

Мурод АБДУЛЛАЕВ

# ТҮМАРИС ОНА

*эссе, бадиа, сұхбат әм мақолалар*

Алишер Навоий номидаги  
Ўзбекистон Миллий кутубхонаси нашриёти  
Тошкент – 2008

63.3(5Ў)

A15

**Абдуллаев, Мурод.**

**Тўмарис она: Эссе, бадиа, суҳбат ва мақолалар. — Т.: Алишер Навоий номидаги Ўзбекистон Миллий кутубхонаси нашриёти, 2008 й. - 264 б.**

**ББК 63.3(5Ў)**

**ББК 83.3(5Ў)6**

**Ўзбекистон Республикасида хизмат кўрсатган журналист Мурод Абдуллаевнинг “Тўмарис она” китобига шу номдаги эссе ҳамда турли йилларда ёзган бадиа, суҳбат ва мақолалари жамланган. Адаб эссе-қиссада кўхна тарихда босқинчи ҳукмдор Кирнинг қадим аждодларимиз — массагетларни бўйсундириб, ўзига тобе этиш ниятидаги қонли юришини, бироқ оқила ва жасур аёл Тўмариснинг мислсиз жасоратидан маглуб бўлиб, ер тишлатанини таъсирчан бадиий лавҳаларда тасвирлайди.**

**Муаллиф бадиа ва мақолаларида шонли тарихимизнинг бугунги ёш авлодга ибрат бўлгали воқеаларидан ҳикоя қилади, она табиатимизни кўз қорачиғидек асрашга даъват этади.**


**ISBN 978-9943-06-108-8**

**№ 114/1735-2008.**

**© Алишер Навоий номидаги Ўзбекистон  
Миллий кутубхонаси нашриёти, 2008 й.**



# **ТАРИХ – БУЮК МУРАББИЙ**



2

## ТҮМАРИС ОНА

Эссе

Милоддан аввалги 530-сана. Кўхна йукуз соҳилидаги баланд тепаликдан сувнинг эшилиб-буралиб, мавжланиб оқишига назар солиб ўтирган Тўмарис онанинг кўнгли ғаш. Массагетлар подшоҳи ўз ажали билан ўлим топиб, унинг ўрнини билдиримай келаётган бева Тўмарисни қабиладошлари подшо этиб кўтардилар. У шунга муносиб улуғ аёл эди. Тўмариснинг бўй-басти етилиб қолган шердай ўғли бор. Замон тинч бўлсаю Сипарангизни ўз танлагани — шаклар гўза-

*Эрамиздан алдинги бешинчи асрда енгилмас подшо деб ном қозонгак Форс давлати ҳукмдори Кир II ни енгган Тўмарис момомизнинг буюк жасорати ҳали-ҳануз жаҳон мактабларининг тарих дарслкларида ўқитилиб келади. Бу жасорат ҳақида ўнлаб асарлар битилган. Бироқ уларнинг аксариятидан кўра Геродот томонидан ёзиг қолдирилган тарихий битиклар биз учун қадрлироқдир. Чунки машҳур тарихчи қадимий қавмларимизнинг яшаш тарзи, мардлиги, жанговар қуромлари, бойликлари ҳақида қимматли маълумотлар бериш билан бирга Помирдан Хазар дengизигача бўлган улкан ҳудуддан оқиб ўтган кўхна йукуз — Амударёнинг шимолидаги бепоён дашту саҳролар, тогу тошларда аксари чорвачилик билан шуғулланган массагет ва шак қабилаларининг аёллари ҳам қиличбоз, мерган ва чавандоз бўлганларини ҳайратланиб ёзган.*

*Аслини олганда, Геродот гувоҳлик берганидек, катта ҳудудларни забт этиб бўлган Кирнинг Марказий Осиёда яшовчи массагетларни бўйсундириш ва улар давлатини ҳам ўзига тобе этиши учун қилган қонли юришида Тўмарисдек оқила ва жасур аёл бош бўлган салтанат пойида мағлуб бўлиб, ер тишлаши асло тасодифий эмасди. Аждодларимизнинг ёвқурлиги, Ватан ҳимояси, Ватан шарафи учун кураш эркагу аёл — ҳамма учун бирдек муқаддас туйғу эканлиги ўзбек фольклори — ҳалқ оғзаки ижодининг энг гўзал саҳифаларини ташкил этади. Тўмарис момомизга хос бўлган буюк жасорат “Алномиш” достонидаги*



лига уйлантирса, қабиладошларини хурсанд этиб тўйу томошалар берса. Туронзамин маликаси кўнгли осойиш топиб, давлат ишларини ҳам аста-секин шу ўғлига топширади.

Бироқ босқинчилар Туронзаминга кўз олайтиргани-олайтирган. Чин тарафдан келган ёвни изига қайтарсанг, жанубу ғарбдан ғаламис тўдалар мўр-малаҳдай бостириб келади. Тинч яшаб ҳаёт завқини суриш, тириклик неъматларидан баҳраманд бўлиш ўрнига эртаю кеч лашкар ғамини ейиш керак. Аслида шаклару массагетлар — туғма жангчилар, ёй отиб, найза санчишда уларнинг олдига тушадиган бошқа бирор қавмнинг топилиши маҳол. Шунга қарамасдан, она-юртни омон сақламоқ учун ҳамиша жанго-

---

*Ойбарчинга ҳам хос эмасми? Эсланг: Барчин кураш тушиб, Кўқаман полвонни йиқади ва яна нечалаб паҳлавонларнинг белини синдиради. Ёй отиб, нишонни бехато уришда, борингки, ҳар қандай ҳолда ҳам ор-номус учун курашда унинг олдига тушадиган мард топилмайди. Тўмарис ва Ойбарчинларга хос ёвқурлик “Алломиши” каби қаҳрамонлик достонларимиздан бўлган “Дода Кўрқут”даги бетимсол образларга ҳам хосдир. Кўрқутнинг қизи акалари сингари полвон ва қиличбоз. Этчилик ва чаққонликда, кураш тушишда улардан асло қолишмайди. Аслида “Алломиши” у “Дода Кўрқут” ва улар сингари ўнлаб қаҳрамонлик достонларимизга ҳам ҳаётда бўлган ва Тўмарис она сингари бемисл қаҳрамонлик кўрсата олган тарихий шахслар, тарихий воқеалар асос бўлган.*

*Публицист Мурод АБДУЛЛАЕВнинг «Тўмарис она» эссе-сida кўжна тарихимизнинг шонли зарварақларидағи ёшларимизга ибрат бўлгули воқеалар ҳикоя қилинади. Муаллиф Тўмарис онамиз ҳақидаги воқеани олиб, бир эссе-қисса яратдики, уни роҳатланиб ўқийсиз. Табиийки, адаб бадиий тўқима усулидан бемалол фойдаланган: ана шунинг учун асар жуда ўқишили чиқкан.*

*Зотан, тарих – буюк мураббий. Ундан сабоқ олмоқ авлодлар учун ҳам шараф, ҳам юксак бурчдир.*

**Шукур ХОЛМИРЗАЕВ,  
Ўзбекистон халқ ёзувчisi**



вар ҳолатда турмоқ, қўшин ёв билан ҳар дақиқа юзмай бўлишга тайёр туриши керак. Бундан ўзга йўл йўқ.

Дарё шиддат билан олға интилади. Оч тўлқинлар қирғоқни ялаб-юлқаб пўртналар ҳосил қиласди. Худди соҳилга сачраб чиққан тўлқиндай йироқдан бир тўп отлик кўринди. Кўп ўтмай улардан ёлғиз отлик ажралиб, жиловни дарё томон бурди. Юз қадамлар нарида маликага кўз-кулоқ бўлиб турган жиловбардор пешвоз чиқиб, у билан гаплашди-да, сўнг Тўмарис ўтирган соҳил томон кела бошлашди.

Тўмариснинг кўнгли недандир безовта бўлиб, улар келиб отдан тушмасиёқ сўради:

— Тинчликми, болаларим?

— Бу Кир силжиди. Ҳазарнинг Устюрт тарафига лашкар ташлабди. Шундан хавотир олиб, сизга хабар бергани келдик.

Тўмарис она ўйланиб қолди: “Кирга нима бор бу ёқларда? Номард қанча мамлакатларни босиб олди. Унинг дастидан Миср, Ироқ, Бобил ҳам омон қолмади. Марғиёнани забт этиб, Сўғдиёнанинг ғарбий қисмини мутаб ётибди. Энди Туронзаминга кўз солибди-да. Ҳаҳ, бошингга қора қун келгур пирсиён... Ё Тангрим, ўзинг мадад бер. Ёв ниятига етмасин. Аждодларим руҳи — бизни кўллагайсизлар!.. Эй улуғ дарё, она Ўқузим! Сенинг пок сувларинг ҳаққи қасам ичаман: агар Кир бизнинг заминни ғорат этмоқчи бўлса, томчи қоним қолгунча курашаман. Сувларингни у мурдорнинг оёғига ҳаром қилдирмайман”.

Тўмарис она фикрини жамлаб, илкис ўрнидан турди-да, уни кузатиб турган жиловбардорига буюрди:

— Сипарангизни чорлангиз!

Сипарангиз боя пўртналар ичра соҳилга сачраб чиққан тўлқиндай бўлиб кўринган отлиқлар орасида экан. Унинг ўзи ҳам “Онам бу хабарни эшишиб, не тадбир қўлларкин?” дея ўйланиб, соҳил томон кўз



солиб турган экан. Жиловбардорнинг ихчам ёйини кўтариб, қўл силкиши биланоқ онаси чорлаётганини фаҳм этиб, отига қамчи босди. Келиб, отдан тушибоқ малика олдида тиз букди. Тўмарис она ҳар қачонгидан ҳам кўра вазмин ва ўқтамлик билан:

— Ўғлим, муддат етди. Энди уйлансанг бўлади, — деди. — Биз шаклар сулуви Заринайга совчи юбормоқчимиз. Ундан кўнглинг тўқми?

Қабиладошларининг асрий удумлари сирини тугал англаб улгурмаган Сипарангиз онаси саволидан бир лаҳза ҳайрон қолиб қолди.

— Тортинма, кўнглингда борини айтавер, болам! — далда берди она.

— Душман йўкуз ортида изғиб юрган пайт кўнгилга тўй сиғармиди, эна? — деди ниҳоят Сипарангиз.

— Ҳа, айни шундай чоғда тўй қиласиз, болам. Кир қурдатимизни кўриб кўйсин. Биз ундан қўрқмаймиз! Бу тўй элдошларинг руҳига ҳам қувват бўлур. Ундан кўра сен ўзингдан гапир. Заринада кўнглинг борми ё йўқми — шуни суйлагин менга!

— Ундей бўлса, мен рози, эна, совчиларни юбораверинг.

— Барака топ, ўғлим. Сен менинг ёлғизим, бахтимсан. Унутма, элингни-да ори бўл, фурури бўл!

\* \* \*

Зум ўтмай қўш тулпор массагетлар қароргоҳи жойлашган Алангқир сари елдай учиб кетди. Қароргоҳ ёнида Тўмарис онани мулозимлари кутиб туришарди. Оқ жигали саропардалар ўраб турган қўрғондай бир ўтов ёнида отдан тушган Тўмарис хос навкарларга буюрди:

— Барча бошнавкарларни чорлангиз. Атроф холи бўлсин.

Бошнавкарлар жам бўлиб йиғилиб келишганида, у массагетлар туғи олдида қасам ичиб, қавмдошла-

рига айтадиган гапларини хаёл кўзгусида жонлантириб турарди: руҳан аёвсиз муҳорабага ҳозирланар, навкарлару суворийларга буюрадиган топширигини кўнглида пишитарди.

Садоқатли навкарлари Онани одатдагидан анча бесаранжом ва жиддий қиёфада кўриб, қандайдир муҳим топшириқ борлигини фаҳм этиб қолишиди. Кўшин бошлиқларига юзланиб, Тўмарис она аста гап бошлади:

— Ўғлонларим! Сизларни яна синов кутаётир. Оғир синов. Юзинг тескари бўлгур Кир Хазардан Туронзамин кенгликларига кўз солаётганмиш. Не-не мамла кату юртларни босиб, кўзи тўймаган Кир энди ўша қонсираган кўзларини биз сари тиккан кўринади. Шай турмоғимиз керак. Она юртнинг бир қаричини ҳам босқинчига раво кўрмаймиз. Ўлсак — ўламизки, юртни горат эттирмаймиз. Сизлар не дейсизлар, фарзандларим?

- Ёвга омонлик йўқ!
- Ёвга омонлик йўқ!
- Ёвга омонлик йўқ!

Бу сўзлар ҳавода ўқ бўлиб учди. Бошнавкарларнинг қатъий сўзларидан саропарда арқонлари зириллаб кетгандай бўлди.

— Кимда не фикр бўлса, айтсин! — мурожаат қилди Тўмарис она яна навкарларига қаратса.

— Аҳдимиз қатъий, Онажон! Ёвга омонлик бермаймиз. Томчи қонимиз қолгунча курашамиз!..

Бу сўзлардан Тўмарис онанинг кўнгли тўлди. Ишонган тоғларига юзланиб, массажетлар удумига хос яна бир ниятини ошкор қилди:

— Энди ўғлим Сипарангиз билан Заринанинг тўйини ҳам кечиктириб ўтирмаймиз. Эртан оқшом куёву келин мурод-мақсадларига етсинглар. Шу боис энг ишонган қўриқчиларимиз Ўкуз бўйларидан жил масин. Токи тўй тугамай туриб ҳеч бир босқинчи биз-

нинг хурсандчилигимизни бузиб кела олмасин.

— Айтганингиз бўлади, энажон, — дейишиди бошнавкарлар. Улар даврасида турган Сипарангизнинг эса кўзлари шодликдан порлади. Бироқ унинг дилига тўй шодлигидан кўра ёв бостириб келаётгани ҳақидаги хабар оғир ботганди: “Энам нега бунчалик шошаяпти? Ахир, Кирни бирёёли қилиб, сўнгра тўй қилсак ярашмасми?” деб уйларди.

Шу тоб яна Тўмарис онанинг мағрур овози жаранглади:

— Энди эса бориб, тўй тадоригини кўринглар. Бўлажак жанг ҳам эсларингдан чиқмасин.

\* \* \*

Тўмарис она туни билан мижжа қоқмади. Уни хаёллар қийнар эди: “Тўй бошлаб хато қилмадимми? Ё жанг оғир бўлишидан қўрқиб, ёлғизим Сипарангиз бир кун бўлса ҳам висол лаззатига тўйсин, шаклар гўзали — ўз Заринасини қучсин, дедимми? Йўқ, қўшин бошлиқларим ичиди у энг ёвқурлардан. Яхши жанг қиласди. Ёвдан асло қўрқмайдиган тулпорим у. Ёв босиб келса, у биринчи бўлиб, душманга ташланади. Номуси кучли, ўзини у ёқ-бу ёққа урмайди. Тўғри душманинг устига бостириб боради. Бироқ унинг тажрибаси кам, ҳали катта урушларни кўрмаган... Майли, эртан бўладиган тўй унинг-да, қавмдошларининг-да қонини гупиртирсин, руҳларини кўтариб, ёвнинг кулини кўкка совуришга тайёр қилиб қўйсин... Эй, Тангрим ўзинг мадад бер. Эй, улуғ аждодларим руҳи, бизни қўллагайсизлар!”

Массагетлар ҳам, шаклар ҳам түфма жангчи эдилар. Улар ўз маконларини, ер-сувларини, уруғ-аймоқларини ёт кўзлардан бутун вужуди билан ҳимоя этардилар. Ўзгаларнинг ер-сувларига эса асло кўз олайтириб бормасдилар. Ёвдан енгилишни нечоғли ор билсалар, бирорлар ерига бостириб боришни ҳам шу қадар

Ўзларига эп кўрмасдилар. Ёлғиз Куёш тангрисига, сўнг эса Тупроқ, Сув ва Оловга сиғинардилар. Қавмлари ватан тутган ота маконларига бирон хавфу хатар доригудек бўлса, саросимага тушмай совутларини кийишар, ёйу найзаларини вазмин кўлга олиб, руҳан бардам бўлиб, жанговар қўшиқларини куйлай бошлардилар. Шу янглиғ Куёш тангрисини ёд этиб, ўтган аждодлари руҳидан мадад олишар, ёвга эса тик боқиб, ўлимдан-да қайтмасдилар. Аксар ҳолда улуғ жанглар олдидан тўю-томошалар қилишар, ўзларининг руҳини кўтаришар, ҳеч вақт эзгин ва руҳи синиқ ҳолда жангта кирмасдилар. Массагет қавмлари болалари, қизларини ёшлиқдан шунга тайёрлаб, эркагу аёл бирдек жангта киришарди. Шаҳид кетганлар учун эса ортиқча мотам тутиб ўтирмасдилар. Ва аксар ҳолда ғалаба уларга ёр бўларди.

Тўмарис она лашкарининг қудрати мана шу удумларда, бу удумларнинг муқаддас қасам янглиғ ҳар бир суворийнинг қон-қонига сингиб кетганида эди.

\* \* \*

Узунқирнинг кунгай томонига юздан ортиқ ўтовлар тикилган. Кўум-кўк кенгликлар бағридаги рангбаранг ўтовлар бамисоли уммон узра сузиб юрган кемачаларга ўхшайди. Уларда ўзгача тараффуд. Бугун шаклар гўзали Зарина билан массагетлар фахри Сипарангизнинг тўйи. Бир йилча аввал — Қизилқум кенгликларига баҳор сеп ёйиб, саксовулзорлар асрий боғлар янглиғ яшнаб кетган кезларда уларнинг бирбирига назари тушган, қалбларида муҳаббат гунчалари очилган эди.

Табиат яшнаб кетадиган айни шу кезда массагет ва шак қабилалари бир-бирларини меҳмонга чорлаб, гўзал зиёфатлар берадилар. Ҳар икки томоннинг оқсоқоллари бир тарафда ўтган-кетгандан гап очиб, гурнгни қизитсалар, ёшлар учқур бедовларини кўпка-



рига солиб, улоқ чопадилар. Уста чавандозлар уларнинг улоқ олишига, ёй отишига, овдаги мерганлигига баҳо берадилар. Бундай мусобақалардан қизлар ҳам ўзини тортмайди. Улар ҳам аввал ўzlари алоҳида, сўнг ёш ўспириналар билан бирга арғумоқларини пойгага қистайдилар.

\* \* \*

Заринанинг мерганлиги, ёйни бехато отиши, бунинг устига пойгада йигитларни ҳам етказмай арғумоқ елдириши кўпларнинг ҳавасини келтирди. Сипарангиз бу ўғлондек ўқтам қизнинг шижаотига қойил бўлиб, юзини яқиндан кўриш орзусида арғумоғини қичаб ҳайдай бошлади. Зарина эса массагетлар қабиласи шунқорига ютқазишни хаёлига ҳам келтирмасди. Ҳар икковининг ҳам орияти кучли. Сипарангиз “етмасам кўймайман” деб қасам ичгандек, тулпорининг ёлига ёпишиб, қизнинг ортидан қуондай елиб борар экан, масофа қисқаргандан қисқараверди.

Зарина ҳам аҳволни тушундию, ортидан бу қадар от суриб келаётган суворийнинг кимлигини билгиси келиб, аста бурилди. Бурилдию бир фурсат ҳангу манг бўлиб қолди. Бироқ яна отига қамчи урди. Қамчи урдию, кўп ўтмай ўз-ўзидан шашти қайтиб, отни қичамасликни истаётганини сезиб қолди. Ахир, ортида елиб келаётган алп аломат йигит экан-да! У Сипарангизнинг довруғини эшитган эса-да, ўзини кўрмаган эди. “Наҳотки, ўша йигит бўлса?!”, деган ўй кечди хаёлидан.

Кенглик тугаб, саксовулзорлар қуюқ ўрмондай бўлиб кетган жойга етишганда, Сипарангиз тўсатдан қизнинг изини йўқотди. У саксовулзор оралаб кетган сўқмоқдан елиб бораркан, анчагача отини тўхтата олмади. Отни ортта бурганида, атрофида осмони фалакка ўрлаб ётган қуюқ саксовуллардан бошқа нарса кўринмади. Ҳар би-



рининг ортида Зарина бекиниб турғандек эди! Бироқ қизнинг қораси кўринмас, аргумогининг шовури ҳам эшитилмасди. Ҳозиргина изма-из келаёттанди, энди етдим деганда кўздан йўқолганини қаранг. У чанқаб сув қидирган жойда саробга йўлиққандек ҳар ёқقا алан-глар эди. Юраги дук-дук уради, кўзларига ишонмайди. “Нима бало бўлди? Ерга кирдими ё осмонга чиқиб кетдими! Ё Тангрим, ўзинг мадад бер!”

У хомуш тортиб саксовулзор четига чиқаёттанди, аргумоги қаттиқ кишина борди. Атрофга аланглаб йигирма қадамлар наридаги бир саксавул панасида Зарина отининг пашша кўриётган думига кўзи тушди. Дарҳол тулпорини никтаб ҳайдади.

Шу чоқ тасодиф рўй берди: майдонга отилиб чиқкан бир оху яна саксовулзорга ўзини урди. Сипарангиз ёйини қўлга олиб, уни нишонга ола бошлаганди, Заринанинг овози эшитилди:

— Отмангиз!

Охунинг кўзларидан ҳам чиройли эди бу овоз. Тағин бу овозда шу чоқ ҳамма нарса мужассам эди. Илтимосу талаб ҳам, гинаю ачиниш, яна аллақандай меҳрлар бор эди. Сипарангизнинг ёй тортган қўли жойида қотиб қолди. Шу пайт дараҳт панасидан чиқкан қиз йигитга гўзал бир табассум ҳадя этди-да, аргумогига қамчи босди. Сипарангиз ўзига келгунча қиз пойга йўлига чиқиб олган эди.

Заринанинг ортидан Сипарангиз ҳам от қўйди. Бироқ қиз бу гал ҳам етказгиси келмагандай аргумогини елдириб борарди. Энди Сипарангиз қизни одамлар кўз ўнгида таъқиб этгиси келмай, жиловни се-кин-секин тортиб қўя бошлади.

Зарина шу боришида ўзини кутиб турган қизлар тўдасига кўшилди. Дугоналар ҳар иккисининг бир-бирига муносиблигини фаҳм этишар, уларни ортиқча хижолатга қўймаслик учун бири қўйиб, бири таҳсин айтарди.

Шундан бери ҳар иккисининг соғинчдан қалблари бир-бирига талпинар, яна висол кунларини қўмса-шар эди. Ниҳоят, шаклар қабиласига совчилар йўлланди ва эркаклар туя жунидан тўқиб тикилган чакмон кийиб, аёллар бошларига оқ рўмол ўраб қайтишиди.

Заринанинг ота-онаси рози, қиз ҳам: “Ота-онам, қабиладошларим рози эрса — мен ҳам розиман”, дебди.

Бугун эса — тўй. Улкан гардишли мис қозонларда кийик ва қўчкор этлари қайнаб ётар, қирғовулу ўрдак, Ўкуздан тутилган неча хил ноёб балиқлардан турфа таомлар пишириларди. Ўтовлар орасидаги кенг ялангликда келин-куёв учун ясатилган мовий саропардали ўтов. Унинг олдида тумонат одам, бола-бақра у ёқдан-бу ёқقا ўтишиб, узоқ-яқиндан меҳмон кутишмоқда. Аллақачон етиб келган меҳмонларга эса баковуллар хизмат қилиб туришибди. Ҳали замон келин ҳам келиб қолади. Ўтов-қўргон олдидағи кенг саҳнга катта гулхан ёқиши учун ермойига пишиб олинган гўлагалар, қуруқ саксовул шох-шаббалари ҳозирлаб қўйилган.

Олисдан қийқириқлар эшитилиб, келинни олиб келгани кетган куёв жўралар қайтаётгани хабари етиши билан ўтов атрофига алоҳида тайёргарлик бошланниб кетди. Ён атрофдаги ўтовлар олдида ясан-тусан қилиб турган қиз-жувонлару хизматкорлар, меҳмонлар гулхан ёқиладиган жойга йиғила бошлашди. Куёв жўралар келиб жойлашиши билан ёр-ёрларни баланд овозда куйлаб келаётган аёллар овози эшитилди. Ўтадаги тўрт-беш аёлнинг қўлларида доира, уларнинг така-тумига ёш-яланглар ўйин тушиб келишарди. Орқадаги икки-уч безатиқли араваларда келиннинг сеплари; дугоналари, қабиладош аёллару кайвони момолар. Заринанинг ўзи эса тоғасининг учкур тул-



порига минганишб олган. Шаклар удумига кўра, келинни энг яқин қариндоши отта мингазиб күёвнинг уйига бошлаб боради.

Ана мовий ўтов-қўрғон олдидаги ялангликда гулхан ҳам ловуллай бошлади. Киз-жувонлар, аёллар ва овози дўриллаб қолган ўсмир йигитчалар қийқиришиб, қўшиқ бошлашди:

*Сув келади мўридан,  
Ёр-ёр, ёрон-ей!  
Мўридан ҳам наридан,  
Ёр-ёр, ёрон-ей!  
Акагинанг айлансанн,  
Ёр-ёр, ёрон-ей!  
Сочларингни торидан.  
Ёр-ёр, ёрон-ей!*

*Кўёш чиқди фалакка,  
Ёр-ёр, ёрон-ей!  
Олов тушар юракка,  
Ёр-ёр, ёрон-ей!  
Акагинанг уйланди,  
Ёр-ёр, ёрон-ей!  
Чиройли келинчакка.  
Ёр-ёр, ёрон-ей!*

*Оққушнинг тўши қордай,  
Ёр-ёр, ёрон-ей!  
Олма-анори бордай,  
Ёр-ёр, ёрон-ей!  
Ой кеча, ойдин кеча,  
Ёр-ёр, ёрон-ей!  
Ўғил берсин қўчкордай.  
Ёр-ёр, ёрон-ей!  
Ёр-ёр, ёрон-ей!*

Келиннинг олдига тушиб келаётган қиз-жувонлару момоларнинг лапари уларнидан ҳам ошиб тушарди...

Ниҳоят гулхан олдига келин мингашиб олган тулпор келиб тухташи билан ҳамма бир зум тин олиб қолди. Маросимнинг энг гўзал дақиқалари етиб келганди. Куёвларнинг башанг либосларига бурканган алпқомат Сипарангиз онаси ва қариндошлари томон эгилиб таъзим қилди-да, Зарина мингаштан тулпор ёнига ўқтам қадам ташлаб борди. Аввал Заринанинг қўлларини ушлади, бу унинг — “Яхши етиб келдингми, ёрим! Энди измингни менга бер” дегани, миннатдорлиги эди. Сўнг келинни худди гўдак бола сингари от устидан адл кўтариб олиб, ёниб турган гулхан атрофидан уч марта айлантирди. Шодон қий-қириқлар, ёр-ёрлар, доиранинг така-тум садолари остида куёв ўз Заринасини шоҳи пардалар билан зийнатланган утовига олиб кириб кетди.

Гулхан атрофида эса ўсмир йигитлар, қиз-жувонлар ҳамда қизиқчи навкарларнинг ўйин-кулгулари ярим тунга қадар давом этди. Ўтовлар олдидаги очик майдонларда келин-куёв шаънига тилаклару кутловлар айтилар, зиёфат қизигандан қизир эди...

Эртанисига турли ёқлардан келган меҳмонлар манзилларига жўнаб кетишаётган маҳал, “келин салом” бошланди. Зарина энг аввал қабила маликаси, массагетлару шаклар макон туттган Туронзамин ҳукмдори Тўмарис онага уч бора эгилиб салом берди.

— Бошинг тошдан бўлсин, она қизим. Сен энди ҳам келиним, ҳам қизимсан. Ҳам... — шу чоғ унинг овози титраб кетди, — ҳам навкаримсан! Аждодларимиз маконини кўз қорачўғидек асрарувчи нажоткорларимиздан бирисан. Боболаримиз руҳи сенга ёр бўлсин, — деди ва олтин тақинчоғу зийнатларга кўшиб олтин сопли ханжар, сопи узун, уч қисми калта ўқли ёй ҳам ҳадя этди. Бу ҳам массагетлар удуми

эди: илло эркагу аёл Ватани ёвдан бирдек ҳимоя қилишга бурчли саналарди.

\* \* \*

... Тўй ўттанига ҳам мана бир ойча бўлди. Тўмарис она яна Ўкуз бўйида оғир хаёлларга ботиб ўтириби. Кир қўшилари дарёнинг у бетига уззукун хуфияларини юбориб, кечувга мос жой ахтармоқда. Демак, саваш бўлиши муқаррар...

Ҳукмдорнинг нафрати ошгандан ошиб, хаёли талбир ўйлаш билан банд. Душманни маҳв этмоқ учун қай усулни қўлламоқ керак? У билан қайси жойда жанг қилган маъқул: очиқ яланглиқдами ёки тоғлар орасидаги қулай манзилларда? Қандай қилса, душман у хоҳлаган жойда юзма-юз бўлади? Қандай қилса ёвни енгиб, кулини кўкка совуриш мумкин? Ўйланган сайин ўйининг адогига етолмас, кўраётган тадбирлари Кирнинг мўр-малаҳдай бостириб келадиган лашкари олдида унчалик пухта кўринмас эди.

Шу тобда унинг душмандан устун келадиган биргина жиҳати бор эди: у ҳам бўлса, Тўмарис она лашкарлари ўз киндик қони томган Туронзамин учун, уни ёв қўлига омонсиз бермаслик учун томчи қони қолгунча курашади. Душманнинг заиф томони эса—унинг босқинчилигига эди. У ўзгалар заминига эгалик қилиб, элини банди қилиш, бойликларини талаш, хуллас, туронзамиликларни ўзига тобе этиш учун келаётган эди.

— Тангрим! — деди Тўмарис она ўтирган жойидан илкис кўтариларкан. — Ўзинг мадад бер! Аждодларим руҳи бизни қўллангизлар. Ёвуз Кир билан томчи қонимиз қолгунча курашамиз! Ё Ҳаёт — ё Ўлим!

Тўмарис она жиловдори туттан аргумоғини шахдила миниб, қуюндай елиб кетди.

Ярим тунда Тўмарис она туш кўриб уйғониб кетди. Осмонга бокди: юлдузлар чараклаган сутдай ой-



дин кеча. Ё тавба, улар бу қадар яқин келиб қолган? Ҳар бири улкан сояга, гүё ўтган аждодлари руҳига айланиб қолгандай, нимадир демоқчидай. Тўмарис онанинг бутун вужудини титроқ чўлғаб, ўзида қандайдир ўзгариш сезди. Тағин: кўрган тушини нақ тепасига осилиб тушгудай бўлиб турган юлдузлар ҳам тасдиқлаётгандай эди. Шунда хаёлидан бир ўй ўтди: “Аждодларим руҳи қўллаяпти. Аждодларим руҳи йўл кўрсатяпти. Ё, тавба, тушимда кўрганим — баланд тоғлар куршаган манзил юлдузларга боққаним сайин улар орасидан ҳам кўзимга чалингандай бўлди-я! Ё Тангirim! Бу қандай синоат бўлди? Улар айнан бир хилдек. Қаер бўлдийкин бу манзил? Ё тавба, мен нимани кўраяпман? Демак, қаер бўлмасин у манзил — Кир шу жойда ер тишлайди”.

Тўмарис она чодирига бурилаётib, ўғли Сипарангиз ва Зариналарнинг хос хонаси томон бир нигоҳ ташлаб олди-да, ичкари кириб кетди. Шу тобда ундан баҳтиёр она, ундан баҳтиёр ҳукмдор йўқдай эди... У узоқ вақт кўрган туши таъсирида уй суриб ётди. Кўзига кўринган ўша тоғ дараси Туронзамииннинг қайси бурчи эканлигини ўйларди, албатта. Ва яна ўша тушни кўргиси, ўша манзараларни эсида сақлаб қолгиси келарди.

Бироқ ҳар қанча уринмасин кўзи илинмади-ю, бир пайт илкис ўрнидан туриб кетди. “Э, бу жой — ўша жой-ку! — деди Тўмарис она ўзига ўзи. — Ё тавба. Ҳув қайси йили раҳматли эрим билан Кўхитангдан ошиб ўтиб, Бойсуну Шеробод томонларга борганда бир кеча тунаб ўтган дарамиз эмасми? Ҳа, худди ўзгинаси. Ўшанда массагетлар ҳукмдори тоғ манзараларини кўрсатиб, уларнинг тарихидан сўз очган, не-не босқинчилар шу жойда ер тишлаган, деб айтмабмиди?! Бу жойнинг хосияти бор. Ҳар гал ёв билан сўқишишганда, бу жойда туронзамиинликлар ғалаба қозонишган. Аждодлар руҳи бу юртнинг асл



фарзандларини ҳамиша қўллаган, демаганими?! Номини нима ҳам деганди-я. Чак-чакми, Темир дарами, нима эди?”

Тўмарис онанинг хаёли янада равшан тортди. Ўз-үзидан фикри бир тўхтамга келди: эрта тонгда энг ишончли навкарларидан ўша жойга йўллайди. Чопқир отлар билан йўлга тушилса — икки кунлик йўл. Қайтиш учун ҳам шунча вақт кетади. Аммо буни зинҳор дарё ортидан кун ора хуфияларини йўллаётган Кир билмаслиги шарт...

Тонг бўзариб келарди. Ҳали Сипарангиз уйкуда. Она уни безовта қилгиси келмади. Хуфиялар сардорини маҳрами орқали чорлаттириди. Сўнг унга ортиқча бирон нарса демасдан кичикроқ бир тўп билан ўша ёқقا жўнатди: шикорга чиққандек бўлиб борадилару, манзилни обдон ўрганиб пистирмабоп жойларни ҳам белгилаб келадилар.

\* \* \*

Эртаси куни Кирнинг элчилари Тўмарис она қароргоҳига келиб қўнди-ку! Ҳокима ички бир туйғу билан уларнинг мақсадларини ҳис қилиб турарди. Шу боис сир бой бермади. Улар олиб келган совфа-саломлардан қанчалар ҳазар қилмасин — олди, кейин элчилар нечук қадам ранжида қилганинни сўради: савдо-сотиқ йўриғидами?

Улар эса бири қўйиб-иккинчиси унинг — Туронзамин маликасининг гўзаллигию тенгсиз бойлиги, оқилалигию тадбиркорлиги, тағин маликаларга хос улуғворлигию меҳмондўстлигини тарьифу тавсиф қилишга тушиб кетдилар. Ниҳоят, малика “мақсад”ни эслатганда, улар бир оғиздан: “Сиз бизнинг шаҳаншоҳимиз — етти иқлим ҳукмдорига муносибсиз. Подишоҳи олам Сизни ўз никоҳига сўраттилар”, дейишиди.

Тўмарис она бош эгиг қолди: “Ху, илоннинг

ёғини ялаган, қонхўр, маккор, ибليس! Сенга мен эмас, менинг Ватаним, элим керак. Туранзаминнинг бойликларию беҳисоб қуллар керак сенга! Сен шуларга ошиқсан. Шуларни “никоҳ”ингга олмоқчи-сан, малъун!” Тўмарис онанинг кўнглидан шу ўйлар кечаркан, кураш оғир бўлишини янада жиддийроқ фаҳм этиб, янада вазмин бўлиши зарурлигини ич-ичидан туди.

Бундан ташқари, вақтдан ҳам ютиш керак! Сипоҳларнинг Чак-чак дарасидан қайтиб келишини кутиш керак! Шу боис ичини ҳарчанд ғазаб алансаси куйдирмасин, ўзини босиб сиполик билан шундай деди:

— Шаҳаншоҳга маҳрам бўлиш — ҳар қандай ма-лика учун — шон-шарафдир. Аммо мен ўзга юртнинг маликалигини қабул этолмайман. Чунки ўз юртимнинг ҳукмдориман. Шу менга кифоя қилади. Кирга сўзларимни бориб айтингиз.

Сўнгра урфга кўра, уларнинг совға-саломлари қатори тухфалар — бирнеча тулпор отлар ва эгар-жабдуқлар бериб, қароргоҳидан кузатиб кўйди.

Аммо улар изидан хуфиялар жўнатишни ҳам унутмаган эди.

\* \* \*

Тўмарис она жуда тадбир билан иш тутган экан: қайтиб келган хуфияларидан билдики, элчилар Тумбўйин кечуви туқайзорларига кириб кўздан ғойиб бўлишибди. Малика Кир қўшинларининг дарёдан мешларни опичлаб ўтишларини яхши биларди. Бироқ олам жаҳон қўшиннинг оғир қурол-аслаҳалари билан тез сузиб ўтолмаслигини ҳам биларди. Пироварди, улар қайиқлари бўлса — қайиқларини бир-бирига улаб, ўшалар устидан ўтишлари учун ҳам камида икки ҳафта вақт кетади.

Тўмарис она яна кўҳна Ўкуз қирғоғида. Бу гал

ҳам она дарё билан, Сув Тангриси ила сўзлашгани чиққан.

“О, она Ўкузим, ўзинг бизга мададкор бўл, ўзинг бизни қўллагин. Ёв кўриниш бергани он тўлқинларинг ўйнасин, пўртаналар қайнасинки, ғанимлар табаррук сувингта кира олмасинлар. Магар кирсалар, гирдобраринг бағрида гарқ бўлсин. Токи, она Турон-заминимизга уларнинг нопок қадамлари етмагай!”

Дарё эса сокин эди.

Она Тўмарис тағин илтижо қила бошлагач, ундан бир садо — балки Тангридан ваҳий келди:

— О, Тўмарис! Кир бугун дарёдан ўтмагани билан эрта ё индин барибир ўтади. Қанча қурбон берса ҳам, қанча жангчилари Ўкуз тўлқинларига ем бўлса ҳам, у ёвуз дарёдан ўтмай кўймайди. Демак, ақлинингга суюн, тадбирингни кўр! Асосий лашкаринг тушингда аён бўлган — Чак-чак дарасига етиб бориб, жойлашиб олишсин! Ана ўшанда кўрамиз Кирнинг ҳолини. Ё саҳро ичида сувсиз қолиб қум денгизига гарқ бўлади ёки дара ичида массагетларнинг ўқларидан кунпаякун бўлади”.

Тўмарис она ўрнидан иргиб туриб, отининг жиловини Кирқулоч дараси сари бурди. Дарё бўйига эса энг ишончли, сергак қўриқчиларини, ёв қўшинининг юрар йўлидан огоҳ этиб тургувчи хуфияларини қолдирди. Сипарангиз бошлиқ энг сараланган лашкар унинг атрофини қўриқлаб борарди.

Йўл олис. Сал фурсат юрар-юрмас ортдан чопарлар етиб келиб, Кир сипоҳлари мешларга осилиб дарёдан ўтиш тадоригини кўраётганини хабар қилишди. Она Тўмарис оти жиловини ўша ёққа буриб, Туямўйин бурнидан дарё торайиб ўтадиган жойдаги баланд тепаликка чиқди. Кўрди-ишонди ва яна дара томонга от кўйди. Номарднинг номардлигига монанд иш тутиб, шу жойнинг ўзида Ўкуз тўлқинларига гарқ қилиш анча қулай эди. Бироқ, номардга



қарши номардларча иш тутиш марднинг иши эмас.

Аслида-ку қадим-қадимдан массагету шаклар, кўхна Хоразм қабилалари душман билан очиқ майдонларда жанг қилишини маъқул кўришар ва кўпинча зафар уларга ёр бўлар эди. Чунки уларнинг отлари ўзғир, ёй ўқлари душманнинг қўли етмайдиган жойлардан етиб келарди.

Бу дафъа дараада уришишга тўғри келади. На чора? Тангрилар хоҳиши ҳам шу бўлди.

\* \* \*

Қизилқум барханлари, саксовулзорлар ортда қолиб, Навтаканинг теп-текис даштлари бошлангач, бир фурсат отларга ҳордиқ бердилар. Энди йўл яланг сайхонлик ва қир-адирлар ёналаб кетарди. Нонушта пайти олдинда юргувчи қоровул ва хуфиялар кутилмаган хабар келтирдилар: Туямўйин түқайзорларига кириб “кўздан ғойиб бўлган” элчилар нақ рўпарадан чиқиб келишаётган эмиш. Улар ортида юз чоқли сипоҳлар ҳам бор эмиш. Буни эшитиб, Тўмарис онанинг юраги шув этди. “Бу пирсиён ўлгурлар биздан олдин Кўҳитанг томонларга ўтиб олишган экан-да! Демак, улар авваллари ҳам бу жойларга хуфияларини юбориб туришган. Эҳтимол, биз борар манзилларни ҳам обдон билишар?..” Шунда Сипарангиз ўз илфорлари билан орқага қайтиб, уларни янчиб ташлашга онасидан изн сўради. Она шошмасдан иш тутишни маслаҳат берди: “Майли, биз ҳозир Балхоёқ йўлидан Чак-чак сари кетамиз. Сен йўлдаги кўхна қалъалардан бирида тўхтаб, душманни кузат. Улар бизнинг орқамиздан тушадими ё Кирнинг асосий лашкарига қўшиладими — шуни билиб, бизга хабар беринглар... — Она ўғлига розилик беришга берди-ю, бироқ ичини бир шубҳа кемира бошлади. Сипарангиз — ўт-олов, душманга қўрқмай ташлана олади. Бироқ унинг ҳали жангларда кўзи пишмаган — ёвнинг ҳий-



лаларию найрангларини вақтида фаҳмламай қолиши мумкин. Бунинг устига кечагина ўйланган бола... Бироқ уни шаштидан ҳам қайтариб бўлмасди. Қолган жангчилар Тўмарис она ўз ўғлини аяди, деб ўйлаши мумкин эди. Шу боис яна Сипарангизга юзланиб, деди: — Кирнинг асосий лашкари бизнинг ортимиздан юрмоқчи бўлса, Чак-чаккача уларга индама. Драга киргач, биз манглайидан, сизлар эса орқасидан зарба берасизлар...”

— Уқдим, энажон!

\* \* \*

Душман лашкари дарёдан ўтди-ю, аммо Тўмарис қўшини изидан тушмади. Балки Туямўйиндан то Бадайтўқайгача бўлган дарёнинг қамишу туронги босган қайирларида жойлашиб олиб, ниманидир кута бошлади. Ниҳоят, Сипарангиз илфорлари билан Қизилкум саксавулзорлари ва Нахшаб тўқайлари атрофида айланиб юраркан, буларни кўриб яна дарё ортига қайтиб кетаётган каби ҳаракат қилдилар. Бироқ йўлларида оз-оз сонли аксари яроқсиз сипоҳларни қолдириб, базми-жамшид дастурхон тайёрлатиб кеттилар. Дастурхонларда хумлар тўла ўткир мусалласлар ва мўл-кўл таомлар бор эди.

Табиий, бу пишиқ ўйланган ҳийла эдикни, Күхитанг тарафдан келаётган бўлиб, юз кўрсатган элчилару юз чоқли сипоҳлар ҳам ана шу макру хийланинг бир учи эди...

\* \* \*

Бу вақтда Занжирсарой атрофларида айланиб, зарур келса душман билан юзма-юз савашишга тайёр юрган Сипарангиз қўшинлари ҳам, Кўхитангдан ошиб ўтиб, Чак-чак дарасига ҳали бориб етмаган Тўмарис она ҳам, табиийки, ёвнинг бу тадбиридан бехабар эди. Кир ўз режасини амалга оширишга ажратган



Қўшини Пойкент теваракларида пайдо бўлиб, Сипарангиз сипоҳларини таъқиб этиб бораётганларини англаттилар. Сипарангиз дарҳол тулпори жиловини ортга буриб, душман галаларига юзма-юз бўлди. Ўқёй отиб, ёвнинг қалқонсиз қисмини қулаттагч, найзаю қийшиқ қиличларни ишга согланда душман тумтарақай бўлиб қоча бошлади. Пойкентгача бўлган йўлларда Сипарангиз сипоҳлари уларнинг қанчадан-қанчасини ер типлатди ва қолган-кутганини қўноғигача суриб борди-да, у ердаги сипоҳлар билан бирга ҳаммасини қириб ташлади. Кейин ғалаба нашидасини сурмоқ учун шоҳона дастурхонлар атрофидан жой олишди...

\* \* \*

Чўллар, қир-адирлар оралаб ўттан йўллардан юриб, баланд тоғ дарасига этиб келган она Тўмарис дара бошидаги қўналғада нафас ростлаб ўтиаркан, бу манзилда мустаҳкам жойлашиб олган лашкарбошилари унга пешвоз чиқиб келишди. Тоғнинг муздай салқин ҳавоси ҳарқанча танин яйратмасин, онанинг кўнгли ғаш эди. Бутун фикри-зикри Сипарангизда: ахир, душман тулкидай айёр... Сипарангиз бўлса катта жангларни кўрмагани устига содда ва танти баҳодир... Она тун бўйи мижжа қоқмай улардан мужда кутди. Тонг-ла самога боқиб, Қуёш тангрисига ёлворди.

Она кўнгли бекорга ғаш бўлмаган экан. Чопар ноҳуш хабар келтирди: Сипарангиз душман қўйган тузоққа тушибди. Сипарангиз душманнинг барча лашкарини қийратиб бўлдим, деб хаёл қилган бўлиши керак. Шунинг учун “Кирга буюрган ғалаба нашидаси менга буюрган экан”, деб етти ухлаб тушида ҳам кўрмаган ноз-неъматлар тўла дастурхонга эга чиқиб...

\* \* \*

Кир Сипарангизнинг кўлига кишан уриб, мастраласт сипоҳларини қиличдан ўтказди. Сўнг эчилари ни яна Тўмарис ҳузурига отлантириди.

— Энди совчи бўлиб борасизлар! — деди. — Аввал кўнмаган бўлса, энди кўнади. Ўғлиниң жони кўзига ширин кўринмасин-чи!..

\* \* \*

Кўҳитангдан от кўйиб келаётган катта лашкар бошидаги Тўмарис она олдидан яна оқ байроқ кўтарган элчилар чиқиб қолдилар. Уларниңг эндиги нияти ҳам Тўмарис онага дарҳол аён бўлди. Улар аввалги гапларини яна тўтиларча қайтариб бўлишгач, шартни кўндаланг кўйдилар: “Шаҳаншоҳнинг таклифига кўнмасангиз Сипарангиздан ҳам айриласиз...” “Ё, фалак, — деб юборди Тўмарис она — бундай кўргилик ҳам бормиди?!?”

Хийлакор Кир нишонга бехато урган эди. Унинг нишони она юраги эди. Она юраги эса... икки ўт орасида тутаб ёнарди: “Ҳей, номард! Мақсадинг Туронзаминни бўйин эгдириш экан, очиқ майдонга чиқа қолмайсанми? Йўқ, сен кўркоқ ва номардсан! Шунинг учун ҳам макр йўлини танлабсан. Майли... энди мен ҳам сенинг йўлингни тутаман. Қуёш тангрим менга мадад беради”.

Тўмарис она Кирниң шартига кўнганини элчиларга билдириди. Шартга кўра Кирниң лашкарлари дарёдан ўтиб келиши ва тўй тантанаси бўлиб турган кезда Сипарангиз кўлидаги кишан ечилиб, ўз элига қайтарилиши керак эди.

Она тонгла лашкар бошлиқларини йўқлатти.

— Болаларим, душманнинг шартига кўнганимиз — бу асло енгилганимиз эмас. Турон лашкари енгилмасдир. Сизлар ўйламангларки, Кир оёғи остида қолдик деб. Йўқ, мен ҳаёт эканман, сизлардай ёвқур



лашкарбошию лашкарларим бор экан, асло бундай бўлмагай. Ҳеч кимга сир бермасдан, хушёрликни йўқотмасдан тургайсизлар. Илк имконият туғилиши билан мен сизларни улуф жангта чорлагайман! У баттолнинг шарти Сипарангизнинг жони эвазига мени хотинликка олиш экан. Биз бунга ҳозирча “хўп”, дедик. Сипарангизнинг ёшлик қилиб, у баттол тузогига тушгани асло эсларингдан чиқмасин, токи бу хотони зинҳор такрорламагайсизлар!

\* \* \*

Кир лашкарлари Ўқуздан ўтиб. Қорадўнг қирликларига мўр-малаҳдай ўрлаб келди. Қирликнинг қоқ белида Тўмарис она лашкарлари қароргоҳ тикиб, Кир одамларини кутиб турарди. Ниҳоят, кунгай томонда массажетлар лашкари, қибла тарафида эронийлар лашкари жойлашиб бўлгач, келишилган тўй маросими бошланиши керак. Унинг аввалида — асиридаги Сипарангиз қароргоҳга келтирилиб кишандан озод этилиши ва у ўз қавмига — массажетлар лашкарига топширилиши, сўнг одатдаги жанг либосини маликаларга хос зеб-зийнатларга алмаштирган Тўмарис она Кир қароргоҳига ўтиши лозим эди.

Қорадўнгнинг қоқ белида ҳали қўл ва оёқларидағи кишан зулфлари ечилмаган Сипарангиз онасини бундай шоҳона кийимларда кўриб эс-хушини йўқотаёзди. Она эса вазмин ва хотиржам эди. Шу чоғ унинг қўл ва оёқларини бўшатишиди. Бироқ юришга мажоли етмай, ўртада серрайиб қолди. Ортига ўтирилган эди, туяларга ортиб олинган шароб тўла кўзаларга кўзи тушди-ю, вужудини бир ўт куйдириб ўтди. У ички бир ҳис билан ногоҳ англаб етдики, онаси ўғлининг жони деб, Кирнинг шартига кўнибди. Ҳа, акс ҳолда Тўмарис она босқинчи ёвга ёр бўлиши мумкинми эди? Ахир, Кирнинг никоҳига кириши, алҳазар Туронзаминни — буюк массажетлар ватанини қўш



кўллаб топшириш, демак... Демак, она Тўмарис Сипарангизни леб элу юртга хиёнат йўлини тутибди.

Йўқ, бундан кўра... Йўқ-йўқ, бундай хаёлга келишнинг ўзиёқ шу хаёл кечган калладан жудо бўлишини тақозо этади.

Демак, Сипарангиз ўлимга тайёр: Ватан озодлигини сақлаб қолмоқ керак! Халқ қул бўлмасин!

— Энажон, эна! —деб бақириб юборди бирдан, — Нечук бундай ясан-тусан қилганингни тушундим! Нечун шароб тўла мешлар туширилаётгани сабабини ҳам тушундим! Нечун ҳаёт-мамот жанги тўй-томошога айлананаётгани сабабини ҳам билдим.

Битта менинг учун! Битта массагет омон қолиши учун... Бу — таърифга сифлас хоинликдир! Наҳот шу йўлни танладинг, энажон?! Шундай пайтда сен мардлик қилсанг, не бўлғай, эй, мардлар маликаси! Мардона Тўмарис?! Мен бу тариқа — бунчалар улуғ қурбонликлар эвазига озод бўлишдан кўра, дарҳол ўлишни афзал биламан, она Тўмарис!

Менинг ўлимим сени шармандаликтан ҳам халос этади!

Ватаним, элим — Туроним озодлик ва эрк оғушида қолади!

Тоабад!

Алвидо, Туронюрт!

Алвидо Қуёш Тангрим! Алвидо, Ўкуз дарё! Еру Само, алвидо!

У шундай дея, боя уни кишандан озод этган душман сипоҳининг ёнига югуриб бора солиб, қўлидаги ҳанжарини тортиб олди ва зарб билан унинг кўксига, сўнг... ўз юрагига урди.

\* \* \*

Ҳаммаёқ тўс-тўпалон бўлиб кетди. Массагетлар кўлларига дуч келган қурол билан душманга ташлашиди. Жайронқир ва Откудуқ ўрларида Тўмарис она



ишорасини кутиб ётган лашкар ҳам сурон солиб, тұрт тарафдан Кир күшинини ўраб олди. Құзалар ҳам синди. Шаробу мусалласлар душман тұдаларининг қонига құшилиб оқа бошлади.

Тұмарис она ўғли тепасида күз ёш түкар ва гүянда-халфалар каби айтиб бўзлар эди:

— Ҳай, содда болам-а, мард болам-а! Онангни яхши билмас эдингми, қўзим?! Ахир, сен-ку сен — ёлғизим, қирқ фарзанддан воз кечсам кечардимки, Ватандан айри тушмас эдим. Ўз тупроғимда ўзим чўри бўлмас эдим. Ҳар қанақа Кирга ўшаганларга юртнинг бир қаричинираво кўрмасдим...

О, болам-а, содда болам, мард болам! Онам “мени деб Туронга хиёнат қилди”, дея фарёд чекдинг-а?! Йўқ, сени деб Кирнинг макрига макр-хийла ишлатган эдим. Ана, лашкарбошилардан сўра: тўй бошланди, деб ногоралар чалиниши замон жанг бошланиши керак эди... Ана, жанг кетаётир! Бизнинг кўлимиз баланд келаётир. Чунки, биласан, бизникилар очиқ майдонларда мардларча курашиб ғолиб келганлар ҳамиша! Бизнинг камонлар ўқи ёв ўқидан икки баробар олисга бориб тушади. Ёв кўксини тешади!

Аммо бу муқаддас кураш — сен учун интиқом олишга ҳам айланиб кетади! Бизнинг тулпорлар ҳар қандай душманинг аргумоқларидан ҳам ўзиб кетади. Биз енгилмас элмиз!

Ҳай, болам-а, жувонмарг кетган болам!

Начора? Қисматинг шу экан. Бироқ сен туфайли душман майдонга чиқди! Бу — омад бўлди биз учун. Сенгина буни билмайсан, холос.

Начора, жигарим!

Энди, мен ҳам жангта кирай! Ана қизларимиз ҳам от кўйиб келишяпти!..

Фалаба яқин!

\* \* \*



Манглайдан зарба берувчи асосий қўшин ҳалқа ҳосил қилиб — душман лашкарини ўртага олиб кирап экан, орқадан зарба беришга тайин этилган Зарина бошлиқ сипоҳлар ўрама ёйнинг иккинчи ҳалқасини бирлашириб, бирорта душман сипоҳининг орадан қочиб чиқишига имкон бермасди.

\* \* \*

Оғир жанг борарди Қорадўнг қирликларида.

Кирнинг барча режалари чиппакка чиқа бошлади. Жангнинг бундай тус олишини шоҳлар шоҳи кутмаган эди. Унинг ўрдаси лашкарнинг ўртарофидা, шу боис у ҳамма жанг манзарасини кўриб турарди.

Бойсун яқинидаги Темир дарада, Кўҳитангнинг кўз илғамас ғорларию кичик дараларида жанг тадоригини кўриб ўтирган массагетлар лашкарнинг олди етиб келиши билан эса душманга сичқоннинг ини минг танга бўлиб қолди.

Ниҳоят, душман сипоҳларидан соғ қолганлари дуч келган тарафга тум-тарақай бўлиб қоча бошлашди. Бироқ Қирққулочнинг қайрилма ўнгирлари ортида дубулғалар билан ҳимояланган, ўқ-ёйу найза-қилич билан куролланган кексалару ўсмиirlар ҳам уларнинг йўлини тўсиб чиқа бошладилар. Улар орасида бўлган Кирнинг ўзи ҳам қамалда қолди.

Бу улуғ бир жанг эди. Босқинчини ер тишлатиш қасосида ёнган, Ватанинг ҳар қарич тупроғини, аждодлар шаънини азиз билган массагетлар учун ҳаёт-мамот жанги эди. Тақдир уларга кулиб боқди. Тўмарис онанинг тушида аён бўлган воқеа Темир дара бошидаги Чак-чак водийсида эмас, унинг йўлидаги очиқ қирлар устида ниҳоя топгани энди ҳаммага аён эди. Ўрликлару жарликларни душман ўликлари босиб кетди. Массагетлар қадим анъанага амал қилиб, шаҳид кетган биродарлари жасадини ерлашар экан, Тўмарис она сўради:



- Кир ҳам ўлдими?  
— Ўлди!  
— Эса олиб келинглар у нокаснинг бошини! — амр этди Тўмарис она.

\* \* \*

Унинг бошини ўз қўли билан кесишни кечадан буён юрагига жойлаб юрган Зарина Кир ер билан яксоң бўлган яланглик сари от елдириб кетди. Қирққулочнинг кунгай тарафидаги ўтлоқда Кир ер билан битта бўлиб ётарди. Зарина учкур сипоҳий аёллар билан кела солиб, отдан тушди-да, унинг бошини қиличи билан шарт кесиб олди. Не-не элларни қон қустирган ёвуз калла Заринанинг хуржунида қонига беланиб ётар, Сипарангизнинг жасур беваси Тўмарис она сари еларди. Тўмарис она Кирнинг хунук калласига узоқ термулиб турди. Сўнг Кир Ўкуздан осилиб ўтган мешлардан бирини душман қонига тўлдириб келишни буюрди.

Қорадўнг ўтлоқларида душман сипоҳлари қонига беланиб ётарди. Тўмарис она амрини адо этишиб, мешни қонга тўлғазиб келтирдилар. Массагетлар маликаси хуржунда ётган Кир бошини олиб мешга тиқди-да, оғзини чилвир билан боғлаб бўлиб деди:

— Сени бу ёвуз ниятингдан қайтармоққа кўп уриндим. Омон-эсон ўз юргингта қайтиб кет, бизнида тинч қўйгин, дедим. Кўнмадинг! Киндик қонимиз томган муқаддас тупрогимизни, аждодларимиз руҳи кезиб юрган Туронзаминимизни, эл-улусимизни форат этмоқчи бўлдинг. Якка-ёлғиз ўғлим Сипарангизни ҳийла билан кўлга туширдинг. Ва мени ундан, яна не-не жасур йигитларимдан жудо қилдинг. Сен қанча элларни қон қақшатиб, қонга тўймаган экансан, мана энди қонга тўясан!

\* \* \*



Массагетлар шаҳид кетган сипоҳларини ўша ердаги тепа-тепа жойларга ерлаб, аста-секин ўз қароргоҳлариға қайта бошладилар. Лашкар энди Хузор ва Нахшаб бўйлари орқали Қизилқум кенгликлари сари йўл тутди. Қароргоҳга етиб келиши билан қадим отабоболар удумига кура, дастлаб етти кун мотам тутдилар. Сўнг қирқ кун ёвуз душман устидан қозонилган зафар нишонланди. Қуёш тангрисига шукроналик рамзи сифатида қурбонликлар берилди. Дош қозонлар тўлиб қўйу қўчкор, кийигу сайғоқ, ўрдагу қирғовул этлари қайнади. Ҳумлардаги шаробу шарбатлар очилди. Қиётнинг тилёрас қовунлари, Зарафшоннинг маска узумлари тўлиб-тошган дастурхонларни Бойсуну Варганзадан олиб келинган олманиорлар безади. Шимол тарафдаги қадим-қадимдан дўст-биродар бўлиб келаётган шак қабилалари ҳам совға-саломлар билан келиб, массагет оға-инилари ни қутладилар.

\* \* \*

Зафар нашидалари давом этаётган қунларнинг бирида Тўмарис она тонг саҳарда она Ўкуз бўйига борди. Арғумоғини жиловдорида қолдириб, сувлари тиниклашган, ўзи ҳам вазмин тортиб қолган дарёйи азимнинг ўша баланд соҳилига чиқиб келди. Куз кезлари она Ўкуз шундай вазмин бўлиб оқарди. Бироқ бор қудрати, улуғлиги шиддатли тўлқинлари бағрида. Шу дарё янглиғ Тўмарис онанинг ҳам бугун кувончу ғамлари — изтироблари юрагининг тубида залворланиб ётарди.

Тўмарис-она она-Ўкузга арзи ҳол қилди. Кўзлари теграсида ёш айланиб, улуғ наҳри азимга минннатдорлик изҳор этди ва ўғли Сипарангизни ёд олиб, она дарё Тангрисидан неларнидир илтижо қилди.



\* \* \*

Орадан ойлар ўтиб, Заринанинг кўзи ёриди. У ўғил кўрган эди. Унга Куёш Тангри ҳурматига Спантаман\*, деб ном кўйдилар.

Тўмарис она оламдан ўтгач, унинг ўрнини Зарина эгаллади.



---

\* Спантаман — Куёш Тангриси пайғамбари Зардуштнинг бошқа бир номи. Бу ўринда яна салқам иккиси аср ўтиб, Искандар Мақдуний босқинчиларига қарши курашган ҳалқ қаҳрамони Спитамен назарда тутилаётганни йўқ.



## ГАГАУЗЛАР — КЎКЎФУЗЛАР

### *Пурқонӣ шажара*

Илгари кўпчилигимиз дунёда шундай халқ борлигини дурустроқ билмасдик. Келиб-келиб яна кимларни денг? Буюк туркий улуснинг асл шажараларидан бўлмиш икки юз минг нуфуздан кўпроқ қадимий халқни. Оға-ини халқларнинг ўзлигини танишидан оловдан қўрққандек қўрқиб, уларнинг бирбирлари билан яқинлашишидан ичи куйиб келган шўроларнинг ёвуз империяси бизнинг орамизда хотой девори ўрнаттан эди.

**ТАРИХИЙ МАЪЛУМОТ:** «Гагаузлар — туркий халқ, асосан собиқ иттифоқ ҳудудида (157 минг, 1970), Молдованинг жанубий районларида, Украинанинг Одесса ва Запорожье вилоятларида, қисман Қозоғистон (Сирдарё бўйлари) ва Ўзбекистонда (Тошкент вил. Қибрай ва бошқа туманларда) ва Болгарияда (10 минг, 1963) яшайди. Турк тилларининг ўгуз группасига кирадиган гагауз тилида гаплашади. Болгар ва рус тиллари гагауз тилига кучли таъсир кўрсатган. Диндор гагаузлар христиан динининг православие мазҳабига эътиқод қиласди. Собиқ иттифоқ ҳудудида яшайдиган гагаузларнинг ота-боболари XVIII — аср охири XIX-чи аср бошларида (рус-турк уруши даврида) Болгариядан кўчиб келиб, Россияда (асосан Бессарабияда) ўрнашиб қолган. XIX-аср охирларида Ўрга Осиёга ҳам кўчиб келган. Гагаузлар хўжалик юритиш, турмуш маъданияти жиҳатидан болгарларга жуда ўхшаб кетади. Гагаузларнинг анъанавий хўжалиги чорвачилик (кўйчилик XIX-аср ўрталари гача етакчи ўринда турган), дехқончилик, боғдорчи-



лик. Революциягача маҳаллий ҳунармандлар орасида гилам тўқиши, жун ва шойи газлами тайёрлаш кенг ёйилган эди».

1972 йили нашр этилган Ўзбек қомусининг З-жилдидага гагаузларнинг асл тарихи, бу халқнинг Булғорияга қай юртдан ва қандай бориб қолгани тўғрисида лом-мим дейилмаган. «Узун карвон» биринчи гагауз романи муаллифи, таникли олим ва адаб Дионис Танасўглиниң тарихий очеркида ёзилишича, гагаузлар ўзларининг бобокалонлари бўлмиш ўгузлар орқали икки минг йилдан ортиқ тарихга эга бўлган халқдир. У шундай деб ёzádi: «... Ўгузларнинг аждодлари қадим даврлардан то VI асрнинг ўрталарига қадар Олтой тоги этакларида яшаб келишган. Турк ҳоқонлигининг вужудга келиши билан улар Farb томон силжиб, Ўрта Осиёга, Сирдарё ва Орол денизи атрофидаги чўлларга келиб жойлашадилар. VIII асрдан XI асрнинг бошларига қадар бу ерда Ўгуз давлати хукмронлик қилган. Сўнг у инқирозга юз тутиб, учга бўлинди. Унинг исломни қабул қилмаган бир қисми ўзларини «ҳақ ўгуз»лар («асл ўгузлар») деб атаб, жанубий рус чўлларига кўчиб борадилар ва у ердан 1064 йилнинг кузидаги Дунай дарёсини кечиб ўтиб, Болқонда макон тутиб қоладилар. Гагаузлар XIX асрнинг бошларида яна Дунайдан ортларига қайтиб ўтиб, Бужоқ чўлларига келиб жойлашадилар».

1990 йили Молдова жанубида яшовчи гагаузлар ўз миллий хукуқларини ҳимоя қилаётганлиги, Комрат деган шаҳарда ур-сурлар бўлиб ўтиб, Гагауз Республикаси тузилганини эшитдик. Бироқ уни Молдова парламенти тан олмаганини билсак-да, у ерда ке чаётган жараёнларнинг асл моҳияти, гагаузларнинг ҳақиқий талабларидан бехабар эдик.

1991 йилдаги «Август фитнаси»дан аввал, аниқроғи 14 август куни Молдовага йўл олаётib, кўнглимнинг бир четида ташвиш ҳам йўқ эмасди: шўролар



нинг марказий матбуоти кунора ёзиб турганидек, Молдова нотинч бўлса, миллий ихтилофлар тугамаган кезда бу сафар менга татирмикан? Айни чоғда туркий улуснинг бизга шу чоқҷача яхши маълум бўлмаган яна бир шажараси ҳаёти билан танишишга иштиёқ ҳам кучли эди. Бунинг устига шу халқнинг тилида чиқаётган «Она сўзи» («Ана созу») газетаси ўзининг уч йиллиги муносабати билан йигин чақириб, барча туркий халқлардан меҳмон чорлаган.

\* \* \*

Кишинёв аэропортининг шаҳарга чиқиш йўлагида «Она сўзи»ни боши узра баланд кўтарган йигит мезбонларга хос тақалуф ила кулиб турар эди. Танишдик: шу газетанинг бош муҳаррири, шоир ва адаб Тодор Занет экан. Йўлда у Туркиядан ношир Ирфонбей Насриддинбек ўғли ташриф буюргани, яна шоир Алибей Тонгюлдуз ва унинг рафиқаси Севимхонимлар келаётгани, Озарбайжондан, Кримдан ва бошқа туркий жумҳуриятлардан меҳмон кутаётганини айтди. Газета кунлари учун харажатларни унинг муассиси — Молдова ҳукумати ўз зиммасига олибди. «Кодры» меҳмонхонасида Туркиядан ва Озарбайжондан келган дўстлар билан танишдик.

Тушдан сўнг Матбуот уйига бораётиб «тарихий воқеа»нинг гувоҳи бўлдик. Шаҳарнинг бош майдонида салобат тўкиб турган «буюк пролетариат доҳийси»нинг таг-томири билан кўпориб ташланган ҳайкалидан бир уюм бетон синиқлари ва темир-терсаклар қолибди, холос. Экскаватор шошилмасдан ҳайкалнинг қолган-қутганини машинага ортар, атрофдан ўтган-кетганлар эса бунга бепарво эди... Умуман, бу ердаги ихтилофлар хусусида Москва матбуоти кўнглимиизга солган ғулғула ҳам, ўша чоғлар биз кунора дуч келаётган одатдаги васвасаларнинг бири экан.

Гагаузлар билан молдованларнинг инокликлари-



ни кўриб «Ё, фалак!» дедим. Ҳақиқий нотинчлик 19 августда бошланди. Бироқ бу миллатлар ўртасидаги низо эмас, фитна хуружи — тоталитаризм билан эрк ва озодлик, миллий ҳаракат ўртасидаги ҳаёт-мамот кураши эди. Бу тўқнашувни Молдовада истиқомат қилувчи халқлар бир тан, бир вужудга айланиб қутиб олганлиги ҳамон кўз ўнгимда турибди. Унинг ўзи бир тарих — сабоқ бўларли тарих. Ўша кунлари Кишинёвдаги мана шу бош майдон турли миллат вакилларига тўлиб-тошли. Улар ўша «бронза даҳо»нинг раҳнамолигисиз оёққа қалқиб, бутун Молдованинг дахлсизлиги, миллий давлатчилиги ва мустақиллинини асраб қолди...

\* \* \*

«Она сўзи» кунлари чинакам байрам, халқ сайлига айланиб кетди. 15 август куни газета муҳарририяти жойлашган матбуот уйида тантанали учрашув бўлди. Унга Молдова жамоатчилиги намояндалари, матбуот ходимлари йигиллилар. Тодор Занет учрашувни очаётиб, меҳмонлар ва мезбонларни таништирди. Узоқ-яқиндан келган телеграммалар орасидан биринчи бўлиб Ўзбекистон Ёзувчилар уюшмасининг табригини ўқиб берди. Сўнгра гагауз халқининг миллий ҳаракати, кураш йўллари, бу борада «Она сўзи» зиммасига тушаётган масъулият хусусида сўзлади. «Сизларни газетамиз кунлари муносабати билан чорлашдан мақсад бутун туркий оламни Молдова ва Гагауз ерларида кечаётган жараёнлар билан яқиндан таништирмоқ, ҳақиқий аҳволни ўз кўзингиз билан кўриб, холис хulosага келишингизга имкон яратмоқдир. Бизнинг эрк йўлидаги интилишларимиз, асл мақсадларимиз хусусида найрангбозликка асосланган шўролар марказий матбуоти бутун жаҳонга сафсата тарқатётган бир шароитда бу ниҳоятда зарурдир», — деди.

Насриддин Ирфонбей гагаузларнинг ўз миллий маданиятини тирилтириш ҳаракатига тушгани барча

туркийлар учун қувончли ҳол эканини қайта-қайта эътироф этди. Туркияда напр этилган гагауз туркча-си сўзлиги ва гагауз фолклори китобларини тухфа этиб, бир-биримиздан бехабар, ажралган ҳолда яшасак, фақат бизни кўролмайдиганларнинг тегирмонига сув қуямиз, деди. Молдова Ёзувчилар уюшмаси раиси Михай Чимпой гагауз шоир ва ёзувчилари, олимлари ижодида миллий уйғониш янги поғонага кўтарилигани, уюшманинг «Литература ша арта» ҳафталигида илк бор ташкил этилган гагауз саҳифаси «Она сўзи»нинг дунёга келишида муҳим қадам бўлганини айтди.

«Она сўзи»ни Озарбойжонда ҳам севиб ўқишаркан. Икки йилча аввал у ерда бу газетанинг эллик мингдан ортиқ обуначиси бўлган. Унинг Бокудаги жамоатчи муҳбири, туркий халқлар адабий алоқалари бўйича тадқиқот олиб бораётган ёш олима Гуллу Гулмамедова умумтуркий газета яратиш зарурлиги, бунда лотин ёзуви қўл келиши мумкинлиги ҳақида сўзлади. Учрашувда ҳамма ўз она тилида эмин-эркин гапириб, тушунмаганларга таржима қилиб турилганини учун мен ҳам шу имкониятдан фойдаландим. Туркий халқларни муштарак мақсадлар йўлида бирлаштириш, ҳамкорлик алоқаларини кучайтиш ўзбек адилларининг фаол ҳаракатига айланганини айтдим. «Ўзбекистон адабиёти ва санъати» таҳририятининг кутловлари, ўзбек шоир ва ёзувчилари, олимларининг янги асарлари билан бирга «Чўлпон» нашриёти чиқарган «Темурнома» китобини ҳам «Она сўзи» жамоасига топширдим. Бу учрашувдагина эмас, умуман барча жойда Ўзбекистонга алоҳида эътибор беришлари, бу заминни «ота юртимиз», деб алоҳида ифтихор билан тилга олишлари, бизда кечаётган жараёнларга катта қизиқиши билан қараашларининг гувоҳи бўлдим. Симферополда чиқадиган «Дўстлик» газетаси бош муҳаррири Шавкат Рамазонов крим ва



гагауз халқларининг қадим алоқалари, ўтган асрнинг 30-йилларида биргина қрим тилида ўн олтига газета чиқиб, у гагаузларга ҳам тарқалгани хусусида сўзлади. Озарбойжонлик сайёҳ Алишер Аҳмадзода эса «Биз икки юз миллионлик турк халқлари бир-бирларимиз билан ўзга тилда эмас, худди бугунгидек барча жойда ўз тилимизда танишайлик. Тил, дил, маслак, мақсад бирлигини истаюрам», деб ҳамманинг олқишига сазовор бўлди.

«Она сўзи» эндиликда мустақил ҳафталиқ бўлиш билан бирга, 1991 йилдан бошлаб ҳар уч ойда бир марта болалар учун маҳсус журнал ҳам чиқармоқда, у «Қирланғач» («Қалдирғоч») деб аталади. Журналист ходимлар етишмаслиги сабабли 21 киши ўрнига атиги беш киши ишлаётган таҳририят учун ҳам газета, ҳам болалар журнали чиқариш осон эмас. Бироқ барча гагауз адиллари унга фаол кўмак бера бошлабди. 80-йилларнинг ўрталаридан бошланган миллий уйғониш ҳаракати боис туғилган зўр иштиёқ Тодор Занет, Сўна Адеева сингари ўз халқининг фидойи журналистларига қанот бағишишамоқда.

Таниқли шоир ва олим Дионис Танасўғли биринчи гагауз газетаси асли 1910 йили кирилл ёзувида чиқкан, 50-йилларда нашр этилган газета эса бу нашрлар ичida энг зўри эди, деди. Сўнгти йилларда бу анъана яна тикланибди. Бироқ янги шароитда, миллий уйғониш заминида вужудга келган «Она сўзи» ўз мустақил адабиёти, ёзма матбуоти бўлишини неча ўн йиллар оша орзу қилиб келган гагауз халқи ҳаёти ва адабиётининг ойнаси бўлмоқда. Таниқли гагауз шоири ва Молдова маориф вазири ўринбосари Николай Бобоўғли, Молдова давлат миллатлар департаменти раҳбарлари, Фанлар академиясининг гагауз бўлими олимлари, гагаузча бадиий адабиётлар чоп этувчи ноширлар бу жараённинг муаммолари ҳақида ҳам сўзладилар. Хусусан, бошқа туркий қавмларгина



эмас, ҳатто гагаузларнинг аксарияти ўз тарихини яхши билмас экан. Гагауз тили ва гагауз халқи тарихи дарслекларини яратиш ва уларни нашр этиш мурдайян қийинчиликлар билан боғлиқ. Бу дарслекларни кирилл имлосида чиқариш керакми ёки кўпчилик гагауз зиёлилари ёқлаб чиқаётган лотин ёзувидали? Насриддин Ирфонбей имло масаласи ҳал бўлса, бу борада турк дўстлар ёрдам беражагини билдириди...

\* \* \*

**ТАРИХИЙ МАЪЛУМОТ:** «XV аср турк тарихчиси Али Язижиўғли араб олимни Ибн Бибининг «Рум салжуклари тарихи» асарига асосланиб битган «Ўгузнома» (ёки «Салжукнома») китобида Болқонда ўғуз (ҳақўғуз) давлати бўлганлигидан гувоҳлик беради. Болгар олими Г.Д. Баласчев ва поляк олими П. Витак ҳам 1953 йили нашр этилган «Гагаузлар — Кайковус одамлари» деган асарида буни кўрсатиб ўтадилар... Демак, гагаузлар ҳамқавм, қон-қариндош қабила-ларнинг тили ва этник жиҳатдан яқинлиги, қадимги кўчманчи элатларга хос муштарак маданияти, умумий туркона қиёфаси, яшаш тарзи, дини ва бошқа жиҳатлар асосида умумий ҳудудда халқ сифатида шакланганлар. Бу жараён Болқондаги ўзига хос шартшароитлар, бинобарин, ўзга тилли кучли давлатлар курсовида экани ва уларнинг доимо таҳдид солиб туриши боис анча тез кечган бўлиши ҳам мумкин. Шу асосда айтиш мумкинки, усмонли турклар келгунига қадар гагаузлар халқ сифатида шаклланиб бўлган, бу ерда болгарлар ва византияларлардан насроний динини қабул қилиб, тўлиқ ўтроқ ҳаёт тарзига ўтган, ўз хўжалиги ва маданиятини йўлга қўйган эди».

Бу маданият ва хўжалик манзаралари бугун ҳам батамом унутилиб кетган эмас. Гагаузларнинг турмуш тарзида кўйчиликдан тортиб гиламдўзликкача,



үй қуришдан тортиб тўй-томушаларгача бўлган ўтмиш маънавий асотирлари сақланиб қолган. Виночилик эса санъат даражасига кўтарилиган. Бунга Комрад ва Конгазда бўлганимизда ишонч ҳосил қилдик. Гагауз йигити Дионис Киса раҳбарлик қилаётган Кишинёв яқинидаги машҳур виночилик комбинати бутун дунё билан алоқа боғлаган.

Меҳмонларни ана шу жойга таклиф этишди. Сафимизга Туркиядан бироз кечикиб келган шоир Алибей Тонгюлдуз ва унинг рафиқаси Севимхонимлар, таниқли молдаван шоири, ёзувчилар уюшмаси раиси Михай Чимпой ҳам қўшилишди. Май тайёрлаш жараёнлари билан танишгач, ажойиб узумзорлар ўртасида фор шаклида қурилган еости омборларига тушдик. Мўтадил ҳарорат яратилган, йигирма-йигирма беш йилик майлар шишаларда тахланиб ётибди. Куйи қаватларга тушганингиз сайин ҳайратингиз ошади. Горнинг энг тўрида худди «Минг бир кеча» афсоналаридагидек оппоқ нурга чўмилган қаср намоён бўлди. Ички бир шуур билан англадикки, юз киши bemalol мулоқот кура оладиган бу кошона шўролик ҳукмронлик қилган яқин ўтмишда олий раҳбарларнинг меҳмон кутадиган жойи бўлган. Айтишларича, ҳатто Гагариндек зот ҳам шу ерга келиб, «бурнидан булоқ бўлиб отилгунча» майхўрлик қилган экан...

Минг йил бурунги еости форларига ўхшашиб кинчи бир кошонага кирдик. Шамчироқлар нимқоронги ёритган шу жойда бир фурсат ҳордиқ чиқаришга таклиф этишди. Ўрта аср манзараларини эслатувчи узун тахта столга билтур қадаҳлар, енгил, яхна егуликлар, мева-чевалар дид билан қўйилган. Гўзал қизлар Молдованинг бир-биридан тотли майларини олиб келиб туришибди. Каберне, Трифешти, эҳе, қай бирини айтасиз... сув ости кемаларида ойлаб ишловчилар шу виноларни хуш кўришаркан. Чунки бу майлар одам аъзойи баданидаги радиактив моддаларни

ютиб, қонни ёвуз нурлардан тозаларкан...

Дионис Киса қадаҳлар тўлдирилишидан олдин майларнинг номи ва неча йил сақланганини айтиб, «марҳамат қилинг», дер эди. Майлар ниҳоятда хуштаъм. Молдовада, гагауз районларидағи ҳар бир хўжаликда май заводи бор, ҳар бир ҳовлида узумдан бочка-бочка кўлбола май тайёрланади. Улар дуб идишлирида исталганча сақланади. Зиёфатларда, тўй-ҳашамларда бу майлардан нўш этганларнинг ҳеч вақт кайфи ошиб қолмайди. Афсуски, бизда узумзор майдонлар, узумларнинг турфа навлари ҳам кўп бўлишига қарамай, бундай олийсифат май тайёрлашни ҳали у қадар йўлга қўёлган эмасмиз. Шунинг учун ҳам тўйларимиз ароқсиз ўтмайди. Ичаётган ароқларимизнинг таркиби ёлғиз худога аён. Нега биз беҳисоб узумзорларимиз бўла туриб, хўжаликларда, хонадонларда, ота-боболаримизнинг эндиликда унугтилган асрий анъаналарини тикламаймиз, машҳур мусалласларимиз билан довруқ қозонмаймиз. Ўрусия босқинчилиги билан юқсан «юқсак маданият» — ароқхўрликдан миллатни, авлодларни кутқарувчи нажот шу эмасми?! Шундай қылсак, халқимизнинг ароқа кетадиган пули чўнтағида қолади, хўжаликлар бундай виноларни сотиб катта даромад ҳам олган бўлур эдилар. Энг муҳими, ароқхўрлик балосидан миллатимиз, наслимизни омон сақлаб қолган бўлур эдик.

Бир-биридан хуштаъм майларни тотиб, хаёлимдан шу ўйлар кечди. Дионис Танасўғли мұъжазгина скрипкасини кўлга олганда нимқоронғи фор қўйнига ҳазин садолар тарапиди. Нимаси биландир ўзимизнинг шарқона оҳангларга эш бўлиб кетадиган бу наволар халқ сифатида ўзлигини тамом йўқотиш ёқасига келиб қолган ва бароғоҳ буни англаб етган одамларнинг мунгли ноласига ўхшарди. Шу куни туркий за бонда шеърлар, қўшиқлар янгради, дил сўзлари айтилди. Гўё олис диёrlарнинг дард ва армонлари бир-



лашгандай, шу бирлашув қанотида ўзлигини қайта топгандай бўлди. Айниқса, Севимхонимнинг ишқ оташига йўғрилган дилбар кўшиқлари кўнгилларга таскин бўлди.

Тарихшунос, бастакор, шоир ва носир, кирилл ёзувига асосланган гагауз имлосини яратувчилардан бири бўлган Дионис Танасўғлини гагаузларнинг Ҳамзасига ўҳшатдим. У ҳам ўтган аср бошларида Ҳамза рўёбга чиқаргани сингари маърифий зиёпарварлик ишлари билан элда танилган. Унинг тўрткулари (гагаузлар сўзни — лоф, қўшиқни эса — тўртку, деб атар эканлар), куйлари беҳисоб. Сози «Йифлаган кўзларга нур тушгани каби» шўх оҳангларга эш бўлганида эса ҳамма ўйинга тушиб кетар, гагауз зиёлиари, адилари шодон қўшиқларига жўр бўлиб куйлашар эди. Ҳамон қулоқларим остида уларнинг «Оҳ, Мари қиз» қўшиғи, опа-сингил Дукаллар бошлиқ фолклор дастаси ижросидаги гагауз халқ қўшиқлари, шоира Сўнахонимнинг айнан ўзбекчадек янграган «Истасанг долғали бир денгиз ўлайин» мисралари садоланиб турибди.

\* \* \*

**ТАРИХИЙ МАЪЛУМОТ:** «Гагаузларнинг турк-ўғуз тарихи халқ ижодида, биринчи навбатда, унинг оғзаки ижод намуналарида ўз ифодасини топган. Халқ шеърияти ва насрининг энг қадимги намуналарида қадимги ўғуз ва турк фолклори элементлари, кўпчиликка маълум гагауз афсоналари, шунингдек, барча туркий халқларда мавжуд бўлган «Ўғузнома», «Гўрўғли» сингари тарихий ва қаҳрамонлик эпослари, «Ошиқ Фарид» каби лироэпик достонлар ва бошқа асарлар парчалар ҳолида учрайди...»

\* \* \*

16 август тонгида Молдова жанубига, Тодор Занетнинг тили билан айтганда, Гагаузистонга қараб кетдик. Йўл ниҳоятда гўзал эди. Молдова нукул қирлигу ёнбағирликлардан, уларни қоплаб ётган пастбаланд ўрмонзорлар, узумзору мевазорлар, кўм-кўк ўтлоқлар, маржон кўллардан ташкил топган шундай бир маъвоки, унга асло қиёс йўқ. Гарчи, бизнинг Ўзбекистонимизда унадиган неъматларнинг кўп хили бу ерда ҳам ўсишига қарамай, Бессарабия ўзга бир олам эди. Унинг мана шу гўзал ўрмонлари, ойнакўллари, узумзор боғлари билан биргаликда дашт деб аталиши кишига бироз эриш туюлади.

Бешолмада жойлашган Гагауз халқ тарихи ва этнография музейи ҳужжатларининг гувоҳлик беришича, 200 йил бурун бу жойлар чиндан ҳам дашт — оддий ўтлоқлардан иборат ялант қирликлар экан. Қора денизнинг гарбий соҳиллари бўйлаб 100-150 км. кенглиқка чўзилган ва Днестрдан Дунайгача бўлган оралиқни ишғол этган Бужоқ чўли (ҳозир дениз соҳилининг 40 км. кенгликтаги қисми Одесса вилояти ерлари ҳисобланиб, Молдова, шу жумладан, гагауз ерлари ҳам буюк дениздан ажралиб қолган. Одесса вилоятининг ана шу ҳудудида ҳам гагаузлар, булғорларнинг қишлоқлари тўп-тўп бўлиб жойлашган, улар буюк баҳри муҳитдан баҳраманд.) Украина, Крим ва Жануби-гарбий Оврупо ўртасидаги ўзига хос даҳлиз бўлган ва ундан кўпинча бир-бирига уруш эълон қилиб борган қўшинлар, лашкарлар, ёвуз босқинчилар муттасил қатнаб турган, ҳарбий истеҳкомлар барпо этган ва бу манзил кўп ҳолларда уруш майдонига, қирғин ўчогига айланиб қолган. Шу боис бу ерлар денизга яқин гўзал иқлимли жойлар бўлишига қарамай, ҳеч ким яшамаган, босқинчиларнинг талончиликларидан ҳадиксираб ҳеч нарса экишмаган ҳам. Атрофдаги битта-ярим ер-жой эгалари эса

қўшинларнинг доимий зўравонлиги туфайли бири икки бўлмасдан хонавайрон бўлиб қолаверган.

Икки аср бурунги турк-булғор уруши йилларида Дунай ортидаги саккиз-тўққиз аср яшаган жойларини ташлаб, кимсасиз Бужоқ чўлларига келиб ватан тутган гагаузлар бу ерни обод қилдилар, боғларга буркадилар. Қирликларнинг тепасидаги 150-200 йиллик паст-баланд ўрмонзорлар бу халқнинг ана шу файрат-шижоатини кўрсатиб турибди. Буни қарангки, бу ерда ҳам уларнинг омадлари юришмади: 1912 йили Бессарабия Россияята қўшиб олинди. Деярли икки минг йиллик тарихи давомида ўзлигини саклаб келган халқ сўнгти саксон йил ичида асл қиёфасини тамом йўқотар даражага юз тутган эди.

Қизил империя уларни ватанда беватан, тилсиз забонсиз ва миллатсиз жамоага айланиш ёқасига келтириб қўйган эди. Биз бирон жойда, ҳатто энг чекка қишлоқларда ҳам гагауз тилида таълим ва тарбия берувчи на мактаб, на боғчани кўрмадик. Конгаз деган қишлоқда замонавий услубда қурилган энг муҳташам болалар боғчасини кўришга таклиф қилишди. Унда тарбияланувчилар ва тарбиячиларнинг 99 фоизи гагауз бўлишига қарамай, тарбия фақат рус тилида олиб бориларкан. Боғча мудираси ҳам худди бир пайтлар бизнинг Ўзбекистонимизда бўлгани каби келишган ва бақувват рус аёли. «Нега болаларга ўз она тилида тарбия берилмайди?» — десак, у совуқ-қонлик билан «Ота-оналари шуни хоҳлашади», деб жавоб берди. Жавобнинг ҳам ҳамма жойда бир хиллигини қаранг! Қизил империя сувини ичиб келган раҳбарларнинг бу «қалтис муаммо»га муносабати ҳам бир хил: «Энди, ошналар, бу ёғига ишларинг бўлмасин, аста-секин ўзимиз ҳал этамиз». Бундай ҳимоядан дадилланган мудира бизга еб қўйгудек бўлиб боқаётган бўлса-да, яна тилга кириб сайрай кетди: «Айтмадимми, сизларга — раҳбарлар нима деса шу!» Бироқ



гагауз зиёлилари ҳам бўш келмадилар: «Биз ўз ушоқларимизни (болаларимизни) рус инкубаториясидан кутқаришимиз керак!» Бу нидо «Она сўзи» газетаси кунлари барча учрашув ва йигинларда қайта-қайта тилга олинди ва ҳар сафар йигилган халойик — боғча мудираси айтмоқчи, ўз болаларининг рус тилида тарбияланишини «хоҳловчи» ота-оналар томонидан узоқ қарсаклар, кўздан ёш чиқарар даражадаги олқишлар билан кутиб олинди.

80-йилларнинг иккинчи ярми ва тўқсонинчى йиллар бошида юз берган жараёнлар барча халқлар қатори бу жафокаш халқнинг ҳам кўзини очди, ўзлигини танитди. Мактаб ва боғчаларни миллийлаштириш ҳаракати ниш олди. Ўзини Гагауз республикаси, деб эълон қилган жумхуриятнинг давлат тили ҳам ўшанда рус тили экан... Чодирлунгада гагауз халқининг ойдинчиси ва адабий тилининг асосчиси Михаил Чакирнинг ҳайкал-бюстига гулчамбар қўйдик. У дастлаб диний китобларни кирилл ёзувида гагаузчага ўтирган, сўнг гагаузлар тарихини лотин имлосида ёзив чиққан, илк гагауз — молдован луғатини яратган тарихчи ва маърифатпарвар сиймо бўлган.

Тарих бу жафокаш халқни кўп синовларга дучор этгани ўтмишдан маълум. Улар Олтойдан Туронзамин ва ундан Болқону Бессарабия кенгликларигача бориб, кўп қийинчиликлар, урушлар даврида йўқотишлиарни бошидан кечирган бўлса, кечиргандир. Бироқ асло очлик азобидан қирилмаган экан. 1946-1949 йилларда эса бор галласи тортиб олиниб, бу кам сонли бечора халқнинг ярми очликдан қирилиб кетибди. Биз Чодирлунгада очлик қурбонлари ёдгорлик мозорига гулчамбар қўяётиб, қизил империянинг қора кўланкасини қалбимизда ҳис этиб турдик. Ана шу мозорнинг яқинида яна бир ёдгорлик пойига эгилдик. У Бужоқ даштларидан олисда — Афғонистонда ўлим топган гагауз йигитлари қабри эди. Улар жафо-

каш халқнинг сўнгти қурбонлари бўлиб қолсин. Зотан, қизил салтанат малайлари айни ўша кунлари ҳали ёвуз ниятларидан қайтганлари йўқ эди. Улар халқларни бир-бирига қарши қайраб, ўртада жанжал чиқариб, қўлдан кетган ҳокими мутлақликни тиклаш йўлида не-не ғаламисликларни ният қилиб турганлари кунора фош бўлиб қоларди. Мустақиллик зълон қилиб, ҳуррият байроғини кўтарган кичкинагина Молдова республикасида Днепрбўйи ва Гагауз республикалари «ташкил қилингани» ва уларнинг гоҳ зимдан, гоҳ ошкора қўллаб келинаётгани бунинг ёрқин далилидир.

Гагаузлар ўз миљий худудида мухтор жумхурият ташкил этса яши эмасми — бу уларнинг асрий орзузи-ку, деб ўйлашимиз мумкин. Бироқ гагауз зиёлилари, оддий меҳнаткашлар, халқ намояндалари билан учрашувлар чоғида шунга амин бўлдимки, улар масалага теран ёндошиб, алдовларга, гиж-гижлашларга учмаслигимиз керак, бу қўғирчоқ республикалар Молдованинг шўролар иттифоқидан чиқиб кетишига қарши қўйилган сиёсий ўйин, биз гагаузларнинг мухторияти масалаларини Молдова ҳукумати ва халқи билан келишган ҳолда парламент йўли билан ҳал этаверамиз, фақат Москва «нонингни тuya қилиб бераман» деб, бу йўлда бизга ҳалақит бермаса, орамизга нифоқ солмаса бўлгани! — дейишарди.

Афсуски, гагауз зиёлилари тушуниб турган бу ҳақиқатни ўшанда гагауз районлари раҳбарлик қилаётган амалпарастлар тушунишини хоҳламагандилар. Москва уларнинг эрк йўлидаги ҳали унчалик пишиб етилмаган интилишларидан усталик билан фойдаланишга зўр бериб уриниб, «пичноқнинг сопини ўзидан чиқариб» бу ҳаракатни мустамлакачиликни абадий сақлаш мақсадидаги сиёсий ўйинларга бошқариб юбораётган эди. Гагауз зиёлиларининг ўшандаги энг жиддий ташвишлари ҳам шунда эди. Улар ўз рес-

публикаларининг Москва қўлида кўғирчоқ бўлишини асло хоҳламайдилар. Шунинг учун ҳалқни раҳбарият билан ихтилофга бормай муросада бўлишга, миллий ҳаракатни Молдавада кечётган жараёнлар билан боғлаб олиб боришга даъват этдилар...

Гагаузистоннинг кўп жойларида сувсиз ётган бетон каналлар ва «Дунайводстрой» деган ёзувларга кўзимиз тушди. Маълум бўлишича, Молдованинг, Гагауз ерларининг лалми дехқончилигидан қаноатланмаган тўралар бу жойларда сугорма дехқончиликни йўлга кўйиш, худди бизнинг Ўзбекистонимизда бўлгани сингари ерни ва ерлик ҳалқни аямай ишлатиш режаларини тузиб, Дунайдан сув олиб келмоқчи бўлибдилар. Юзлаб километрлик улкан каналлар куришибди. Сув очилгач, энг унумдор ерлар шўрлаб, издан чиқа бошлабди. Чунки дарёларни дуч келган ёққа буриб юбориш машқини олган сув хўжалиги шоввозлари канал битгунга қадар ҳам Дунай дарёси суви таркибини ўрганиб кўрмаган эканлар. Ҳозир каналлар куриб, хориждан келтирилган ноёб техника ускуналари дуч келган жойда сочилиб ётибди. Улар шўролар очкўзлигига қўйилган «ҳайкал»га ўхшайди...

Гагаузистоннинг лалми дехқончиликка асосланган сўлим боғлари ҳозир ҳам мўл ҳосил бермоқда. Хориждан келаётган автокарвонларнинг кети узилмайди. Харидорлар шу ернинг ўзига келиб мева-чеваларни шартлашиб олиб кетишмоқда... Узумзорлар, шафтолизорларда бўлиб гагауз дехқонлари билан гурунглашдик. Шафтолихўрлик қилдик, уларнинг таъми юртимиз мевалариникидан қолишмайди. Боғонларнинг даромади ҳам чакки эмас.

**ТАРИХИЙ МАЪЛУМОТ:** «Гагауз ҳалқ оғзаки ижоди, қадимий санъати асосан шарқ анъаналарига уйғун бўлиб, у Болқон ва Бессарабияга хос хусусиятлар билан ҳам бойиган. Таниқли туркшунос профессор Н.А.Баскаков рус тилининг этимологик луғатида



«гагауз» номи «гёк» (кўк, осмон) ва «уз» (ўғузларнинг номи)дан келиб чиққан, деган тахминни илгари суради ва «гагауз» номининг келиб чиқишига доир яна бир этимологияни ҳам кўрсатади. Яъни, «гагауз» сўзи «ҳақўғуз» (асл ўғуз) дан келиб чиққан бўлиши мумкин, дейди. «Ҳақўғуз» вакт ўтиши билан славянча талаффузлар таъсирида «гагауз»га айланиб кетган бўлиши мумкин».

Гагауз романнависи Д.Танасўғли кўп йиллик тадқиқотлари натижасида мана шу холосага келган. Бироқ Н.Баскаковнинг биринчи тахмини ҳақиқатга яқин кўринади: гагаузлар — кўкўғузлардир.

\* \* \*

Давр шамоллари, олис ва шиддатли тарих бўхронлари гагаузларнинг тили ва маданиятини буткул ўзгартириб юборолмаган бўлса-да, уларнинг ҳалқ сифатидаги ўзига хос номида муҳрини қолдирди. «Кўкўғузлар» бугун «гагаузлар» бўлиб қолицди. Яхшиям XXI аср бўсағасида жаҳон буюк янгиланиш эпкинларига юз бурди. Акс ҳолда тоталитариzm тегирмони кўкўғузлар сингари не-не катта-кичик ҳалиqlарнинг номинигина эмас, ўзини ҳам янчиб, мажақлаб, кулини кўккка совурган бўлар эди. Мана шу мудҳиш тегирмондан омон қолган ҳалқ қурратли пўлат фиддираклар эзизб ўтганидан сўнг ҳам бош қўтаришга ўзида куч ва қудрат, иродга топа олган маъсума гулга ўхшайди. Шуylага интизор гиёҳга ўхшайди!

... Оламда Гагаузистон деган бетакрор бир юрг ҳам бор. У бугун ўзлигини англашиб, жаҳон меҳваридаги ўрни, миллий ҳақ-хуқуқи, инсоний қадр-қиммати учун курашмоқда. Ҳали бу йўлнинг сабоқлари кўп...

1992 йил, 31 январь,  
(*«Узбекистон адабиёти ва санъати»*).

## ҚҮНИМ ТОПМАГАН КАРВОНЛАР

Хева хонининг ёэги саройи. Хоразм меъморий санъатининг дурдонаси бўлмиш бу бино ўз маҳобатига зил ўлароқ ажиб сеҳрга ботгандай, не-не зотларни ҳайратта солган кошонанинг ўзи ҳам буюк ҳайратта чўмгандай эди. Унинг бағрида турфа забон жаҳон сўзларди, қадимий карвонлар қўнғироғи янгарди.

“Буюк Ипак йўлидаги шаҳарлар ва карвонсаройлар” мавзуидаги халқаро анжуманни (*1991 йилнинг 10 майи*) очаётуб, покистонлик таниқли олим Аҳмад Ҳасан Дони кўхна қўнғироқ жарангি билан ҳамманинг эътиборини тортди.

— Азизлар, икки кун бурун биз Беруний номи билан аталаётган шаҳардан ўтиб келдик, — деди у. — Гарчи, бу мўъжаз шаҳарча буюк алломанинг жаҳоншумул шуҳратига жудаям муносиб кўринишда бўлмаса-да, бизнинг қадим Туроннинг буюк фарзанди олдида ўз эҳтиромимизни изҳор этишимизга асло монеълик қиласиди. Бугун халқаро анжуманимизни шундай табаррук заминда — Абу Райҳон Беруний ватанида бошлаяпмиз.

Яна оҳиста қўнғироқ чалинди. Унинг садолари Хева хони саройидан эмас, ўтмишнинг олис қатларидан келаётгандай эди. Балки у йўллари тўсилиб манзилидан адашган, саҳроларда қўним топмай кезиб юрган карвонларнинг мунгли ноласидир. Балки Балхдан хориб қайтган карвонлар олиб келаёттан — Беруний бобомизнинг бугунги ҳур шамолларга саломидир... Ҳар нечук шундай деб ўйлагинг келади.

Жаҳоннинг турили мамлакатларидан ташриф бу юрган олимлар карвонсаройлар тарихини илидан иғнасигача қизғин муҳокама қилишмоқда. Бу манзиллар

исломгача карвонсарой, сўнг эса работ деб аталган, улар Буюк Ипак йўлининг шоҳ бекатлариридир, дейди нотиқ. Юзлаб йиллар давомида Осиё ва Оврўпонинг турли жуғрофий, сиёсий ва иқтисодий шароитдаги қатор мамлакатларини туташтирган Ипак йўли фақат савдо-тижорат йўлигина бўлиб қолмай, турли халқларнинг маданий тараққиётига, ўзаро бир-бирини бойитишига кучли таъсир кўрсатган. Шаҳарлар ва шаҳарсозликнинг вужудга келишига, ҳунармандлик ва маданий қатламлар шаклланишига бебаҳо ҳисса кўшган, ижтимоий жараёнларни ҳаракатга келтирган.

Хитой чинниси ва ипагининг довруги ҳам шу йўллар орқали ёйилган эди. Беруний Эронда ғоят машҳур бўлган Хитойнинг уч хил чинниси ҳақида хабар беради. Ўрта Осиёдаги ойна тайёрлаш технологияси эса 424-йили Хитойга олиб ўтилиб, бу ўлканнинг турли вилоятларида ойнасозликнинг кенг тараққий этишига туртки берган. У ердаги нафис қофоз тайёрлаш усуллари Туркистонга кўчиб, бу соҳанинг Самарқандда равнақ топишига сабаб бўлади.

Булар фанга аллақачон маълум бўлган ҳақиқатлар. Бироқ ҳали тарихнинг қат-қатларида, ҳаробага айланган қадимий қалъалар, қўрғонлар, карвонсаройлар бағрида не-не тилсимлар юз очмай қолиб кетяпти. Олимлар игна билан қудуқ қазгандай мاشақат чекиб, работу қалъалар ўрнидан ўтмишнинг не бир сиру синоатлари, тилсиз ҳужжатларини топмоқдалар. Қадимий Нахшаб марказидаги Ерқўргон ҳаробаларини қазиш чоғида тилладан ясалган мўъжазгина типратикан шаклидаги ҳайкалча-тўғноғич топилган. Унинг сирти, “тикон”лари дуру жавоҳирларлар билан зийнатланган. Тошкентдаги Ўзбекистон тарихи музейида сақланаётган бу топилма ҳозиргача қадимий ҳаробалар «ҳадя этган» дунёдаги шундай иккита тилла типратиконнинг биридир. Ота-боболаримиз

типратиконга бежиз тилладан ҳайкал қўймаган бўлса керак. Бугун ҳам одамлар уни жонзотлар ичидаги яқин дўст ҳисоблайди, “илон ундан қочади”, дейди. Яна бир жиҳати эса тарихимизнинг зукко тадқиқотчиси Ҳамид Зиёевнинг гувоҳлик беришича, умуман бизда қадим-қадимдан хазиналардаги олтинларни, ҳатто энг катта ҳажмдаги тиллаларни ҳам бирор жонзот қиёфаси шаклида кўйма ҳолда сақлаш урф бўлган. Бунинг ўз маъно-мазмуни, сиру синоати бор.

Шундай ноёб топилмалардан бирининг суратини экспедиция автобусида кетаётуб москвалик олима аёлнинг қўлида кўрдим. У сопол кўзачага ажойиб бир шақлда ишланган түя етаклаган Мажнуннинг тасвири эди. Қизилқум ҳудудидаги кўҳна қалъалардан бирини қазиши чоғида топилган кўзача синиқлари бутланганда шу тасвир ҳосил бўлган. У шу қадар гўзал ва афсонавий эдики, нафақат уста кулолнинг, шу билан бирга салкам икки минг йиллик маданиятимиз тарихидан ҳам шаҳодат бериб турибди. Кузачадаги Мажнун қиёфаси китобимиз саҳифасидан жой олиши мумкин эди. Бироқ, меҳмонимиз олтин топгандек уни биздан қизганди: докторлик илмий ишига қўшиб эълон қилмоқчи экан. Нима ҳам дердик — ҳар кимнинг ихтиёри ўзида. Она тарихимиз қанчадан-қанча турфа забон олимларини илмий унвонлар билан сийласа, улар орқали ўз ўтмишимизни ўргансак ёмонми? Ахир ўзимизда бундай олимлар бармоқ билан санарли, олий ўкув юртларини битираётган ёш археологларнинг аксарияти худди Шарқ кулиётларини битиргач, бу ердаги қўлёзмаларни титкилашни эп кўрмай бошқа соҳаларга ўтиб кетаётганини инкор қилолмаймиз-ку! Фақат бир армон бор: қачондир қайси бир нотанти дўст бизга мабода “ўтмишингда ёруғлик йўқ, маданиятсиз қора халқсан” деган бўхтонларни ёғдирса, соқовланиб қолмасак бўлгани...



Шу ўринда юракни тирнайдиган яна бир сўроқ бор. Бухородаги Варахша музейида бу қадим шаҳардан топилган V — VII асрларга доир ноёб деворий расмлар эътиборимизни тортди. Уни 1938 йили Варахша харобаларида қазицма ишларини олиб борган археолог В.А.Шишкун топган. Салкам бир ярим минг йилдан бери Варахшанинг “Кўк хона”сида тупроқ остида омон-эсон сақланиб келаётган бу ажойиб санъат дурдонаси исломгача бўлган даврга оид сўғдийлар маданиятидан шаҳодат берувчи ноёб топилма эди. 30-йилларнинг ҳақиқатлари бизга қоронғу. Бу топилманинг тақдирини кимлар узил-кесил ҳал эттан — уни ҳам билмаймиз. Билганимиз шуки, Варахшадаги нақшин манзараларни топган олимлар уларни девордан қириб олишиб, Эрмитажта олиб кетадилар. Музей ходимасининг тушунтиришича, Варахшанинг деворий расмлари Эрмитажга ҳукумат томонидан совға этилган эмиш (Худди Амир Олимхоннинг зиннатланган қимматбаҳо қиличи Фрунзе томонидан Ивановодаги музейга туҳфа этилганидай)...

Эртаси куни ЮНЕСКО экспедицияси Бухородан 38 километр гарбдаги Варахша харобалари томон йўл олди. Кўтчиликни ўша ноёб манзаралар топилган хона қизиқтириди. Таниқли археолог Абдулаҳад Мұҳаммаджонов бизга ўша хоналарни кўрсатди. Ё фалак, бир ярим минг йилдан бери нақшин расмларини тупроқ тагида асраб-авайлаб келган Варахша харобалари дурлари талангандан ўксик манзилга менгзарди. Бу ердан топилган сўғд худоларининг ҳайкалчалари ҳам қайси бир шаҳардаги музейларни безаб турган бўлса, ажабмас. Наҳотки, археологлар томонидан ўрганилган ҳар бир кўхна шаҳар, қалъя уларнинг ташрифидан сўнг шундай қиёфага юз тутса?! Бағридаги дуру гавҳарлари, осори-атиқалари билан илм учун бекиёс кашфиётлар берса, уни топган одамнинг номини дунёга машхур этса-ю, китобларга битилгач, ўзи қисқа кунда



олови ўчган кулдек батамом йўқлик қаърига сингиб кетса.

Ақлга сиғдириб бўлмайди! Ахир фан учун янгиликлар калитини топиб берган, ўтмишни қайта тирилтирган она замин гувоҳликлари археологлар қадамидан сўнг ҳам ўзининг табиий ҳолатини сақлаб қолиши зарур эмасми?! Агар, бу бизнинг қўлимииздан келмайдиган бўлса, эҳтимол қадимий харобаларни ҳуда-бехудага очиб, кавлаб ташлашни тўхтатиш керакмикан? Бундан ҳам баттари, Варахша ва унга ўхшаган ўнлаб тарихий обидалар — Еркўрон, Эски Термиз, Шерободдаги қатор қадимий манзиллар, ибодатхоналар таваккалчилик билан ер ўзлаштириш, бўлар-бўлмас каналу зовурларни қазиб ташлайвериш оқибатида, сизот сувларининг кўтирилиши таъсирида бағридаги не-не тилсимларни очмасдан вайрон бўлиб бораётир.

Ахир уч-тўрт минг йиллик тарихдан гувоҳлик берувчи харобалар шунча йил яшаб келиб, кейинги 30-40 йил ичida бутунлай йўқликка юз тутса, бунинг гуноҳи кимнинг бўйнига тушади? Ўз ҳудудида мана шундай обидалар тўлиб ётган туманларнинг раҳбарлари буни ўйламаса, тирикчилик юмушлари билан банд оддий одамларнинг кўлидан нима келарди?

Варахша ва унга ўхшаган ўнлаб тарихий қўрғонларнинг тақдири ўйга толдиради. Тўғрисини айтиш керак, уларнинг аксариятини тиклашнинг иложи йўқ. Профессор Аҳмад Ҳасан Дони айтганидек, эҳтимол, буларни тиклайман деб уринишнинг кераги ҳам йўқдир. Негаки, Бухоро, Шаҳрисабз, Хевадаги нисбатан ободроқ кейинги асрларга тааллуқли ўнлаб тарихий обидалар, саройлар, мадрасаларни ер ости сувлари, туз ва шамол, ундан ҳам баттари тўрачилик ва ҳафсаласизлик емирмоқда. Ваҳоланки, энг қадимги даврларга мансуб ёдгорликларимиз тақдири алоҳида меҳр-муҳаббатни талаб этади. Улар бизгача қандай

яшаб келган бўлса, бундан буён ҳам шу ҳаётини давом эттиришига халақит бермаслик, ҳуда-бехудага кавлаб, «қош қўйман деб кўз чиқармаслигимиз» керакмикин, деб ўйлаб қоласиз.

Эндиликда бизга Варахша харобаларидан қолгани—архитектор Нильсон топилмаларга асосланиб яратган манзаралару дурлари талангандан «Кўк хона» деворидағи ноёб расмларнинг мойбўёқда матога кўчирилган нусхалари, холос... Эрмитаж музейларини безаб турган асл манзараларга қайтсак, ҳақиқатан ҳам девордан қириб олинган нақшин манзараларни дуч келган жойда сақлаш осон эмас. У жуда камёб кимёвий воситалар билан қотирилмаса, буткул йўқолиб кетиши мумкин. Бироқ ўз қадимшуносларимизнинг бу борада ҳали ҳам қўли қисқалик қилмоқда... Эҳ-хе, сўрайверсангиз, археологларнинг ҳасратидан чанг чиқади. Ҳанузгача олий ўқув юртларимизда археология соҳасида маҳаллий шарт-шароитни биладиган миллий кадрлар тайёрлаш тузукроқ йўлга қўйилмаган. Гўёки миллий-маданий равнақимиз учун бу соҳа мутахассисларининг кераги йўқдек. Қатағон йилларида-ку, тарихни ўрганиш, миллий фуруримиз уйғониб кетишидан қўрқардик. Энди-чи? Она тарих дарвозасида осиғлик турган кулфларни ким очади?

Ростини айтишим керак, мен Ипак йўли экспедицияси билан бирга бўлган саёҳатим давомида ўз она тарихимиздан билганларим жуда юзаки эканига имон келтирдим. Тўғриси, буни тан олдиму қўрқиб кетдим. Шунча йил совет мактаби, олий ўқув юртида ўқиб, матбуот соҳасида қалам тебратиб, менинг билганларим жуда оз бўлса, йигирма миллионли ҳалқимиз ўз тарихидан нимани билади? Келажак авлодчи? Умуман, яқин ўтмишда тор доирадаги беш-ўнта мутахассисдан ташқари ҳалқнинг асосий қисми ўз тарихини билишдан маҳрум этиб келингани ҳеч бир адолат тарозисига тўғри келмайди.



Экспедиция Шаҳрисабзда Темур даври билан боғлиқ ёдгорликларни, буқчайган Оқсаройни кўздан кечираётib, уларни қандай асраб қолиш мумкинлиги устида бош қотираётганида бир киши экспедиция илмий раҳбарларидан бири Аҳмадали Асқаровга «Домла, бир саволим бор, шунга жавоб берасизми?» деб мурожаат қилди.

— Марҳамат.

— Менинг танишимда бир китоб бор экан. Унда Темур Шаҳрисабзда эмас, Эронда туғилган деб ёзилишибди. Шу ростми?

Бундай манқуртларча берилган саволни эшитиб, домла Асқаровнинг қандай ҳолга тушганини кўрдим. Лекин у босиклик билан ўша одамга тушунтируди:

— Бу нотўри, бизнинг қўлимиизда Темур даврида, унинг замондошлари томонидан ёзиб қолдирилган китоблар бор. Уларнинг ҳаммасида Амир Темурнинг Хўжа Илғор қишлоғида туғилганлиги аниқ қилиб ёзилган. Бу китоблар бутун дунёга маълум. Танишингиздаги китоб ҳойнаҳой навбатдаги уйдирмалардан бири бўлса керак...

Бу тарихни билмайдиган, билишга имкон берилмаган одамларнинг шунчаки сафсатаси эди. Лекин бу сафсатани бежиз эслаёттанимиз йўқ. Бемаъни саволни берган одам-ку, шунчаки бир саводсиз кимса эди. Лекин профессор унвони бўлган айрим олимларнинг Темурнинг ўзбек халқига алоқаси йўқ, деб ёзганларини ҳам ўқидик-ку. Бундай гаплар ҳамма жойда ҳам эмас, халқ ўз ўтмишидан, она тарихидан бебаҳра қилинган, манқуртлашиб кетиши учун шартшароитлар яратилган жойдагина туғилиши мумкин. Шу маънода халқаро экспедиция халқимизнинг кўзини очиб, уни ўз маънавият сарчашмаларидан огоҳ этишни ҳам ният қилган бўлса ажаб эмас, деб ўйлайман.

Нега жаҳон XXI аср бўсағасида — юксак мадани-

ят шоҳсупасидан туриб, ўз ўтмишига бунчалар талпинмоқда? Ўша тупроқ қатламлари, кум барханлари тагида қолиб кетган қандай сир-синоатлар уни ўзига тортмоқда? Жаҳоннинг турфа бурчакларидан ташриф буюрган не-не алломалар қадим карvon йўлларидаги работу қалъалар, саройлар, оддий кўрғону даҳмаларни жаҳон цивилизациясининг ажралмас бўлаги ҳисоблаб, уларнинг шакли, меъморий услублари хусусида баҳс юритаётгани, алоҳида бир иштиёқ билан суратларга тушираётгани, ён дафтарларига ёзиб олаётгани, киноленталарга муҳрлаётганини кўриб, беихтиёр ана шу саволлар ҳақида ўйлайсан. Ахир биз бу обидаларнинг қанчадан-қанчасини ўтган етмиш йил давомида мафкуравий лўттибозликлар билан атайин вайрон қилиб юбормадикми? Хориждан келган мөхмонарлардан бирортаси буни билармикан? Билмаган тақдирда ҳам бизнинг бирортамиз бу ҳақда юрак ютиб сўзлармидик? ЮНЕСКО раҳбарияти «Умумжаҳон мероси рўйхати»га киритишни ваъда қилган қадим Бухоронинг бетакрор обидалари 1920 йили ҳалқаро келишувларни назар-писанд этмаган Фрунзе буйруғи билан самолёт бомбалари остида вайрон қилинганини ҳам улар билмайди. Биздан эса садо чиқмади. Ёпиқлик қозон ёпиқлигича қолаверди. Ҳатто Бухорода бўлиб ўтган илмий семинар пайтида хитойлик Лю Енг Шенъ босқинчиларга қарши курашда мардларча ҳалок бўлган ҳалқ қаҳрамони Маҳмуд Торобий мақбараси қаердалитини сўраганда ҳам «Тороб қишлоғи Бухорога 22 километр» деган гапдан бўлак ҳеч нарса айттолмадик. Аслида Маҳмуд Торобийнинг жасади ўша ҳайт-мамот жангига бурда-бурда бўлиб кетган. Кишлоқдошлари Маҳмуд Торобийнинг қони тўкилган жой тупроғидан олиб келиб рамзий мақбара, сўнгра хонақоҳ курган, асрлар оша бу жой ҳалқ сифинадиган табаррук масканга айланган, художўйлар уни авлиё атаб зиёратгоҳга айлантирган.

Биз одамларни бу авлиёдан бездириш учун қўли-миздан келган барча номаъқулчиликларни қилдигу, аммо ҳақиқий қаҳрамон зиёратгоҳини сохта тасаввурлардан тозалаб ололганимиз йўқ. Торобий тарихига шунчалар қизиққан хитойлик дўстимиз буларни билмайди, биз эса чурқ этиб буларни сўзлаб беролмаймиз... Ахир, Торобийнинг ўзи ҳалқ қаҳрамонлигининг тимсоли, рамзий қабри эса ҳалқнинг унга бўлган меҳр-муҳаббатининг ифодаси эди-ку. Наҳотки, босқинчиларга қарши курашиб, ҳалқини ўз ватани озодлиги учун курашга бошлиб чиққан эр йигитнинг қаҳрамонлиги муносиб баҳосини топмаса? Яқин-яқингача арабий имлодаги китоблар қатарон қилиб келингани, дин ва тарихдан ўзлигимизни англашдан кўрқиб яшаганимиз асорати бизга яна неча йил азоб бераркан?

...Экспедициямиз Тожикистоннинг Кўргонтепа вилоятига йўл олаётib Термиз яқинидаги Хайратон кўпригига бир фурсат тўхтаб ўтди. Амударё устидаги Ўзбекистон ва Афғонистонни туаштирган дўстлик кўпригига чегарачилардан рухсат олиб, эсадалик учун суратга тушилди. Кўхна Жайхун минг йиллардан бери Айритом ва Хайратон ўртасида шитоб-ла оқиб ётган бу сарҳад қадим Мовароуннаҳрнинг буюк дарвозаси эди. Нариги соҳилда не-не буюк зотларга паноҳ бўлган Афғон диёри ястаниб ётиби. Уларнинг даврида бу дарвозалар кулфу калитсиз бўлган. Элу юртларни бир-бiri билан боғлаган карвонлар бу ерлардан ҳадсиз-тўсиқсиз ўтиб юрган. Бугун эса биз Афғон тупроғида абадий қўним топган уч буюк зот — Беруний бобомиз, ҳазрат Навоий, Мирзо Бобурнинг паноҳ жойларини бемалол зиёрат қилиб қайтиш имконига эга эмасмиз. Биз қачон ўз худудимизга посбон бўламиз? Қачон бу чегаралардан ўз тилимизда сўзлаб, дўсту ёрларимиз билан борди-келди қиласми? Йўллари тўсилиб манзилидан адашган, бир дарё-



нинг икки ёқасида қўним топмай юрган карвонлар қачон манзилига етади?..

Ҳур шамолларга юз бураётган она Ўзбекистон ташки олам билан борди-келди қилувчи карвонларини йўлга шайламоқда. Не тонгки, бу карвонлар йўлга чиқадиган муборак кунларда бизни қатор Осиё мамлакатлари, Ҳинд океани билан боғловчи қадим йўллар белидаги Хайратон кўприги Ўзбекистоннинг бош дарвозаси бўлиб қолса. Ўтмишдан элчи бўлиб қадим карвон йўлларидан келаётган «Буюк Ипак йўли — мулоқот йўли» экспедицияси карвонлари шу манзиларни бир-бирига боғлаб кетса, ажабмас...

*1991 йил 24 май,  
(«Ўзбекистон адабиёти ва санъати»).*



## ИЛК МАДАНИЯТ БЕШИГИ ҚАЕРДА?

Илк маданият бешиги қайда? Унинг ворислари ким: ўтроқларми ёки кўчманчилар? Неча асрки, бу кенг жаҳон ilk маданият бешигини ахтаради. У гоҳ Миср эҳромларину будда ибодатхоналарига, гоҳ эса зардӯштийлик хилхоналарига кўчади. Мусулмон маданияти ҳам бундан мустасно эмас.

Ворисликка дъявогар эса ҳамон Farbu Шарқ ўтмисидаги улуг алломалардан тортиб, нақшин сопол синиқларигача, номи қай бир тилга мансубу ўзи бошқа бир эл маънавий мероси билан чирманиб кетган роботу шаҳарларгача талашадилар. Ворис бўлиш иштиёқи айримларнинг «иштаҳаси»ни шу қадар очиб юборадики, улар бу ҳавоийи эҳтирос қуршовида кўзига губор тушганию ўз ўтмиши илдизига билиб-билмай болта уриб қўйганини ҳам гоҳо сезмай қолади.

Уларга басма-бас қадимшунослар эса ҳамон ер юзидан инсон ақлу шуурини ҳайратга солувчи мўъжизаларни ахтариб топмоқдалар. Яқинда ойнаи жаҳон Британия археологлари бундан 500 минг йил бурун яшаган одам қолдиқларини топганидан хабар берди. Шу чоққача топилгани эса бу галгисидан юз минг йилча ёшроқ эди. Ўзбек қадимшунослари ҳам муайян далиллар асосида инсоннинг ёшини 700 минг — 1 миллион йил нари-берисида деб ҳисобламоқдалар...

Мана бир неча йилдирки, Марказий Осиё тупроғи инсоният маданиятига бебаҳо дурдона бўлиб қўшилгувчи осори атиқаларни, турфа битиклару унтутилган қадимий ёзувларни туҳфа этиб келмоқда. 1991 йили ЮНЕСКОнинг Буюк Ипак йўли бўйлаб Марказий Осиё худудларидан ўтган ҳалқаро илмий экспедицияси чоғида эса инсониятнинг қадим маданияти, ilk маданият бешиги билан боғлиқ фан



учун ғоят қимматли янгиликлар эътироф этилди. Жаҳоннинг турли мамлакатларидан келган олимларнинг илмий маъruzalari, хитойлик ва мӯгулистанлик қадимшуносалар кино ва фотоҳужжатлар асосида на майиш этган ноёб топилмалар, илмий сафарнинг сўнгги ҳафтасида Олмаота атрофидаги қўрғон-даҳмаларнинг ўринлари, тоғ дараларидаги қоя-тошларга ўйиб ишланган расм-чизгилар, битиклар, Қозогистон тарих ва этнография музейидан жой олган ноёб экспонатларнинг илмий таҳлили Марказий Осиё ҳалқарининг қадим маданияти ҳақида шу чоққача Farbda урф бўлиб келган айrim сийقا қараашларни бутунлай чиппакка чиқариб юборди.

Айни чоғда, анжуман кунлари айrim эскича даъволарни тиқиширишга уринганлар ҳам бўлди. Тарих бу хил даъволарнинг кўп бор гувоҳи бўлган. Хўш, тарихни сохталаштиришлар, бир ҳалқнинг ўтмишини камситиб, бошқа бир ҳалқ маданиятини улуглаш қандай ақидалар аосида келиб чиқади? 1913 йили Ўрта Осиёдаги саводхонлик даражасини атайин сохталаштирувчи рўйхат нега зарур бўлган эди? Ўрта Осиёнинг бутун тарихи, илм-маданият, дин, маънавий мероси, бу юрт алломаларининг бутун жаҳонга машҳур асарлари битилган арабий имлодаги китобларни ва шу китобларни ўқиган одамларни қатағон этиш нима мақсадда қилинган эди?

Тарих бу жумбоқларнинг жавобини аллақачон бериб бўлган. Бугун ниҳоят ўтмишни холис баҳолаш рағбат топган йилларга ҳам етиб келдик. Шундай экан, «ўтган ишга саловот» деб қўя қолсак бўлмайдими? Бу ҳақда яна сўз очишнинг зарурати борми. Ҳа, бор! Тарихни сохталаштиришдаги ғаламисликлар «Чор Русиясининг қолоқ ва чекка ўлкалари» деган атаманинг ўзи билангина тугамаган. «Ўтроқлар» ва «кўчманчилар» деган атамалар ҳам ўз даврида аллақимларнинг пуч ақидаларига хизмат қилган эди.



Халқаро илмий сафарнинг кундалик йиғинлари ва экспедиция сўнгтида Олмаотада бўлиб ўтган халқаро қадимшунослар анжуманидаги айрим мунозараларнинг илдизларини мен орадан бир йил ўтиб, таниқли тарихчи олимимиз Бўрибой Аҳмедовнинг «Ўзбек улуси» китоби билан батафсил танишиб чиққач, чукурроқ англагандек бўлдим. (Бу асар илк бор Москвада 1965 йилда «Кўчманчи ўзбеклар давлати» номи билан напиr этилган). «В.Ф.Шахматов, С.Е.Тўлибековлар... ўзларининг баъзи асарларида қадим замонларда ҳозирги Қозоғистон ерларида кўчманчилик билан бир қаторда ўтроқлик ҳам бўлғанлиги ҳақидағи ҳақиқатни инкор этганлар, — деб ёзади Б.Аҳмедов. — Уларнинг фикрича, ҳозирги Қозоғистоннинг қадимиий аҳолиси ўтроқликни билишмаган ва бу ерда ўтроқликка ўтиш жараёни XIX асрнинг 30-йилларидан, яъни қозоқ жузларининг Россияга қўшилганидан сўнг бошланган. С.Е.Тулибековнинг ёзишича, гўё фақат «шу пайтдан бошлаб рус давлати ва рус аҳолисининг бевосита таъсири остида қозоқ жузлари ва йирик уруғ қабилавий гурӯҳларнинг ўтроқликка ўтиш жараёни бошланди».

Бундай қараш биргина В.Ф.Шахматов ёки С.Е.Тўлибековларгагина хос эмасди. Олмаотадаги анжуманда Д.Кишебековнинг фикр юритишича, кўплаб илмий манбалар бу хилдаги уйдирмаларни анча йиллар бурун инкор этганига қарамай, Плетнева, Киргелев ва у сингари олимлар турли рисола ва қўлланмаларда бундай бирёқлама фикрларни ҳанузгача тиқишириб келмоқдалар. Ҳатто, нотиқ Бартольддай етуқ олим ҳам ўз даврида ўтроқлар ва кўчманчилар маданиятини бир-бирига қарама-қарши қўйишдан ўзини тия олмаганини қайд этиб ўтди.

У ёғини сўрасангиз, илмий манбалар кўп ва етарли бўлишига қарамай, тарихга бир ёқлама муносабат узоқ давом этиб келган кўринади. Тарих фанлари док-

тори А.Немировскийнинг ёзишича, олмон тарихчи-си И.Дройзен ўзининг «Элленизм тарихи» мақоласида Александр Македонский лашкарларига қарши ўз юрти озодлиги йўлида курашган Ўрта Осиёлик халқ қаҳрамони Спитаменни асов, исёнкор сифатида тасвирлайди. Уни «осиёликларнинг қонуний ҳукмдори» бўлган Искандарга «хиёнат қилган жоҳил» сифатида ерга уриб, босқинчи Македонскийни эса Осиёга цивилизация олиб келган сиймо сифатида улуғлади.

Биз ҳоҳлаймизми, йўқми узоқ йиллар мобайнида шундай қаравшлар урф бўлиб кетган эди. И.Дройзен сингари тарихчиларнинг фикрини чиппакка чиқаришда В.В.Григорьев сингари рус тарихчиларининг ҳиссаси борлигини ҳам эътибордан соқит қилиб бўлмайди, албатта. Бироқ алам қиласидагани шуки, И.Дройзен ва ундан қарийб икки аср ўтиб, бугунги қунларгача ҳам Туркистон, Марказий Осиёning ҳақиқий турихини «бilmай» ва «kўrmay» келганлар кўп. Улар Геродотнинг милодий эрадан аввалги VI асрда Эрон шоҳи Кир II лашкарлари адабини берган, шоҳнинг қонга тўймаган бошини меш тўла қонга тиқсан, Сирдарё ва Каспий дengизи оралиғида яшовчи массагетлар маликаси Тўмариснинг жасорати ҳақида ёзганлари; VI асрда Буюк уммондан Қора дengизгача бўлган ҳудудларда ҳукмронлик қилган қудратли Турк ҳоқонлигидан хабар берувчи қабртошлардаги битикларни ўқиган даниялик В.Томсоннинг асарлари; милодий 629-630 йилларда Амударё билан Чу орасида жойлашган бу мамлакатни кезиб чиқиб, ўз хотираларида «маданият нуқтаи назаридан бир бутунликка эта эди... ёзувлар, тил ҳамма ерда бир хил» деб таърифлаган Хитой сайёхи Сюань Цзанинг саёҳатномаси; қабртошлар ва битик тошлардаги ёзувлар; Билга Ҳоқон, Култегин ва бошқа ёдномалар; Муҳаммад ибн Мансур Марваррудий, Абу Райхон Беруний, Маҳмуд Кошғарий, Юсуф Ҳос Ҳожиб каби ўнлаб аллома-



ларнинг асарларидан ҳам гўё бехабарлар. Уларни ҳеч ўқимаган, эшигмагандай, «кўзларини кўр», «кулоқларини кар» қилиб, фикр юритишган.

Шу ўринда тарихнинг яна бир гувоҳлигини эсга олиб ўтишга тўғри келади. Ёзувчи ва публицист В.Ян, ўттизинчىй йилларда ўзининг «Чингизхон» тарихий романни қўлёзмасини Максим Горькийга ўқишга беради. Адид асар билан танишиб чиқиб, уни таниқли тарихчи олимлар назаридан ўтказишга беради. Улар В.Янга асар хусусида баъзи эътиrozларини, яъни Чингизхонни уччалик ҳам зарур даражада ваҳший қилиб тасвирламаганини айтишади. Ҳатто, бу асарда Чингизхоннинг рус ерларини эгаллаши «ёғни пичоқ билан кесгандек» осонгина юз бергандек тасвирланган экан. Шундан сўнг В. Ян «маслаҳатлар» асосида ўз асарини қайта ишлаб нашр эттиради.

Тўғри, тарих ҳеч қачон Чингизхонни оқламайди. Бироқ, нохолислик ҳам ҳеч қандай тарих учун обрў келтирмайди. В.Ян Чингизхон ва унинг рус ерларидаги юришларини истеъоди етганича «талабларга мувофиқ» ёзив бергани-ку, манбаларда бор ҳақиқат. Эҳтимол, биз шу чоққача Амир Темур шахси ва тарихини холис ёритмагани учун қаттиқ ранжиб келаёттанимиз Сергей Бородин ҳам В.Яннинг аҳволига тушмаганмикан? Яна ким билади... Ҳар ҳолда тарихни сохталаштиришдан манфаатдор кучлар ўзини ҳақ қилиб кўрсатишга уринишдан асло чарчамайди.

Қизиги шундаки, ҳалқаро илмий сафарнинг семинар ва анжуманлари чоғида ҳам ўзларини ўтроқ аҳолига мансуб деб билувчи айрим олимлар ўтроқлар ва кўчманчилар маданияти ҳақида-ги бир ёқлама фикрларини ўтказмоқчи бўлдилар. Бу билан Буюк Ипак йўлидаги манзилларда яратилган бебаҳо маданият обидаларини фақат бир ёки икки ҳалқагина мансуб деб кўрсатишга ҳаракат яққол сезилиб қолди. Тарихчи Ю.Ёкубов анжуман чоғидаги



илмий маърузаларида ҳозирги Қозоғистон ҳудудидан топилган ва топилаётган осори атиқалар, жаҳоннинг кўп мамлакатларидан келган қадимшунослар ҳавола этган ноёб манбалар шу чоққача тарих фанида хукм суриб келган қарашларни бутунлай ўзгаририб юбораётганида ўзини тута олмасдан маърузачилардан бирига шундай савол билан мурожаат қилди:

— Ўтроқ деҳқонлар шаҳарлар бунёд қилдилар, мадрасалар, масжидлар қурдилар. Хўш, кўчманчи қабилалар нимани яратдилар?

Томдан тараша тушгандек қилиб айтилган бу гап анжуманда кулгу уйғотди. Ҳеч ким саволнинг жавобини эшитишини хоҳламади. Унинг гапи қарсаклар билан бўлиб қўйилди. Чунки, кўчиб юрувчи ва ўтроқ турмуш кечирувчи халқлар орасида, уларнинг бир-бирларига муносабатида, мол айирбошлишда келиб чиқкан ижтимоий омиллар қадим-қадимдан савдо-сотиқнинг ривожланишига, унинг касб-хунарга айланishiغا, урбанизация жараёнларининг кучайишига, шаҳарсозликнинг вужудга келишига шароит яратган. Ҳар икки ҳаёт тарзида шаклланган маданиятларнинг муштараклашуви шаҳар ҳаётига, шаҳарсозлик маданиятига асос солган. Ҳозирги Қозоғистон ҳудудидан топилган Суёб, Бобосоғун, Саройлик, Турайлик, Еккиўғуз, Сузоқ, Кумкент, Савдокент каби ўнлаб тарихий шаҳарларнинг қолдиқлари бунинг далилидир. Ҳатто, араб манбаларининг гувоҳлик берисича, Тошкент яқинидаги Бурчмулла ёнида VII-XII асрларда Арлонкент деган қадимий шаҳар бўлган. Улар қадимий ўтмишимиз, ўзига хос ҳаёт тарзимиз, маданий қатламларимизнинг тилсиз гувоҳлари бўлиб, кўчманчиликдан ўтроқлашувга ўтиш жараёнлари хусусида бой маълумотлар беради.

Бўрибой Аҳмедов бу ҳолни қуйидагича талқин этган: «Кўчманчиларнинг ҳаётларида улкан ўзгаришлар бўлиб турган... Агар қадим замонларда чорвага

жамоат эгалити бўлган бўлса, феодализм даврига келиб, ҳатто унинг ибтидоий шаклларида ҳам чорвага шахсий эгалик ҳукмронлик қилгани инкор этиб бўлмайдиган ҳақиқатдир. Оддий қўчманчиларнинг ўз чорваларидан ажраганларидан сўнг ўтроқ ҳаёт тарзиға ўтишлари доимо рўй бериб турган... Ўрта асрдаги Қозогистон ерларида шаҳарлар, дехқончилик ривожланган воҳалар ва суғориш тармоқларининг мавжудлиги, у ерларда қўчманчилик билан бир қаторда ўтроқлик ҳам бўлгани учун одамларнинг хўжалик фаолиятлари турлича эди, деб айтишга имконият беради. Ўша даврда баъзилар қўчманчилик ҳаёт тарзида яшаб, яйловларда чорвачилик, баъзилар эса шароитга қараб (асосан ер ва сувнинг бор йўқлигига қараб) дехқончилик маҳсулотларини етишириш, яна бошқалари — хунармандчилик ва савдо ишлари билан шуғулланганлар. Дехқонлар ҳам хунармандлар ҳам, савдогарлар ҳам у ёки бу даражада ўтроқ ҳаёт кечиришар эди. Бу ерларда чарм ва темирдан турли буюмлар ишланарди, заргарлик безаклари тайёрлар эдилар. Махсус хумдоңларда сопол идишлар пиширилар эди. Ундан ташқари, ҳарбий асбоб-анжомлар: қиличлар, ўқ-ёй, найза, эгар-жабдуқ, аравалар ясаларди. Ҳозирги Қозогистондан қадимшунослар қазиб олган топилмалар, ҳарбий асбоб-анжомлар ва хўжаликка тегишли буюмлар уларнинг қўчманчилар овулларида ҳам қишлоғ ва ёзловлар пайтида ясалганини кўрсатади...»

Олмаота яқинидаги Иссиқ кўргондан топилган ва халқаро илмий сафар чоғи бутун дунё олимларини ҳайратта солган «олтин одам» ҳам шундай шароитларда тайёрлангани шубҳасиз. «Олтин одам» деб аталиб келаётган бу ёдгорлик, асло бирон одамнинг ҳайкали эмас. У сипоҳийнинг бошдан-оёқ олтиндан тайёрланган махсус кийими бўлиб, ғоятда нағислик билан ишланган. Ҳатто сипоҳийнинг рутбасини англатувчи тимсол ва рамзларгача катта маҳорат билан яратилган.

Бу топилма Иссиқ кўргондан қазиб олинганини айтдик. Қозоқ ва қирғизларда «кўргон» сўзи даҳматепалик маъносини беради. «Олтин одам» топилган Иссиқ кўргони қайсиdir ёвқур сипоҳийлар йўлбошчиси дағн этилган жой. Расм-русумларга кўра дунёдан ўтган одамнинг қуролу анжомлари, зеб-зийнатлари, бойликлари ҳам кўшиб кўмилган. Қозоқ ва қирғиз олимларининг гувоҳлик беришича, бу кўргонларнинг аксарияти турли босқинчилар томонидан таланганд, бойликлар, зеб-зийнатларни қўлга киритиш умидида кавлаб очилган. Турли минтақаларнинг қадимшунослари кейинроқ ўтказган археологик қазишларда улардан фақат дағн этилган одамларнинг қолдиқлари, баъзан кўшиб кўмилган аслаҳалар, турли ашёлар топилган, холос.

Экспедиция Иссиқкўл бўйида, Олмаота атрофи ва Еттисув ҳудудларида тўхтаб ўтган ўнлаб даҳматкўргонлардаги кавлаб ташланган жойлар ҳам шундан далолат бериб турибди.

Афтидан, ўтган асрнинг иккинчи ярмида Туркистонни ўқ ва қилич билан тобе этган Скobelov ва Черняевларнинг юртимизга мўр-малаҳдай ёпирилган аскарларини Туркистон тупроғи, меҳнатсевар одамларигина эмас, отнинг тақасидан тортиб, қабрлардаги тақинчоқларгача, саройлардаги ноёб суратларгача қизиқтирган кўринади. Бугун Москва, Санкт-Петербург музейлари, Эрмитажни безаб турган ёдгорликлар, осори атиқалар таланганд бойликларнинг мингдан бир улуши бўлса ажаб эмас. Бу бойликларнинг қанчадан-қанчаси Амир Олимхоннинг олтин қиличини ўзининг шахсий ўлжаси қилиб олган Фрунзенинг кирдикорлари каби босқинчи галаларнинг шахсий мулки сифатида қай бир пучмоқларда ётгани ёки ўзлашиб кетгани шубҳасиз.

«Ипак йўлидаги кўчманчи ва муқим яшовчи ҳалқлар маданиятларининг ўзаро бир-бирига таъсири» мав-

зуидаги халқаро анжуманда ҳукумат номидан илмий сафар қатнашчиларини кутлаган Узоқбой Қарамонов: «Саёҳат одамни ҳом хаёллардан фориғ этади, — деган гап бор, — деди. — Буюк Ипак йўли — бу ноёб феномен. Уни ўз аҳамиятига кўра одамларнинг фазога йўл олишига қиёслаш мумкин. Бу йўл туфайли Шарқ Фарбни, Фарб Шарқни билди, таниди, тан олди. Эндиликда ҳудудида икки миллиард аҳоли истиқомат қиласётган қадимий карvon йўлларидағи манзиллар бўйлаб Трансосиё магистрали ўтади. У янги давр цивилизациясига хизмат қиласди...»

Бир неча кун давом этган анжуман чоги ён дафтаримга қайд этилган ёзувларни ўқиб, ўша улуг издиҳомнинг бетакрор руҳини қайтадан ҳис этгандек бўламан. Экспедициянинг сўнгги кунларида Олмаота ва Жамбул вилоятлари оралиғида унчалик баланд бўлмаган тоғ дараларига сафар қилинди. Баланд қоя тошларга турли расмлар ўйиб ишланган дара ёнидаги сайҳонликда жаҳоннинг турли бурчакларидан келган меҳмонлар миллий расм-руsumлар, уйин-кулгулар билан кутиб олинди. Худди Иссиққўл атрофидаги тоғлардан Қозоғистоннинг Кеген туманига ошиб тушганимизда бўлгани сингари экспедиция қатнашчилари учун қирқта ўтов тикилди. Ўтовлар қаршисидаги улкан майдонда эса чавандозлар беллашуви учун маҳсус отчопар курилди. Яна бир томонда фолклор-этнографик дасталари учун саҳна ясатилди. Бир сўз билан айтганда, ўтмишдан элчи бўлиб келган жаҳонгашта олимлар Фарбу Шарқнинг Буюк Ипак йўллари кесишган чорраҳасида катта кувонч ва ифтихор билан қаршиланди. Чавандозлар беллашувидан тортиб, оқинларнинг айтишувларигача, ясатиғлиқ ўтовларда ял-ял ёнган гиламлардан тортиб, келинларнинг миллий кийим-кечагу тақинчоқларигача, дастурхондаги қази-қартадан тортиб қимизу қимронгача бўлган майший турмуш асотирлари қадимда қан-



дай бўлса шундай намойиш қилиндики, «кўчиб юрувчи» деб ном олган қадимги қавмдош, элдошларимизнинг бу ўзига хос маданияти ҳаммани ўзига маҳлиё этиб кўйди.

Кўчманчиларнинг маданияти йўқ, нимани яратибди, деган қарашларнинг нечоғли юзаки ва уйдирмалиги аён бўлди-қолди. Айниқса, экспедициянинг археология бўйича илмий раҳбари бўлган покистонлик фан доктори Аҳмад Ҳасан Донининг кўзларида ўт чақнар эди. У бутун экспедиция давомида ўзининг доно саволлари, муҳим изоҳлари ва кенг феъллиги, чукур билими билан барчада теран тафаккурли аллома сифатида ҳайрат ва хурмат уйғотди. Унинг Марказий Осиё тарихини пухта билиши, яна бунинг устига халқимизнинг ўтмиш маданиятига доир ҳар бир маълумотта болаларча қизиққонлик билан эътибор бериши, эринмай дафтарчасига ёзib бориши, лозим бўлганда хато қарашларини инкор қилиши, изоҳ бериши ибратли эди. Ораста безатилган ўтовлардан бирида ана шу таникли қадимшунос аллома билан сұхбатлашиб, халқаро илмий сафар хulosаларини ёзив олишга муваффақ бўлдим.

«Биз бу ерда цивилизация гоҳ таракқий этиб, гоҳ инқирозга юз тутиб турганини кўрдик, дея сўз бошлади доктор Аҳмад Ҳасан. Афсуски, биз бу маданият хазиналари батамом вайрон этилган, деб ўйлардик, шундай деб кўп эшиттандик. Негаки, биз Чингизхоннинг босқинчилкларию Темур етказган вайронгарчиликлар ҳақида жуда кўп ўқигандик. Бироқ шу чоқقا қадар Марказий Осиё ҳудудида талайгина тадқиқотлар олиб борилганига қарамай бу минтақа аҳолиси, халқлари маданиятининг аҳамияти, бу цивилизация концепцияси етарли даражада ўз баҳосини олмаган эди. Бошқа томондан эса, «кўчманчилар» деган сўзниңг ўзи нотўғри ва ноилмий талқин этиб келинди. Унинг моҳиятини нотўғри тушуниш ва англаш

урф бўлган эди. Бу янгилиш тасаввур, яъни «кўчиб юрувчи» халқлар, эл ва элатлар цивилизациясини нотўғри талқин этиш бутун дунё бўйлаб кенг ёйилган эди. Ҳатто шундай қараш ҳам мавжуд эдики, гўё «кўчманчилар»да умуман маданият, цивилизация бўлмаган. Биз халқаро илмий сафаримиз чогида ўз кўзимиз билан кўришга муяссар бўлган ноёб ёдгорликлар, қоятошлардаги битиклар орқали шу чоққача бу маданият сарчашмаларини чукур билмай келганимизни англаб етдик».

Ушбу илмий карvon сафари давомида фан оламидаги мавжуд ғайри илмий қарашлар ва концепцияларнинг пуч эканлиги рад этишга муваффақ бўлинди. «Кўчманчи» деб камситиб келинган халқларнинг маданияти, ўз аҳамиятига кўра, ўтроклар яратган маданиятдан асло қолишмайдиган, у билан баробар даражада турадиган, бир-бирини тўлдириб ва бойитиб келган ягона маданият илдизлари экан! Фақат ўртадаги иқтисодий омиллар бошқача жараёнда кечган.

\* \* \*

Халқаро экспедиция илмий раҳбарларидан академик Аҳмадали Асқаровнинг қайд этишича, ўзбек қадимшуносларининг шу сафар давомидаги саъиҳаракатлари, далил-исботлари туфайли эллинизм маданиятини кўкларга кўтарувчи Farb олимларининг яна бир фикри — Ўрта Осиёликлар қадимда шаҳар қуришни билмаганлар, уларга Александр Македонский шаҳар қуришни ўргатиб кетган, деган даъволари ҳам пучга чиқди. Жаҳонгашта олимлар Марказий Осиё тупроғидаги энг қадимий шаҳарларнинг қолдиқларини ўз кўзлари билан кўриб, улар Македонскийнинг босқинчилик юришларидан анча аввалроқ бунёд этилганини эътироф этдилар.

Шоир ёзганидек, гўё таъна тошин саноғи битиб, тарих сопқонидан тушган каби зар, бугун бизга улуг



Ватанимизнинг озод жамолини кўриш насиб этди. Она тарихимизни ҳеч кимдан ҳайиқмай ўрганиш, ўтмишимизнинг энг ёруғ даврларидан гувоҳлик берувчи шу чоққача нашр этилмай келинган ноёб китобларни чоп қилиш, бинобарин Ўзбекистоннинг асл тарихини яратиш имкони туғилди. «Темур тузуклари», Ибн Арабшоҳнинг «Амир Темур тарихи», Мирзо Улуғбекнинг «Тўрт улус тарихи», шунингдек, «Мухтасар» ва «Ҳидоя» сингари ўнлаб нодир китобларнинг нашр этилганлиги бу йўлдаги илк қадамларимиздир.

Экспедиция даврида туғилган яхши бир ният шарофати билан Самарқандда ЮНЕСКО раҳбарлигига иш олиб борувчи халқаро Марказий Осиё маданияти тарихини ўрганувчи институт иш бошлиди. Умид шулки, бу илмий қароргоҳ қадим маданиятимиз тарихини жаҳон кўламида энг холис ва мукаммал ўрганувчи мўътабар даргоҳга айланади.



## ВАТАН ТУПРОГИ

Ватанни онага менгзайдилар. Фарзанд она бағрида ўсиб-улгайгани сингари минг-минглаб одамлар учун ягона бўлган юрт, Ватан онадек мўътабар ва азиздир. Шу боис она Ватан деймиз, Ватанни онага тенглаймиз. Ватан — Она!

Бир машхур ғазалда ҳазрат Алишер Навоийнинг лирик қаҳрамони суюкли ёрга мурожаат қилиб, “Кўзим қаросида мардум киби ватан қилғил”, дейди ва Ватан туйғусининг моҳиятини янада теранроқ ифода этади. Яъниким, мардум — фуқаро учун Ватан кўз қорачуғидек азиз. Сен ана шу азиз маскан — кўзим қаросида абадий яшагин, уни Ватан тутгин, дейилмоқда.

Биз мардумлар, яъни бугунги озод мамлакат фуқаролари ўз Ватанимизни беҳад севамиз. Унинг шоншавкатидан қалбимизда ғуур ва ифтихор ҳис этамиз. Бу-ку, тайин гаплар. Бироқ Ватан севгиси деган улуғ тушунча замираida яна бир муқаддас туйғу ҳам мавжудки, бу туйғуни англамасдан Ватанни севиб бўлмайди. Бинобарин, Ватанни севиш уни шарафлаш, шарафлай олишга монанд бурч ҳиссини ҳам шакллантиради.

Хўш, биз Ватан шарафи деганда нимани идрок этамиз? Бу туйғу моҳиятини қанчалик тўғри англаймиз?

Тарихда ҳам, бугунимизда ҳам Ватан шарафини теран англатувчи мисоллар кўп.

### *Юлдузли онлар*

Ўтган асрнинг бошларида капитан Роберт Скотт инсон қадами ҳали етмаган Жанубий қутбга экспедиция уюштиради. Бу илмий сафар учун у бор бисо-



тини сарфлайди ва яна қарзга ҳам ботади. Унинг ягона орзуси муз қитъаси узра Британия байроғини биринчи бўлиб қадашдан иборат эди. Зарур асбоб-анжомлар, мұжаз лабораториялар билан жиҳозланган кема Антарктида соҳилларида лангар ташлайди. Бир ярим йиллик йўл азобларидан сўнг Скотт кўзлаган манзилига етиб ҳам келади. Бироқ... омад ундан юз ўтирганди. Тақдир муз қитъа кўксига биринчи бўлиб ўз ватани байроғини қадаш шарафини норвегиялик Амудсенга раво кўрган эди. Капитан Скотт бор-йўғи бир ойгина кеч қолади.

Унинг қайтиш йўли янада машаққатли ва ҳалокатли кечган. Руҳан эзилган Скотт сафардош дўстларидан жудо бўлади ва охир-оқибат ўзи ҳам муз қитъа узра абадий макон топади... Кейинги экспедициялар муз қотган кутбчиларни топиб, ўша жойда дафн этишади. Уларнинг кундаликлари, кино ва фотохужжатларини олиб қайтишади. Скотт муқаррар юз беражак ўлим олдидан ўз кундалигига шундай деб ёзганди:

“Катта кашфиётларга қодирмидим ёки йўқми — буни билмайман, бироқ бизнинг ўлимимиз мардлик ва матонат ҳали ҳам миллатимизга хос эканлигидан бир шаҳодатдир”.

Ўзига нисбатан беҳад камтарлик ва ҳалқи, миллатига нисбатан фурур-ифтихорга тўлиб айтилган бу сўзлар замиридаги ишонч ва қатъият боиси нимада? Ватан шарафи деган ўлмас туйғу шу эмасми?! Эҳтимол шунинг учундир, XX асрнинг буюк ёзувчиси Стефан Цвейг капитан Скотт жасоратини инсониятнинг юлдузли онлари, деб атайди.

Капитан Скоттнинг ўлим олдидан ёзганларига ҳали яна қайтамиз. Ҳозир эътиборни бир лаҳза она Ўзбекистонимиз, қадим Туркистонимиз тарихидаги бу воқеалардан асло қолишмайдиган юлдузли онларга қаратайлик. Тўмарису Широқдан Муқаннаю Шайх Нажмиддин Кубрографча... яна не-не зотлар Ватан туп-

роғини, Ватан шарафини муқаддас санадилар. Ёвуз Чингизхонни ҳайратга солиб, Синд дарёси узра от соглан Жалолиддин Мангубердининг букилмас руҳи асрлар оша уйғоқ кезиб юрибди. Соҳибқирон Амир Темур ҳазратларининг азму шиҷоатига, буюк қудратига эса олти ярим асрки, жаҳон ҳайрат кўзи билан боқиб келади. Илоҳий иноят соҳиби бўлган бу бутоқ зот мулку мамлакат фахри, бутун бир миллатнинг бетимсол шарафига айланган эдилар.

Шайх Нажмиддин Кубродек улуғ зотлар, Султон Жалолиддин Мангубердидек баҳодир фарзандлар тимсолида бошланган ва бир ярим аср давом этган Ватан озодлиги учун кураш она халқимиз учун ниҳоятда оғир кечди. Не тонгки, Ватаннинг даҳо халоскори бўлишдек буюк баҳт Амир Темур бобомизга насиб қилди. Шунча вақт мобайнида Чингиз тўдалари оёғи остида топталган Туркистонни босқинчилардан озод этибгина қолмай, бу ҳудудда йирик марказлашган мустақил давлатга асос ҳам солди у буюк зот. Соҳибқирон тузган салтанатнинг шуҳрати етти иқлимда машҳур бўлди. Амир Темур яратган буюк салтанат ўз ҳудудининг катталиги билангина эмас, бу салтанатда амал қилинган ижтимоий-маънавий қадриятларнинг умуминсоний моҳияти билан ҳам шуҳрат қозонди.

Ватанинни қандай шарафлайдилар, деганда бизнинг кўз олдимизга, энг аввало, соҳибқирон Амир Темур тимсолидаги буюк боболаримиз келади. Ўз навбатида шуни айтмоқ керакки, ёвқур боболаримиз Ватанинни шарафлашни, унинг шаънини улуғлашни, биз уларни фаҳр билан тилга олаётганимиз каби, ўзларидан олдин ўтган аждодларимиздан, олис ажлодларнинг буюк қаҳрамонликларидан ўрганганлар. Уларнинг қонидан ўтган ватансеварлик туйғусини ўз жисму жонларида қайта уйғотганлар, вояга етказғанлар, ке-

лажак насллар учун ибрат қилиб қолдириб кетганлар.

Эрамиздан олдинги бешинчи асрда енгилмас подшоҳ деб ном қозонган Эрон шоҳи Кир II нинг бошини қонга ботирган Тўмарис момомизнинг буюк жасорати ҳали-ҳануз жаҳон мактабларининг тарих дарсликларида ўқитилиб келади. Чунки бу жасорат афсона эмас, чин тарих эканлигини Геродот ёзиб қолдирган. Машхур тарихчининг гувоҳлик беришича, Мидия, Лидия ва Вавилонни истило қилган, Ўрта ер денгизи бўйларидағи ҳудудларни ҳам забт этиб бўлган Кир II эрамиздан олдинги 530-йилда Марказий Осиёда яшовчи массагетларни бўйсундириш ва улар давлатини ҳам ўзига тобе этиш учун бизнинг юртимиз сари юриш қилади. Аждодларимиз бу вақтда Каспий денгизи, Амударё ва Сирдарё оралиғидаги улкан ҳудудда яшар эдилар. (Денгизу дарёларнинг номларигина ҳозиргидан бошқача аталган).

Кир II дастлаб массагетлар маликасини ҳийла йўли билан қўлга олмоқ ниятида унга ўз элчиларини юборади ва уни (массагетлар шоҳи ўлимидан сўнг бева бўлиб қолган малика Тўмарисни) ўзига хотинликка сўрайди. Кир II нинг асл нияти унга уйланиш эмас, балки юртини, Ватанини эгаллаш эканини фаҳм этган доно Тўмарис унга рад жавоби беради. Рад жавобини берибгина қолмайди, балки қўшинларингни олиб кет, бўлмаса бу юртдан омон чиқмайсан, деб ёвқур подшоҳларга хос сиёsat ҳам қилади. Беомон жангга катта ҳозирлик кўради. Жасур йигитларини ҳаёт ва мамот синовига ташлайди.

Бироқ Кир ҳийла ишлатади, кучсиз бир қўшинини дастурхон тўла зиёфатлару ўткир мусалласлар билан жанг майдонида қолдириб, асосий қўшини билан уларни пойлаб туради. Кирнинг бир қўшингина кучсиз аскарларини енгиб, ғолиб бўлдик, деб ўйлаб зиёфатга машгул бўлган Спарангиз бошлиқ Тўмариснинг бир қисм навкарларини душман доғда қол-



дириб асир олади. Бундай ҳийлага чув тушганига но-  
мус қилган Тўмариснинг ўғли Спарамиз ўзини хан-  
жар уриб ўлдиради...

Сўнг беомон жанглар бошланади — қонлар дарё-  
дай оқади. Массагетлар ўқ-ёйи тутагач, найза ва хан-  
жар билан душманга юзма-юз ташланадилар. Ва Кир-  
нинг қўшиларини буткул маҳв этадилар. Тўмарис  
жанг майдонида ўлиб ётган босқинчилар орасидан  
Кир II нинг жасадини топиб, унинг бошини олиб  
келишни буюради. Кирнинг бошини қон тўлдирил-  
ган идишга ботириб, Тўмарис шунда дейди: “Сени  
енгтан бўлсан ҳам қалбим қасосга тўлиқ! Сен ўғлим-  
ни хийла билан кўлга туширдинг. Номусига чидай  
олмаган Спарамиз ўзини жувонмарг этиб ҳалок  
бўлди. Жангдан аввал сен жўннаттан элчиларга айтта-  
нимдек, сени қонга тўйғазаман. Энди истаганингча  
қон ютавер!”

Кир II нинг ўлими ҳақидаги кўпдан-кўп ҳикоят-  
лар орасида мен учун энг ишончлиси — мана шу! —  
деб ёзади Геродот.

\* \* \*

Бу воқеалар икки ярим минг йил бурун юз берган  
эди. Она тарихимизнинг олтин саҳифаларида аждод-  
ларимизнинг Ватан шарафини муқаддас тутиб кела-  
ётганларидан ҳикоя қилувчи бундай мисоллар оз  
эмас. Энди саккиз юз йилча аввал (1219 -1224) юр-  
тимиизга от суриб келган Чингизхон босқинчила-  
ри билан юзма-юз олишган боболаримиз жасорати-  
дан яна бир лавҳага эътибор тортмоқчиман. Бу ҳазрат  
Алишер Навоийдек буок сиймони ҳам ҳайратлан-  
тирган Шайх Нажмиддин Кубро жасоратидир.

Ўшандада ҳозирги Кўҳна Урганч Хоразмнинг ул-  
кан пойтахти эди. Беруний ва Ибн Синодек аллома-  
лар қизғин илмий фаолият билан шуғулланган маш-  
хур Маъмун академияси мана шу шаҳарда жойлаш-



ган эди. Чингиз тўдалари бу шаҳарни кўп уринишлардан сўнг ҳам ололмагач, Амударё ўзанини буриб бориб, уни сувга бостирадилар. Хоразм аҳли ёвга енгилавермагач, босқинчилар Шайх Нажмиддин Кубро ҳазратларининг эл орасида обрўси юқорилигидан, бутун раият пешволари у зотнинг сўзидан чиқмаслигидан фойдаланиб, Шайхнинг ҳаётини сақлаб қолишини ваъда қилиб, таслим бўлишни талаб қилишади. Шайх Нажмиддин Кубро ҳазратлари бунга асло кўнмайдилар ва ёвга қарши отланган халқ орасида туриб мардонавор жанг қиласидилар. Бир қанча душман аскарларини нобуд этиб, ўзлари ҳам Ватан озодлиги йўлида шаҳид бўладилар.

Нега Шайх Нажмиддин Кубро ҳазратлари ўз жонини қутқариб, элни таслим бўлишга даъват этмади?! Бундай йўл тутиш у зот умри давомида амал қилиб келган эътиқодга зид бўлиб, юртга хиёнат билан баробар эди. Эҳтимол, Чингизхон тўдаларига қирон солиб, асло унинг қўлига тушмаган Султон Жалолиддиннинг жасоратига Шайх Нажмиддин Кубродек азиз авлиёларнинг одамни ҳайратга солувчи буюк эътиқоди ибрат бўлгандир!

### *“Отаға шундай фил зарур...”*

Энди сўзни Мирзо Улугбек бобомиздан эшитайлик. Буюк салтанат соҳиби ва улуғ аллома Мирзо Улугбек “Тўрт улус тарихи” китобида Жалолиддин Мангубердининг Синд дарёси бўйида Чингизхон лашкарлари билан бўлган муҳорабада кўрсатган жасоратлари ҳақида фахрланиб ёзалилар. Маълумки, Синд дарёси бўйидаги ана шу жангда Жалолиддиннинг етти-саккиз ёшлардаги ўғли асирга олинади ва Чингизхон болани шу ондаёқ ўз олдида қатл эттиради. Чингизхон беҳисоб лашкарга эга эди. Жалолиддин эса жуда оз кўшин билан қолган. Ана шундай кучлар но-

тент бўлган муҳорабада Чингизхоннинг қўли баланд кела бошлайди. Жалолиддиннинг онаси, хотини ва бошқа аёллар даҳшат ичра фарёд қиласилар: “Аллоҳни ўртага қўйиб илтижо қиласиз, бизни ўлдириб, асирикдан қутқар!” ( Шаҳобиддин ан-Насавий: “Султон Жалолиддин Мангуберди ҳаёти тасвири”).

Жалолиддин ноилож барчасини сувга чўктиришни амр этади. Муаррихларнинг гувоҳлик беришича, бу чинакамига баҳтсизлик, ишониш қийин бўлган кулфат эди.

“Тўрт улус тарихи”да воқеанинг давоми шундай дарж этилган: “Султон юраги гирён, кўзлари ниғорон бўлиб, болалари ва улуғлари билан минглаб дарду фироғ билан видолашиб, қора тўриқ отига мениб, мўгулларнинг беҳисоб лашкарига яна ҳамла қилди. Уларни орқага суриб ташлаб, сўнг жиловни орқага тортди. Советуни елкага ташлаб чатрини қўлга олди, чўбини ерга отиб, отига қамчи босди. Синд дарёси қирғоғидан то узан (сув) гача ўн газдан ортиқроқ эди. У отни дарёга ҳайдади. Лашкардан бир тўдаси унга эргашган эди, мўгулларнинг ўқидан йўқлик денгизига ғарқ бўлди. Бу фириб дарёсининг наҳанги Ҳақ сўбҳоноҳу таолоннинг марҳамати билан отнинг сузишига назарини солди...

Соҳибқирону аъзам Чингизхони муazzам дарё қирғоғида туар экон, Султон Жалолиддин унинг рўпарасига етиб келиб, сувнинг у қирғоғида қора тўриқ отидан тушди ва эгар-жабдуқларини отнинг ингичка белидан олиб, ўз чопони ва ўқлари билан бирга офтобга қўйиб қуритишга бошлади. Чатрини эса найзага илиб, ўзи унинг соясида ёлғиз ўтирди. Намози асргача еттита киши сувдан чиқиб келиб, султон Жалолиддинга қўшилди. Кун ботмасдан аввал бу етти киши йўлга равона бўлиб, Харқ чўлига кириб, бу тўқайдан олға силжидилар.

Соҳибқирони аъзам Чингизхони муazzам султон

Жалолиддин ибн султон Мұҳаммад Ҳоразмшоҳдан бу аҳволни мушоҳада қылғач, либосининг ёқасини таажжуб бармоқлари билан тутди.

Олий нишонли султоннинг бу ҳоли Соҳибқиронга манзур бўлди. Унга оғарин айтди-ю, деди: “Отадан ҳали бундай ўғил туғилмаган. У саҳрода шер каби ғолиб жангчи, дарёда эса наҳанг каби ботир. Қандай қылсинки, ҳали ҳеч ким тақдир билан, ҳеч бир моярода тенг келолмаган. Лекин у мардликнинг додини берди. Қазойи қадар қаршисида қудрат қўлини (мардона) очди. Мардлик билан ундан (қазо) қутулиб бўлмайди. Нима қылсин-қымасин бу улуғ худо ишидир”.

Султоннинг барча феълу ҳаракати Соҳибқирон (Чингизхон) га манзур бўлиб, таҳсин оғзини очиб, ўғилларига юзланди ва деди: “Отага шундай ўғил зарурки, у икки гирдоб — олов ва сув гирдобидан озодлик майдонига чиқа олди!”

Бу султондан кўп ишлар ва ҳисобсиз қиссалар вужудга келди ва унинг ишларидан ҳар қандай оқил ўғил ғофил қолмаслиги керак!”

Бу Мирзо Улуғбек бобомизнинг сўзлари, даъвати, балки энди армони ҳамдир. Тақдирнинг ўйинини қарангки, Улуғбек бобомиз ўз ноқобил фарзандининг ҳукми билан бу ёруғ оламни тарк этганлар...

\* \* \*

Олис тарихдан кечаги ва бугунги кунларимизга қайтайлик. Беҳбудийу Қодирий, Чўлпону Фитратлар қандай куч даъвати билан ўлимга тик боқсан эдилар? Улар қалбидаги исён миллат ва Ватан руҳиятидаги исённинг акс-садоси эмасмиди? Бугун исёнкор боболар руҳи барҳаёт. Ватан озод, юрт обод! Аждодлар шонидан мадад олган истиқлолимизнинг ўтган йилларини хаёлан сарҳисоб қилиб кўрайлик. Жаҳон томонидан гўё унутилган қадим Туркистон



заминида Ватан шарафини күтарувчи не-не улуг ишларга құл урилди...

Мен гоҳо айрим ёшларнинг боболаримиз тарихнинг энг кескин, бурилиш лаҳзаларида қаҳрамонлик күрсатғанлар, бутун у қадарли жасорат күрсатиш имкони йўқ, деганларини эшишиб қоламан. Йўқ,unday эмас. Аслида ўтаётган ҳар бир кун Ватан шарафидни муқаддас тутиб, буюк жасоратлар күрсатиш учун кенг имконият беради. Бу эҳтиёжгина эмас, балки зарурат ҳамдир.

Истиқлолимизнинг ўтган йилларида Ўзбекистон шарафини жаҳон узра юксалтирган қанчадан-қанча қаҳрамонлар гувоҳи бўлдик. Миллий кураш, шахмат, бокс ва бошқа спорт турлари бўйича не-не чемпионларимиз озод Ўзбекистон номини жаҳон узра шарафладилар. Бутун оламнинг нигоҳи қадалган дунёдаги энг йирик спорт анжуманларида озод Ўзбекистон мадҳияси янграб, байробимиз ҳилпираб туришига сабаб бўлган, олқиши олган ёшларнинг жасорати фахр-ифтихорга лойиқ эмасми! Улар ўз шоншуҳратлари билан яна қанчадан-қанча ёшларнинг кўнглида фурурни тарбиялашга, Алпомиш боболаримиз, ёвқур оталаримиз сингари паҳлавон келбатли мард инсонлар бўлиб етишишга ҳавас уйғотдилар!

Аслида Ватан туйғуси ҳар биримизнинг қонимизда, жонимизда бор. Фақат уни шакллантириш, тарбиялаш кўп жиҳатдан ўз савиямизга боғлиқ. Шу ўринда яна бир оддий мисолга зътиборни жалб этиш мумкин. Ҳар бир ўғил-қиз энг обрўли олий ўқув юртларида таҳсил кўришни ихтиёр этади. Бу табиий эҳтиёж.. Бугун хориждаги энг машҳур университетларда таҳсил олиш имкони яратилди. Ёшларимиз ана шу жаҳоний илм масканларига бориб ўқимоқдалар. Ҳеч шубҳа йўқки, улар орасидан ўз илми, кашфиётлари, ихтиrolари билан Ватан шарафини юксалтирадиган олимлар, билими зўр ноёб мутахассислар етишиб чи-



қадилар. Демак, энг иқтидорли ёшлар, истеъдод на-  
мояндалари ҳам она юртни шарафлашта қодирлар.

Озод Ватанга истеъдоди зўр, ўз иқтидорини  
камолга етказа биладиган ёшлар ниҳоятда зарур.  
Чунки бир улкан истеъдод ўз кашфиётлари билан  
бутун бир ҳалқнинг номини улуглашга қодирдир.  
Муҳаммад Мусо Хоразмий, Аҳмад Фарғоний,  
Беруний, Ибн Сино, Улуғбек сингари буюк сий-  
молардан тортиб, ўтган асрда яшаб ўтган Ҳабиб  
Абдуллаевдек ўз илмий мактабларини яратган ал-  
ломалар фикримиз далилидир.

### *Озод элнинг қаноти*

Кўпчилик яхши биладики, мустабид тузум дав-  
рида ўзбек миллатига, тубжой аҳолига мансуб киши-  
лар орасидан ҳарбийлар, йирик саноат иншоотлари-  
даги мураккаб муҳандислик курилмаларини бошқа-  
ришга қодир мутахассислар, фазогир учувчилар етиш-  
тиришга атайлаб эътибор берилмаган. Тўғрироғи туб-  
жой аҳоли фарзандлари бундай ноёб соҳаларнинг  
яқинига ҳам йўлатилмаган. Бу соҳалардаги оддийги-  
на, жўн ишларни бажараётган миллатдошларимизга  
шўро тузумининг орден ва медаллари берилиб, улар  
номига кўз-кўз қилинган, асл вазият бузиб кўрса-  
тилган эди.

Бунинг сабаби аён: аввало миллат ўз кучига ишо-  
надиган бўлмасин. Зарур мутахассиси бўлмаган ҳалқ  
нимасига ҳам ишонади? Агар у ўз кучига ишонади-  
ган бўлса, мустақиллик талаб қилиши мумкин. Бор-  
дию фалакнинг гардиши билан қай бир шароитларда  
мустақилликка чиқиб қолса ҳам стратегик аҳамиятга  
молик иншоотлар, йирик заводлар, корхоналарни  
бошқара олмай шарманда бўлсин, яна босиб олишга  
имкон бўлсин, деган яширин ниятларда зўр бериб  
амалга ошириб келинган сиёsat эди бу.

Мустақилликнинг ilk кунларида ёқ йиллар мо-

байнида ўтказиб келингган бу сиёсатнинг натижаси сезилиши мумкин эди. Лекин эркка, озодликка ташналиқ онгли фарзандларнинг қон-қонига сингиб кетганидан бу жараёнда нима иш қилиш зарурлиги, қандай йўя тутиш кераклиги тез илғаб олинди. Ёнилхи-энергетика иншоотларини бир маромда ишлатиш, ғалла ва нефт мустақиллигини таъминлаш учун Президент томонидан қўйилган вазифалар бу соҳаларда иш олиб бораётган мутахассислар томонидан чуқур идрок этилди. Бу аслида Ватан шарафини сақлаш билан баробар қаҳрамонлик эди.

Муборак шаҳрида Марказий Осиёдаги энг йирик газни қайта ишлаш заводи жойлашган. Корхона минтақанинг ёнилғи-энергетика мажмууда муҳим ўрин тутади. Мустабид тузум даврида қурилган йирик иншоот қурилмаларини бошқариш худди Мурунтов олтин конларидағидек асосан русийзабон мутахассислар қўлида бўлган, тубжой аҳоли фарзандлари иккинчи даражали ишларни бажаришга жалб этилгану, бироқ улар энг муҳим жараёнларни бошқаришга йўлатилмаган. Ўзбекистон мустақилликка эришгач, Россиядаги айрим матбуот нашрлари тўқиб чиқарган “русийзабон аҳоли муаммоси” бизда ҳам баъзи мутахассисларда Россия ҳудудига бориб ишлаш кайфиятини туғдирди. Мустақилликнинг дастлабки йилларида Муборак газни қайта ишлаш заводига раҳбарликни ўз қўлига олган ишбошиларимиз вазиятни ниҳоятда синчковлик билан ҳис этиб, узоқни олдиндан кўрдилар. Улар тубжой аҳоли фарзандларидан ўзбек ишчиларининг янги авлодини камол топтиришга катта аҳамият бера бошладилар.

Кўп йиллар мазкур корхона ҳамда Муборак газ ва нефт конлари бошқармасига раҳбарлик қилган, эндиликда Қашқадарё вилояти ҳокими бўлиб ишлаётган Нуриддин Зайневнинг гувоҳлик беришича, бу йирик иншоотда айрим русийзабон мутахассислар



бошқа худудларга кетиб улгурмасиданоқ бир йил ичиде миллий ишчи кадрларнинг резерви шакллантириб бўлинган. Русийзабон мутахассислар бошқариб келган мураккаб муҳандислик қурилмаларини ўз ишчи мутахассисларимиз, муҳандисларимиз ишончли бошқара бошлашади.

Бу “Боинг” сингари улкан самолётларни бошқарайтган ўзбек учувчиларининг жаҳондаги энг йирик аэропортларга дадил қўнаётганлиги, илгари учеб кўрилмаган ҳаво йўлларида парвоз қила бошлаганидек завқли ва шарафли иш эканини тушуниш қийин эмас. Яна бир нарсани айтиш керак, мустақилликка эришилган дастлабки оғир йилларда ҳам Муборак газни қайта ишлаш заводи ишлаб чиқариш маромини сусайтирмаган ҳолда ҳар йили янги-янги кувватларни ишга туширди. Режали равишда корхона қайта қурила бошлади. Ишлаб чиқариш кўрсаткичлари мутасил ўсиб, йилига ўтиз миллиард тоннадан ошди.

Мустақиллик йилларида жамоада корхона шаррафи учун кураш туйғуси шаклланди. Мана шу жароёнда Ватан туйғуси ҳам яққол намоён бўлди. Фидойилик кўрсатиб ишлаш корхона жамоасини ижтимоий жиҳатдан қўллаш, уй-жой ва ишлаб чиқариш шароитларини яхшилаш, янги спорт-соғломлаштириш иншоотлари қуриш бўйича имкониятларни кенгайтирди. Ҳозир корхона ўз футбол ва теннис иншоотлари, футбол командасига эга. Газчилар жамоаси мамлакатнинг иқтисодий қудратини оширишгагина эмас, ватаннинг спорт шарафини ҳимоя қилишга, уни юксалтиришга ҳам ҳисса қўшимоқдалар. Бу ютуқлар истиқлол ҳадя этган улуғ неъматлар самараси.

Бугун барчамизнинг тилимизга тушган Кўқдумалоқ нефт конлари ва Қоровулбозордаги Бухоро нефтни қайта ишлаш заводи ҳам Муборакдан унча узоқмас. Бу иншоотларни ҳам истиқлол йилларида шаклланган ўзбек ишчиларининг янги авлодлари мо-



ҳирлик билан бошқармокда. Нефт конлари ва нефтни қайта ишлаш заводидаги жаҳоннинг энг янги технологиялари билан жиҳозланган курилмаларни кечагина Тошкент Политехника институтини битириб, Фарғона, Муборак, Шўртан сингари қайта ишлаш корхоналарида тажриба оширган ўз йигитларимиз ишлатмоқдалар. Замонавий компьютерлар билан тиллашиб, энг нозик технология жараёнларига кўз-кулоқ бўлиб турган мутахассисларни кўрганда қалбинг бемисл фахр-ифтихорга лиммо-лим бўлади.

Бухоро нефтни қайта ишлаш заводи мустақиллик йилларида курилди. Корхона ўз маҳсулотларини чет элларга ҳам экспорт қила бошлаган кунларда Қашқадарёдаги Шўртан газ конлари ҳудудида яна бир улкан иншоот — газ-кимё мажмуи қуриб битказилди. Хўш, биз бу иншоотларни кимнинг кучига ишониб барпо этдик? Албатта, ўз кучимизга, ўз салоҳиятимизга, мустақиллик йилларида шаклланган ўзбек мутахассисларининг янги авлодига ишониб! Улар янги давр одамлари. Озод юрт қанотларири. Ўзбекистоннинг XXI асрдаги қиёфасини белгилайдиган, Ватан шарафини мустаҳкамлаш зиммасига тушган авлод — мана шу авлоддир.

\* \* \*

Биз “қаҳрамонлик”, “жасорат” деган сўзларни кўп ишлатамиз. Ҳақиқий қаҳрамонлик нима, унга қандай эришилади? У қандай юз беради? — деган саволлар, мунозаралар ёшлар ўртасида тез-тез бўлиб туради. Эсингизда бўлса, 1998 йилнинг бошларида ўшлиқ ўзбек йигити Солижон Шарипов америкалик астронавтлар билан биргаликда фазога учди. Ҳаммамиз қалбимиз бемисл ҳайрату ҳаяжонга тўлиб, учиш қандай бораёт-ганлигини “ойнаи жаҳон” орқали кузатиб бордик. Миллатдошимизга оғарину тасаннолар айтдик. Солижон Шариповни Президент Ислом Каримов кутлади.



Президентнинг қутловлари, сизу бизнинг суюнчимиз бежизга эмасди. Ахир миллатдошимиз, ўзбек фарзанди жаҳонда камдан-кам одамларга насиб эта-диган қаҳрамонликка сазовор бўлди. У ўз жасорати билан жаҳон узра ўзбек деган номни яна бир бор шон-шавкатга буркаб, Улугбекдек аллома боболаримиз бошлиб берган ўзбек коинот, фазогирлик илмининг сардафтарига ҳеч унтилмас олтин саҳифалар битиб қайтди. Қаҳрамонлик — мана шу! Ватан шарафини, миллат шарафини улуғлаш — мана шу!

Аслида Ватанинг ҳар бир онгли фарзанди ўз Ватанини, мамлакатини улуғлашга, шарафлашга қодир.Faқат бунинг учун имконият кутиш шарт эмас. Имконият ўз-ўзидан келмайди. Аллома шоиримиз Faфур Фуломнинг машхур мисраларини эсланг: “Фурсат ғаниматдир, шоҳ сатрлар-ла, Безамоқ чоғидир умр дафтарин”. Ўз жисми-жонида Ватан шарафи, Ватан туйғуси билан яшаган инсон, бутун руҳида миллат шавкатини ҳис этиб яшайдиган, ўзини ҳар жиҳатдан комил инсон бўлиб етишуви учун жонини куйдирган фарзанд олдида ҳамиша Ватанин шарафлаш имконияти очилиб келаверади.

Шу ўринда инглиз миллатининг шарафи учун Антарктидани биринчи бўлиб очишга бел боғлаган ва бу шарафга биринчи бўлиб эмас, иккинчи бўлиб эришган-у, бироқ қайтиш йўлида ҳалокатга учраб, муқаррар юз беражак ўлим олдидан, эҳтимол етиб борар деган умидда ўз ўтичларини ёзиб қолдирган капитан Скоттнинг кудалигига қайтайлик. Ёзуви Стефан Цвейг Роберт Скотт кундалигидаги битикларни шундай ифодалайди: “У маҳбубасига ёзади. Ундан ўғлини — ўзидан энг қимматбаҳо ёдгорни эҳтиёт қилишни ўтинади, уни ялқовликдан асрарни сўрайди, жаҳон тарихидаги энг юксак жасоратлардан бирини содир этиб туриб, яна шунга иқрор ҳам бўлади: “Мен фаол бўлишга ўзимни қанчалар мажбур эт-



ганимни, ҳамиша менда ялқовликка мойиллик бўлғанини сен яхши биласан-ку!” Ўлим ёқасида у энг оғир ва машаққатли ҳаёт йўлини танлаганидан сира афсус чекмайди, аксинча ўз қарорининг тўғри эканини бор вужуди билан маъқуллайди: “Бу саёҳат ҳақида сенга қанчалар кўп ҳикоя қилиб беришим мумкин эди! Бунинг уйда, бутун қуликлар орасида ўтиргандан кўра қанчалар яхши эканлигини билсанг эди”.

Машхур адаб ҳужжатли асарининг мазкур бобини “Ўлаётган одамнинг мактублари”, деб атаган. Капитан Роберт Скоттнинг ўлим олдидаги иқрорномасини келтириб ўтиш орқали айтмоқчи бўлган гапим шуки, қаҳрамонлик ва жасорат ҳеч қачон ўз-ӯзидан юз беравермайди. У инсон қалбининг табиий эҳтиёжи сифатида намоён бўлиши мумкин. Шунчаки истак, хоҳишгагина қараб рўёбга чиқавермайди. Қаҳрамонлик, фидоийлик, жасорат кўрсатиб Ватанини шарафлашга ўзида куч, ирова, билим, шизоатни уйғота билган, ўзини шу муборак йўлди чиниктира олган фарзандгагина бундай шараф ёр бўлғусидир!

### *Бурук ибрат тимсоли*

Инсоний комилликка етишмоқ умидида яшаган фарзанд ҳамиша яхшилардан, ёши улуғлардан ибрат олиб яшайди. Ибрат эса фақат тарихда, ўтмишда ўтган боболаримиз тимсолидагина эмас, бугуннинг ўзида, ҳар куни ҳаётимизда ҳам тўлиб-тошиб ётибди. Биз ҳар куни буюк ибрат намуналарига дуч келамиз. Фақат уни қалб кўзи билан кўришимиз, юрак эҳтиёжи билан ҳис этишимиз мумкин. Мушоҳадамиз аввалида тарихимиз ва бугуннимиз мисолида жуда кўплаб ибрат мактаби бўлишга арзигулик воқеаларга тўхталиб ўтдик. Ватан туйғусини чукур идрок этиш йўлида, Ватанини шарафлашни ўрганиш йўлида яна бир тимсол борки, бу ҳақда сўзламасдан бўлмайди. Бу



**озод мамлакатимиз йўлбошчиси — Президент Ислом Каримов ибратидир.**

Эътибор берган бўлсангиз, Юртбошимиз жуда кўп маъруза ва сұхбатларида Қашқадарёни, бу воҳанинг танти ва мард инсонларини тез-тез тилга оладилар. Сабаби у киши Ўзбекистоннинг олий даражадаги раҳбари бўлиб сайлангунига қадар бир неча йил шу вилоятнинг раҳбари бўлиб ишладилар. Бу йиллар мустабид тузум хукмронлигининг фирромликлари айни авжига чиққан давр эди. “Пахта иши” баҳонасида ўзбек ҳалқига нисбатан навбатдаги террор — қатағон сиёсати юргизилаётган оғир давр эди. Қанчадан-қанча беайб кишилар турли бўхтонлар билан қамоқларга ташланиб, мол-мулки мусодара этилиб, оила аъзолари турли қийноқларга солинаётган, кўз кўриб, қулоқ эшитмаган бедодликлар юз бераётган кезлар эди. Вилоятнинг бош раҳбари сифатида Ислом Каримовнинг бундай номаъқулчиликларга нисбатан виждони исён қилди. Жуда кўплаб истеъододли ўрта бўғин раҳбарлари, ишбошилар, зироатчилар, оддий меҳнаткашларни ҳимоя қилди. Уларнинг кўпчилигиги ни қамоқлардан олиб қолди, қамоқдагиларнинг эса тезроқ озодликка чиқиши учун курашди.

Ислом Каримовнинг юртпаварлиги, ватанпарварлиги илк бор мана шу жараёнда юз кўрсатди. Вилоят ахли ўз раҳбарини севиб қолди, унинг жасоратига, мардлигига қойил қолди. Республиkanинг ўша пайдаги раҳбарлари бу қатағонга қарши тура билмаганлари етмагандай марказдан — мустабид тузум марказидан берилган кўрсатмаларни “финг демай” бажарувчи маддоҳга айланиб қолган кезларда республика вилоятларини ўзини оқламаяпти, деган баҳонада бирбирига қўшиб юбориш тадбирлари амалга оширила бошлади. Қашқадарёни ҳам Бухоро вилояти билан қўшиб юбориш режаси тузилиб, унинг асослари яратилаётган кезларда Ислом Каримов бу сиёсатга

қатъиян қарши турди. Ноёб қобилиятли иқтисодчи сифатида бу иш иқтисодий жиҳатдан ҳам, маънавий жиҳатдан ҳам ўзини оқламаслигини, нотўғри тадбир эканини исботлаб берди. Шу масала юзасидан собиқ иттифоқ ва республика даражасидаги йиғинларда ўз фикрини мардонавор ҳимоя қилди. Қашқадарёнинг ишга туширилмаган иқтисодий имкониятлари, келажагини, воҳанинг ижтимоий-иқтисодий ривожланиш истиқболларини аниқ мисоллар билан пухта таҳлил этиб берди. Мана шу жараён Ислом Каримовни узокни кўра оловчи раҳбар, ўтқир сиёсатчи сифатида танидти ва бу ҳол кўп ўтмай Ўзбекистондек йирик республиканинг олий даражадаги раҳбари бўлиб сайланишида унга катта ишонч уйғотди.

Ислом Каримов республикага раҳбарлик қила бошлигаран кезлар Ўзбекистон тақдири учун ҳал қилувчи ғоят масъулиятли бир давр эди. Мустабид тузум ўз хукмронлигини узайтириш учун миллий жумхуриятларда турли миллий можароларни зимдан авж олдириб тургани кечагидек ҳаммамизнинг ёдимизда. Фарғона ва Ўш воқеалари, Тошкент вилоятида келиб чиқсан можароларнинг асл муаллифлари собиқ мустабид тузумнинг марказида эди.

Бизнинг баҳтимиз шундаки, Юртбошимиз ана шундай кезларда ниҳоятда вазминлик билан вазиятга холис баҳо бера олди ва у ер-бу ердаги ўт чиқишиларнинг олдини тезда олишга, биродаркушлик алансасининг авж олиб кетишини тўхтатиб қолишга муваффақ бўлди.

Ардоқли шоиримиз Абдулла Орипов ўзи гувоҳ бўлган бир воқеани мароқ билан сўзлаб юрадилар. Бу собиқ иттифоқ ҳалқ депутатлари қурултойи кунлари Москвада Ислом Каримов ва Николай Рижков ўрталарида бўлиб ўтган сұхбат бўлиб, ўрни келгани учун унинг тафсилотини келтириб ўтишни лозим кўраман. Маълум бўлишича, Юртбошимиз собиқ итти-

Фоқ даврида республикага раҳбарликни ўз зиммасига олгач, Зарафшон ва Мурунтовдаги олтин конларини Ўзбекистоннинг ўз тасарруфига ўтказишни ният этиб, бу ҳақда иттифоқ ҳукумати раисига кўп бор мурожаатлар қилган. Табиийки, Москва миллий жумхуриятлардаги муҳим стратегик иншоотларни марказдан туриб бошқаришни сира қўлдан чиқаргиси келмасди. Шунинг учун ҳамиша бундай сўровларга (илгари бундай сўровлар бўлганми-йўқми — Худо билади) йўқ, деб жавоб бериш одат тусига кирган. Бироқ Ислом Каримов ўз талабида қатъий турган.

Курултойга келган Ўзбекистоннинг айрим халқ депутатлари олдида Николай Рижков олтин конларини республика тасарруфига бермаслик учун турли важлар кўрсатади: у ерда жуда мураккаб технологик ускуналар, механизмлар мавжуд, республика уларни ўз кучи билан ишлатиши амри-маҳол, иккинчидан, агар ўз талабларингизда шундай қатъий турадиган бўлсаларингиз, биз ўша техника ва технология воситаларини у ердан олиб чиқиб кетамиз, деб пўписа ҳам қиласди. Шунда Ислом Абдуғаниевич: агар техникаларни олиб чиқиб кетадиган бўлсаларингиз — биз оддий лопатка-белкурак билан ҳам қазийверамиз олтинни, деб жавоб қайтарадилар. Николай Рижков: сизларда лопатка ҳам йўқ, униям Россиядан оласизлар-ку, дейди. Юртбошимиз: керак бўлса — қўлларимиз билан, тирноқларимиз билан ҳам қазиб оламиз олтинимизни, деб кескин жавоб беради ва собиқ иттифоқнинг бош вазирини мот қиласди.

Мен бу суҳбатни шу мулоқотга гувоҳ бўлган шоиримиздан эшитганларим асосида ҳикоя қилдим. Юртбошимиз ва собиқ мустабид тузум раҳбарларидан бириининг орасида бўлиб ўтган бу суҳбат Ўзбекистоннинг мустақиллиги учун кураш қандай шароитларда бошланганини рўй-рост кўрсатиб турибди. Мустақиллик, баъзилар ўйлаганидек, бизга ос-



мондан тушгани йўқ! Истиқлолга биз Юртбошимиз тимсолидаги мана шундай событқадамлик билан олиб борилган курашлар натижасида мушарраф бўлдик. Буни ҳис этмоқ учун яқин тарихга холислик ва адолат билан кўз ташлашнинг ўзи кифоя. Истиқлол берган буюк имкониятларни мустаҳкамламоқ учун эса Ватан туйғусини ниҳоятда теран англомимиз зарур бўлади.

Бу йўлда бизга Юртбошимиз ҳаёти, у киши илгари сураёттан фоялар буюк ибрат намунасиdir. Ислом Каримов Ўзбекистон Президенти бўлганидан буён амалга ошириб келаётган сиёsat моҳиятини ўқиб-ўрганиш, таҳдил этиб кўриш, мушоҳада юритиш озод Ватанимизнинг ҳар бир фуқароси учун юрт шарафини ҳимоя қилиш, Ватаннинг қадр-қимматини англашда буюк сабоқdir.

“Ҳозирги вақтда дунёда икки қарама-қарши қутб барҳам топган бўлса-да, турли хил мақсад-манфатларни ифода этувчи мафкуралар тортишуви тўхтагани йўқ,— дейди Ислом Каримов “Тафаккур” журнали бош муҳаррири саволларига жавобларида. — Очиқ айтиш керакки, бу тортишувлардан кўзланган асосий мақсад — инсон, авваламбор ёшлар қалбини эгаллаш, муайян мамлакат ёки минтақадаги бирор миллат ёки ҳалқнинг онгига, унинг сезги-туйғуларига таъсир ўtkазиш, уни ўз дунёқарашига буйсундириш, маънавий жиҳатдан заиф ва тобе қилиш. Фикр қарамлиги, тафаккур куллиги эса ҳар қандай иқтисодий ёки сиёсий қарамликдан ҳам кўра даҳшатлидир”.

Ватан шарафини ҳимоя этишини ният этган фарзанд, Президент эътироф этганидек, ҳарбий, сиёсий тазийиклардан кўра таъсири ва оқибатларини тезда илғаб етиш ниҳоятда қийин бўлган мана шундай мафкуравий тазийиклардан огоҳ бўлиши, событ эътиқод, ўзи таяниб яшайдиган ҳаётий-миллий қадрият-



ларга, шаклланган дунёқараш ва мустаҳкам иродага эга бўлиши керак.

Бу фикрлар ўз она Ватанини, сизд мамлакатини севиш, уни қадрлаш ва шарафлашнинг ҳақиқий сабоқлариdir. Ватанни севишнинг, миллатпарварлик ва юртпарварликнинг буюк тимсолидир!

\* \* \*

Ватан туйғуси, Ватан тупроғи, Ватан шарафи ҳақида мушоҳада юритдик. Олис тарихдан то бугунги кунларимизгача бу туйғуни устивор этиб келаётган мисолларни тилга олдик. Бу йўлда бизга маёқ бўлган миллатдошларимиз, ватандошларимиз жасоратини мадҳ этишга ҳаракат қилдик. Бинобарин, уларнинг жасоратлари буюк эъзозга муносибдир.

Жамиятнинг барча аъзоларини муштарак мақсад йўлида бирлаштирувчи, уларни бир ёқадан бош чиқариб истиқлол берган буюк неъматларни эъзозлашга илҳомлантирувчи, Ватан учун чин фарзандлик ҳиссини камол топтирувчи буюк даъваткор куч — бу, Ватан туйғуси, Ватан шарафидир!





# **ТУРКИСТОННИНГ ТОЗА МАВЖЛАРИ**

## БУЮК ВА БЕТИМСОЛ

Туркистонни осмоналаш тоғлар, буюк саҳролар, чўнг деңгизлар ўраб туради. Бағридан улуғ дарёлар ҳайқириб оқади.

Бу диёрда оламга келиб, унинг юксак тоғлариdek мададбаҳш бўлган, жўшқин дарёлариdek тўлиб оқдан, эл қалбida улуғ деңгиздай мавжланиб ётган буюк сиймоларга жаҳон таъзимда. Улугбекнинг ўзи бир деңгиз, Навоийнинг ўзи бир уммон, буюк соҳибқирон бобомиз Темурбекка эса қиёс йўқ.

Яна қанча азамат тоғлар, жўшқин дарёлар, шиддати тез ирмоқлар...

Мен Туркистонни хаёлан тасаввур эттим келганида ана шу тоғлар, ана шу дарёлар, ана шу улуғ боболаримни ўйлайман.

Бир неча йил муқаддам Помир ва Тиёншон тоғлари бағрида улуғ юрт сарҳадлари бўйлаб икки кун йўл юрдик. Йўл юрсак ҳам мўл юрдик. Бир ёнимизда “дунё томи” деб ном олган, булутларни ёриб кўкка интилган қорли чўққилар, яна бир ёнимизда эса осмон билан бўйлашган чўққиларини муз қоплаган тоғлар узра ястаниб ётган афон, ҳинд, хитой чегаралари.

Биз деңгиз сатҳидан тўрт-беш минг метрлар баланд тоғ йўлидан юқорилаб, шарқ томонга қараб борардик. Бадахшоннинг маркази Хорўф шаҳрида Амударёнинг энг катта ирмоқларидан бўлмиш Панж ва Фунт дарёлари бир-бирига қўшилади. Уларга ўз сувини қуювчи ўнлаб, юзлаб ирмоқлардан ўтар эканмиз, дарёлар, тоғ чўққилари, довонлар номини қўлимиздаги хариталарга қиёсан ён дафтаримизга белгилаб борардик. Мустабид тузум даврида чоп қилинган харитадаги қайси бир нуқтага қараманг қадим юртнинг асл номлари ўрнидаги Скалистий, Солсбери



каби чўққиларга дуч келардик. Онда-сонда шу юртнинг тарихи, табиати, этнографиясидан гувоҳлик берувчи ўзгармаган номлар ҳам учраб қоларди.

4137 метр баланддаги Найзатош довонига етмасдан чап томонимизда Яшилкўл пайдо бўлди. Унинг яқинидан ўтаётганимизда таникли қозоқ олими Абай Турсунов Оролнинг тузлари шундай олис тоғларга ҳам етиб келганини айтиб бош чайқаб қўйди. Абай оға юртимиз табиатининг беназир билимдони, ерсувимиз, гўзал тоғларимиз, чўлу саҳроларимиз ошиги.

Ўнг тарафимизда қорли чўққилар, Афғонистон худудлари. Ҳиндистон, Хитой, Афғонистон ва Марказий Осиё худудлари бир-бирига туташадиган шу жойда Амударёнинг катта ирмоқларидан бири бўлган Оқсув дарёси бошланади. У сув оладиган музлик шундай кўл узатсанг етгудек жойда. Унинг бир ёнидан эса Хитой тарафга Қораҷуқурсув бошланади. Афғонистондан бошланган Оқсув дарёси Тожикистон худудига ўтиб Қизилравот ва Шоймоқ деган манзиллар, сўнгра 5298 метр баландликдаги Оқсой тоги ёнлари оралаб, Тўхтамиш деган жойда Чештепадан келувчи Сулуистиқ дарёсига қўшилади.

У Сувбоши деган жойда ҳам Оқсув деб аталадию тоғлар оралаб шарқдан шимоли-тарбга бурилгач, номи ўзгариб Мурғоб дарёсига айланади. Унинг соҳилидаги шаҳар ҳам шу ном билан аталади. Мурғоб ўз йўлида яна қанчадан-қанча ирмоқларни қўшиб олади. Зилзила боис ҳосил бўлган Сарез кўлидан сўнг ҳам ҳатто Бартанг деб аталгунча ўз номини саклайди. Бартанг эса Панжга, Амударёнинг асосий ирмоғига келиб қўшилади. Бир дарёнинг битта ҳудудда бир неча ном билан аталишининг ўзиёқ бу жойларнинг этнографияси нечоғлик ранг-баранглигидан далолат бериб турибди.

Мурғоб Найзатош ва Оқбайтал довонлари ораглифида, ҳавоси экстремал шароитлардаги антиқа

шаҳар. Қўтосбоқар қирғизлар истиқомат қиласиди-  
ган шу шаҳарда бир оқшом тунаб ўтдик. Эрта тон-  
гда барвақт уйғониб, теваракка назар солдик. Ат-  
рофни абадий музликларга чулғанган тоғ чўққи-  
лари ўраб туради. Поёни йўқ тоғ тизмалари, ки-  
чик водийлар. 6233 метр баланддаги бир чўққи  
шўро зобитлари номига қўйилган экан...

Оқсувнинг муздек сувида юз-қўлимизни чаяр  
экансиз, Абай оғани дарёлар ва жой номларига доир  
саволларга кўмиб ташлайман. “Қаранг, Абай оға, да-  
рёларнинг бири Афғонистону Шарқий Туркистон-  
дан келаётган бўлса, бошқа бири шу жойнинг ўзи-  
дан Хитой тарафга оқиб ётибди,” дейман. Э, бунинг  
нимасига ажабланасиз, дейди у. Помир ва Тиёншон-  
да бундай дарёлар беҳисоб. Рангкўл, Шўркўл ва  
Қоракўл кўлларидан ўтганимиздан сўнг ҳали йўли-  
мизда Ўзбел ва Қизил Арт довонлари келади. Чапда-  
ги — собиқ даҳо номидаги 7134 метрлик чўққи-  
дан бошланган Маркансувни Қизил Артнинг бе-  
рисида кесиб ўтамиз. Маркансув у ёқдаги Қашғар  
дарёсига бориб қўйилади. Бизнинг Қозоғистонда-  
ги Или дарёси ҳам дастлаб Иссиқкўл атрофидаги  
тоғлардан бошланади-да, Урумчи тарафга қараб  
оқади, сўнг шарқ ва шимолга бурилиб Харгўш  
яқинида яна Қозоғистонга ўтади.

Абай оға айтган дарёлар, тоғлар, довонларни  
ошиб, Олой водийсидаги Саритош ва Эргаштомдан  
ҳам ўтдик. Оқшом чоғи то Ўшга етиб келгунимизга  
қадар Қизилсув ва Қашқасув дарёлари, Заря Востока  
ва Скобилов чўққиларини, Кичик Олой тоғи ва шу  
номдаги дарё, Қизилқўргон, Гулча деган манзиллар-  
ни, тоғлар тасбеҳининг бир-биридан гўзал гавҳар  
шодаларини ортда қолдириб ўтдик. Не-не чашмалар,  
ирмоқлардан тўхтаб сув ичдик.

Мен она Туркистон ҳудудининг бунчалар бу-  
юклигини ўшандада теран англаб етдим. Шу сафар

чоғи танишган қозоқ, қирғиз, тожик, туркман дўстларимиз эса бу юртнинг чин фидойиси эканларини ҳар қадамда намоён этдилар. Абай Турсуновнинг ўзи бир олам. Ҳамсуҳбат бўлсангиз дилингиз яйрайди. Йўқ, у қозоқча ўлан айтиб кулдирмайди, дўмбира чертиб юрагингизни сел ҳам қилмайди. Аммо Абай оғанинг битта ажойиб фазилати бор. Бу кишининг турган-битгани илм. Табиат, тарих, келажакка доир саволлардан бераверинг — теран мушоҳадали чин алломанинг илм дарёсидан чанқоғингизни босаверасиз.

Мен аввал Душанбеда, сўнг Хорўғ ва Ўшдаги илмий мунозаралар чоғида унинг чиқишиларини кузатар эканман, дунёнинг катта илм дарғалари билан беллаша оладиган, рус тилида шу қадар бийрон сўзлаб, баҳсларда Москваю Киевдан келган энг билагон туркистоншуносларни ҳам лол қилиб қўядиган чин олимни кўраман. Шу боис у киши билан учрашган заҳотим ўзим учун қоронги бўлган ниманидир сўраб олгим келаверади. Абай оға ҳеч вақт оғринмасдан, яна бунинг устига вазминлик билан ҳар қандай саволга холис жавоблар беради. Фақат аниқ факт ва далиллар билан сўзлайди. Туркистон табиатини, тарихини, иқлим ҳусусиятини бунчалик чуқур биладиган одамни ҳали учратмаганман. У кишини дафъатан уйғотиб Туркистоннинг қай бир дарёси, унинг қай бир ирмоғи ҳақида, заминда, ҳавода, иқлимда кечеётган жараёнлар ҳақида сўраманг, тайёр қомусни саҳифалагандек етук алломанинг фикр оламидан баҳраманд бўлаверасиз.

Мен Туркистоннинг чин фарзандлари ҳақида ўйлаганимда унинг бағридан бетиним оқиб ётган бир жўшқин ирмоқдай Абай оға кўз олдимга келади. Шундай ажойиб инсон билан бутун Туркистон ҳудуди бўйлаб давом етган икки ойлик экспедицияда сафардош бўлганимдан ҳали-ҳали суюниб юраман.

Бир сафар тонг маҳали Қизилурдадан йўлга чиқиб, буюк Қизилқумни қоқ ўртасидан кесиб ўта бошладик. Кун бўйи кум барханлари, саксовулзорлар оша роса йўл юрдик. Орол денгизи 80-100 чақиримлар шимолроқда ўзининг кузги салқинини уфуриб турарди. Оқшом чоги Қизилқумнинг Ўзбекистон ҳудудига ўтмоқчи эдик. Филдираклар қумга тиқилавериб анча вақтни бой бердик. Вақт ярим тунга яқинлашганда Чўпонқозғон деган бир манзилга етиб келдик. Самода юлдузлар шунчалар кўп эдики, ҳар бири тепангизда нақ “учар ликопча”дек осилиб турарди. Узатсанг қўл етгудек. Юлдузлар шу қадар яқин, шу қадар катталигидан юрагингиз ҳаприқади.

Осмон билан Ер шу қадар яқин ва, айни чорда, шу қадар йироқ эди... Мен болалигимда қишлоғим осмонинигина билардим. Қайдадир ёнгинамизда — чўл кўйнида Жайхундарё ҳайқириб оқиб ётганини хаёлан тасаввур қиласдим ва олис-олислар қадар чўзилган Ватан деб аталмиш улкан кенгликларни ҳам шууримга жойлардим. Энди ёшим улғайиб, Туркистон деб аталмиш улуғ Ватан сарҳадларини кезиб чиққач, унинг нақадар буюк ва бетимсол бир макон эканига иймон келтирдим.

Улуг маърифатпарвар Исмоилбек Фаспиралининг “Биз туркий ҳалқлар қадим-қадимдан Мармар денгизидан Хитой деворигача ёйилган йирик бир тарихий-этнографик бирлик ўлароқ яшаб келдик ва худди шундай яшамогимиз керакдир”, деган сўзларини эслаганда дилда ана шундай умумий Ватаннинг барча манзилларини қадамлаб кезиб чиқишига иштиёқ уйғонади.

Ўша оқшом экспедиция аъзолари қозоқ чўпонларининг ўтовларига беш-ўнтадан қўноқ бўлиб тунағани бўлиндик. Биродарларимиз бир зумда ўтовларига намат ёзиб дастурхонларини ясатиб юбордилар. Рус, украин, қозоғу туркман — етти-саккиз киши бир



ўтовга тушган эканмиз. Абай оғани даврабошлиқка сайлаб, чўпонлардан ҳол-аҳвол сўрагунимизча дастурхон шилпиддоғу қази-қартага, қимизу қимронга тўлиб кетди. Миллий удумга кўра қозоқ келинлари ҳам дастурхоннинг бир четидан жой олиб, меҳмонларга чойу қимиздан узатиб туришибди.

Шу куни Абай оғанинг яна бир фазилатини кашф этдим. Тошкентнинг Сирғалиси яқинидаги қишлоқда туғилиб ўсан, Москва ва Олмаотада ўқиб катта олим бўлган Абай оға ўзбек ва қозоқ уруғларининг қадимий қардошлиги тарихини мароқ билан ҳикоя қилиб берди. Айниқса, бу ҳикояларнинг биз ўша оқшом тунаган — эндиликда суви қуриб қолган Жанадафёнинг Оролга қуйилиш жойларида манзиллар тарихи билан, ўтмишда Хоразм ва Жанадарё оралиғидаги карвонлар қатнови, қабилалар биродарлиги билан боғлиқ жиҳатларини ҳали-ҳали эшигтим келади. Уларни ҳар эслагандан Қозогистоннинг бепоён чўлларидек кўнгли кенг ажойиб олим сиймоси кўз олдимда намоён бўлади.

Абай оға ўша сафар давомида бўлиб ўтган илмий мунозаралар чоғида Туркистон экологияси, келажакдаги иқлим ўзгариши билан боғлиқ муаммолар хусусида фикр юритиб, собиқ иттифоқнинг турли шаҳарларидан келган олимлар ва ижодкорлар диққатини Ер куррасидаги иқлимининг ўзгариш жараёнларига таъсир этувчи омилларга қаратган эди.

А.В. Шнитков деган олимнинг жаҳон тан олган тадқиқотларига кўра, қитъаларнинг иқлимий намгарчилик даври 1850 йиллик даврийликка бўйсунар экан. Астрономик омиллар таъсирида рўй берадиган бу давр Ер иқлимининг нисбатан энг кичик ёзги ўзгариш даврийлигига тўғри келаётир. Иқлимшунослик тарихида “кичик муз даври” деб аталган Ернинг сўнгги намгарчилик ва иқлим совуш даври эса икки мингингичи йилликнинг 15-19 асрларга тўғри кел-

тани маълум. Энди ана шу даврийлик қонунлари асосида Ер курраси қурғоқчилик ва исиб бориши даврига қадам кўйиши керак. Илмий тахминларга қараганда у кам деганда минг йил давом этади.

Шундай қурғоқчиликнинг бошланиш жараёнида 20-асрнинг етмишинчи йилларидан бошлаб атмосферанинг ис газлари, метан ва азот оксиди сингари заарли чиқиндилар билан кучли даражада ифлослана бориши боис мұхитнинг сунъий равишда исиши одамларни анча шошириб қўйди. “Парник газлари” деб ном олган моддаларнинг ҳавода ниҳоятда катта тезлик билан ёйилиши — 2030-йилларга келиб унинг миқдори ҳозиргидан деярли икки баробар ошиб кетиши эҳтимоли Ер атрофи иқлимини айрим ҳисоб-китобларга кўра тахминан уч даражага ошириши мумкин.

Аслида иқлимининг бундай тез исиб кетиши жуда катта муаммоларни келтириб чиқариши мумкин. Арктика ва Антарктидадаги Ернинг “муз қалпоқлари”, Гренландия ва бошқа ороллардаги музларнинг эриши оқибатида жаҳон океанида сув сатҳи кўтарилиб кетади. Ернинг кўпгина қисмидаги аҳоли тифиз жойлашган соҳил бўйлари сув остида қолади. Тоғлардаги чўққиларнинг муз қалпоқлари очилиб, улар атрофи ҳам қурғоқчиликка юз тутиши мумкин. Шундай шароитда лалмикор ғаллачилик даромад бермайдига соҳалардан бирига айланиб қолади.

Бу муаммо жаҳон иқлимшуносларининг жуда кўплаб ҳалқаро анжуманларида қайта-қайта мұхокама қилиниб, 1992 йили Рио-де Жанейрода ўтган экология форумида атмосферага ёмон таъсир этувчи газларни чиқаришни чеклаш тўғрисида маҳсус Конвенция қабул қилинишига сабаб бўлди.

Абай Турсуновнинг нуқтаи назарига кўра, “парникили исиш” концепциясида иқлим ўзгари-

шига геофизик факторларнинг таъсири етарли даражада ҳисобга олинмаган. Масалан, катта вулқонлар, Орол сингари қуриёттган кўл ва денгизлар тубидан атмосферага кўтарилаёттган тўзонларни булутларга, иқлим ҳосил бўлишига таъсири эътибордан соқит қилинган.

Абай оға Туркистон табиатидаги ҳар бир ўзгаришни миридан сиригача тадқиқ қилиб борувчи олим сифатида ўз илмий ишлари йўналишини мана шу масалаға қаратди. 1995 йили Тошкентда Оролни асраш муаммолари юзасидан бўлиб ўтган халқаро анжумандан ана шу тадқиқотлари юзасидан катта илмий маъруза билан чиқди. Ўз қарашларини жаҳоннинг турли мамлакатларидан келган олимлар олдида илмий жиҳатдан асослаб берди.

Аввало, сўнгги 160 минг йил мобайнида Ер иқлимига доир миқдорий кўрсаткичларнинг аниқлангани ҳозирги замон фанининг энг катта ютуқларидан ҳисобланади, деди у. Бироқ сўнгги йилларда қитъалар заминидан кўтарилаёттган катта миқдордаги қаттиқ аэрозоллар (чанг-тўзон) ҳамда уларнинг оғир таъсирида булутларнинг пастлаб сузиб юриши сабабли муҳитда янги-янги ўзгаришлар содир бўлмоқда.

Табиатнинг кутилмаганда юз бераёттган ҳодисалари ўз хусусиятлари жиҳатидан Мексикадаги 1982 йилги Эл-Чичон, Тинч океанидаги 1963 йилги Агунг ва бошқа шу сингари ўнлаб вулқонлар отилишидан сўнг атмосферада содир бўлган ўзгаришларга айнан ўхшаб кетади. Шуниси характерлики, Каспий денгизидан ажратилган Қорабўғоз кўлининг қуриши ва Орол денгизи сувининг денгиздан қочиши оқибатида ҳавога кўтарилиган узлуксиз чанг, тўзонлардан сўнг ҳам бу жойларнинг таъсир доирасидаги иқлимда шу сингари ўзгаришлар кузатила бошлади.

Ёғин-сочинлар даврийлигига бўлаёттган ўзгаришларга ҳаммамиз гувоҳмиз. Тоғ чўққиларига қўнган

гард-губорлар таъсирида абадий музликлар нисбатан тез эриб, дарёларда сув кўпайди, ҳатто баъзи йилларда кучли намгарчилик ҳам кузатила бошланди. Бино-барин, чанг-туз ҳолидаги қаттиқ қумли тўзонлар атмосферанинг қуви қатламларида тўпланиб қолиши оқибатида пастлаб ўтувчи булутлар миқдори купаймоқда. Куёш нурларини тўсувчи янги қатламларнинг ҳосил бўлиши билан боғлиқ бу жараёнлар атмосферанинг исиб кетишига эмас, балки аксинча совушига олиб келаётир. Ҳатто Форс кўрфазидаги нефт конларида, шунингдек Чеченистондаги урушлар оқибатида юз берадиган ёнгинилар ҳам атмосферанинг иқлим ҳосил қилувчи факторларига кучли даражада таъсир кўрсатмоқда.

Шунга кўра айтиш мумкинки, учинчи минг йилликнинг биринчи ўн йилликларида Марказий Осиё иқлимида бўладиган ўзгаришлар бизнинг сунъий вулқонларимиз — Орол денгизининг бир қисми ва Қорабўғоз кўли осмонида содир бўладиган атмосфера жараёнларига боғлиқ ҳолда кечади. Шундан сўнг эса Ер курраси атрофида ҳаво оқимларининг айланиши ва уларнинг бир-бирига қўшилиши билан боғлиқ жараёнлар таъсирида бу вазият ўзгариши мумкин.

Ер иқлимшунослиги тарихида атмосферанинг бундай жараёнларга боғлиқ ҳолда ўртача бир даражага совуш даврийлиги 20-30 йилдан ортиқ давом этмаган. Икки ва уч даражадан ортиқ совушлар эса кучли геофизик ва астрономик омиллар таъсирида рўй берабиб, 500-1000 йилларга чўзилган. Ер биосистемалари нисбатан секин ўтадиган бундай ўзгаришларга эҳтимол аста-секин мослашиб бориш ҳам мумкин.

Лекин барибир ҳавонинг исиб кетиши сингари совуб кетиши ҳам безиён эмас. Бошланган намгарчилик даври атмосферадаги турли таъсирлар доирасида эллик-олтмиш йилларга чўзилиши эҳтимолини ҳам

назардан соқит қилиб бўлмайди. Ҳавонинг кўпроқ совуш таъсирида бўлган Помир ва Тиёншон тоғ тизмаларидағи кичик дарёлар музликларнинг тез эри- маслиги оқибатида камсув бўлиб қолиши ёки бутунлай қуриш хавфи ҳам бор. Бу ўша дарёлар атрофидаги текисликларда курғоқчилик хавфини тұғдиради.

Абай оға ўз маърузасини “Биз эндиги тадқиқотларимизни ана шу масалаларни ойдинлаштириб, олдиндан зарур чоралар қўллай билишга қаратмоғимиз керак”, деб якунлади. Аңжуман аҳли олимнинг илмий жиҳатдан аниқ ва пухта далилланган мулоҳазаларидан катта қониқиш ҳосил қўлди. Мен эса юртимиз, бетимсол табиатимизнинг шундай зукко билимдонлари, Туркистоннинг фидойи фарзандлари кўплигидан кўнглим ифтихорга тўлиб, алломани ҳайрат ва ҳавас билан кузатардим.

Она Туркистонимизнинг фидойи фарзандлари оз эмас. Фақат улар бугун замон руҳидан, давр даъватидан келиб чиқиб, бир-бирларига янада яқинроқ бўлишлари, қўлни-қўлга бериб умумий, ягона Ватанимизнинг эртанги кунини яратишлари зарур. Ана шунда Туркистоннинг келажаги шубҳасиз буюк ва бетимсол бўлади.

Бу ҳақиқатни чукур англаб етган шундай фидойи фарзандларни мен “Диёнат” романида она табиатимизнинг фидойи жонкуяри Нормурод Шомуродовдек зукко олим образини яратган машхур адабимиз Одил Ёқубов, таникли тожик публицисти Маъсуд Муллажонов, атоқли қорақалпоқ адаби Ўрозбой Абдураҳмоновлар мисолида ҳам кўраман. Собиқ иттифоқ даврида 1988 йилги нуфузли Орол илмий сафарини уюштирган зўр ташкилотчилардан бири Маъсуд Муллажонов эди. У ўша пайтда “Помир” журналининг бош муҳаррири сифатида собиқ иттифоқ пойтахтидаги не-не залворли эшикларга бош уриб најот тополмагач, ахийри “Новый мир” журнали-

нинг бош муҳаррири, ёзувчи Сергей Залигин ҳузурига далил кириб: “Мен иттифоқ кўламида Орол илмий сафарини ташкил қиласяпман, шу ишга бош кўшинг ва экспедицияга раҳбарлик қилинг” деган таклифни айтади. Асослари, далиллари, таклифлари пишиқ-пухта эди. Ниҳоят, Сергей Залигин журнал масъул котиби Григорий Резниченко илмий сафарга раҳбар қилиб юборишга розилик беради.

Абай оға сингари Маъсуд Муллажонов билан ҳам ўша сафар чоги танишган эдим. Мана орадан йиллар ўтди. Замон ўзгарди, одамлар ўзгарди. Эҳтимол, кимларнингdir қараашлари, нуқтаи назарлари ҳам ўзгаргандир. Бироқ, эрта бир кун биз бўлмасак, бизнинг авлодларимиз, албатта, Орол денгизини тиклайдилар, деб қаттиқ ишонган Абай оға, Тошкентни туркӣ ҳалқларнинг ўзига хос Маккаси деб билган Тўлапберган Қайипберганов, Маъсуд Муллажонов, Ўрзобой Абдураҳмонов сингари Туркистоннинг фидойи фарзандлари ҳамон ўша-ўша. Улар улуғ Туркистонни бирлашган, ҳалқларимиз бир ёқадан бош чиқариб метин қояга айланган, дарёларимиз сувга тўлиб оққан, заминимиз гарду губорлардан тоза, осмонимиз мусаффо бўлган ҳолда кўрмоқни истайдилар.

Бири улуғ Абайдан, яна бири Бердақ шоирдан, бошқаси мавлоно Жомийдан сўз очиб, ҳаммалари Навоий каломини муборак билган азиз одамлар! Уларнинг ҳар бирини юртимизнинг тиниқ бир ирмогига менгзагим келади. Улуғ Туркистоннинг буюк дарёлари шундай ирмоқларнинг тоза мавжлари бир-бираiga қўшилуви, бирлашувидан ҳосил бўлади.

Танҳо ва бетимсол Ватанимиз ана шундай буюк дарёлар шиддатидан куч-кудрат олади.



## САРЕЗ КЎЛИ МАДАД СЎРАЙДИ

Помир тоғлари бағрида жойлашган Сарез кўли хақида эшитмаганлар кам. У 1911 йилнинг 19 февралидан 20 февралялига ўтар кечаси кучли зилзила туфайли вужудга келган. Помирнинг Тоғли Бадахшон автоном вилояти худудидаги зилзила боис юксак тоғлар бағридаги Мурғоб водийси ёнбағирларида тоғ ўпирлиб, Усой қишлоғига тарихда мисли кўрилмаган кўчки тушди. Кўчки Мурғоб дарёсини бутунлай тўсиб қўйди ва жаҳонда энг йирик сунъий тоғ кўли ҳосил бўла бошлади.

Помирнинг марказий қисмида жойлашган бу кўлни шимолдан Олой орти, жанубдан Ҳиндикуш, шарқдан Кошғар, ғарбдан эса Лолатоғ ўраб туради. Ҳозирги пайтда Сарез кўлида 17 куб километр сув йиғилган.

— Кўлнинг дарё, сел сувларига тўлиши ва улкан миқдордаги обиҳаёт кўчки ҳосил қилган тош-тупроқ тўғоннинг у ер-бу еридан сизиб чиқиши натижасида атрофда бошқа кўллар ҳам ҳосил бўлаётир, — дейди 1998 йили Ўзбекистон томонидан юборилган маҳсус экаспедиция аъзоси Николай Горелкин. — Ана шу сафаримиз давомида биз тўғон ва унинг атрофларида бир неча жойда маҳсус ускуналар ўрнатиб лаборатория тадқиқотлари олиб бордик. Тўғонда ҳосил бўлаётган хавфли ёриқларни кузатдик.

Ўзбекистон бош гидрометерология хизматининг илмий ходими Николай Горелкин сув омборлари хавфсизлиги бўйича мутахассис. Унинг айтишича, тоғларда шу сингари турли табиий жараёнлар, зилзилалар туфайли ҳосил бўлган катта-кичик кўллар беҳисоб. Уларнинг очилиб кетиш ҳоллари ҳам рўй бериб туради. Бундан бир неча йил муқалдам Шоҳи-



мардонсойда ҳосил бўлган шундай кичик қўлчанинг очилиб кетиши қандай фожиаларга олиб келгани ҳамманинг ёдида.

Сарез кўли эса йигилган сув микдорига кўра бир неча бор катта бўлиб, у Амударёнинг қуи қисмида жойлашган шаҳарлар ва 5 миллиондан ортиқ аҳоли учун жуда катта хавф туғдиради. Чунки муттасил текшириб борилаётган қўлнинг ҳолатида кўп йиллардан бери барқарорлик сезилгани йўқ. Унинг гидромелиоратив аҳволи турғунлашмаяпти.

Шу соҳа бўйича яна бир мутахассис — “Гидролойиҳа” муассасаси директори, “Планета” халқаро нодавлат ва нотижорат ташкилотининг Сарез кўлидаги табиий тўғон очилиб кетишига таҳдид солувчи хавфни камайтириш бўйича ташабbus гуруҳи тайёрлаган лойиҳа раҳбари Сергей Жигарев берган маълумотларга кўра, Сарезнинг очилиб кетиш хавфини бартараф этиш учун шу бугунданоқ саъй-ҳаракат бошламоқ зарур. Акс ҳолда ҳар бир кун кеч қолиш сари қўйилган қадам бўлиши мумкин.

Ҳозирча, хавфни бартараф этишнинг тезкор лойиҳаларини яратишга доир иккита фоя илгари суримоқда. Уларнинг биттаси сув юзасида сузиб юриб ишловчи насос станциялари қуриб, қўлдаги сувни улкан қувурлар орқали тўғон ортидаги дарёга оқизиши кўзда тутади. Бу усулнинг кулайлиги шундаки, агар улкан қувурлардан сув чиқаётган жойда кичик гидроэнергетика ускуналари ўрнатилса, насосларнинг ишлаши учун зарур электр қувватини унинг ўзидан олиш мумкин. Узоқ жойлардан электр симлари тортиб келишга ҳам ҳожат қолмайди. Фақат бир муаммо бўлиши мумкин, у ҳам бўлса насосларни ишлатиб юбориш учун зарур бўлган дастлабки электр қуввати. Уни шу жойда дизел дивигателлари ўрнатиб, олиш мумкин. Шундай қилинса, қўлдаги сув сатҳини ханф туғдирмайдиган даражагача пасайтириш имкони бор.

Иккинчи таклиф Сарез кўли ён-атрофидан туннел қуриб унинг сувини оқизиш. Бу режанинг мурракаб жиҳати шундаки, туннел қазиш учун баъзи тоғ жинсларини портлатишга тўғри келади. Бу эса ниҳоятда хавфли, у мавжуд табиий тўғоннинг ўз-ўзидан очилиб ёки силжиб кетишига олиб келиши мумкин.

Сарез кўли хавфини бартараф этиш, аввало, беш миллион аҳоли истиқомат қилаётган ҳудудларни тошқин балосидан халос этса, иккинчидан, кейинги йилларда сув танқислиги бот-бот юз бериб турган Марказий Осиёning собиқ чўл жойларида янгидан ўзлаштирилган зироатчилик майдонларини обиҳаётга сероб қилиш имконини беради. Бундан ташқари, Орол дengизининг қуриши билан боғлиқ экологик фожиа ҳудудларидаги санитария аҳволи бирмунча мўътадиллашади. Чунки Сарез кўли сувини аста-секинлик билан босқичма-босқич Бартанг дарёсига оқизиш ва у орқали Амударё ҳавзасини мўл-кўл обиҳаёт билан таъминлаш, охир-оқибатда, кўхна Жайхуннинг кўйи қисмида янгидан тикланаётган эски кўлларни тезроқ сувга тўлдириш имкониятини яратади.

Сўнгти қирқ йил мобайнида Орол дengизи ҳавзасида сугоришнинг ниҳоятда самарасиз усуслари кўлланиши ва бу тажрибанинг амалда яроқсизлиги жаҳонда қитъа ичидаги сув ҳавзалари орасида катталиги жиҳатидан тўртинчи ўринда турувчи Орол дengизи майдонининг кескин қисқариб кетишига олиб келди. Бир пайтлар Мўйноқ билан Қозогистоннинг Орол шаҳарлари ўртасидаги салкам минг километрлик очиқ дengизда йирик кемалар, замонавий теплоходлар қатнаган, неча миллион тонналаб балиқ тутилган. Бу дengиз эндиликда сувининг шўрлигидан тирик ҳужайра ҳам яшай олмайдиган сассиқ кўлга айланиб қолди. У шўролар тузумининг тарих олдида-



ги кечирилмас гуноҳларидан биридир. Миллионлаб одамларнинг ўз тирикчилик манбаидан маҳрум бўлиб қолиши XX асрда инсоният бошига тушган энг катта фалокатлар билан баробар, десак асло муболага бўлмайди.

Хозир денгизда қирқ йил аввалги сувнинг борйғи 15 фоизигина қолган, унинг сатҳи эса 23 метрга тушиб кетган. Оқибатда 50 минг квадрат километрлик катта ҳудудда Оролқум деган янги саҳро вужудга келди. Мазкур экологик фожиа денгиз ҳавзасидаги тирикчилик асосини барбод этиб, ичимлик сув танқислигини, нафас йўли ва буйрак-жигар хасталиклари, камқонлик ва ирсий заифлашувни келтириб чиқарди. Оналар ва болалар саломатлигини издан чиқарди. Денгизнинг қуриган тубидан кўтарилаётган тузли кум зарралари наботот оламига қирон солиб, ҳосилдорликни тушириб юборди. Яйловлар маҳсулдорлиги пасайиб, барқарор дехқончиликка путур етди.

Мустақиллик йилларида Марказий Осиё давлатларининг биргаликдаги саъй-ҳаракатлари билан бу оғир экологик фожиа асоратларини имкон қадар бартараф этиш йўлида муайян тадбирлар амалга оширилмоқда. Ўзбекистоннинг денгизга туташ қисмидағи Чучуксув (Судочье), Жилтирбош, Балиқчи, Мўйнок, Дарёлар оралиғи, Мақпалкўл каби кўпгина табиий кўллар тикланди. Жаҳон банки ҳам бу борада ўз ҳомийлик ёрдамини кўрсатмоқда. Оролни кутқариш ҳалқаро жамғармасининг GEF (Глобал экологик жамғарма) агентлиги лойиҳалари асосида мазкур кўлларни денгиздан ажратувчи тўғонлар барпо этилгани олtingга тенг обиҳаётнинг бесамара кетиши олдини олмоқда. Бунинг натижасида Амударё ва Сирдарёнинг денгизга қуйиладиган ҳавзаларида сунъий кичик денгизлар вужудга келди.

Денгизнинг қуриган тубида ўрмончилар ва ҳалқаро “донор”лар ёрдамида янги бутазор ва саксовул-



зорлар барпо қилинмоқда. Чучуксув ва Кўкорол (Қс юғистон) кўллари қайта тикланиши, янги сунъий ўрмонзорларнинг барпо этилиши билан Балиқчилик ва овчилик аста-секин оёққа турмоқда. Табиат мувозанатининг узилган халқалари тикланаётгани боис қитъалараро учиб юрувчи кўчар қушлар ҳам ўз табиий миграция ҳудудларини адашмай топиб келмоқдалар.

Ана шу жараёнда Помирнинг юксак тоғлари бағрида хавф солиб турган Сарез кўлининг суви Орол ҳавzasига қисман оқизилиши она табиат мувозанатининг тикланишини бир қадар жадаллатиши ҳам мумкин. Бироқ бу иш жуда катта маблагни, кўплаб манфаатдор ва ҳомий ташкилотларнинг бир ёқадан бош чиқаришларини тақозо этмоқдаги, бундан тўрт йил аввал тузилган “Планета” халқаро нодавлат ва нотижорат ташкилоти Марказий Осиёдаги ва планетанинг бошқа ҳудудларидаги барча тараққий парвар инсонларни ана шу олижаноб ишга даъват этмоқда.

Унинг ташаббуси билан манфаатдор ташкилотлар ҳамкорлигида Сарез кўли муаммоларига бағишлаб анжуманлар ўтказилмоқда. Жамоатчилик кўлнинг ҳозирги гидрогеологик аҳволидан огоҳ этилмоқда.

— Атроф-муҳит муҳофаси, табиий ва фавқулодда техноген вазиятлардан аҳолини огоҳ этиш сингари эзгу мақсадларни рўёбга чиқаришда Фавқулодда вазиятлар вазирлиги, ҳаво ва табиий муҳит тозалигини назорат қилувчи муассасалар билан ҳамкорлик қилмоқдамиз, — дейди “Планета” халқаро ташкилоти президенти Исмоил Қаландаров. — Сайёрамизни бирталикда асрар асосий шиоримиз. Сарез кўлининг очилиб кетиш хавфини камайтириш бўйича лойиҳа эса мамлакатимиздаги етакчи муассасалар ҳамкорлигида ишлаб чиқилмоқда.

Ўз олдига беғубор муҳитимизни муҳофаза қилиш, габиий бойликлардан тежамли фойдаланиш, соғлом



турмуш тарзига эришиш йўлида саъй-ҳаракат кўрса-тишни мақсад қилиб қўйган мазкур ташкилот одамлар интеллектуал салоҳиятини ошириш, жамият ҳар бир аъзосининг ўзига муносиб шароитларда яшашига кўмаклашиш борасида ҳам жон куйдирмоқда.

Бу йўлдаги асосий вазифа инсониятнинг эзгу мақсадли тараққийпарвар кучларини она сайёра экологиясига хавф солаётган таҳдидларни бартараф этишга сафарбар этмоқдир.



## **ОЛИСДАГИ ...СУВ**

### **У бизнинг муаммоларимизни ҳал этадими?**

#### ***Коса танидаги “нимкоса”***

Хурматли Нусрат ака!

Сиз бир вақтлар Табиятни муҳофаза қилиш қўми-  
тасида Сибир дарёлари сувини Марказий Осиёга  
оқизиш лойиҳаси муҳокама қилинишида иштирок  
этганингиз каби, камина ҳам ўша кезлари мазкур  
войиҳани рӯёбга чиқаришга жалб этилган нуфузли  
сув хўжалиги идораси раҳбари билан “Ўзбекистон ада-  
биёти ва санъати” саҳифаларида қилган суҳбатим  
эсимда. Ўшанда сизу биз эмас, жуда кўпчилик бу  
войиҳа амалга ошса, кечикиброқ бўлса ҳам Орол му-  
аммосини ҳал этади, деб ўйлашган. Бироқ кейинроқ

*Ушбу мақола таниқли ёзуви ва публицист Нусрат Раҳматнинг “Саҳрода олмалар гулласа ёмонми? Ёки эски лойи-  
ҳага янгича назар” сарлаөхали мақоласи билан бирга “Ўзбекистон адабиёти ва санъати” ҳафталигининг 2007 йил 2 март сонида “Бир мавзуда икки фикр” рукнида эълон қилинган. Нусрат Раҳмат мақоласида “Мана, орадан иштирма иши ўтди: тузум ўзгарди, дунё-  
қарашларимизда инқилобий ўзгаришлар содир бўлди. Энди мазкур лойиҳага ўзгача нигоҳ билан, аниқроғи ўз манфаатларимиз ва бу-  
гунги ҳамда келажак авлод нуқтаи назаридан қарашимиз, баҳо бе-  
ришимизга тўғри келади”, деган мулоҳазани илгари суради ҳамда мақола сўнггида: “Каминани хаёлпаратликсда айбламанг-у, Қизил-  
қум бағридаги сув ҳавзалари — шовуллаб ётган боғ-роғларни биз кўрмасак, келажак авлодлар кўришини том маънода ҳис қилиб ту-  
рибман. Бу борадаги фикрларим нисбийлигини ҳам биламан ва муҳ-  
тарам газетхонлар ўз мулоҳазалари билан ўртоқлашишларини ис-  
тайман”, деб ёзади.*

маълум бўлдики, Сибир сувларининг бир қисмини тобора қуриб бораётган дентизни асраб қолиш учун эмас, иложи борича уни тезроқ қуритиб, очилиб қолтган ерларга ҳам пахта экиш учун Марказий Осиёга буриш кўзда тутилаётган экан. Бу сир “Орол — 88” илмий экспедицияси чоғи фош бўлган, унинг харитаси Қизилурда ва Москвада олимлару адиллар иштирокидаги анжуманларда жамоатчилик эътиборига ҳавола қилинганди.

Демак, ўша лойиҳанинг барбод бўлишига унинг керагидан ортиқ муҳокама этилгани ёхуд Сергей Залигин каби адид ва экологларнинг қарши турганигина эмас, “коса тагидаги нимкоса”, яъни Оролни ўлимга маҳкум этиб, қирқ миллион аҳоли истиқомат қилаётган ҳудуд экологик фожиага юз туттирилгани ҳам сабабдир, десак тўғрироқ бўлади. Чунки мазкур лойиҳа бошида ҳам, Оролнинг қуриган жойларига пахта ва шоли экишни режалаштирганлар тепасида ҳам бир ташкилот — собиқ иттифоқ Сув хўжалиги вазирлигининг ҳукуматдан миллиард-миллиард маблағларни ўндириш ва бу маблағни турли важ-карсоғлар билан талон-торож қилишга устаси фаранг бўлган бир гурӯҳ нафси наҳанглари тургани ошкор бўлиб қолган эди. Собиқ иттифоқ шу каби таваккалчилик билан тузилган самараси ноаниқ улкан лойиҳалар, ҳарбий истеҳкомлар қуришга маҳлиё бўлган ўша кезларда Ўзбекистон каби азал-азалдан ер-сув асосида деҳқончилик қилишга ихтисослашган республикалар аҳоли жон бошига гўшт-сут ва мева-чева истельмол қилиш миқдори бўйича энг охирги ўринлардан бирига тушиб қолгани ҳам мана шу фирром сиёсат билан боғлиқ эди.

Таваккалчилик, дедик. Фикримиз исботсиз бўлмаслиги учун эътиборингизни бир манзарага жалб этмоқчиман. Камина 1991 йилнинг 14-20 август кунлари Молдовада чиқадиган “Ана сўзу” газетаси юби-



лейи муносабати билан гагауз журналистлари таклифига кўра Бессарабия ҳудудларида бўлган эдим. Ўшанда “Гагауз ери”нинг кўп жойларида сувсиз ётган бетон каналлар ва «Дунайводстрой» деган ёзувларга кўзимиз тушганди. Маълум бўлишича, Молдованинг, Гагауз ерларининг табиий ҳолда ҳам мўл ҳосил бераётган лалми деҳқончилигидан қаноатланмаган собиқ иттифоқ тўралари бу жойларда суформа деҳқончиликни йўлга қўйиш учун Дунай дарёсининг beminnat сувидан фойдаланиш лойиҳаларини тузишган экан. Шу мақсадда қанчадан-қанча маблағ сарф этилиб, юзлаб километрлик улкан каналлар курилибди. Сув очилгач эса, унумдор ерлар шўрлаб кета бошлабди. Чунки дарёларни дуч келган томонга буриб, маблағларни кўкка совуриш машқини олган шоввозлар канал битгунга қадар ҳам Дунай суви суғориш мақсадларига нечоғлик тўғри келиш-келмаслигини ўрганиб кўрмаган эканлар. Шу боис хориждан валютага келтирилган ноёб техника ускуналари дуч келган жойда сочилиб ётарди.

Энди сизнинг Об канали Оролбўйида ичимлик сув муаммосини ҳал этади, деган фикрингизга келсак, шуни айтмоқчиманки, аввало, Сибир суви то Оролбўйига келгунча деҳқончилик учун нечоғлик яроқли бўлиш-бўлмаслиги мавхум бўлиб турган бир пайтда унинг ичимлилик даражаси қандай бўлиши ҳақида олдиндан бир нарса дейиш қийин-ов. Фақат шу нарса аёнки, ҳатто 200-300 километрлик яқин масофа-ларга қувурлар орқали олиб борилаётган сувнинг ҳам таркиби ўзгариб қолаётир (Бетон ва темир қувурлар занги улардан оқаётган сув таркибига таъсир этар экан). Буни ҳисобга олмаслик мумкин эмас. Буларни айтишдан мақсад шуки, икки ярим минг километрлик масофа — чўлу сахро, турли конлар атрофидан ўтадиган Об канали суви таркиби ва тозалик даражасига кўра бизга қай ҳолда етиб келиши номаълум.



Йиккинчидан, бу сув билан деҳқончилик қилиш мумкинлиги ўз исботини топганми? Ишончим комилки, сиз мақолангизда лойиҳанинг камчилиги сифатида тилга олган — саҳродан ўтган канал сувининг кумларга сингиб, ҳамма ёқни кўлу ботқоқликка айлантириб юбориши лойиҳачилар томонидан ҳисобга олинмагани каби минглаб километрдан оқиб келадиган бу сув деҳқончиликка нечоғли яроқли бўлиш-бўлмаслиги ҳам ўрганилмаган. Бинобарин, унинг ичимлик сув сифатидаги тозалик даражаси ҳакида ҳам олдиндан бир нарса дейиш қийин.

Ўзанлари бетонланмаган канал саҳроларда ботқоқликлар ҳосил қилиши мумкинлиги юзасидан сиз айтган фикрларга яна шуни ҳам қўшимча қилмоқчиманки, бу манзарани биз ҳозирнинг ўзида Қорақум канали мисолида рўй-рост кўриб турибмиз. Амударёнинг катта миқдордаги сувини ютиб юбораётган бу канал бошланишидан то асосий ўзанига тушгунча бир неча квадрат километр кенгликни сувга бостириб, қанчадан-қанча қимматбаҳо обиҳаётнинг қумга сизиб, беҳуда исроф бўлишига олиб келмоқда. Дарёдан олинаётган сувнинг ярми ҳам асосий ўзанга тушаётгани йўқ... Сиз эътироф этаётган Об канали трассасида ҳам тоғдай-тоғдай келадиган қум бархалари орасида шундай кратерсимон чуқурликлар мавжудки, янги канал сувининг ҳаммасини очиб қўйсангиз ҳам улар асло тўлмайди... Токи шундай экан, яна бир Қорақум каналига ҳожат бормикан?

Ер юзида ичимлик сув тўлиб-тошиб ётгани йўқ. Шу боис бутун жаҳонда ва хусусан Ўзбекистонда ҳам уни тежаб сарфлаш юзасидан муҳим дастурлар амалга оширилмоқда. Бугунги тараққиёт шуни кўрсатмоқдаки, бугун, эртага, келажакда ичимлик сув муаммоси билан жиддий шуғулланишимизга тўғри келади. Шунинг учун биз ҳозирданоқ уйимиздаги кувурларга беминнат келиб турган қимматбаҳо обиҳаёт-

нинг ҳар қатрасини тежаб ишлатиш машқини олмомиз ва фарзанду набираларимизни ҳам оқар сувни кўз қорачиғидек сақлашга ўргатмоғимиз зарур.

## *Суб ҳам Аллоҳнини немати-ку!*

Ҳурматли Нусрат ака! Сиз, эндиликда мазкур лойиҳага янгича нигоҳ билан қараб, Сибир сувларидан жаннатмакон юртимизнинг чўлу саҳроларини янада обод қилиш мақсадида фойдаланиш мақсадга мувофиқ, деган нуқтаи назарни илгари сурмоқдасиз. Фикрингизга қўшилувчилар кўп. Бироқ лойиҳага шу мақсадда ёндошганда ҳам қатор муаммолар келиб чиқаётгани қизиқ. Биринчидан, жаноб Лужков Сибир дарёлари сувининг бир қисмини Марказий Осиё томон оқизиб, фақат ер ўзлаштириш, одамларни ишли ва уйли-жойли қилиш, Осиёнинг beminnat қуёши тафтида пишадиган мўл-кўл неъматлар етиштиришга биз ҳам ҳисса қўшайлик, деяётгани йўқ. У Сибирнинг сувини ҳам худди газ ва нефт сингари сотиб, ундан катта даромад олайлик, демоқда. Тўғри, нефт ва газни сотиб даромад олишни бир қадар тушуниш мумкин: чунки, конларни қидириб топиш, ёнилгини ер остидан юзага чиқариш ва улкан корхоналар қуриб уни тозалаш ҳамда магистрал қувурлар қуриб, истеъмолчига етказиб бериш ишлари учун катта-катта харажатлар талаб қилинади. Эҳтимол, сувни ҳам шу каби бир ҳудуддан иккинчи бир ҳудудга етказиб бериш учун канал ва улкан насос станциялари қуриш ва уларнинг эксплуатация харажатларини нима-нингдир ҳисобига қоплашга тўғри келар. Бироқ жаноб Лужковнинг бу гапидан илҳомланган баъзи сиёсатдонлар ҳозирданоқ табиатнинг буюк инъоми бўлган обиҳаётни товарга айлантириб сотишни таклиф этмоқдалар. Шу мақсадда қандайдир корпорациялар тузилмоқда. Қаранг-а, каналлар, насос стан-



циялари куриб олиб келинган ёки шишаларга қадоқланган сувни эмас, инсоният пайдо бўлмасидан ҳам бурун дарёлардан ўз ҳолича оқиб ётган Аллоҳнинг beminnat неъматини сотиб, даромад олишни кўзлаётгандар чиқиб қолишиди. Ахир хоҳлаганингизда ҳам дарёларни тўсиб, бир жойда абадий сақлаб кўйишнинг иложи бўлмаган, ўз ҳолича денгизлар сари оқиб ётган сувга ҳам кимдир моддий манфаат илинжида кўз тикмоқда. Бу инсониятнинг маънавий ақидала-рига нечоғлик тўғри келади? Инсоният пайдо бўлма-сидан ҳам бурун дарёлардан ўз ҳолича оқиб ётган Аллоҳнинг бу beminnat неъматини пуллашни ўйлаш гуноҳи азим эмасми? Бунга нима дейсиз?!

Бу ҳақда ўйлаганда, жаноб Лужковнинг Сибир сувларини Марказий Осиёга оқизиши тўғрисидаги эски лойиҳага доир “янги” гаплари аслида “сувни товарга айлантириш” ғоясини олға суриш учунгина айтилмадимикин, деган ўй ҳам келади хаёлга.

Сибир дарёлари суви сотиладиган бўлса, уни ҳарид қилишга кетадиган маблағларни, сиз мақолангизни бир ўрнида жуда топиб айттанингиздай, сувдан тежаб-тергаб фойдаланиш имконини берувчи технологияларни қўллашга сарф этсак, ҳар жиҳатдан мақсадга мувофиқ бўлмайдими? Ахир ҳалқимиз: “икки ўн беш — бир ўттиз” деб бежиз айтмайди-ку!

Сувдан тежамли фойдаланиш усувлари ҳозир бутун дунёда урф бўлмоқда. Бу борада Истроил технологияси ҳаммага қўл келаётир. Истроилликлар томчилитиб сурориши усулинини қўллаш орқали куриб битаёзган бир неча ўлик дарёларига қайтадан ҳаёт бағишлидилар. Уларнинг соҳилларида бир неча минг гектарлик курортбоп истироҳат боғлари вужудга келган. Бу тажриба ҳозир ҳамма жойга кенг ёйилмоқда. Муаммо шундаки, бу технологияни бизда қўллаш маълум харжатларни тақозо этади. Биз бугун бўлмагани билан, барибир, эртага, сиз ўз мақолангизда келтир-



ган миссисипилик фермер Фред Балларднинг пахтазори ёхуд Истроил экинзорларида бўлгани каби сувдан тежаб фойдаланиш имконини берувчи замонавий усулларни қўллашга ўтамиз. Бу ишда фермер деҳқонларимиз оғирини енгил қилиши мумкин бўлган жиҳат шундаки, томчилатиб ёки ер остидан сувориш усулларини қўллаш учун зарур бўлган қимматбаҳо пластмасса қувурларни эндиликда хориждан сотиб олишга зарурат қолмади. "Шўртангаз" кимё мажмуи буюртмага қараб бундай қувурлардан исталган миқдорда тайёрлаб бериши мумкин. Боз устига шундай замонавий газ-кимё комплексларидан яна бирини Қорақалпоғистон ҳудудида ҳам барпо этишга киришилмоқда.

Аслида сувни экинларга томчилатиб беришга доир Истроил технологияси ҳам ўз ота-боболаримизнинг минг йиллик ҳаётий тажрибаларидан олинган. Сувсиз жойдаги дараҳт тагига сув тўлдирилган сопол қўзачани салгина тешиб кўмиб қўйиш бизда азалдан бор. Бугунги кунда эса баъзи деҳқонлар ҳатто помидор-бодирингдай сув талаб экинларни ҳам пластмаса идишларга шу усулда сув тўлдириб қўйиб, ёз жазирамасидан сақлаб қолишилмоқда. Ҳалқимизнинг азалий анъаналари бошқа жойларда қадр топаётган экан, бунга фақат тасанно деймиз, холос.

### *Ўз топлағимиз ზашмаси ёхуд Пахтиқораладай сунгий ўрмон*

Самарқанддан Тахтиқорача довонига кўтарилишда Омонқўтон чашмаси юқорисида бир гўзал манзара бор. Ургут тоғларининг ўша ёнбағрини қишинёнзин кўм-кўк ўрмон қоплаб ётади. Ёши юз-юз ўттиз йиллик чинору қайрағоч, тоғ арчаларидан тортиб, олис шимол қайнину буталарига қадар ўсади. Тоғ ёнбағ-

рининг фақат шу жойидагина ҳудуди минг гектардан кўпроқ қуюқ ўрмон бору бошқа жойлар яйдоқ. Шунинг учун ҳам Омонқўтон чашмаси ўрмонзор бағридан сизиб чиққан ойна кўзли булоқлардан баҳраманд. Бир гал таниқли ўрмоншунос олим Абдухалил Қаюмов билан шу жойдан ўтаетганимизда бунинг сирини сўраб қолдим: “Нега, тоғнинг фақат бир жойида ўрмон сақланиб қолган-у, бошқа ёнбағирлар тап-тақир бўлиб ётибди?”

— Бу табиий эмас, инсон қўли билан барпо қилинган ўрмон...

— Наҳотки, шундай асрий ўрмонни сунъий равишда бунёд этиб бўлса?!

— Ҳа, ишонаверинг. Бу ўрмон XIX асрнинг сўнгти чорагида таниқли рус ўрмоншуноси Николай Королков томонидан барпо этилган. Ўшанда чор истилочилари босиб олган ҳудудлари қиёфасини ўзгартириш, шимол дараҳтларини экиб кўпайтириш учун илмий тадқиқотларга катта маблағ ажратган, машҳур ботаник олимларни жалб этган. Бу ўрмон ўша олимдан ёдгорлик...

Демак, Марказий Осиё тоғликларининг бошқа ҳудудларини ҳам шундай сунъий ўрмонзорларга буркаш мумкин экан-да. Шу ҳақда ўйлаганда, ўрмон ва яшил бойликлари кўплиги жиҳатидан дунёда энг юқори ўринда турувчи Япония кўз олдимишга келади. Бу мамлакат ҳудудининг етмиш фоизи асрий ўрмон, бутазор, инсон қўли билан барпо этилган ва асрлаб авайланадиган яшил бойликлардан иборат. Японлар дов-дараҳтга ҳудди инсонга қарагандек ғамхўрлик қилишади. Уларнинг жаҳонда энг умрзоқ одамлар экани ҳам бежиз эмас, шекилли.

Корея мамлакати эса ҳудудига нисбатан ўрмонлари кўплиги жиҳатидан иккинчи ўринда туради. Японлару корейслар ўз эҳтиёжи учун ташқи дунёдан ёғоч маҳсулотлари олса оладики, асло энг катта мил-

лий бойлигини шимол ўрмонлари каби қийратиб, кулини кўкка совурмайдилар. Кореяда одамлар довдараҳтларни асрашга шахсий ишидек қаравшар экан. Болалар ёшлигидан шу руҳда тарбияланади. Дараҳтни ўзбошимчалик билан кесиш фақат бир марта — 1997 йилда содир бўлган... Дов-дараҳт ва ғербари уруғлари банки ҳам ақлни лол қиласди. Жаҳоннинг турли минтақаларида ўсуви бир миллион турдан ортиқ дараҳт, гул, ноёб гиёҳлар уруғи улар ўсадиган жойнинг иқлим шароитлари яратилган ҳолда асралади. Миллионлаб гектар игна баргли ва бошқа дараҳтлар, юзлаб навдаги бутали ўсимликлар ўсадиган ўрмонзорларга қараб туриш учун саноқли одамларгина ажратилган, холос. Улар ҳамма ишга улгуришади. Чунки техника билан таъминланиш даражаси юқори, ўрмончиларга яратилган шароитларга ҳавас қиласиз. Уларнинг тоғлар юқорисидаги хонадонларига обод йўллар, иссиқ-совуқ сув, электр узатиш тармоқларигача олиб борилган. Қўлида доривор ва шприц кўтарган дараҳт даволовчи оқ ҳалатли биолог-шифокорларгача бор. Кишлоқ ҳудудларидағи Ўрмончилик институтда эса қирқ минг турдан ортиқ дов-дараҳт экиб кўпайтирилади ва мутахассис тайёрланади...

Яшил бойликларга бундай муносабат бежиз эмас, албатта. Одил Ёкубовнинг “Диёнат” романи қаҳрамони Нормурод Шомуродов айтганидек, “Арча... минг йил умр кўради. Тоғу тошларни емирилишдан асрайди! Ҳавони мусаффо қиласди. Қишида қор йигиб, булоқларни сувга тўлдиради... Агар ҳамма тоғ ва адирлар қадим-қадимлардагидек яна арча билан қопланса... дарёлар бурунгидай тўлиб оқажак, сув яна сероб бўлажак”.


Ҳурматли Нусрат ака, тарихдан яхши маълумки, ўтмишда барча тоғларимиз Тахтиқорача довонидаги каби қалин ўрмонларга бой бўлган. Улар табиатни яшнатган, булоқлару ирмоқларни обиҳаёт билан



таъминлаб, дарёларни серсув қилган. Чунки, довдараҳтли, ўрмони кўп жойларга ёғин-сочин одатдагидан кўп ёғади ва буни физиклар ҳам тасдиқлашади. Бугун эса юртимиз ҳудудининг атиги тўрт фоизида-гина ўрмонлар сақланиб қолган. Шундай экан, деҳ-қончилик равнақи учун узоқдан сув келтиришга ва уни сотиб олишга кетадиган маблағ ҳамда ишчи кучларини Тахтиқорачадаги каби сунъий ўрмонзорлар яратишга сарф этиш тўғрироқ бўлмайдими? Ўрмон эса қўшимча сув демакдир. Бу — олимларнинг кўп йиллик тажрибаларида ўз исботини топган.

Бинобарин, ҳозирча “олисдаги қуйруқ” бўлиб кўринаётган Сибир сувларига кўз тикиб ўтиrmай, ўз сувимиздан тежаб фойдаланиш ва юртимиз тоғлари-ни ўрмонларга буркаб, beminnat обиҳаётимизни кўпайтириш йўлидан борганимиз назаримда мақсад-га мувофиқ кўринади.





## АБДУЛЛА ОРИПОВ САБОҚЛАРИ

Эл-улус ардоқлаган, юрт мәхрига сазовар халқ шоири билан ҳамсуҳбат бўлишни орзу қилмаган инсон топилмаса керак. Ва яна у она халқини мудроқликдан уйғотган, гуурини юксалтирган, ҳатто, ўзи ҳам миллий ифтихор тимсолига айланган бўлса — бундай шоир билан учрашув ҳақиқий муҳлис учун чинакам байрамдир. Замондошларимиз учун Абдулла Орипов мана шундай улуғ сиймо.

2002 йилнинг 2 март куни Низомий номидаги Тошкент давлат педагогика университети Абдулла Ориповнинг ижодий кечасини ўтказди. Дорилфунун профессорлари, домлалар ва талабалар шоирни эҳтиром билан кутиб олдилар. Абдулла ака муҳлислар ҳузурига кириб келаркан, талабалар унинг “Сен баҳорни соғинмадингми?” қўшигини кўйларди. Шундай бир интиқлиқ билан кўйлардики, муҳаббат гимнига айланган бу қўшиқ юрагингиздаги эрка ҳисларни жўштириб юборганидан ўзингизни энг азиз туйгулар оламида учеб юргандай сезардингиз.

Университет ректори олқиши садолари остида шоирни саҳнага — азиз меҳмон учун гуллар билан ороланган жойга таклиф этди. Учрашув ана шундай бошланди. Сўнг яна Абдулла Орипов шеърияти билан мунаввар бўлган куй ва қўшиқлар янгради. Шоир ўзининг ушбу илм даргоҳига аталган дил сўзларини изҳор этаркан, таклиф учун миннатдорлик билдириди. “Жаннатга йўл” драмасидан талабалар ижро этган Она ва Йигитнинг сұхбат саҳнасини кўзлари ёшлиниб, ҳаяжон билан кўрди. Сўнг савол-жавоблар бўлди. Мен эл ардоғидаги улуғ шоирнинг ўз муҳлислари, адабиёт ихлосмандлари билан юзма-юз учрашувидаги баъзи савол-жавобларни эслаб қолишга ҳаракат қилдим.



## *Шеф ёзмашиниңа нима турткы бўлган?*

— Ҳазрат Навоий бобонгиз дастларига илк бор қалам туттганда ҳали бола Алишер эди. Пушкин ҳам Пушкин эмас, оддий Саша эди. Биз ҳам даставвал ҳамма қатори она, ота, мактаб, табиат, Ватан ҳақида машқлар битганмиз. Сал лофи билан айтадиган бўлсам, — шундай дея Абдулла ака бирор ҳазил гап айтгиси келганда бўладиган одатича ўзига хўп ярашадиган табассумдан очилиб кетади, — Сталинга бағишиланган шеърларимнинг ўзи бир чемодан эди (мухлислар кулиб юборадилар).

Ҳар ҳолда, шеър бирор туртки билан ёзилгани яхши. Унинг таъсир кучи бўлиши керак. Туртки, сабаб шунга хизмат қилиши мумкин. Буларни кейин англадик. Шунгача ноқулай аҳволга тушган пайтларим ҳам бўлган. Ўқувчилик йилларим уйимизга меҳмонлар кўп келишарди. Бир гал уларнинг олдида шеър ўқитиши. “Кремл деворлари” деган шеъримни ўқибман. Меҳмонлардан бири (бу ҳақда Абдулла ака тўрт томлик “Танланган асаллар”ининг биринчи жилдидаги “Кўрган-билгандарим” мақоласида батафсил ёзганлар): “Ўғлим, ўзинг Кремелни курганмисан?” — деб қолди. Мен “йўқ” дедим. У киши “бўлмаса кўрмаган нарсангни бундан кейин ёзма!” — деди. Роса мулзам бўлдим — ҳеч эсимдан чиқмайди! Ўша дашном менга ҳозиргача сабоқ бўлиб келаётир.

- *11 сентябр воқеаларига муносабатингииз?*
- У инсониятнинг энг қора кунларидан бири.
- *Аскияга муносабатингииз?*
- Аския ҳам, ҳажв ҳам шунчаки “хо-хо” деб кулиш ё кулдириш учун қилинмайди. У жудаям катта курол. Зўраки ҳажв, зўраки аския қитиқлаб кулдиришдай бир гап.
- *Замонавий саёз қўшиқларга қандай қарайсиз?*



— Улар ҳам боя айтганимиз сингари одамни қитиқлаб кулдиришга ўхшайди. Бундай қўшиқларнинг эгаларини, — Абдулла aka кулиб туриб дейди: — жиноий жавобгарликка тортса ҳам бўлади.

## *Қўзимни пирпиратиб ўтаман*

Бир шоиримиз, ўзи ёмон ижодкор эмасди, қарилек чоғи армон билан шундай деди:

— Жавоним тўла китоб. Уларни кўздан кечираётуб, ўз асарларим олдидан кўзимни чирт юмиб ўтаман. Сен эса баҳтлисан — китобларинг олдидан кўзингни юммай ўтасан!

Мен: “Китобларим олдидан кўзимни пирпиратиб ўтаман”, дедим.

Қариган чоғинг, бутун умр ёзган, чоп этган асарларингдан кўнглинг тўлмаса — бу, катта фожия.

## *Ҳадислар Ҳаққиа олиб борди*

Чархий домла билан кўп гаплашардик. Ҳадислар ҳақида суҳбатлашардик. Гўзал ривоятлар, мукаммал ҳикоятлар мажмуаси бўлмиш пайғамбарномалар, тарихномалар, Куръону ҳадислар нашр этилмаган ўша йилларда бундай суҳбатлар бизни олийжаноб ва эзгу туйғулардан баҳраманд этарди. Асл диний дунёқарашибиррик тафаккурнинг ҳаётдаги жонли кўлланмаси экан. Мустақилликнинг илк йилларида уларнинг таржима қилинганлиги, Куръон тафсирларининг ўзбек тилида пайдо бўлиши катта ҳодисага айланди. Олийжаноб инсоний туйғулар ҳадисларда ғоят гўзал ташбеҳлар воситасида баён этилганки, биз уларни бадиий кашфиётдек қабул қиласиз. Мен ҳам Пайғамбаримиз ҳадисларини бирмунча ўрганиб ва улардан илҳомланаб, “Ҳикмат садолари” мавзууда дастлаб қирқта, сўнг яна анча-мунча шеърлар битдим. Бу шеърларим мусулмонлар идораси томонидан эълон қилинган танловда мукофотга лойиқ кўрилди. Идора вакиллари



мени чақириб, “мукофот пули Маккага бориб келиш учун етади, пулни ўзини оласизми ё Макка зиёратига бориб ҳожи бўлиб келасизми?” — деб сўрашди. Мен, албатта, бораман, дедим. Шундай қилиб, Ҳаж сафарига мени пайғамбаримиз ҳадисларининг ўзи олиб бориб келди.

### *Армон*

Кўп йилларни бек *Армон* иб юборган давларни эслайман. Буни сиз б... — мустабид тузумнинг сиёсати қаттиқ эди. Ҳар нечук, вижданга қарши бирор иш қилмаган бўлсак-да, кўп вақтимиз беҳуда ўтгани рост. Энди, у қунларни қоралайман, деб қўйнимни тошга тўлдириб келган эмасман. Улар — бир армон.

\* \* \*

Абдулла аканинг тилига бирор сермаъно гап келиб қолганида юзи гул-гул очилиб кетарди. Ва биз суҳбатдошлар ҳам буни кўпинча у киши ўша гапни айтиб улгурмасдан илғаб қолардик.

Талабалар ҳар бир йилни қайсиdir мавзу ва қадриятга бағиашлаш анъанага айланган йилдан келиб чиқиб савол берганларида шоир шундай жавоб берди:

— Қарияларни қадрлаш йилида ёшлиар синовдан ўтади.

Адабиётта доир саволлар-жавоблар чоғида эса шоир қатъий қилиб шундай деди:

— Адабиёт — кўнгил изҳори эмас!

### *Бухоронини төр қўйлағида*

Ўшанда Абдулла ака Бухорога мени ҳам ўзи билан бирга олиб борди. Биз ҳинdlар томонидан қурилган гўзал замонавий меҳмонхонанинг саккизинчи қаватида — ёнма-ён хоналарга жойлашдик. Универ-



сиадага меҳмон бўлиб борган жуда кўплаб раҳбарлар ҳар қадамда Абдулла акага пешвоз чиқишар, шоирни кўриб хурсанд бўлганларидан юз-кўзлари ёришиб кетарди.

Борган кунимиз оқшом чоғи универсиадага атаб қурилган янги стадион сари йўл олдик. Сал кеч қолган эканмиз, йўллар бекила бошлаган эди. Бизни кўрган ички ишлар вазирининг ўринбосари ўз машинасида тўғри стадионнинг марказий дарвозасидан махсус кириладиган жойга ўтказиб юборди ва биз оппа-осон ўз жойимизга ўтиб олдик. Шу оқшом Бухорои Шарифга улуг руҳлар ташриф буюргандек эди. Халқ маънавият оламини нурафшон этган улуг алломаларнинг руҳлари шод эди. Универсиада жуда гўзал ўтди. Шундан сўнг бухоролик таниқли шоир Тошпўлат Аҳмаднинг уйига меҳмонга бордик. Шоиримиз шарафига бухоролик хушвотоз ҳонанда Аҳмаджон Шукуров ҳам келган экан. Аҳмаджон онаси оғир бетоб ёттани учун, унга қараб турган бўлса-да, шоир даврасини обод қилиш учун мумтоз қўшиқлар билан бирга Абдулла ака шеърлари асосида яратган қўшиқлардан ҳам куйлаб ҳаммамизни сархуш этди...

Меҳмонхонага қайтар чоғимиз яна Тошпўлат аканинг «Тико»сига чиқдик. Тунги Бухорои шарифни айланиш мароқли ва сехрли эди. Тўсатдан Абдулла ака шундай деб қолди:

— Тошпўлат, бу катта кўчаларингни кўп кўрганман. Сен менга Бухоронинг ўша қадимги тор кўчаларини, ҳеч ўзгармаган, аслида қандай бўлса шундай-ича турган маҳаллаларини кўрсат.

— Хўп бўлади, Абдулла ака. — Тошпўлат ака «Тико»сини Бухоронинг жин кўчаларига томон буриб юборди. Биз бир аср аввал ҳам мавжуд бўлган кўчаларда сайр этиб юрардик. Онда-сонда уйларга тортилган электр симлар, газ ўтган қувурлар янги тамаддун белгилари сифатида кўриниб қоларди.



Назаримда Абдулла ака ўшанда Файзулла Хўжавадай, Фитрат домладай, Мутаввакил Бурхоновдек улуғ инсонларни камолга етказган Бухорои шариф билан ўзича сұхбат кургандек бўлганди... Эртаси куни эса улуғ шоиримиз билан биргаликда ҳазрат Баҳуддин Нақшбанд бобомизнинг мақбараларини зиёрат қилдик. Тошпӯлат ака “Зиёратни ҳазратнинг оналари қабрларини тавоф этишдан бошлайлик”, дея машинани физиллатиб тор йўлаклардан олиб ўтиб, Ориф она мақбаралари сари бошлади. Сўнг қайтиб келиб Нақшбандий ҳазратлари қабрини зиёрат этдик. Зиёратга борища ҳам, қайтища ҳам кенг йўлакларни тўлдирган зиёратчилар дарров шоирни таниб олишар, бирор ҳайратга тушар, бирор эҳтиром ила салом берганча қўл олиб кўришишга, яна кимлардир дастхат олишга, биргаликда суратга тушишга шошарди. Одамлар улуғ замондошларини яқиндан кўрганингига мамнун, ундан ифихор қилишларини яширишмас, тўғриси бу онларнинг ўзи бир мангу лаҳзалар эди. Абдулла ака ҳам одамлар ҳоли-жонига кўймай ўраб олишларига заррача малоллик билдирамас, эҳтимол бунга жуда оддий ва табиий бир ҳол деб қаради.

Менинг назаримда эса, Абдулла ака билан қанча жойларда неча бор сафардош бўлмайин, бу галгиси бутунлай бошқача, яъни авлиё бобомизни зиёрат этгани яна бир авлиё келгандай эди...

Бу манзилдан чиқиб “Чор Бакр” некраполини зиёрат этдик. Мен аввал ҳам Бухорои Шарифда неча бор бўлган эсам-да, “Чор Бакр”ни биринчи бор кўришим эди. Ниҳоятда улуғвор сокинлик чўккан эди бу муҳташам қабристонга. Зиёратгоҳ яхшилаб таъмирланганидан саранжом-саришта. Айниқса, эътиборимни тортган нарса бу манзилдаги улкан масжиду мадрасалар улуғворлигига улуғворлик баҳш этган жилонжийдалар бўлди. Жилонжийда кеч гуллар экан. Майнинг охирида бир ажойиб гуллаб, ўзидан шундай хуш-

бўйлар таратиб турибдики, худди жаннатнинг ҳаволарини исказгандай бўласиз. Бу неъматнинг барглари шу қадар мусаффоки, гуё уларни ҳозиргина ёмғир ёғиб, ювиб ўтгандек туюларди. Эҳтимол бу ҳам “Чор Бакр”нинг бир сеҳримикан ё?..



## *“Мафтуҳкоғ қўғиниаш тоқи ғавоқдан”*

2004 йилнинг 31 декабри. Газетанинг янги йил сони нашрга тайёрланаётган эди. Компьютерчимиз Шоҳруҳ (Бегали Қосимовнинг ўғли) ҳозиргина Абдулла ака машинасида таҳририятта олиб келиб қўйгани, шу сонда босилаётган шеърини телефонда ўқиб беришмни сўраганини айтиб қолди.

Абдулла ака билан Бегали ака қалин дўст бўлишган — бирга ўқиган, ёнма-ён ижод қилган тенгдошлар эди. 2004 йилнинг 25 сентябрида оғир хасталлик сабаб оламдан ўтган қадрдон дўстининг вафотидан Абдулла ака жуда музтар бўлиб қолганди. Ҳатто ўша куни Денов қишлоғида жаноза олдидан сўз берилганда ҳам армонларини:

**Тонгларим тийрадир, оқшомлар пурғам,  
Бир-бир кетаётири жўраларим ҳам, —**

дея қайгули бошлаган эди. Кейинчалик бу мисралар катта шеърга айланиб, “Ўзбекистон адабиёти ва санъати”да эълон қилинди:

**Бирорин йўлини касаллик тўсса,  
Бирорин йиқитди ғам билан гусса.**

**Бошига тушса ҳам қанчалик савдо,  
Ношукур бўлмади улар, ажабо!**

**Билдимки, иолишни наинки замон,  
Оллоҳ ҳам ёқтирумас экан ҳеч қачон.**

Улуғларнинг бир-бирига оқибатини қарангки, Абдулла ака 31 декабр куни эрталаб Бегали аканикига ҳол-аҳвол сўраб борган экан. Шоҳруҳдан буни эшишиб хурсанд бўлдим-да, саҳифа чиққач, телефон қилишни кўнгилга туғиб турувдим, бир пайт Абдулла аканинг ўзлари йўқлаб қолди. Телефонда бўлса ҳам янги йил билан кутладим. Устознинг саҳифадан жой олган “Шоирлар ва юлдузлар” шеърини ўқиб бердим. У киши одатдагидек: “Шеър қандоқ бўпти. Маъқулми?” деб сўради. Абдулла аканинг ҳар бир шеъри муҳлислар учун катта байрам. Бу шеър ҳам ҳақиқий муҳлислни бефарқ қолдирмасди. Шу боис ҳаяжонимни яширмадим. У киши хурсанд бўлди ва “шеър тагидаги сана тушиб қолмасин”, деб тайинлади.

Абдулла ака яқинда Каршига бориб келган эди. Насафнинг 2700 йиллиги муносабати билан амалга оширилаётган ишлардан мамнун бўлиб сўзлади ва: “Наврўзда ҳаммангни ўзим Кашқадарёга олиб бораман. Илҳомжонни уйлантирамиз. Тўйни чиройли қилиб ўтказасизлар”, — деди.

Устоздан бугун янги йилни қаерда кутмоқчи бўлаётганларини сўрадим.

— Биз янги йилни шаҳарда кутишга қарор қилдик, — деди Абдулла ака. — Неваралар, қизлар ҳам шу ерга келишади...



— Агар газета нашри кечга қолмаса, шеърингиз чиқсан янги йил сонидан олиб ўтаман.

— Э, шундай демайсанми! Бу мен учун энг катта совға бўлади. Албатта келгин, кутаман, — деди Абдулла ака.

Газетанинг чиқишини сабрсизлик билан кутдим. Ниҳоят илк нусхалардан иккитасини олиб, Абдулла аканинг шаҳар марказидаги уйига борганимда соат ўнларга яқинлашиб қолганди. Йўлакда устознинг куёви Гуломжонни учратдим. Биргалашшиб лифтда бешинчи қаватга кўтарилдик. Шоир хонадонида шоду хуррамлик, байрамона кайфият. Абдулла ака бизларни кўриб севиниб кетди. Куёви билан келган набирасини тўйиб-тўйиб ўпаркан, қўлимдан “Ўзбекистон адабиёти ва санъати”ни олиб, дарров илк саҳифасига кўз югуртириди. Сўнг шошилмай ўқиб чиқди-да, менга одатдагидек, “Ўқи” деди. Абдулла ака шеъри чиқсан куни севиниб кетади, яқинлари, шогирдларига қайта-қайта ўқитишни хуш кўради. Бир вақтлар “Бугун шеъри чиқсан шоирдай дунё, жилмайиб боқади барчага масрур” мисраларини бежиз ёзмаган-да. Газетадаги шеърлар ҳам муҳлислар учун байрам туҳфасидай эди:

Балки коинотнинг қай пучмоғида,  
Кайсиdir юлдузда яшар бир шоир.  
У ҳам бизга ўҳшаб жўшган чоғида,  
Балки шеърлар ёзар самога доир.

Янги йил дастурхони неъматларидан тотиниб, гурунглашиб ўтиарканмиз, устоз олис сайёрадаги шоир билан мулоқот тарзида ёзилган шеърнинг ёзилиш тарихини айта бошлагандা, Қаршидан Нурилдин Зайнисов кўнғироқ қилиб қолди. Абдулла ака у кишини кутлар экан, барча соҳаларда вилоят нуфузи ошаётгани, буни кўпчилик эътироф этаётганини айтди. “Яшанг, бўш келманг, Насафнинг юбилейида барча ижодкорларимиз хизматда бўлади”, деди.



Мен телефон орқали кечаётган бу мулоқотни бе-ихтиёр тинглаб ўтиарканман, уларнинг бир-бирлари ни гоятда эъзозлашини ҳис этдим. Нуриддин ака Абдулла акани улуғ шоир ва ҳурриятимизнинг толмас куйчиси сифатида бениҳоя қадрлайди. Унинг она Ватанни беқиёс меҳр билан севишидан ифтихор этиб, ўзи ҳам шу эл фарзанди сифатида юртнинг фидойи-си бўлишга интилади. Қалбидаги ниятлар шоир дилидаги истакларга эш бўлганиданми, қаерда ишламасин ўзидан доимо яхши из қолдиришни истайди. У кишининг адолатпарвар, меҳнаткаш одамларни қадрлаши ва қўллаб-кувватлашига мухбирлик тажрибамда ҳам кўп гувоҳ бўлганман.

Муборак шаҳрида, Кўкдумалоқ чўлларида амалга оширилган ишларнинг ўзи бир достон. Абдулла ака Ёзувчилар уюшмаси йиғилишларидан бирида ёш ижодкорларга: “Муборак ва Кўкдумалоқ чўлларида ўн йиллаб бошидан каска тушмай, бўронлар билан басма-бас, эл-юрт ғамида фидойилик ва жасорат кўрсатиб юрган Нуриддин акадай инсонлар образи ёшларимиз учун бир тимсол бўлиши мумкинлиги”-ни таъкидлаган эди. Унинг вилоят ҳокими сифатида юрт ободлиги йўлида қилаётган ишлари кўпчиликка маълум. Бу икки сиймо кўнгилларидаги беғубор са-мимиятлари билан ҳам бир-бирларига ўхшаб кетади. Эҳтимол, уларнинг дўстлиги боиси ҳам шундадир.

Шоир хонадонидаги телефон тинимсиз жиринглар, узоқ-яқиндаги муҳлислар, қадрдонлар дил сўзларини айтиб Абдулла акани байрам билан кутларди. Бир оздан сўнг Ҳолмамат (Ҳол Муҳаммад Ҳасан) ҳам Қаршидан кўнфироқ қилиб қолди. Абдулла ака у билан гаплашаётib, эшик кўнфироғи жиринглаб қолгани сабаб, гўшакни менга берди-да, “гурунгни давом эттиравер” деди. Меҳмон устига меҳмонлар кела бошлиди. Мен Ҳолмаматга Абдулла аканинг янги шеъри чиққанини айтганимда у севиниб, шеър мав-

зунини суриштира бошлади. У шоиримизнинг чин мухлиси, садоқатли шогирдларидан-да, «газетани топгунимча анча вақт ўтади, ўқиб бера қолинг», деб туриб олди. Суҳбатимизни эшишиб ўтирган Абдулла ака ҳам “уқийвер” деб имо қилдилар.

Гап гапга уланиб, Абдулла акадан шеър қандай туғилгани ҳақида боя бошлаган суҳбатни давом эттиришларини сўрадик.

— 24 декабр куни эрталаб кимнингдир наҳорги ошига бориб келдим-да, одатдагидек, шу уйга кирдим, — деди Абдулла ака. — Вақт эрта эди, бир оз дам олмоқчи бўлдим. Кайфиятим ўртачароқ... Нимадир ёзишга ундайверди. Қофоз-қалам олиб, столга ўтирап-ўтирмас ўз-ўзидан сўзлар қуюлиб келаверди.

**У ҳам балки бедор оламни кезиб,  
Йироқ-йироқларга учмоқ истайди.  
Ўзининг ғалвали буржидан безиб,  
Бошқа дунёларни кучмоқ истайди.**

**Балки у тунлари энтикиб боқдан  
Юлдуз бизнинг Ердир, бизнинг Сайёра.  
Балки юрагида оловлар ёқдан,  
Шимол ёғдулари — мовий шарора.**

Хуллас, шеър бир ўтирганда қиёмига етди. Бус-бутиң ҳолиҷа туғила қолди. Тўғри, кейин айрим сўз ва қофиялар устида ишладим. Лекин ўша куни шеър ёзаётib, менда қизиқ ҳол рўй берди. Худди кимдир фойибдан сўзларни айтиб тургандай, мен эса эшишиб ёзаётгандай эдим. Авваллари ҳам баъзи шеърларимни шундай ҳолатда ёзганман. Эҳтимол, ёшлик йилларимдадир. Лекин кўпдан бери бундай бўлмаётганди...

**Балки Фарғонанинг сўлим боғлари,  
Уни чорлаб турар кўм-кўк нур бўлиб.**

**Сирли севги ҳиссиин туйган чоғлари,  
Термулар, шеър ёзар шавқларга тўлиб.**

Шоир шу сўзларни айтаркан, болаларча бир бегуборлик унинг бутун жисми-жонини чулғаб олгандек эди... Соат 12 га яқин қолганда уйга шошилдик. Шоир ҳузуридан қайтар эканман, ҳамон ўша шеър руҳи билан яшаётгандай эдим:

**Унинг бағри буткул заққумга тўлиқ,  
Инсон деган жонзот етган бошига.  
Кўксидан тараплар мунгли бир қўшиқ,  
Тавалло қиласар у ўз Куёшига.**

Абдулла ака руҳий кўлами ниҳоятда кенг шоир. У замин муаммоларини ўйлаб изтироб чеккан чоғлари бот-бот само қаърига, олис сайёralар оламига тафаккур уфқлари билан тез-тез «сайр» қилиб туришини биламан. Гоҳи-гоҳида юлдузлар билан бўладиган бундай мулоқотлар яхши бир шеър тухфа этиши мухлисларга сир эмас. “Шоирлар ва юлдузлар” шеъри шундай кайфиятда туғилибди. Шеърда инсон Ерда яшайдими ёки олис бир сайёралик бўладими, барибир, ўз замини ташвишларидан ҳеч ёққа қочиб кутуломмайди, деган руҳ бор эди.

**...Оҳ, у содда шоир, билсин қаёқдан,  
Гўзал бу сайёра синоатларин.  
Мафтункор кўрингай тоқи равоқдан,  
Яшириб ҳисобсиз жароҳатларин.**

“Митти юлдуз”дан бошланган инсоний тафаккур эврилишлари “Баҳор”, “Сароб”, “Она сайёра” каби баркамол шеърларда нечоғли теран моҳият касб этган бўлса, фазовий кенгликларга интилган шоир туйгуларининг рангин қирралари янги шеърларида ҳам шундай гўзал тарзда юз кўрсатаётир.

Заминда яшаб, хаёлан осмон кенгликларига сафар қилиб, олис юлдузлар билан сирлашаётган шоир



идроки бир зум бўлсин она Ернинг озурда оғриқла-  
рига нажот излашдан чарчамайди.

## *Кор ёқдан квіа*

Қиши бошлангандан бери ёғин-сочин сероб, ле-  
кин одам ҳузур қилгудек қор ҳали ёғмаганди. Борлиқ  
оппоқ ёпинчиғини ёpmаганидан табиатга нимадир  
етмаётгандек. Қишининг ҳам ўз гашти бор-да. 15 январ  
куни тонгда уйғониб, ҳаммаёқни оппоқ қорга бур-  
канган ҳолда курдим. Дараҳтлар қор қалинлигидан  
шохларини күтара олмайдиган ҳолга келган, болалар  
мириқиб қор ўйнашарди.

Ҳаво тоза, ҳаммаёқ мусаффо. Одамнинг нечун-  
дир бу покликдан дили яйради. Шу куни Ҳолмамат  
 билан Дўрмонга, Абдулла аканинг боғига бормоққа  
келишиб кўйгандик. Бундай чоғлар Дўрмон боғлари  
ҳам афсонавий гўзалликка чўлғанганди. Лекин  
тушга яқин Абдулла аканинг ўзи қўнфироқ қилиб  
қолди.

— Қор-ку, зўр бўлди. Бироқ иссиқ сув йўқ, чироқ  
ўчиб қолди. Шаҳарга тушмоқчи бўлаяпмиз, — деди.

“Майли шаҳардаги уйингизда учрашамиз”, деб  
ваъдалашдик. Боришимиздан Абдулла акани хабар-  
дор этиб кўйгандик... Кечкурун нима бўлдию  
мен сал уйда тутилдим. Соат олтилардан ошганда рас-  
сом Ортиқали Козоқов қўнфироқ қилиб қолди.

— Биз меҳмонлар билан Абдулла аканикдамиз.  
Сизни излашяпти, — деди ҳол-аҳвол сўрагач. Шу пайт  
гўщакни Абдулла аканинг ўзи олиб:

— Жўраларинг келишди, тез этиб кел, таксининг  
пулини ўзим тўлайман, — деб ҳазиллашди.

Абдулла аканинг Яхё Фуломов кўчасидаги уйи сари  
борарканман, шаҳар кўчалари оппоқ қордан янаям  
гўзаллашиб кетганди, одамнинг дили яйрайди. 13-үй  
ҳовлисида ҳам болалар қий-чув қилишиб, Қорбобо  
ясаш билан овора эдилар. Худди янги йил кечасидай



ҳаммаёқ нурафшон. Ҳаво ёқимли. Шоир меҳмонхонасида эса гурунг авжида экан. Салом-аликдан сўнг, Абдулла ака «Холмамат билан Ортиқалини яхши биласан, бу йигит эса Бахтиёржон, — деб хона тўрида ўтирган йигитни таништирди. — Олий қозихонамиизда ишлайди. Ёш бўлса ҳам катта вазифада, дедилар. Сўнг мени ҳам роса мақтаб-мақтаб таништирган бўлдилар.

Абдулла ака шу оқшом кўнгли ийиб, яйраб ўтирап, бундай чоғлар одатда биз муҳлислар учун кутилмаган янгиликлар кўп бўларди. Аввало, Абдулла ака, бирон воқеа-ҳодиса ёхуд бирон одамга таъриф берса, бу таъриф худди шеърларида мисралар каби оригинал бўлар, ифоданинг теран ва аниқлиги, факат Абдулла акага хос бетакрор бўлиши суҳбатдошларни сеҳрлаб кўярди. Биз Абдулла аканинг суҳбат, гурунгларидан худди у кишининг янги шеърини ўқиётгандек таъсирланамиз. Дилемиз ҳам, кўзимиз ҳам яшнайди. Шоир даҳоси унинг ҳар айтган гапида ярқ этиб, бутун жозибаси билан намоён бўлиб туради. Абдулла ака ҳузуридаги гурунгларда, бошқа давраларда бўлгани каби, зинҳор майда гаглар, майда туйғулар бўлмайди. Шоир ҳар қандай дамда ҳам ўз шоҳсупасидан асло тушмайди. Устозлари ҳақида сўзлаганда эса уларга эҳтиромини заррача бўлсин камайтирмайди. Шу куни ҳам гурунг одатдагилек ижод ва улуғ зотлар хусусида борарди. Гап айланиб Fafur Fулом ҳақида сўз кетди.

### *“Алвидо, устоғнини”нини ёзилиш тарихи*

Fafur Fулом вафот этганида Абдулла ака 25 ёшида бўлган. Ўзбек шеъриятини чақмоқдай ёритган шеърлари билан адабиётта кириб келган шоирнинг муҳлислари ўша пайтдаёқ ниҳоятда кўп эди.



Шоир Миртемир таҳрири остида чиққан “Митти юлдуз” китоби билан 60-йиллар ўзбек шеърияти осмонида ёрқин юлдуз бўлиб шўъла таратада бошлаган, бундан Ойбек, Абдулла Каҳҳордек улуғ ижодкорлар ҳам боши осмон қадар юксалиб севингган йилларда — 1966 йилнинг 26 апрелидаги Тошкент зилзиласидан кўп ўтмай, 9 июл куни Faфур ака оламдан ўтади. Ўшанда Faфур ака 63 ёшда бўлганлар. Бугун Абдулла ака 64 ёшдалар (2005 йил). Ўша кунни эслаб туриб:

— Менга шоир вафоти муносабати билан шеър ёзишни топшириб қолишибди, — деди Абдулла ака. — Майли, ёзаман — дедим. Сўнг “Ўзбекистон маданияти” (ҳозирги “Ўзбекистон адабиёти ва санъати”) — нинг бир хонасини ажратиб беришибди. Ичкаридан беркитиб Faфур Фулом хотирасига “Алвидо, устоз” деган шеъримни ёздим.

Шеър Faфур аканинг:

“Зўр карвон йўлида етим бўтадек,  
Интизор қўзларда халқа-халқа ёш...”

мисралари билан бошланиб, биринчи банд:

Сарбоним, қўлингдан кетдими кан эрк,  
Сарбоним, не учун кўтармайсан бош, —

деган мисралар билан тугарди...

Эсимда Faфур Фулом вафоти, шоир хотирасига бағишлиб ёзилган бу шеър жуда катта акс-садо берган. Биз ўша йили университетнинг филфакига ўқишга кирдик. Талабаларнинг ҳаммаси бу шеърни ёд билар, давраларда қайта-қайта ўқиб юрадик.

Абдулла акадан шеърнинг ёзилиш тарихини эшитиб ўтиарканмиз, шеърнинг ўша йиллардаги довруғи, юксак жарангига яна бир бор ёдга тушди. Абдулла ака ҳам ўша кунни, ажиб бир тарих билан қайта учрашгандек эслар, биз эса энтикиб тинглардик, мисраларни шоир билан бирга такрорлардик:

## **Ажал, сен найзангни санчдингми чиңдан Ўзбек шеъриятин паҳлавонига.**

— Faфур ака раҳматли билан хайрлашув “Баҳор” концерт залида бўлди. Бутун аркони давлат йифилди. Улуғ шоир билан хайрлашув митингида менга ҳам сўз беришди. Шу шеърни ўқиб бердим. Назаримда шеър жуда жойига тушган эди. Кўп эътирофлар эшиздим. Сўнг ўзимча ўйладим: ўша куни ўқиладиган хотира шеърини менга ёздириш фикри кимдан чиқдийкин? Ўйлай-уйлай, эҳтимол Шароф ақадан чиққан бўлса керак, деган хаёлга бордим. Бунинг сабабларини ўзим-ча ўйлайман-да.

Шароф ака Москва хукмронлигининг энг оғир йилларида юрга раҳбарлик қилганди. Москва миллий туйғунинг уйғонишига асло йўл қўймаслик учун курашарди. У ёқнинг қанчадан-қанча шотирлари бор эди у кишининг идорасида, Ёзувчилар уюшмасида. Яна бус-бутун давлат хавфсизлик хизматининг ҳам қулоги динг эди. Шароф ака ўз элидан чиққан истеъдодларни қанчалик сўймасин, қадрламасин, буни уларнинг кўз ўнгига очиқ-ойдин қилолмасди, лекин гоҳи-гоҳида бу борада донишмандларча иш юритаётгани бизга ҳам сезилиб қоларди. Масалан, ўшанда менинг шеърларимни Ойбек, Каҳҳор, Миртемир, Озод ака каби устозлар, мухлислар нақадар катта қувонч билан кутиб олган бўлмасин, маҳсус идора хизматчиларининг қовоғидан қор ёғарди, ҳар куни хавфсираб яшардим. Менинг шеърларим, шеъриятим овози, оҳанги уларга асло ёққан эмас. Уларга урра-уррачи шоирлар керак эди. Тергашлардан жоним халқумимга келганди. Шундай кезда Faфур ака хотирасига бағишилаб, у кишининг тобути ёнида, бутун аркони давлат олдида шеър ўқиш катта шараф эди. Мен ҳайрон эдим, қуёш қаёқдан чиқдийкан, деб. Энди билсан... Шароф ака мени асраб қолиш учун шун-



дай қилган экан. Faфур Fулом бутун иттифоқ биладиган ўриспараст шоир эди...

“Уни хотирлаб шеър ёзган ҳам, ҳар ҳолда, керак одам-да, ахир...”

Бу эътирофни Абдулла ака айтмади-ю, биз у кишининг сўзларидан шуни англалик.

— Ҳа, шундай бўлганди, — дея сўзида давом этти Абдулла ака. — Faфур акани Чигатой қабристонига кўйиб келганимиздан сўнг ҳамма у кишининг Арпапоя кўчасидаги уйига келди. Энди... бу ёғини қандоқ айтай — ростакамига ўрисларнинг паминкаси бўлди-кўйди. Мен бир ўриндиқнинг чеккасига омонатгина ўтирудим. Сарвар Азимов ўшанда Совминда ўринbosар эди. Уч-тўрт одам нарида ўтирган экан, бўлса 35-40 ёшларда, ёш, келишган, забардаст гавдали. Бир ўзи назаримда икки шиша ароқ ичдиёв. Столлар нознеъматга тўла, кетма-кет кабоб келиб турибди. Ароқ сувдай оқиб ётибди. Ё тавба дейман: ўзбек ўшанда бир “кетиб қолган” экан-да...

Шоирнинг ушбу хотираларини қоғозга тушираётуб ўйлаб қоламан: Абдулла ака Faфур Fулом вафотига қадар 1965 йили чиқсан “Митти юлдуз” тўпламига кирган “Темир одам”, “Тилла балиқча”, “Дорбоз”, “Севгисиз одам”, “Муҳаббат”, “Куз хаёллари”, “Онамга хат”, “Сен баҳорни соғинмадингми?”, “Мен нечун севаман Ўзбекистонни?”, “Қасам дара”, “Ўзбекистонда куз” шеърларидан ташқари “Юзмазюз” (у кейинроқ босилган эса-да), “Авлодларга мактуб”, “Онажон”, “Сароб” каби энг машҳур шеърлари билан шеъриятимиз осмонида чинакам юлдуз булиб чақнаган эди. Агар бирор катта даврада мушоира бўладиган бўлса, одамлар у жойларга сифмай кетарди. Ҳамма Абдулла Ориповнинг шеър ўқишини кутар, шоир минбарга чиқсанда эса бутун зал, театрлар олқишидан ларзага келарди. Шоирни қайта-қайта олқиши билан минбарга қайтариб чиқаришар, яна янги-янги

шеърларидан айттиришар эди. Бундай олқишиңи ўша замонда бирор шоир олган эмасди.

Шунинг учун замон пешволарининг “Хотира” шеърини Абдулла Орипов ёзсин дегани бежиз бўлмаган. Бу таклиф ноёб истеъодли шоирни асраш учун айтилган тақдирда ҳам шуни назардан қочирмаслик керакки,Faфур Фулом хотирасига бағишлаб, бир-икки шоирнинг у қадар эътибор қозонмаган шеърларини ҳисобга олмаганда “Алвидо, устоз” каби жарангдор шеър ўпшанда ҳам, ундан кейин ҳам ёзилмади.

Орадан бир йил утиб, Абдулла ака Faфур Фулом вафотининг бир йиллигига бағишланган “Нутқ” шеърини ёзади:

**Faфур Фулом ўлганига бир йил тўлибди,  
Нарёғини ўйлаганда сесканар одам,**

деб бошланади бу шеър.

**Асқад ака лутф этгандай, у мисли кўзгу.  
Камалаклек неча рангли дарёларни у  
Жамлай олган бир ўзида денгиз мисоли.**

Бу мисралар “Нутқ” шеърининг энг гўзал, мағзи тўқ мисралари бўлиб, ўқиган одамни рухлантириб юборади. Ўша куни Абдулла ака: “Faфур ақанинг тириклигида мен у зот билан яқин бўлган эмасман, лекин кейинроқ биз улуғ шоирнинг ўғиллари билан худди ака-укалардек дўст бўлиб кетдик”, деди.

— Катта ўғиллари Москвада ўқиган, ядершик эди, Мирзоулут деб ном қўйган шоир. Бу Мирзо Улуғбекдай бўл деганлари. Қодир Фуломовни Мирзақодир дердилар, Мирзо Абдулқодир Бедилдек бўл деб. Яна бир ўғилларининг номи Хондамир. Хондамирдай тарихчи бўлсин деб ният қилган-да. Айниқса, Мирзоулут билан биз жуда яқин бўлиб кетдик. Уйларига кўп борар эдик. Ҳозир музей бўлган уйда, эҳ-ҳе, қанчадан-қанча сұхбатлар қилганмиз. Faфур ақанинг не-

не ўқиган китобларини кўздан кечирганимиз. Шоирнинг ижод оламига шу китоблар ва унинг ҳаёт тарзи орқали назар солганимиз. Гоҳи-гоҳида бу хонадонда бўлганда Мирзоулур билан бирга шоир яшаган ўша уйда қолиб ҳам кетардик. Муҳаррам аямиз мени ҳам худди ўз боласидай кўрарди. Бизни не-не азиз таомлар билан сийларди.

— Муҳаррам ая асли кўқонлик бўлган эканлар-а,  
— деб сўз қотамиз.

— Ҳа, Муҳаррам ая Кўқондаги энг маърифатли, аждодлари ҳатто Худоёрхонга бориб туташадиган хонадоннинг қизи бўлган. Fafur aka ўша хонадонга бориб аямизни ёқтириб қолганлар. Fafur aka ўшанда ҳам довруғли шоир бўлган. Муҳаррам аянинг оталари: “Маъқул” деб шоирни куёв қилишга рози бўлган экан. Муҳаррам аямизнинг оталари қизининг сепига Куръони Каримни ва Бедилнинг бир китобини қўшиб берган экан...

Биз бу гапдан анча таъсирландик. Fafur akанинг Бедил ижодидан ниҳоятда кўп баҳраманд бўлганидан хабардор эдик. Ўғилларидан бирининг номини Мирза Абдулқодир деб атаганлари боисини эса энди билдик.

Абдулла aka Fafur akанинг Миша деган сартароши билан қилган гурунгларини, сўнг Мирзоулур ўша чоғлар шоир вафот эттанида омонат дафтарчасида борйуғи 2 минг 600 сўм қолганини айттанини эсладилар.

— Fafur aka болаларини ҳалол ризқ-насиба билан боққанди — деб давом этди Абдулла aka. — У киши мутлақо бой бўлган эмас. Ўша 2600 га ўшанда берса — битта “Запорожец” берарди. Шоирнинг уйида ҳар куни саккизта қозон қайнаган, уйдан одам оёғи узилмаган. Меҳмонлар, муҳлислар дегандай... Шоир кўп ҳолларда бозорни ҳам ўзи қилган. Еган-ичган, ичирган, дастурхони ҳамиша очиқ бўлган. Бун-



дай одамда пул турармиди! Ҳатто кўпинча айтишадики, Faфур ака гонорарини олдиндан олиб кетарди, деб. Ҳа, ҳақиқатдан шундай бўлган. Faфур ака радиода шеърни ўқиётиб, лентага ёздириб бўлгунча, муҳарриру ҳисобчилар қалам ҳақини тайёрлаб қўйишган. Шоирнинг шунга эҳтиёжи бўлган-да. Бориб бозор-учарни шу билан қилган-да.

Абдулла ака яқинда Мирза Абдулқодирни бир мажлисда кўриб қолгани, бир фурсат гурунглашганини айтди. У “Шум бола”нинг Абдулла Орипов сўзбошиси билан чиққан нашри учун миннатдорлик билдирибди.

Холмамат боядан бери гап Faфур Фуломнинг буюклигию инсоний қиёфаси ҳақида кетаётгани учунми:

— Шу Шум бола Faфур аканинг ўзи эмасми? Faфур ака ҳам жуда шўх бўлган дейишиди, — деб қолди.

— Айни ўзи, — деб тасдиқлади бу гапни Абдулла ака мийигида кулиб. Ҳаммамиз кулишдик. Сўнг шоир Faфур Фуломнинг шумликлари ҳақида Абдулла Каҳҳордан эшиттан гапларни сўзлаб берди:

— Абдулла аканинг ҳозир музейга айланган уйида, иккинчи қаватда гурунглашиб ўтирадик. У киши бетоб эдилар. Оёғининг бир чеккаси, бармоқ учига майдагина яра чиқа бошлаган экан. Қанд касали бор эди.

— Назаримда, шу жимжилокдай яра-ча мени олиб кетади-ёв, — деди. Ҳақиқатдан ҳам шундай бўлди... Ўшанда Абдулла ака кроватда ётар, мен ёnlарида эҳтиром кўрсатиб ўтириб, гурунгларини тинглардим. У киши секин-секин Faфур аканинг шумликларидан сўзларди.

30-йилларда Чимёнда шоирларга ўтовлар тикиб берилиб, ҳаммалари бир жойда Пушкинни таржима қилишган. Ўшанда Ойбек кун бўйи ўтовдан ташқари



чиқмай “Евгений Онегин”ни таржима қилган. Бошқа шоирлар бир варақ-икки варақ келадиган шеърларни таржима қилишиб, базми-жамшид қилишган, дам олишни ҳам қойиллатишган. Fafur aka эса атрофига йигилганларга асия айтиб, кулдириб юаркан.

Ойбек домла бирор қувликни билмайдиган, соддадил, кўнгли беғубор одам бўлган. Сўнг гап Ойбек домланинг «Навоий» романига кўчиб, Навоий бобомиз хақида сўз кетди. Абдулла aka:

— Мен ҳазрат Навоий бобомизга доир кўп китобларни ўқиганман. Ижодини умр буйи мутолаа қилиб келаман. Бироқ бир саволимтга ҳеч жавоб ололмайман: Навоий ўз уйида, одамлар билан мулоқотда қайси лаҳжада, тилемизнинг қайси шевасида гаплашган экан? Ҳанузгача бунга бирор аниқ жавоб ололмаганман. Мени шу нарса жудаям қизиқтиради. Албатта, Ойбек домла бунга анча яқин борган бўлсалар керак. «Навоий» романини ёзаётиб, кўздан кечирган манбалар орқали бу саволга жавоб топгандир. Бироқ асарда Навоий бобомиз лаҳжада сўзламайди-да...

Бобур бир-икки ўринда у зот Андижон шевасида сўзлаган, деган. Лекин у пайтда Андижоннинг ўзи қайси шевада гапирган? Бу бизга қоронфу. Ўйлаб кўринг, ҳозирги Қарши, Самарқанд шеваларини. Ҳар ҳолда Ҳирот шеваси ҳам шундан унчалар узоқ бўлмаса керак. Ҳозир Афғонистон шимолида яшовчи ўзбекларнинг тилида форсий, пушту тили элементлари кўпроқ сезилади...

Биз ўтирган ўша хонада Абдулла aka Мутаваккил Бурхонов билан биргаликда мустақил давлатимиз мадҳиясини ёзишган. Унинг мусиқаси ёэилган пианино ҳам шу хонада турибди. Уни консерватория музейи сўраган экан. Биз ўз уйингизда тургани яхши, дедик.

Эшик кўнғироги жиринглаб, яна меҳмон келди...



Қайтар чоғимиз Абдулла ака доимий одатига кўра меҳмонларга тўн ёпди. Устоз ўзига совға сифатида берилган ёки турли сафарлар, учрашувлар чоғи эҳтиром рамзи сифатида елкасига ёпилган тўнларни уйига келган меҳмонларга кийгизиб, уларни хурсанд қилиб юборарди.

\* \* \*

Уйга келаману ҳозиргина бўлиб ўтган гурунг таъсирида сеҳрга тўлиб ўтираман. Гоҳо Абдулла аканинг китобларини қўлга оламан. Бир пайтлар ўзимга ёд бўлиб кетган, энди эса баъзи мисралари хаёлимдан фаромуш бўлган шеърларни қайта-қайта ўқийман. Ўқийману бу шеърлар ёзилган ўша қирқ-қирқ икки йил аввалги лаҳзалар кўз олдимда жонлангандек бўлади. Биз талабалар бу шеърларни илк бор ўқиган, эшигтан кезларимиз нақадар баҳтли, баҳтиёр ҳис этардик ўзимизни. Нақадар масрур эдик, бутун олам гўзал ва пурвиқор эди... Шоир айтганидек, гуё нурдан яралганди инсон деган зот.

Эҳ, у шеърлар ўқилган лаҳзаларнинг, давраларнинг шукуҳини айтинг. Ҳақиқий шеърнинг нақадар буюк мўъжиза эканини қайта-қайта ҳис этарканмиз, дилимиз буюк бир мунаварликдан ёришиб кетар, олдимиизда улуғ манзиллар турганига ишонар, ёруғ хаёллар гирдобида энтикардик.

Бугун-чи, бу туйгулар бугунги авлодларга ҳам азизми. Бу туйгулар уларга бегона эмасми? Улар ҳам биз туйган ҳайратни туядиларми?

Ушбу сатрларни ёзаётib такрор-такрор ўзимга шу саволларни бераман. Шоир айтганидек: шеър баҳоси муҳлисгадир тан.

Бу гўзал шеърият ҳеч кимни бефарқ қолдирмаган. Биз инсонга ҳамиша улкан сабоқ берувчи шундай улуғ шеъриятни кўмсаб, шундай сеҳрли шеърларни биттан шоирга интилиб яшадик.

## **«ТОЛСТОЙНИНГ НИЯТИ МЕНИ МАФТУН ЭТГАН»**

*Ўзбекистон халқи ёзувчили  
Шукур ХОЛМИРЗАЕВ билан суръат*

— Шукур ака, биласизки, тарбиянинг воситалари кўп. Турли даврларда одамлар тарбиянинг турли усулларига мурожаат қилишган. Ҳатто тарбияда қайси усул афзал, деган баҳслар ҳамон тутагани йўқ. Сиз дунё адабиётининг мумтоз намуналари билан танишсиз ва бу асарларни яратган ижодкорлар ҳаёти, жумладан, уларнинг инсон тарбиясига муносабати ҳақида ҳам яхши биласиз. Хўш, Сизнинг бу масаладаги қарашларингиз қандай, уни қай тарзда баён бўлур эдингиз?

— Мен ҳам қай бир даражада «тарбия кўрган» одам сифатида, қолаверса, бир адабининг Инсон тарбиясига ички бир эҳтиёж-ла қизиқиши тақозоси билан ушбу масала ҳақида ўйлаб-ўйланиб қолардим баъзан.

Кўрни қўзғаганингиз учун раҳмат.

Энди, буюк адабларнинг Инсон тарбиясига муносабати ҳақида сўз юритадиган бўлсак, камина жуда олислаб кетмай, қўшнимиз Русиянинг «олтин асри»да ижод этиб, «дунёнинг талай қисмини забт этган» Лев Толстой ҳазратларининг бу йўриғдаги изланишларию хulosалари ҳақида гапирсам девдим. Ёки Жанубдаги қўшнимиз Ҳиндистоннинг «олтин даври» соҳибларидан Рабенранат Тагор (Тхакур)нинг бу борадаги изланишу топилдиқлари ҳақида гапирсамми? Эсларсиз: бу аллома адаб 30-йилларда бола тарбияси бобида маорифнинг тутумларини ўрганиш мақсадида янги Русияга келган ва «Русиядан хатлар» номли рисолаям битган эди.

Келинг, Толтой бобонинг этагини кўйвормайлик.



Маълумингиз, Толстой Ясная Полянада кўним топиб қолганидан кейин беихтиёр Инсоннинг ҳаётдаги ўрни, унинг Аллоҳга зътиқодлари, пироварди, «комил инсон» киму нимадан иборат ва ўша мақомга қандай етмоқ мумкинлиги ҳақида ўйлаб, «Тирилиш» романини ҳам ёзди. Унда бир помешикнинг бир замонлар қилган гуноҳини Ўзи олдиди — айни чоғда Тангри қаршисида ювмоқ — покланмоқ учун қилган саъӣ-ҳаракатлари, ўртаниб тортган изтироблари тасвирланади. Шуниси ажойибки, унга — ўша бош қаҳрамонга (исмлар ёдимдан чиқади-да! Моҳияти қолаверади — нима қиласай?) бу борада ҳеч ким, ҳеч бир зот маслаҳат бермаган, дейлик, ғойибдан қандайдир ваҳий-да келмаган. Ҳа, у Ўзи-Ўзлигини поклаш, аникроғи, ниҳоят, Инсон номига муносиб бўлмоғи учун шу йўлни тутади...

Офарин! Унга эмас, уни Яратган зотга оғарин!

— Шукур ака, бир дақиқа. Ўша асарни мен ҳам ўқиганман. Яхши. Лекин, баъзи жойлари одамни ишонтирмайди-да. Масалан, ўша Маслованинг орқасидан сургунларга бориб юришлари қандайдир...

— Тушундим. Сиз-ку — сиз, ўша асар эълон қилинганида, уни дастлаб ўқиб чиққанлардан бири Антон Павлович — Чехов жаноблари ҳам, масалан, «мен факат ўша мурданинг ётиши тасвирларига ишондим. Мурдани қандай гўзал тасвирлаган. Бошқаси...» ва ҳоказолар деган эди.

Бу — табиий ҳол, албатта. Мен ҳам ишона қолганим йўқ Нехлюдовнинг хатти-ҳаракатларига...

Лекин, Толстойнинг НИЯТИ... мени мафтун этган. Ундай инсонлар инсонига топингим келган. Ҳа, ўша ИНСОНСЕВАРГА... Хуллас, тарбия отли мавзумизга қайтсақ, Толстой Инсон Тарбиясига ўта-ўта жиддий ёндашган экан.

Унинг — минглаб «душлари» бор дворян-бойнинг деҳқон болаларини йифиб, мактаб очиб, уларни ўқит-



ганини эсланг! Нима зарил келибди экан. Унга бу ишлар? Тағин денг, ўша жужуқларга дарслик китблари ҳам ёзган-а?

Мактабда — ўзбекча дарсликларимизда ўқиганмиз-ку: «Шер билан кучуквачча», «Айиқ билан икки дўст» ва ҳ.к. Нима кераги бор эди унга бу ташвишларнинг??

Шу тобда ўзимизда — айни ўша 30-йилларда чиққан маърифатпарвар адибу шоирларимиз, борингки, зиёлиларимиз бўлмиш — Авлонийлар, Мунавварқорилар, Фитратларни эсламай бўладими? Ўз-ўзидан эсингизга тушиб кетади-я, тавба.

Ана, ўзим ҳам хиёл чалғидим... Гапнинг қисқаси, бу аллома адиб, бу дворян-бойвачча Баркамол инсоннинг шаклланиш жараёнлари ҳақида (инчунин Ўзи-ўзлиги ҳақидаям!) ўйларга толиб, шундай бир холосага келади.

Мен бу холосани «ўзлаштирма гап» қилиб баён этаман. Мана, Инсон тарбиясига замин бўлгич омиллар бор: МАКТАБ (ўқитувчилар, сабоқлар...) бор, ОТА-ОНА (демак, жамият-кўй ҳам шу ҳисобга киради) бор. Тағин, умумий МУҲИТ-да мавжуд (давлат сиёсати, манфаатлари, ташвиқотлари...).

Бу УЧОВЛОН, аниқроғи, икковлон ёш вужуднинг камол топиши, баркамол инсон бўлиб етмоғи учун кўлидан келган ҳаракатни қиласи: демак, ақли етган қадар (ўзлигидан-да келиб чиқиб) тарбия бегради... Аммо, — о, дунёи кўтири, — «тарбия топган» жужуқларнинг тўқсон тўққиз фоизи ота-онасига тортиб кетади.

Толстой ота-онасига тортмаган!

Қарабсизки, бири — анчайин помешик-дворян бўлиб етишибди, бошқа бирори яна «душ»лигича қолаверибди... Уларнинг ҳар иккисида ҳам БАРКАМОЛЛИК кўринмабди.

Толстой ҳазратлари бу ҳолга иқрор бўлганларидан

кейин қўйидаги тезис-дастурни олға сурадилар: «ДЕМАК, ИНСОН — бўлажак инсон ЎЗИНИ ЎЗИ тарбия қилиши керак!»

Ўрисчасига: «САМОВОСПИТАНИЕ».

— Қаранг, масаланинг шу тарафи ҳақида жуда кам гапирамиз-а? Менимча, гап адабиётта келиб тақалди?

— Худди шундай... Чунки китоб ўқийдиган кимса — ёшми у, кексами у — қатъи назар, КИТОБ билан юзма-юз қолади. Ундаги — асаддаги қаҳрамонлар билан ЎЗИЧА гаплашади. Орага бирор тушмайди! Йўқ-йўқ. Китобхоннинг ўзи... ўзини тарбия қила бошлага нини сезмай ҳам қолади. Сиз айтган «турли усуллар»дан Толстой домла айни мана шу усулни «энг самара ли усул», деб ҳисоблайди ва шунга буткул ишонч ҳосил қиласиди. Илло бу ҳолга ЎЗИ мисол — ўзлиги шоҳид...

— Шукур ака, илтимос, Сиз ҳам ўзингиздан-ўзлигингиздан бирон мисол келтириб ўтсангиз. Тарбия бобида.

— Энди мисоллар шу қадар кўпки, ҳатто қандай қадам босишпим ҳам ўша — Адабиёт билан боғлиқдек...

Болаликдан тушсам. Иккинчи курс... узр, иккинчи синфларда ўқирдим. Ўша ўзингизга маълуму машҳур «Икки сандик» эртак-китобчани ўқиб қолганман. Бу тўғрида ёзганман ҳам... Унда, масалан, «Зумрад сув олгани жилғага тушса, гуллар эгилиб салом берарди», деган жумла бор. Ўлай агар, «гулларнинг эгилиб салом беришига» наинки ишониб қолган эдим, билъакс, уларни илгаригидан ҳам яхшироқ кўриб қолгандим. Оқшомлари баргаклари юмилаёттан номозшомгулни кўрсам, «уйқута кетаётир», деб кулимсирардим. Кейин ҳовлининг чирогини ёқиб кўйсам, қурмағур номозшомгул очилиб кетарди-да, мен: «Алладим, алладим!» деб кулардим. Кейин унга раҳмим келарди...



Ёки бўлмасам, ўша... йўқ, иккинчими-учинчими синфнинг «Ватан адабиёти» дарслигига бўлса керак: Куддус Муҳаммадийнинг «Бол ари» деган шеъри бор. Шеърнинг устида учиб юрган асалари билан атиргулларнинг расмиям солингган эди. Шеърда шундай сатрлар ҳам бор эди:

Бол ари, ҳой, бол ари,  
Учиб ўйин сол, ари.  
Боғчамизда яирашиб,  
Ғув-ғув нағманг чол, ари...

«Вей, асалари билан гаплашиш мумкин экан-ку?» деб ўйлаган бўлишим аниқ. Ўйламаган эсам-да, арилар билан гаплашадиган бўлувдим. Баъзан уларни қувлаган бўлиб, шу шеърни қўшиқ қилиб куйлардим. Ёки бўлмасам, ўша китобда Зафар Диёрнинг:

Тўрткўз итим ўйнайди.  
Ўйнамасам — қўймайди...

деб бошланадиган шеърини ўқиганимдан кейин Қорабой деган маймоқ итимни янайм яхши кўриб қолгандим. Ўша йиллар итлар қулоғидан касал бўлишар, кейин қулоғи... осилиб, боши ҳам ўша томонга қийшайиб, ўлиб кетар эди. Во-о, ўша ит учун қанча қайғурганман:

Энди ким билан ўйнайман, Қорабой жўра,  
Сени соғинаман, бир ўйлаб кўр-а...

Умуман, «Табиатни» дейишим мумкин — менга қайта бошдан севимли қилган, дўстта-ҳамроҳга айлантирган «мактаб ҳам, ота-онам ҳам» — аслида Адабиёт бўлади!

Энди, кап-катта йигит, ҳатто университетнинг қайсиdir курсида ўқиётганимда Адабиётнинг менга дафъатан кучли таъсир этган моментларидан бирини айтиб берсам.

Ўшанда Ёзувчилар уюшмаси «Первомайский» деган кўчада — икки қаватли иморатда эди. Биз — то-



либи илмларни қайсиdir домламиз оборган эдилар ўша ерга — қандайдир йигинга. Шунда йўлакда соти-лаётган китобларни кўриб, кимнингдир маслаҳати билан Эрнест Хемингуэйнинг янги чиққан икки жилдлик русча асарларини 25 сўмга сотиб олдим.

Квартирамга обкелиб, биринчи ўқиганим — «Иметь или не иметь» деган романи бўлди. Ўзбекчаси — «Гардкам!..»ми? Йўқ — «Бўлсанг-бўл, бўлмасанг-ўл». Асар асосан контрабандистлар ҳақида... Тағин унда Испан урушидан келган бир ногирон жангчи ҳам бор. У — таги журналист. Ўша йигит (тағин исми эсимда йўқ. Майли, кебқолар) бир куни денгиз ёқасида сайр қилиб юрганида, плашига ўраниб ўтиб кетаётган бир жувонга кўзи тушади. Жувон ҳам уни кўриб: «О, Генри!» деб изига қайтади. Кўришадилар. Йигит эслайди: бу — машхур фоҳиша. «Қалай энди?» деб ахвол сўрайди йигит. «Э, сўрама, уруш тугади-ю, қашшоқлик қачон тугар экан, ҳайронман», деб жавоб беради аёл. Кейин у: «Эй, Генри, мени бир кафега обкирмайсанми?» деб қолади. Йигит жилмайиб: «Юр, яхши бўлади-да», деб уни эргаштириб кетади. Кафедан кафе кўп. Биттасига кирадилар. Швейцарга плашларини ечиб беришади. Кейин ўзлари умумий залга ўтишади. Тамаки ҳиди, виски ҳиди! Фала-ғовур. Танца тушишаёттири. Булар иккови ҳам уч оёқли стол ёнига бориб, виски буюришади. Бироз ичишганларидан кейин ўйин тушаётганлар орасидан журналистнинг бир-иккита таниши буларни кўриб қолиб, ёнларига келишади. Яна бироздан ичишади. Кейин улардан бири Генридан сўрайди: «Хоним билан рақс тушсак майлими?» Генри яна кулимсираб: «Ўзи билади. Ўзидан сўра», дейди. Фоҳиша шундай мамнун, чехраси очилиб кетган бўладики, жон-жон деб унинг кучогига киради. Улар айланиб-айланиб кетишади. Булар гурунг қилиб туришади. Кейин уйинчининг шериги ҳам кетиб, Генри ёлғиз қолади. Тағин бироз отади-да, битта сига-



ретни чекиб бўлгунча, хонимни кутади. Хоним шод-масур! У йигитдан бу йигитга, бундан яна бошқасига отилиб бориб, рақс тушаверади. Ниҳоят, Генри ярим жилмайиб, ярим хўрсиниб қўйиб залдан чиқади. Швейцардан плашини олиб кияди. Ҳақини тўлайди-да, унга яна ўн доллар узатади: «Менинг ким билан залга кирганим эсингизда бўлса керак?» — «Ҳа, сэр, эсимда. У қизни жуда яхши танирдим», деб жавоб беради хизматкор. «Чиқиб, мени сўраса, мана шу пулни унга беринг. Сўрамаса, обкўйинг, кейин бир киришда оламан». — «Хўп бўлади, сэр», деб уни кузатиб қўяди швейцар.

Орадан анча кунлар ўтгандан кейин Генрининг йўли тушиб, тагин шу кафега кириб қолади ва швейцардан: «Ўша хоним нима қилди залдан чиқиб? Мени йўқладими?» деб сўрайди. «Йўқ, жаноб (сэр). Кайфлари бор эди. Танишлари билан кетиб қолди», деб жавоб беради хизматчи. Сўнг Генрига ўн долларни узатади. Генри пулдан беш долларини унинг олдига ташлаб, чиқиб кетади...

Тамом.

— Буни ўқимаган эканман, Шукур ака. Ҳемингуэйнинг қаҳрамони жуда олижаноб йигит экан.

— Гап шунда-да... Шунинг ўрнида, ўша журналистнинг ўрнида ўзимизнинг йигитларимиздан биронтаси... келинг, ўзим бўлганимда, нималар қилган бўлардим? Тасаввур этиш қийин эмас. Авваламбор, фоҳишани бунаقا даргоҳларга етаклаб кирмасдим. Хўп, етаклаб кирганимдаям унинг бировлар билан танса тушиб кетишига қараб турмасдим. Ниҳоят, унинг йигитдан йигитнинг кучофига ўтаётганини кўриб, тоқат қилолмасдим-да, уч оёқнинг устидаги бутилкани олиб, секин уларнинг ёнига борардим. Ана тўполон — мана тўполон...

Ёки, ёки анову швейцарга мени эсидан чиқарган аёлнинг эсига яна тушиб қолиб, мени суриштирга-

нида: «Бериб қўйинг», деб ўн доллар берган бўлур-мидим? Тошни берардим...

Э, яна буёғиям қизиқ: бирон ҳафтадан кейин ўша кафега қайтиб кириб, ўша жонон мени сўраган-сўраганини суриштирганимда, ўзбек швейцар нима деб жавоб берган бўлур эди?

Бу ёғини тасаввур этишни Сизга қўяман...

Ўшанда жуда ёлғизликни ҳис этганман. Ўзи, ҳақиқатан ҳам ёлғиз ўзим эдим квартирамда. Ўзиму китоб! Ўзиму Генри билан фоҳиша... Ўзлигим ҳақида кейин қанчалар изтироб билан ўйлаб қолганимни тасаввур этишингиз қийинмас. Ўзимни шу қадар юраги тор, яна алламбалолардек ҳис қилгандимки, қўяверинг.

Кейин, табиий равишда, ўша журналистдай Одам-Инсон бўлгим келган эди-да! Тағин дент, ўша пайтда — ўша йилларда совет сиёсати ҳар сония миямизга куярди: «Америка — империалистик давлат. Чириб бораяпти. Халқи жоҳил ва оч. Уларда бўрилар қонуни амалда! Бир-бирини ейиш пайида кун кўрадилар!» ва ҳ.к.

Бадиий асар — Китоб — Адабиёт... менинг кўзими-ни очиб юборган эди, десам ишонасизми?

Мана — Адабиётнинг кучи.

Мана, у билан ёлғиз (атрофда одамлар бўлсалар ҳам, барибир ёлғизликда сухбатлашасан асар қаҳрамонлари билан) қолганингда кўнглингдан кечадиган — киши билмас ўйлар-хаёллар, мулоҳаза-фикр, ҳатто — тақлиду қиёлашу қиёсланишлар...

Бир олам ТАРБИЯ беради (ҳар йўсинда) бу мўъжиза-Адабиёт! О, унинг садағаси кетай... Шу ерда «мисол»га нуқта қўйиб, бошқа бир нарсани айтсан, майлими?

— Қани-қани?

— Бундан уч-тўрт ой муқаддам десаммикан, телевизорда — хато қилмасам, — Алишер деган укамиз



«АДАБИЁТ» мавзуида давра сұхбати ўтказди. Ҳим, ўртада яна иккита йигит: бири — шартли равища қораловчи, бири — оқловчы. Уларнинг ортида — йигит-қизлар...

Ўшанда пачоққина, сурроқ кулимсираб турган бир йигитча бошловчининг саволига жавобан — тахминан шундай деди: «Адабиёт менга керак эмас. Менинг мақсадим бор, компьютерни ўрганаман. Шу мақсадимга мос келадиган илмий қўлланмаларни ўқийман. Мақсадимга, албатта, етаман!»

Мен ўшанда ўзимча шивирладим:

— Мақсадингга етарсан-у, аттанг, барибир одам бўлолмас экансан-да, нодон. — Кейин жаҳлим чиқа бошлади. — Унинг ишшайиб туришини қара. Ҳудди бир нарсани қойил қилиб қўйгандай... Оббо, қаердан чиқди ўзи бунақа гаглар-а: «Ҳар кимнинг ўз ФИКРИ бўлиши керак!» Ҳа-ҳа-ҳа, фикри бўлиши керак!

Лекин оламда шундай ҳақиқатлар борки, жумладан, Яхшилигу Ёмонлик, Нодонлигу Жоҳиллик, Раҳм-шафқату буларнинг акси... Бу тамойилларга нисбатан ҳар хил эма-ас, БИР хил фикр, бир хил кўзқараш бўлиши керак-ку! Акс ҳолда...

...Урғочиси ғажиётган сўнгакни тишлаб тортиб олган йиртқич сиртлондан нима фарқимиз қолади?

Ҳа, бунақа — нигилист йигитчалар ўз МАҚСАДларига етиш йўлида сўнгакдан каттароқ ўлжаларни-ям ўмаридекетишилари мумкин... Раҳмдиллик? Нега раҳмдил бўлишилари керак? «Мақсад» йўлида олға босаётган шоввознинг бировга меҳр-шафқат кўрсатиб ўтиришга вақти йўқ, ахир! Ёхуд бир мунгли — қайгулардан ҳикоя қиласидиган мумтоз мусиқа янграётир дейлилк. Уни тинглашга вақти борми унинг? Вақти бўлган чоғдаям тинг-ла-майди. Ахир, бу куй уни ўйлатади... Унга эса, ўйлатмайдиган, МАҚСАД сари юришига кўмак берадиган ё кайфини чоғ қиласидиган енгил, ўйинқароқ ва қичимол қўшиқлар керак...



Юнусобод бозорига кираверишда ҳар гал эшитаман шундай қўшиқларни: «Оқшом кел, бир маза қиласлий...», «До-од», деб чинқириб қўяди мусиқа ёзилган кассеталарни сотаётган йигитча гижинглаб. Унга бошқа шериклариям қўшилади ва ўша кассетани харид қилишади... Ҳа бизнинг ўша — МАҚСАД сари интилишга аҳд қилган пучук йигитчамизning ўзига хос маслақдошлари — булар...

Й-ўйқ, бунақалар билан бир окопга тушиб қолишдан Худо асрасин. Мисол учун-да...

Унга жон керак: мақсад сари интилиши учун...  
Ҳимоя, дўстни ёлғиз қолдириш?

А, нима бўпти!

Даҳшат-а?

Ўша кўрсатувнинг охирида яна битта — қандайдир саволга ўша йигитча шундай жавоб берди: «А-а, «Ўтган кунлар»ми? Ўқимаганман. Отебк («Отабек» эмас) деган йигитнинг фожиаси ёзилган эмиш. Телевизорда кўзим тушган... Йўқ, ўқимайман. Ахир, айтдим-ку, менинг адабиётгаям ўз нуқтаи назарим бор. Ўз фикрим бор...»

Вассалом.

Кейин бошловчимиз ҳам, назаримда, қовун туширдилар. «Мана, маълум бўлдики, — дея палағдагина товуцда хulosса ясай бошлади бошловчи укамиз, — ҳар бир масалага ҳар хил ёндашиш бўлганидек, адабиётга ҳам икки хил қарааш мавжуд экан. Бу — табиий ҳол...»

Э, бекорларни айтибсиз!

Тавба.

— Шукур ака... Бундан анча йиллар бурун чиққан бир маъруза-мақолангиз «Адабиёт ўладими?» деб номланган эди. Орадан шунча йил ўтди. Ҳақиқий адабиёт тақдирига доир мунозаралар эса ҳамон давом этиб келаяпти... Ҳаваскор шоиру носирлар топса — ўз пулита, топмаса — улдабурролик қилиб — ўзига яқин

ташкilotларнинг бошини қотириб, машқларини китоб қилиб чиқараяптилар. Ҳатто баъзилари ўша — бир пулга қиммат китобларини кутубхоналаргаям жойлашириб пул ишлаётирлар... Шу ўринда иккита нарса ўйлантиради. Биринчиси — ўша пул қайси манбадан олинишидан қатъи назар, барибир — жамиятнинг бойлигидир. У беҳуда совурилаяпти! Иккинчиси: майли, қоғоз, босмахона ҳақини айтмаган тақдирда ҳам, уларни китоб қиёфасига келтириш учун нашриётларда меҳнат қилаётган қанчадан-қанча ижодкорлар ақлий меҳнатларини самарасиз ишга сарфламоқдалар... Боз устига ҳақиқий адабий меҳнат билан қиёмига етмаган асарларини журналларда, китобларда турфа жанрлар билан бостириб, ўкувчилар дидини ўтмаслаштираётганлар-да, йўқ эмас.

— Аввало, ўша маърузамга «Адабиёт ўладими?» деб ном кўйган бўлсам, бу — Адабиётнинг куни тўлаётганидан хавотирга тушганимдан эмас эди! Мен ушбу сарлавҳани кўштироқ ичига олган эдим ва биринки саҳифадан кейин шу мазмундаги гаплар кулагимга чалинаётганини илова қилган эдим. Шу боис бироннинг гапини кўштироққа олиб, сарлавҳага чиқаргандим. Зоро, бу сарлавҳа ўкувчилар диққатини кўпроқ тортса ўзига, деган ниятим ҳам йўқ эмас эди.

Сиз таъкидлагандек, маъруза-мақолага (маърузамнинг учдан бири ўшанда «ЎзАС» саҳифаларида қисқариб чиқсан) нисбатан турли-туман муносабатлар билдирилди. Ҳатто битта тузуккина ёзувчи укам: «Шукур ака, адабиёт ўлмаслигини биламан. Шунинг учун ўша йиғинга бормай қўя қолдим», деган эди. «Ажаб, мен буни билмас эканманми?» деб кулимсираб кўйган эдим мен ҳам...

Адабиётнинг ўлими — Инсоннинг ҳалокатига тўғри келади: илло бу инсониятнинг тадрижий тақомилидаги ақлий ва ҳиссий Ўсуvinинг ҳосила-сидирки, Инсон ундан кечиб орқага — ибтидой

сезимлару фикрлаш тарзига қайтолмайди. Биль-акс олға бориб, Адабиётнинг янгидан-янги имкониятларини очадики, Адабиёт, ўз навбатида, ана шу Инсон(ият)нинг ақлий ва ҳиссий такомили даражасини ойнадагидек кўрсатиб туради: булар — узангги-йўлдошdir.

Энди бозор иқтисоди шароитида ҳар хил қораламаларнинг китоб ҳолида чиқиб кетаётганига келсак, бундай муаллифларга эргашаётган айрим ёзувчиларни ҳам ана ўша «ҳаваскорлар» сафига қўшмоқ керак. Чунки уларнинг адабий савияси ҳам, ном чиқаришга ишқибозлик даражалари ҳам бир хил.

Шу тобда раҳматли Асқад Мухторнинг бир мулоқотда айтган гаплари ёдимга тушиб кетди: айтмасам бўлмас... «Асқад ака, — деб сўраганман мен, — нимага бу одам чол-мўйсафид бўла туриб, бунчалар нодон-а?» Асқад ака жавоб берганлар: «Чунки, Шукуржон, улар ёшликларида ям нодон эдилар. Демак, нодон ёшлардан доно қариялар пайдо бўлмас экан». Зўр гап-а?

— Асқад ака — донишманд одам эдилар-да!

— «Хўш» деганингиздан билдик — ўзбек эканлиз, деганларидек, бир-биirimизни тушундик. Энди мен сизга бир эмас, иккита мисол айтаман-да, кейин биргалашиб ўйлаб кўрамиз... Остап Бендер ролини кинода ўйнаган машхур актёр, ҳозирда режиссёр (исми нимайди? Руревми, Гуревми — шу-да!) телевизорда мухбирга интервью берар экан, «Нима учун bemaza саҳна асарлариям кўпайиб кетди?» деган саволга анча ўйланиб қолиб, афтидан не-не андишалар билан шундай жавоб берган эди: «Бизда цензура йўқотилди. Бу, бу — жуда яхши иш бўлди. Аммо лекин бадиий асарни ўқиб чиқиб, мулоҳаза билдирадиган, керак бўлса — уни таҳлил қиласидиган, керак бўлмаса — қайтариб юборадиган зукко мұхаррирлар ҳам ройиб бўлишиди. Ёзганингни чиқаравер — қўлингдан

келса, демократия замони бу!» дейилди, демак. Ана шунинг учун «Яхши асар» билан «Ёмон асар»нинг фарқига боролмай қолдик. Бу соҳада «замона — зўр графаманники ё пулдорники бўлиб кетди».

Бу теран ва аччиқ мулоҳазалар — боёқиш режиссернинг юрагидан ситилиб чиқсан дард — бизнинг ҳам дардимиз эмасми?..

Энди, иккинчи мисолни айтаман. Бир куни Антон Павлович шогирди Бунин билан Қора денгиз соҳилида сайд қилиб юриб, иттифоқо тўхтаб қолишади. Толстой... Лев Толстой сув ёқасидаги бир қояда қоядек бўлиб ўтирганиш. Оппоқ соқоли елпиниб, елкала-рига учармиш. Чехов ўзига хос назокат ва дўхтирларга хос хотиржамлик билаб дебди: «Иван, Толстой қари-ди. Яқинда ўлади. Биласанми, унинг ўлими мени ун-чалик ҳаяжонга солмайди. Бошқа нарса ҳаяжонга со-лади: адабиётимизда қаланг-қасанғи ёзувчи, хом-хатала асарлар бодраб кетади. Диднинг бузилиши бош-ланади. Демак, одамга зиён етади... Толстойнинг ав-торитети адабиётимизни ана ўша лойқа оқимлар бос-қинидан асраб турибди ҳозир...»

...Буюк авторитетлар, Адабиётни виждони пок ҳолда кўтариб тургувчи билимдон истеъдод соҳибра-ри... Қани? Қаҳдору Ойбек қаторидаги чинорларимиз қулаб кетди. Таңқидчи-адабиётшунос олимларимиз ҳақидаям шу гапни айтиш мумкин. Масалан, Озод ака Шарафиддинов батамом публицист бўлиб олди-лар. Домла Кўнжонов анчайин ҳаваскор адабнинг ҳам бошини силаяптилар, холос. Умарали ака шоирона эҳтиросларга бериладиган бўп қолдилар. Норбой ака, умуман, сафдан чиқиб кетди. ИброҳимFaфуров бошқа йўлда ижод қилаяпти. Қозоқвой Йўлдошев зўр-у, баъзан унинг шахсий «мен»и «шунос»лигини бо-сиб кетади...

Хаёл қиласманки баъзан, азиз умрларини адабиётимизга тиккан бу олимларимиз худдики селдан —

бўтана тўлқинлар қаъридан соҳилга чиқиб бир қаттиқ силкинишда анча-мунча лойқа сув зарраларини сочиб ташлаб, атрофларга чимирилиб қараган тулпордек, би-ир силкини-иб олсалар, олам гулистон бўлиб кетадигандек.

Аммо айни чоғда сезиб ҳам тураман: буларнинг ортида суюнадиган тоғлари бўлиши билан бирга қўллари ҳам узун — нашриёту журнallарга бемалол етадиган бўлиши керак... Ўзини ҳурмат қиласидиган ёзувчи ҳам йирик жанрдаги ҳар қандай асарини шу соҳа мутахассислари муҳокамасига қўймасдан эълон қилиб юборишни... ор билгани тузук.

Ҳа, шундай бўлиши керак. Акс ҳолда китобхоннинг савияси — бизнинг савиямиз орқага кетиши тайин... Ҳолбуки, биз комил инсон, баркамол жамият йўлини туттганмиз. Шундайми?

— Албатта... Чарчатиб қўймадимми, Шукур ака?

— Йўқ... Айтдим-ку, бу масалаларда маслаҳат бериппга мен ҳам «ёшлик қиласман». Сиз айтган муаммоларга бирмунча муносабат билдиридим, холос.

— Майли. Суҳбатингиз учун, раҳмат, Шукур ака.

— Сизгаям...



## АДИБНИНГ КЎНГИЛ ЧИРОФИ

Соч-соқоли оқ, юзидан алломалик нури балқиб турган хушрўй бу инсон, замондошларининг эътироф этишича, бир қараашда қаттиққўл, сиёсатли одамга ўхшаб кўринса-да, фоят зийрак, кўнгли очик, адабиётта кириб келаётган истеъодли ёшларни астойдил қўллаб-куватлайдиган инсон бўлган экан.

Абдулла Қаҳҳорнинг ижодий ва инсоний қиёфасини тавсифловчи бу чизгилар нақадар ҳаётий эканини адаб умрининг сўнгги икки-уч йилидаги ўзим гувоҳ бўлган бир-икки воқеа мисолида ҳам рўй-рост кўриш мумкин, деб ўйлайман. Ўшанда – бундан қирқ бир йил муқаддам Абдулла Қаҳҳор деган ном ўзбек миллий адабиёти доирасидагина эмас, собиқ иттифоқ кўламида ҳам алоҳида эътибор билан тилга олинарди. Асарлари хорижий тилларга таржима қилинган, “Сароб”, “Кўшчинор чироқлари” романлари, “Ўтмишдан эртаклар” қиссаси, ўнлаб машҳур ҳикоялар муаллифи бўлган адабни адабиёт муҳлислари бениҳоя севишарди, китобхонлар асарларини қўлдан қўймай ўқишар, драмаларини завқланиб томоша қилишарди. Радио тўлқинларидан “Шоҳи сўзана”, “Оғриқ тишлар”, “Аяжонларим” каби писетлар, “Синчалак” қиссаси асосидаги радио спектакллар тез-тез таралиб турарди.

“Тобутдан товуш” спектакли Ҳамза театри саҳнасидан олиб ташлангани ҳақида ҳар хил гаплар ҳам юрарди. “Литературная газета” саҳифаларида босилиб турган ижтимоий-маънавий мавзудаги ўткир мақолалари эса муҳим янгилик сифатида кутиб олинарди. Адаб бу мақолаларида республикада айтиш қийин бўлган, бироқ одамларининг ҳаёт тарзларида юз кўрсатадиган ижтимоий муаммоларни ҳозиржавоблик билан тилга оларди. Бу гаплар ҳар қанча тагзаминили,



пишиқ-пухта асосларга эга бўлишидан қатъи назар мустамлака республиканинг расмий идораларида хушланмай қабул қилинарди. Шунга қарамай, адабнинг эл орасида, айниқса, адабий жамоатчилик ўртасида обрўи баланд эди. Одамлар дилидаги оғриқли гаплар жамиятнинг вижданни сифатида адаб томонидан ошкора айтилиши барчани руҳлантирас, эзгуликка ишончни мустаҳкамлар эди.

Кўпчилик адабнинг катта шуҳрат қозонишига сабаб Абдулла Қаҳҳорнинг ёзувчилардан биринчи бўлиб, руҳий қашшоқлик, моддий дабдабабозлик кетидан қувиш, порхўрлик, таниш-билишлиқ, алдамчилик каби ижтимоий иллатлар ҳар қандай тузумни ичидан емириши мумкинлигини ўз асарлари орқали кўрсатишга ҳаракат қилганида, деб биларди. Ёзувчи жамиятнинг онгли аъзоси сифатида ҳётдаги мана шу жараёнларни фош қилишга, адолатни ҳимоя этишга ҳаракат қилгани катта ибрат эди.

“Қиз-жувонларнинг гўзаллиги пахта жўякларида қолиб кетмоқда” деган гапни ҳам биринчи бўлиб Абдулла Қаҳҳор айтган. Бундай ўйлаб кўрсантиз, бу гап аслида эндиликда кескин қораланган пахта яккаҳокимлигига, собиқ иттифоқнинг бу борадаги мустамлакачилик сиёсатига кескин бир эътироҳ бўлган. Шунинг учун ҳам маҳкамачи тўралар адабнинг ҳар бир гапини оғринмасдан қабул қилмаганлар.

Истиқлол орзусидаги минг-минглаб оддий одамлар эса адабни ана шу ҳақѓўйлиги учун қадрлашар ва олқишлишарди. Маҳаллий тўраларнинг ҳайиқиши шундан эди. Аслида ўша замоннинг катта-кичик раҳбарлари ҳам ич-ичидан адабнинг бу гаплари тўғрилигини билишган, бироқ Москванинг қаттиқ назорати остида буни очиқ эътироф этиб бўлмасди. Адаб ва раҳбарлар ўртасидаги хушомадгўй таъмагирларга эса мана шу керак эди. Улар сувни лойқалатиб, орани бузишга ҳар дақиқада ҳозир нозир эдилар.

Шундай кунларнинг бирида ҳозирги Амир Темур хиёбонида жойлашган университетнинг филология факультетида таниқли ёзувчи Пиримқул Қодировнинг эндиғина эълон қилинган “Қора кўзлар” романни муносабати билан бир учрашув бўлди. Унга Пиримқул аканинг устози сифатида Ўзбекистон халқ ёзувчиси Абдулла Қаҳҳор ҳам ташриф буюрди. Миллат ифтихорига айланган адебининг бу ташрифи ни талабалару домлалар худди байрамдек қарши олишгани, учрашув ҳаммага зўр кайфият бағишлаб, руҳимиз кўтарилиб кеттани кечагидек эсимда.

Адабиётшунос олим Озод Шарафиддинов олиб борган ва янги роман ҳақида тўлқинланиб сўзлаган бу учрашувда айтилган ҳар бир гапни жон қулоғимиз билан эшитишга ҳаракат қиласадик. Абдулла aka сўзга чиққанда талабаларнинг чуғур-чуғури босилиб, залга жимлик чўқди. Абдулла Қаҳҳор нима деркин, деган ўй ҳамманинг фикри-зикрини забт этган эди. Соchlари оқарган, юз-кўзларидан нур ёғилиб турган Абдулла aka ўзига ярашган бир ажиг вазминлик билан сўз бошлаб, ўзбек адабиётининг ривожи аксарият ҳолларда ёш ижодкорларнинг янги асарлари орқали намоён бўлаётганига эътибор қаратди-да, Абдулла Орипов, Эркин Воҳидов каби истеъдодли шоирлар, Одил Ёқубов, Пиримқул Қодиров, Шукур Холмирзаев ва бошқа истеъдодларнинг ижодий истиқболи умид уйғотаётганини эътироф этиб ўтди. Адаб Пиримқул Қодировнинг янги асари ҳақида ҳам кўнгли тўлиб гапиргани эсимизда. Ўшанда эҳтимол ёзувчини ошириб мақтаб юбормадимми, дегандай андишада бўлса керак, янги асар ҳақида сўзлаётиб, “Пиримқул русча фикрлаб, ўзбекча ёзади”, деб кулиб кўйганди. Бу Пиримқул аканинг узоқ йиллар Москвада ишлагани учун бир дўстона ҳазилми ёки ҳақиқатан ҳам асарнинг айрим қаҳрамонлари талқинида бу ҳол сезилиб қолган бўлса, шунга ишорами,

билолмаганмиз. Эҳтимол, бу катта адабнинг шогирдларига дўстона айтган сабофи бўлиши ҳам мумкин. Дарҳақиқат, Абдулла аканинг устозлик меҳридан баҳраманд бўлган шогирдларнинг эътироф этишича, ўша йилларда адабий муҳитда “Абдулла Қаҳҳор нима деркин?” деган ибора кенг урф бўлиб, жуда кўп ёзувчиларни шошмашошарлик ва ижодий меҳнатга бепарвоник билан ёндошишдан огоҳлантириб турган.

Талаба сифатида хотирамда муҳрланиб қолган воқеаларнинг иккинчиси олтмиш еттинчи Йилнинг ўн еттинчи сентябрида Навоий номидаги катта театрда бўлиб ўтган Абдулла Қаҳҳор таваллудининг олтмиш йиллиги кечасидир. Ўшанда театрнинг иккинчи ошиёнасидан жой текканига шукр қилиб, юбилей кечасида айтилаётган ҳар бир сўзни онгимизга жойлаб олишга ҳаракат қилганмиз. Кечанинг нуфузини шундан ҳам билиш мумкин эдики, бу тадбир Константин Симонов таржимасидаги “Синчалак” повести билан жаҳон китобхонлари эътирофига сазовор бўлган, “Шоҳи сўзана” комедияси эса собиқ марказнинг давлат мукофотига сазовор бўлиб, Москва, Санкт-Петербургу бошқа шаҳарларнинг театрларида ҳам намойиш этилган улкан адабнинг юбилейи эди.

Адаб исходи ҳақида атоқли адабиётшунос олим Иззат Султон маърузаси тингланди. Ўшанда Иззат ака, бундай пайтларда кўпинча одатланиб қолинганидек, рус тилида эмас, соф ўзбек тилида сўз айтгани гулдурос қарсаклар билан олқишиланган эди. Шундан сўнг Иззат ака ўз нутқини рус тилида ҳам баён этишга тарафдуланаётуб: “Азиз ўртоқлар, ўттиз-қирқ йиллаб шу юртда яшасалар-да, тилимизни ҳанузгача ўрганмаганлар орамизда борлиги учун мен маърузамни рус тилида ҳам такрорлашга мажбурман!” дегани кўпларнинг хотирасида сақланиб қолган.

Узоқ-яқиндан келган ёзувчилар кутловидан сўнг ниҳоят Абдулла акага сўз берилганда театрга йигил-



ган бутун жамоатчилик адабнинг ҳар бир сўзини жон қулоғи билан эшита бошлади. Абдулла Қаҳдор ҳеч қачон оддий, ҳамма ўрганиб қолган сўзларни айтмас, унинг ҳар бир чиқиши ва ҳар бир сўзи бетакрор бўларди. Адаб ўз эътиқодларига содиқ ҳолда ижодкорнинг жамият олдидаги бурчи, адабиётнинг умумисоний вазифаларидан келиб чиқиб, ўз миннатдорлигини баён этар экан: “Мен қирқ йиллик ижодий фаолиятим давомида кўп иш қилолганим йўқ, чунки бу қирқ йилнинг кўпини тажриба орттиришга сарф қилдим”, деди бениҳоя улуғ камтарлик билан. “Азиз ўртоқлар!” — деб бошланган ана шу нутқнинг охири тахминан мана шундай мазмунда якунланган эди: “Баъзи дўстларим сен хушмуомалаликни билмайсан, кўполсан, гапни эплаб гапира олмайсан, дейишади. Нима қиласай феълим ўзи шунаقا. Мен партиянинг “есть” деб честь бериб турадиган солдати эмасман. Мен партиянинг онгли аъзосиман!”

Бу гапдан сўнг зал бир тўлқинланиб олгандай бўлди. Бу гап кимгадир ёқди, кимгадир ёқмади. Аслида у қадар ёмон гап айтиланий йўқ эди. Абдулла Қаҳдор бор-йўғи: “Мен ўзим яшаётган жамиятнинг онгли аъзосиман” деган эди, холос. Бироқ бундан қирқ йил муқаддам шўролар салтанати энг гуллаган даврда жамиятнинг онгли аъзоси бўлиш мустамлакачи тўраларга очиқдан-очиқ ёқмасди. Шунинг учун ҳам адабнинг бу гапи жуда оғир қабул қилинди. Унинг ижодига, ҳар бир айтган сўзига “қора кўзойнак” билан қараш давом этди.

Ўзбекистонда хизмат кўрсатган журналист, таниқли адаб Алиназар Эгамназаровнинг эсласича, Абдулла ака “Тобутдан товуш” асари муносабати билан ижодкор талабалар ҳузуридаги учрашувларнинг бирида ўша пайтдаги мафкура раҳбарларини назарда тутиб: “Баъзилар ижодкорлар билан суҳбатда ўзларини худди салтанатни кифти билан тутиб тургандек

бўлиб гаплашадилар. Ахир Сиз бу салтанатни елкан-гизда тутиб турган бўлсангиз, биз ҳам шу иморатга гишт қўйиб келяпмиз-ку”, деган эканлар.

Абдулла Қаҳҳор билан боғлиқ учинчи хотирани эслаш эса оғир. Бу улуғ адиб вафот этган кун, уни сўнгги йўлга узатиш маросими. Шўро мафкураси шоввозларининг совуқ муносабати адиб билан видолашув лаҳзаларида ҳам тарқамаган эди. Буни шундан билдики, ўша чоғлар Абдулла Қаҳҳор даражасидаги бирор атоқли арбоб ҳаётдан кўз юмса, бу хабар эълон қилиниши билан радио орқали мотам куйлари янгарди. Абдулла ака вафот этганда эса ундай бўлмади. Адибни сўнгги йўлга узатиш маросими ҳам одатдагидан ўзгачароқ — ҳозирги биржা маркази ўрнидаги эски концерт залида ўтказилди. Ижодкорлар, муаллимлар, талабалар, Абдулла Қаҳҳорнинг вафоти ҳақида эшиттан ва кўнглида буюк адибга нисбатан эҳтиром сақлаган зиёлилар бу маросимга келишган эди. Биз атеизм руҳи уфуриб турган замоннинг ёшлари ҳам одатда бундай тадбирлардан четроқда юришга одатланган бўлсак-да, ўзимиз яқиндан билган, учрашувларида иштирок этган, китобларини севиб мутолаа қилган адибни сўнгги йўлга узатиш маросимида қатнашишни ўзимиз учун бурч деб билғанмиз. Бошқача айтганда, ўша куни Абдулла Қаҳҳор гўё отамиздай бўлиб, бизни ҳам элга қўшган эди. (Ўшанда Ойбек домлаю Миртемир акаларни илк бор кўрганмиз. Ойбек домланинг концерт залига кираверишдаги айвонча устунига қўлини тираганча узоқ ўйга толиб турган ҳолати хотирамда муҳрланиб қолган. Орадан бир ойча ўтиб адабиётимиз Ойбекдек зардаст адибидан ҳам жудо бўлган эди).

Концерт залидаги видолашувдан сўнг Абдулла Қаҳҳор тобутини Форобий қабристони сари олиб бораётган одамлар оқими дарёдай тошли. Бу улуғ издиҳомда барча — ёзувчию олим, талабаю профессор,



оддий ҳайдовчию сотувчи, муаллиму шифокор—  
ҳамма теппа-тeng эди. Адиб тобути дастасига қўли те-  
гиб қолишига интилганларнинг ҳаммаси унинг мух-  
лислари, миллатдошлари, юртдошлари эдилар.

Улуғ адибнинг жисми тупроққа қўйилган маро-  
симда ҳукуматнинг барча раҳбарлари иштирок этди.  
Атоқли ёзувчи Шуҳрат Абдулла Қаҳҳорнинг сўнгги  
кунлари ҳақида сўзлаётуб айтган гаплар қулогимиз-  
да қолган. Адиб ўз умрининг сўнгги чоғларида Шуҳ-  
рат акага шундай деган эканлар: “Одамлар мени душ-  
мани кўп деб ўйлади. Ваҳоланки, менинг душма-  
ним йўқ. Мен ҳам ҳеч кимга душманлик қилган эмас-  
ман. Мабодо бирор одамга қаттиқ гапирган ёки у ҳақда  
ёзган бўлсам, жоним ачиганидан, ўша одамнинг та-  
лантсизлиги ёки ёмон асар ёзгани учун шундай қил-  
ганман”.

Ўша куни кўпчиликнинг тилида юрган ва айт-  
масликнинг ҳеч иложи бўлмаган яна бир гап шуки,  
Абдулла aka ҳаётлик чоғларида: “Мен асло ўлимдан  
кўрқмайман. Бироқ ўлганимда фалончининг қабрим  
устида нутқ ирод этишидан кўрқаман”, дер эканлар.  
Тақдирнинг ҳазилини қарангки, ўша куни худди  
атайлаб қилгандек, Шуҳрат аканинг жуда кўпчиликни  
тўлқинлантириб юборган юқоридаги сўзларидан сўнг,  
ўша русийзабон ёзувчи Абдулла Қаҳҳорнинг қабри  
устида сўз айтишга таклиф этилди...

Абдулла Қаҳҳор миллатпарварлик тимсоли эди.  
Адиб қалбидаги бу туйғу унинг Матёкуб Кўшжонов,  
Озод Шарфиддинов, Одил Ёкубов, Пиримқул Қоди-  
ров, Абдулла Орипов, Эркин Воҳидов, Шукур Хол-  
мирзаев каби жуда кўплаб ижодкор шогирдлари то-  
монидан эъзоз ила шарафланди. Бу адибларнинг ярат-  
ган асарлари, ҳаётий аъмоллари шундан далолатdir.

Адибнинг “Буюк хизматлари учун” ордени билан  
тақдирланиши истиқлолни соғиниб яшаган ва шўро-  
лар даврининг иллатларини фош этиб чарчамаган улуг

ёзувчининг ватанпарварлик йўлидаги бекиёс хизматлари зарур даражада эътироф этилганининг шаҳодатидир. “Абдулла Қаҳдор таваллудининг 100 йиллиги ни нишонлаш тўғрисида”ги Президент қарорида ёзувчи ижодий меросининг ёш авлодни Ватанга муҳаббат ва садоқат, миллий ва умуминсоний қадриятлар руҳида тарбиялаш борасида муҳим аҳамиятта эга экани таъкидланганни ҳам бежиз эмас.

Адибнинг юз йиллиги юртимизда катта адабиёт байрами сифатида кенг нишонланди. Ўзбекистон Миллий боғида Абдулла Қаҳдорнинг улкан ҳайкали қад ростлади. Адибнинг яқин сафдош ва шогирдларидан атрокли адабиётшунос олим, Ўзбекистон Қаҳрамони Озод Шарафиддинов ёзганидек, “Абдулла Қаҳдор асарлари бугунги маънавий қиёфамизни шакллантиришда, қалбимизда одамийлик туйғуларини аллангалантиришда, инсоний покликка доф туширадиган ҳар қандай иллатлардан ҳазар қилишни ўрганиб олишимизда катта хизмат қилди ва бундан кейин ҳам хизмат қилади”.

Жамиятнинг онгли аъзоси бўлиб, ҳамиша ҳақ сўзни айтиб яшашни ўзига ҳаётий аъмол деб билган улуғ адибнинг кўнгил чироги истиқлолдан дили нурафшон минг-минглаб қалбларга эзгулик ва адолат ёғдуларини сочишда давом этаёттани Абдулла Қаҳдор умрининг боқийлигидир.

## АБДУЛЛА ҚУТБ МАДРАСАСИ ТОЛИБИ

*Пиримқул Қодировнинг  
“Амир Темур сиймоси” асафини ўқиб..*

Ўзбекистон халқ ёзувчиси Пиримқул Қодировнинг “Амир Темур сиймоси” асари атоқли адабимиз истиқлол йиллари яратган «Она лочин видоси», «Тил ва эл» асарлари каби китобхонлар учун катта янгилик бўлди. Бу илмий бадиа Амир Темурдек буюк сиймонинг камол топишида зарур омил бўлган маънавий муҳит масаласига алоҳида эътибор берилгани билан дикқатни тортади. Муаллиф бу ҳақда фикр юритиб шундай деб ёзади: “*Унинг отаси Тарагай баҳодир бутун Туронзаминга ҳоким бўлган Қорачорнўённинг авлодларидан эди. Темурбекнинг онаси Тегина бону Бухорий шарифда шариат ишлари бўйича юксак лавозимларни эгаллаган Садри-Шария Убайдулла Маҳмуднинг қизи эди... Парвардигор улуғ фарзандларни ота-онанинг улуғ муҳаббатидан яратади, деган ҳикматли гап бор. Тарагай баҳодир билан Тегина Бону орасида улкан бир меҳру оқибат бўлмаса, шаҳарлик аслзода қиз узоқ қишлоққа бориб яшаши ва гўзал табиат бағрида Темурбекдай бўлажак даҳони дунёга келтириши амримаҳол эди. Темурбек болаликдан ота-она бағрида жуда яхши тарбия олди. Ростгўй, ахлоқи пок, адолатли, диннатли ва меҳру оқибатли фарзанд бўлиб ўсади*”.

Мана шундай беназир муҳитда ўсиб-улғайган Темурбек ўн ёшида Кешидаги Абдулла Қутб мадрасасига ўқишига борган. Мударислар унинг Қуръон оятларини икки-уч ўқищаёқ ёд олишини кўриб ҳайрон қоладилар. Ана шу йиллари бўлажак Соҳибқирон озарбойжон шоири Шабистарийнинг “Сирлар гулшани”



китобини севиб ўқиб, унинг кўп жойларини ёд олган экан. Вақти келиб жаҳонгирлик мартабасига эришган бобомиз Озарбойжоннинг Шабистар қишлоғидан ўтганда ўша китобни ёзган шоир турбатини сўраб-суриштиради. Маълум бўлишича, унинг қабри жуда қаровсиз ҳолда экан. Амир Темур фармон бериб, гўзал мақбара қурдиради, вақф ерлар ажратиб, ундан келадиган даромад ҳисобига зиёратгоҳни обод сақлашни буюради. Шу қишлоқлик олти мингдан зиёд аҳолининг ҳар бирига шоир ҳурмати учун беш мисқолдан олтин улашилади...

Асарда Амир маънавий қиёфасини гавдалантирувчи муҳим чизги-деталлардан бири сифатида келтирилган бу маълумотни ўқирканмиз, бир ҳайратимизга ўн ҳайрат қўшилди ва беихтиёр Навоий ҳазратларининг ушбу лутфлари бежиз эмаслигига иқорор бўлдик: “Темур Кўрагон — агарчи назм айтмоққа илтифот қилмайдурлар, аммо назм ва насрни андоқ хўб маҳал ва мавқеъда ўқибдурларким, анингдек бир байт ўқигони минг яхши байт айтқонича бор”.

Адид Соҳибқироннинг ёшлиқ ва ўсмирилик йиллари тасвирида Амир Темурнинг буюк жаҳонгирлик рутбасига эришуви бежиз эмаслигига аҳамият қаратади, у китоб мутолаасини севишини, алломаларни жуда ҳурмат қилишини асословчи кўпгина тарихий манбаларга мурожаат этади. “Темур тузуклари”дек буюк асарни Амир Темурга раво кўрмаган хорижлик тарихчиларнинг (Бартолд ва Якубовский) буҳтонларини пучга чиқарувчи мисолларни таҳлилдан ўтказади. Афтидан, “Темур тузуклари”ни Амир Темур ёзмаган дейиш буюк Соҳибқиронни марказлашган давлат асосчиси, улуғ маърифатпарвар сиймо эмас, балки ўзга мамлакатларни куч билан бўйинсунидиришта ишқибоз шахс сифатида талқин этиш учунгина зарур бўлган кўринади.

Муаллиф ҳақиқатдан юз ўтириб, фирром сиёсат-



ни асослани учун Соҳибқиронни саводсиз деб ёзган айрим шўро олимлари ғаламислигини фош этади. Аждодларимизга ғайриқўз билан қараган бундай талқи-қотчилар “Амир Темур китобларни бошқаларга ўқиттириб эшигарди”, дея даъво қилишган. Соҳибқирон ўз юришлари чоғида зарурат юзасидан ислом уламолари, мулла ва қорилар, илмли, зеҳни ўтқир кишиларга эҳтиёж сезган. Амир Темур солнномасини ёзган барча тарихчилар унинг ўзи билан бирга Куръони каримни олиб юргани, бу муқаддас китобни ёд билган сиймо эканини қайта-қайта эътироф этадилар.

Агар саркарда қироатдан бош кўтармай барча китобларни ўзи ўқиши билан банд бўлса, унинг она юрти ва яна не-не элларни муғуллар асоратидан Қутқариш йўлидаги халоскорлик фаолиятини ким амалга оширап эди? Китобларни шахсий котиблар ва қироатхонларга ўқиттириб эшитиш буюк саркардага давлат юмушларини бир зум ҳам эътибордан соқит қилмаслик учун зарур бўлгани ҳаммага аён ҳақиқат-ку!

Шўроларнинг тарихни ўз сиёсатига мослаб ўзгартириш йўлидаги бундай машъум идеологияси қатагон-қирғин даврининг ҳам асосий қуроли бўлган эди. Беҳбудий, Абдулла Қодирий, Чўлпон, Фитрат ва улар сингари минг-минглаб миллат фидойилари “халқ душмани” деган сохта айбловлар билан отиб юборилгани асл сабаби уларнинг буюк боболари саводсиз, босқинчи ва талончи эмас, балки миллатпарварлар йўлини мудом ёритиб турувчи маёқ эканини жуда яхши билгандарида эди. Билгандари учун ҳам ҳар қандай босқинчилик сиёсати, уйдирмалар томирига болта уриб, миллатни уйғотиб юборишга қодир зотлар эканлигидан чўчирдилар...

Пиримкул Қодиров бу асарида фақат адаб эмас, айни чоғда зукко тарихнавис эканлигини ҳам намоён этади. У Шомий ва Яздий “Зафарнома”ларини “Темур тузуклари”га қиёсан ўрганиб, Амир Темур

ҳаётининг ўта масъулиятли бурилиш палласи Шомий томонидан бир ўринда бутунлай тескари баён қилинганини аниқлайди. "Шомий "Зафарнома"-сидан кейин ёзилган Яздий "Зафарнома"сида ҳам Темурбекнинг халқ озодлик ҳаракатига бошчилик қилгани ва Тўғлуқ Темурхон уни ўлимга буюргани мутлақо кўрсатилмаган", деб ёзади адаб. Ёзувчи Темурбекнинг салтанат бошига келишига қадар бўлган ҳал қилувчи жанглар тафсилотини бир йўла бир неча манбадаги тарихий далиллар асосида, улардан босқичма-босқич олинган иқтибослар орқали холис баён этиб боради. Шу тариқа, китобхон кўз ўнгида Соҳибқирон ҳаётининг тўлиқ манзарасини гавдалантириб беради.

Пиримкул Қодиров зукко тадқиқотчи сифатида "Зафарнома"лардаги узилишларни тўлдириб ўқиш зарур бўлган жиҳатларни ҳам кўрсатади ва бошқа тарихшуносу адиблардан фарқли ўлароқ, Амир Темурни халқ озодлик ҳаракати майдонга келтиргани ва юзага чиқарганига алоҳида аҳамият беради.

Амир Темурнинг бир қанча ҳудудларни (Шероз, Ҳамадон, Кирмон каби вилоятлар) қурол кучи билан эмас, дипломатик йўл билан ўз қаламровига кириттани хусусида Шоҳ Шужонинг эътирофилари далил сифатида келтирилгани эса асарнинг илмий-бадиий қимматини оширган. Исфаҳон ҳам бир неча маротаба жантсиз Амир Темур тасарруфига ўтган. Бироқ бу шаҳарни қўриқлаш учун қолдирилган Амир Темурнинг уч минг йигити ва шаҳар доругаси тунда ухлаб ётган маҳали ўлдирилиши буюк жаҳонгирнинг қаттиқ ғазабига, энг катта хиёнат ва орқадан пичоқ санчиш деб баҳоланишига, исфаҳонликларнинг қатли ом қилинишига сабаб бўлади. Амир Темур бутун умр ўзининг барча давлатчилик ва ҳарбий юришларида адолат тузуклари асосида иш тутиб келгани, қўп ҳолларда мардлик ва тантилик, жўмардлик кўрса-



тиб айбдорларни кечирган бўлса ҳам асло хиёнатни кечира олмаслиги мана шундай воқеаларда аниқ на-моён бўлади. Адаб тўғри баҳо берганидек, бу ҳол ўша замоннинг кўпгина вакиллари, шу жумладан Шоҳ Шужо томонидан ҳам хиёнатта қарши қаттиқ жазо сифатида баҳоланганд.

Биз шу чоққача соҳибқирон Амир Темурни Ватаннинг даҳо ҳалоскори сифатида билардик ва буюк бобомизга шунинг учун ҳам катта эҳтиром кўрсатар эдик. Пиримкул Қодировнинг ўнлаб, юзлаб илмий ва тарихий манбаларни, игна билан кудуқ қазгандек, синчилаб ўрганиши асосида ёзилган мазкур асарни ўқиб, унда иқтибос сифатида келтирилган аниқ далилларни кўздан кечириб, яна бир бор икрор бўлаётимизки, Соҳибқирон икки аср мобайнида мўғул босқинчилари асоратида азоб тортиб ётган Европсиёдаги қанчадан-қанча мамлакатлар, хонликлар, князликларни чингизий Олтин Ўрда асоратидан батамом озод қилган ва шу элларнинг ҳам ҳақиқий ҳалоскори бўлган улуғ сиймо экан.

Амир Темурнинг жаҳон тақдирини ҳал этган ва тарихнинг буюк бурилиш нуқталарида амалга оширилган ҳал қилювчи муҳорабаларидан бири 1391 йили Волганинг чап соҳилидаги Кандирча дарёси бўйида, иккинчиси эса, 1395 йилнинг 15 апрелида Кавказ тоғларидан бошланиб Каспий денгизига қуйилувчи Терек дарёси бўйида юз берган эди. Кандирчадаги жангда Тўхтамишнинг енгилиб қочиши, адаб ёзганидек, туткун элларни чингизийлар асоратидан кутқаришда янги саҳифа очган бўлса, Терек бўйида Тўхтамиш лашкарлари билан бўлган сўнгти муҳора-ба ва кўп ўтмай Сарой Беркадан Занжирсарой ўчининг олиниши, француз олими Люсен Кэрэн зътироф эттанидек, Олтин Ўрданинг тиз чўкиб ўнгланмайдиган даражада тор-мор этилишига, рус князликларини озодликка чиқариб, бўлажак рус империясига

пойдевор қўйилишига шарт-шароит яратди.

Узоқ йиллар мобайнида тан олинмай келган ҳақиқат, ниҳоят, 2004 йили ёш тарихчи Михаил Арнолдов томонидан “Наука и жизнь” журналида мардона зътироф этилгани ибратлидир: “Куликово майдонидаги жангдан кейин... юз йил давомида Россия бирор марта ҳам Олтин Ўрда билан йирик тўқнашувга борган эмас. Аммо шу вақт ичидан Олтин Ўрданинг ўзи тор-мор бўлиб тарих саҳнасидан фойиб бўлди. Бундан чиқдики, бизни кимдир ўзимизнинг иштирокимизсиз озод қилган экан-да? Ким у жўмард? Ким бўларди, айни ўша зот — кўп йиллар ноҳақ қоралаб келинган “буюк ва шафқатсиз” Амир Темур бизни озод қилган. Тўғрироғи, Олтин Ўрда зулмидан озод бўлишимизга олиб келган”.

Ҳақиқатни ҳеч қачон абадул абад йўқ қилиб бўлмаслигини кекса тарих ўтмишга адолат мезонлари билан ёндошувчи олим ва тадқиқотчиларнинг иқорлари орқали яна бир бор намоён этди.

Пиримқул Қодировнинг ушбу асари, гарчи илмий-бадиа тарзида ёзилган бўлса-да, унинг ҳар саҳифасида буюк Соҳибқироннинг тафаккур дунёси, қалб тебранишлари, меҳр-муҳаббати ва изтироблари, қаҳр-ғазабини ҳис этиб турасиз. Бадиа худди гўзал бадиий асар сингари ўқилади. Тарих саҳнасида ҳаракат қилаётган буюк инсоннинг орзу-ҳаваслари, ҳалоллигу тантилиги, мард инсон сифатидаги ҳимматидан шодланиб, ёвуз кимсалар хиёнатига дуч келганда у билан бирга изтироб чекасиз. Назаримда, бу ҳақиқий бадиий асарнинг хос хусусиятларидир.

Пиримқул Қодиров мана шу улуг тарихни катта муҳаббат билан ўргангани ҳамда уни китобхонга жонли тарзда, содда ва самимий тилда ҳавола этгани ҳар жиҳатдан таҳсинга сазовордир. Адибнинг бу хизмати яна шу жиҳатдан эътиборлики, бугун Амир Темур тарихига доир китоблар, тарихий, илмий ва бадиий

асарлар кўп ёзилмоқда. Бу ҳол Амир Темурдек буюк сиймо тарихини ўрганишда катта имконият бўлсада, манбаларнинг ҳаммасини ўқиб, бир фикрга келиш оддий китобхон учун қийин кечади. Кўп ҳолларда, бу манбаларнинг турли даврларда турли қарааш ва иқтидордаги муаллифлар томонидан ёзилгани учун ҳам ўқувчини бир қадар чалғитадиган ўринлар топилиб турибди. Шу боис, манбаларни катта тажриба ва салоҳиятга эга, тарихни яхши ўрганганд адиб нигоҳидан ўтган ҳолда сайқалланиб китобхонга тақдим этилиши кўпчилик учун фойдалидир.

Яна, айтиш мумкинки, темурийлар тарихининг жонкуяр билимдони Пиримқул Қодировнинг ушбу бадиаси асосида киносанъаткорлар томонидан йирик маърифий фильм яратишга ҳам эҳтиёж бор. Асарни мутолаа этишдан олинадиган энг катта таассурот шуки, соҳибқирон Амир Темур бутун умр Абдулла Қутб мадрасасида олган сабоги — исломий қадриятларга эътиқод қўйиб катта иймон-эътиқод билан яшагани, куч-қудратни адолат ва ҳақиқатда, Аллоҳга бўлган ишончда, деб билгани туфайли Парвардигор у зотга улуғ зафарларни ёр этди. Шу эътиқодда собит турган Соҳибқирон авлодлари уч-тўрт аср мобайнида улкан салтанатлар тузиб, жаҳон тамаддунида ёрқин из қолдиришга муваффақ бўлдилар.

Бизга, ҳазрат Амир Темур авлодларига улуғ бобомиздан мерос бўлиб қолган табаррук сабоқ ҳам ана шудир.



## ЎЗ ОСМОНИ БОР

Ўша куни — минг тўққиз юз тўқсон биринчи йилнинг бешинчи апрелида, офтоб чараклаб, назаримда, бобоқуёш янада ўткирроқ ёғду сочаётгандек эди. Севимли шоиrimiz Абдулла Ориповнинг эллик йиллиги нишонланётган кунлар давом этарди. Самарқанду Қаршида ҳаяжонли дийдорлашув, катта анжуманлар, шеърият байрами руҳида ўттан тантаналарнинг охирги куни кўхна Шаҳрисабз элу юртнинг ардоқли шоирини соғинчли бир шукуҳ ила шарафлади. Учрашувлардан сўнг ижодкорлар Оқсаройнинг шундай биқинидаги хос ҳовлида кутиб олинди. Тошкентта қайтиш олдидан меҳмонлару мезбонлар буюк Соҳибқирон руҳи файзиёб эттан мўътабар шаҳарга, унинг тирик обидаларига тўймай боқишарди. Бутун ижодида юрт озодлигини ташналик ила куйлаган ва бу туйғуни минг-минглаб қалбларда ниш олдирган Абдулла аканинг, ундан бениҳоя ифтихор этувчи юртдошларнинг чехрасини шоир юбилейи тимсолидаги шеърият байрами, ҳали кўпчиликка ноаён бўлса-да, яқинлашиб келаётган Истиқлол шукуҳи нурлантириб юборгандек эди.

Пойтахтдан шоиrimizга ҳамроҳлик қилиб келаётган ижодкорлар карвони сафида машҳур адабиётшунос олим Озод Шарафиддинов, ҳассос шоиrimiz Жуманиёз Жабборов, атоқли танқидчи Иброҳим Faфуров ва яна қанчадан-қанча таниқли олиму журналистлар, адабиёт муҳлислари, ёш шоирлар бор эди. Қарши шаҳридан бу карвонга қўшилган ижодкорлар орасида ҳали ўзини катта давраларда намоён этиб ултурмаган, бироқ шеърият оламида ўзига йўл ахтараётган истеъдодлар ҳам оз эмасди.

Оқсаройнинг кунгай томонидаги мўъжаз ҳовлида



ажиб кўнгилхушилик ила давом этаётган даврани таникли шоиримиз Нормурод Нарзуллаев бошқариб борарди. Шу куни иштирокчиларнинг деярли ҳаммаси кўнглидаги эзгу сўзларни айтиб, Абдулла акани муборак ёши билан кутлашга муяссар бўлди. Кўтчилик унинг унтилмас мисраларини ёд айтиб, давра файзига файз қўшар, бошқа бирор эса шоирга бағишлиланган шеъри билан кўнгилларни чоф этарди. Абдулла Орипов ва унинг устозлари даврасида ўзининг нурсизгина ашъорини шеър сифатида тақдим этишга кўплар журъат этолмас эди.

Нормурод ака хурмату зътибор, янада аниқроқ айтсам, даврадаги сурур ва файзиёблиқдан бениҳоя яйраб ўтирган устозларнинг табригу кутловларидан сўнг “яна кимга сўз навбатини берсам экан”, дегандек ёш ижодкорлар тарафга ҳам бот-бот қараб қўярди. Мен ўзини катта давраларда намоён этишга қўпинча ийманиб юрса-да, бироқ гўзал шеърлар битиб тенгдошлари орасида ўз овозига эга бўлган, айни чоғда шеър ва сўз қадрини бениҳоя юқори тутувчи ёш шоирлардан бирини имкон туғилгудек бўлса Абдулла акага яқинроқ танишириш ниятида эдим. Шу боис Нормурод акага: “Ҳол Муҳаммад Ҳасан ҳам бир сўз демоқчи”, дегандек имо қилиб қуйдим. Фурсати билан Ҳол Муҳаммадга сўз берилганда давра бирдан жонлангандай бўлди. Чунки унинг маънодор шеърлар ёзишини шу анжуманди иштирок этаётган Самир Нуров, Сувон Соқий, Ислом Тўхтамишев, Муҳаммад Очил, Амир Худойберди, Норқул Тилов, Али Ниёз каби қашқадарёлик ижодкорлар илгаридан яхши билишар эди. Ҳол Муҳаммад табрик сўзини бошқаларни такрорламаган ҳолда оҳорли ифода этди:

— Устозларимиз бизга ҳар бир ижодкор ўз йўли, ўз овози, ўз услубини топиб куйласин, деб сабоқ берадилар, — деб бошлади у сўзини. — Тўғри, ҳар бир ижодкор шунга интилиб яшаши керак. Бироқ риёзи-

ётда шундай аксиома (*исботсиз қабул қилинадиган фикр*) бор: икки нуқтани туташтирувчи энг қисқа чизиқ, бу — тұғри чизиқдир. Яъни бу икки нуқта ўртасидан ўтказилған бошқа барча йұллар уңдан узун бўлади. Шеъриятда ўша энг қисқа ва тұғри йұлни топиш баҳти Абдулла Ориповга насиб этган. Ҳарчанд уринмасин энди бошқа ижодкор Абдулла ака кашф этган ушибу йұлдан мукаммалроқ иккинчи ё учинчи йұлни топиши даргумон. Шундай экан, биз аввало, устозимиз ижодининг асл сарчашмасини, унинг мөхиятини теран илғаб олмоғимиз керак. Шеърий сабоқни шу йұлда олмоғимиз зарур, деб ўйлайман...

Бу гап Озод ақага ҳам жуда маъқул бўлди ва ёш шоирни синаш учун луқма ташлади. Бироқ шоир довдираб қолмади. Озод ака унинг жавобидан мамнун бўлди. Сұнг шоир “Йигитнинг” радифли бир шеъри ни ўқиди. Кейинчалик кўплаб түйбоши сухандонларнинг тилак сўзларига, хонандаларнинг машхур қўшиғига айланиб кетган бу шеър ўшанда даврани янада жонлантириб юборган эди.

...Тивлагани мост қиласиган,  
Ғаюр дилин паст қиласиган,  
Ағёрни-да дўст қиласиган  
Тил-забони бўлсин йигитнинг...

Қавми бўлсин аридай аҳил,  
Орасидав ўтолмасин қил,  
Иймон қадар бутуни, бедаҳл  
Хур макони бўлсин йигитнинг.

... Бут имони бўлсин йигитнинг.  
Ўз осмони бўлсин йигитнинг.

Ҳол Мұхаммад Ҳасан ўшанда ўзининг халқона оҳангларга эш бўлган шеърлари билан устозларнинг ҳам назарига тушиди. Улуғ шоирнинг тўйи кунлари,



тантаналар авжида бундай истеъодларнинг кашф этилиши халқимиз бағри теран чашмадай истеъодларга бой экани, озгина рағбат бўлса, милтираб турган бу юлдузлар чараклаб нур сочиши мумкинлигидан шаҳодат берар эди. Бу туйғу Абдулла аканинг ҳам кўнглини кўтариб юборди. Шу боис, менга юzlаниб: “Бу шоирни менга бир олиб боргин”, деб тайинлади.

Ўша куни болалар Оқсаройнинг кунгай тарафидаги қизғалдоқлар ўсиб ётган энг тепа жойгача чиқиб борганига ҳайрат ила боқиб қўярдик. Менинг хотирамда шу манзаралар муҳрланиб қолди. Ҳа... Оқсаройнинг мунаққаш пештоқлари ажиб бир синоат ва виқор ила намоён бўлган кунни кейин ҳам кўп эслаб юрдим. Энди ўйлашимча, буюк Соҳибқирон қурдирган Оқсарой қўйнини мунаввар нурларга тўлдирган офтоб яна бир шоирнинг ижод оламига ёғду сочган экан...

Пойтахтда, Алишер Навоий номидаги театрда юбилей катта тантаналар билан нишонланганидан кўп ўтмай, мен ваъдага биноан Ҳол Мұҳаммадни шоиримизнинг Дўрмондаги камтаргина чорбоғига бошлиб бордим. Кекса чинор тагидаги ором курсида жойлашиб ўтирган Абдулла aka ўша куни унинг жуда кўп шеърларини аввал дафтардан ўқиб чиқди, сўнг ўзига ҳам ўқиттириб эшитди. Баъзи мисралар, сўзларга таҳrir киритди. Ва дафъатан бир варақ оқ қофозга “оқ йўл” ёзиб, “Адабиёт ҳафталиги”да беринглар, дея менга узатди. Мана 1991 йилнинг 15 ноябрида “Ўзбекистон адабиёти ва санъати”да босилган ўша “Оқ йўл”:

“Дунё билади: бизнинг юртимиз ҳам чинакам истеъодлар юртидир. Улар гоҳ шахри азимда, гоҳ номи ҳеч кимнинг ўйида йўқ чекка бир қишлоқда намоён бўлади. Бизнинг баҳтимиз шундаки, улар бор. Мана, яна бири, бу сафар Дехқонобод тоғлари бағрида милтирабди.

*Бир замонлар у тогларни саир қилиб, оху, какликларни кузатиб, афсоналар оғушида “Қасам дара” деган баллада ҳам ёзганман. Ҳол Мұхаммаднинг шеърлари ўша узоқ ишларимни эслатди...*

*Дўстларим! Биз муттасил равишда ён-атроғимизга назар ташлаб ишт этган ҳар бир чироғимизнинг “пилигини кўтариб” қўйишишимиз шарт.*

*Ҳол Мұхаммад, сенинг шеърларинг шу замин фарзандларининг руҳиятини равшан қиласин. Ана ўшанда муродингга етган бўласан”.*

Шу эътирофдан сўнг Ҳол Мұхаммад Ҳасан кўп мазмунли шеърлар битди. Уларни саралаб “Охува”, “Қадимий қўшиқ” каби гўзал китоблар чоп эттириди.

*“Ҳол Мұхаммад Ҳасан битикларидан дашт ҳиди анқийди. Каврак иси, қоқигул иси ўқувчини сармас тэтади. Кулоқларимизга дўмбиранинг мунгли-мунгли саси, чанқовуз фарёди эшишилади. Бешхтиёр учқур тулпор ёлига бош қўйиб ҳўнг-ҳўнг ишлагинг келади... ”, деб ёзади Ўзбекистон ҳалқ шоири Усмон Азим “Қадимий қўшиқ” қа ёзган сўзбошисида. Унинг ижодини “шаршарадек соф шеърият”, деб эътироф этади. Атоқли шоирнинг бундай эътирофи бежиз эмас. Ҳол Мұхаммад Ҳасаннинг шеърларида чин инсоний дард бор. Бу дард поэтик образлар силсиласида китобхон қалбига кўчади. Унинг-да дардларини шунчаки янгилақ қолмай, кўнглига равшанлик ҳам бағишлийди. Шоир миллат орини уйғотишга, кўнгилларда уни камол топтиришга ўзини бурчли сезади:*

Фужури музлаган, қони тўнглаган,  
Ёй тугул қозиқнинг учин йўнмаган,  
Чиборни кўя тур, чўбир минмаган,  
Бир дадар ўзини қўнғирот дейди,  
Демагин, дема-я, кўкайим қуйди...  
Қўнғирот — ўзбекнинг ўзаги, билсанг,

**Бир уруғ бир элнинг безаги билсанг,  
Галирма бир гапни юзаки билсанг,  
Алп Кунбек — Алномиши қобогин уйди,  
Ҳол Мұҳаммад, яна күкайим куйди.**

Ҳол Мұҳаммад Ҳасан шеърий мушоҳада қамрови кенг ижодкор. Унинг янги сайланмасини ўқиб, шоиримиз халқ тилини, халқона оқангларни, устозлар босиб ўтган изланиш йўлларини пухта эгаллагани ва мудом изланишда эканига амин бўламан. Шеърлари ўзи униб-ўсган Дехқонобод шалолаларидек тиник ва сермавжлиги, ҳар бир айтган сўзи оҳорли маъно- мазмунга бойлиги, ўзгалар капиф этган “поэтик ихти-роларни” такрорламаслиги, ўз йўлини очиб, ўз билгича сўзлаш иштиёқи баландлигидан завқ оламан.

Унинг поэтик манзара яратиш санъати ҳам ўзига хос. Буни шундан англаш мумкинки, у худди баҳшилар каби ўхшатишу қиёслаш, сифатлашу менгзал-маларни шеърларида маржондай тизишга қодир. Менимча, булар гоҳо рангларни қуюқлаштириб юборгандай бўлиб ҳам туюлади. Бироқ бу унинг ўз йўли, ўз овози сифатида қадрли. Рангларнинг қуюқлигини мен шундай тушунаман: табиатда ранглар кўп. Шоирнинг уларни теран идрок этиши бадиий ифода мөҳиятини ёрқинлаштиради. Бироқ шоир имкон қадар уларни танлаб-танлаб, энг ёрқинларини нурлантиришга ҳаракат қилгани мақсадга мувофиқ.

Шу ўринда мен Абдулла Ориповнинг ижодий таж-рибасидан мисоллар келтираман. Гоҳо бирон мақола ё суҳбатни ёзиб олишда котиблик қилаётib, шоиримиз сўзга ниҳоятда талабчан эканига қайта-қайта иқрор бўламан. Шеър равон ўқилиши учун шоир баъзан ҳатто энг яхши шеърий образларидан ҳам воз кечган ҳолларни ҳайрат билан кузатганман. Шоир: “Китобхон шеърни ўқиётганда бирон жойда “тўқи-ниб” кетмаслиги керак”, дейди. Бунга эришиш учун



мисралар устида бетиним изланишдан ташқари, айрим топилмалардан воз кеча билмоқлик ҳам зарур экан.

Мен шу ҳақда сўзласам, Ҳол Мұхаммад Ҳасан: “Абдулла ака — шунинг учун ҳам Абдулла Ориф-да! У киши кўзига хирароқ кўринган бир образдан воз кечеётиб, ундан ҳам зўрини топишга асло шубҳа қилмайди. Файришуурӣ бир қудрат Абдулла аканинг тилига оҳори тўқилмаган янги-янги образларни инъом этишига кўплар ҳайрат билан қарайди. Шунинг учун ҳам шоиримиз ранглару образларнинг истаганидан воз кечиб, истаганини оқ қофозда қолдираверади. Абдулла Орипов поэтик истеъодининг қудрати ҳам мана шунда. Айни пайтда бу барча ёш шоирлар учун сабоқ ҳам бўлиши мумкин”, дейди.

Шоирнинг тасвири тиниқ чиқса, табиат ёки инсон туйғуларининг манзаралари нафис ва тўлақонли акс этган бўлса ўқувчида завқ уйғонмаслиги мумкин эмас. Қайсин Қулиевнинг ушбу мисраларига эътибор беринг:

Дарёлар гувиллаб чопар денгизга,  
Күшлар хаёлингни завқда ўрайди.  
Замин мўъжизалар берару бизга,  
Эвазига фақат ҳайрат сўрайди.

Рассом яраттан гўзал манзарани завқланмасдан томоша этиб бўлмаганидек, шоирнинг ҳаёт ва инсон туйғулари манзарасидан яраттан бадиий образларини ҳам ҳайратсиз идрок этиб бўлмайди. Ҳол Мұхаммад Ҳасаннинг поэтик топилмаларида ҳам китобхон идрокига завқ бағишлийдиган манзаралар оз эмас.

Сулувнинг сирғасидай  
Сирғалади кўкда ой...



\* \* \*

Ой айланиб чимилдиқда  
Келин бўлиб сузилсин-а...

\* \* \*

Кетди ёр, омон-омон,  
Оловланиб-олланиб.  
Белида қирқта илон  
Соқчиликка ёлланиб.

Барини тутди гуллар,  
Пойини ўпди йўллар,  
Сочин силар сумбуллар,  
Сиполаниб-солланиб.

\* \* \*

Сибизгамни синдириди-я бу қизлар,  
Қўзгинамни тиндириди-я бу қизлар,  
Оталари тўйга ҳали кўнмасдан,  
Кўй боқишига кўндириди-я бу қизлар...

\* \* \*

Ай, бу тун, ой бутун, ойдинми,  
Ойдинга ё бетинг чайдингми?  
Ингладинг сел-себор, лайливор,  
Мендан-да мажнунни суйдингми?..

Ҳол Муҳаммад Ҳасан шеърларидаги ажаб сеҳр ва жозибани мен яна унинг Маҳтумкули оҳангларига эш бўлган пандномаларида ҳам кўп кузатаман:

Нокасдан ион тилама, очдан адо бўлсанг ҳам,  
Хузурига йўлама, хубдир гадо бўлсанг ҳам,  
Беш кунлик шу умрингда beminnat олгин нафас,  
Бош эгма ҳеч бирорга, бошдан жудо бўлсанг ҳам.

\* \* \*

**Ҳақирдан ҳол сўраб қўйгин**  
дарду дилинг очаринг бор,  
**Гоҳи яёв юриб қўйгин,**  
қайдам... отдан тушаринг бор.  
**Мол — омонат, жон — омонат,**  
давр ҳам, даврон омонат.  
**Мозорларга бориб қўйгин,**  
бир кун тупроқ кучаринг бор.

Шоир айни ижодий балофат ёшида кўхна дунё тил-  
симларидан маънолар излаш, лаҳзаларни мангулик-  
ка муҳрлаш, қадим қўшиқларга янги битиклар қўшиш  
умидида' халқ баҳшилари сингари дўмбирасини ажиг  
оҳангларга созлаётир.

Ўз оғомонига эга йигитнинг бу йўлдаги илҳоми  
янада баракали бўлсин.





# ОНА ТАБИАТ ЭЪЗОЗИ

## МУАЛЛИМ АРЧАГА БОЛТА УРДИ

Ҳисор тоғлари бағрида Омонхона деган шифобаҳш маскан бор. Унинг сувларидан роҳатланиб, Аллоҳ тоғлар бағрида инсон учун яратиб кўйган бемисл мӯъжизалардан ҳайратланиб юрганимизда шу ерлик бир муаллимнинг кўп йиллик арчаларни кесиб, қамалиб кетгани ҳақида эшитиб қолдим. Гарчи, бундай воқеалар тез-тез бўлиб турса-да, негадир муаллим кишининг шу ишга кўл ургани ва қамалгани менга жуда оғир ботди.

Шу ҳақда кўп ўйга толдим. Бечора муаллимни нима мажбур қилдийкин? Тирикчилик ташвиши миёни шунчалик ҳамма қатори қилинган оддий бир хатоми бу? Нега бундай бўлди? Муаллимнинг ҳамма қатори хато қилишга ҳадди йўқми?

Саволлар кўп эди. Ҳар қалай шу ҳақда фикр юритаётуб, аввал ўша муаллим билан суҳбатлашсам, унинг нега бу ишга кўл ургани сабабларини ўргансам ёмон бўлмасди. Шу ўйга келдим-у, тағин фикримдан қайтдим. Унинг ярасини янгилаб нима қиласман. Туман судининг айблов хатида ҳамма нарса равшан ёзиб қўйилган-ку. Шундай бўлса-да, ўша арчага болта солган муаллим билан хаёлан узоқ суҳбатлар курдим. Унинг айбдор қиёфаси кўз ўнгимдан кетмади. Негадир, юз ифодаларида бир оз таъна, гинахонлик ҳам кўргандай бўлдиму, фикримни банд этган ўйларни кўпчилик билан ўртоқлашгим келди...

Юнусободдаги гавжум чорраҳалардан бирининг муюлишида арчасимон ёш ниҳоллар ўраб турган бир туп қарағай (ножу) бўларди. Йўлкадан ўтаётуб уни негадир сарвқомат гўзалга, атрофини ғуж ўраган арчаларни эса ёш келинчакларга ўҳшатардим. Қарағай ёмғир ёғиб турган ёки майин эпкинлар эсган чоғлари ўзидан шундай ажиб ифор таратардики, беихтиёр



йўлкада бир зум тўхтаб қолардим. Ҳидлаб-ҳидлаб бу нозик хушбўйга тўймасдим. Ортидан қора қурум чиқариб, тўхтовсиз автокўликлар ўтиб турган чорраҳада олис тоғларнинг бир қатим тоза насими бўй тараттандай бўларди. Айниқса, шаҳарни ғубор қоплаган оқшомлар ишдан қайтаётиб, қарагай ёнида бир зум нафас ростлагим келар, гоҳида ажриқ қоплаган супачада ўтириб, унинг хушбўйини симирап, кеч тушгандада базур қўзғалардим.

Эссиз, бир янги йил оқшоми, не кўз билан кўрайки, қарагай жойида йўқ эди. Арчасимон “келинлар” унга мотам тутишаётгандек изғиринда маъюс чайқалиб туришибди. Нима бўлдийкин, наҳотки, бирон кимса уни янги йил арчаси учун қирқиб кеттган бўлсая?! Ахир, атрофдаги дўконларда табиийи ҳам, сунъийи ҳам — ҳар хил арчалар қалашиб ётувди-ку! Қандай бефаросат, жоҳил одам унга арпа солдийкин?

Яқинроқ бориб кўрдим: хақиқатан ҳам ердан икки қарич юқоридан бир кичкина шоҳ қолдириб, ўн йиллик дараҳтни танасидан арралаб кетишибди. Ҳали у бирон уйга ёғоч бўлар даражага етмаган эди. Фақат қутичага ўҳшаб қурилган кўп қаватли уйларда атиги бир кунгина янги йил арчаси вазифасини адо этиши мумкин, бироқ бу жоҳиллик инсоннинг ўзи турган дараҳт шоҳини арралащдек бир иш эди. Ахир у турли машиналардан чиқаётган ва биз иложсиз симираётган неча тонналаб заҳар-закўум ҳавони ўзининг бир ҳовучгина тоза насими билан поклаб ётган минглаб дараҳтларнинг бири, бири бўлганда ҳам энг энг ноҳиди, энг гўзали, энг хушбўйи, энг безиёни эди-я.

Аттанг! Ким қилиши мумкин бу ишни? Йўқ, шунчаки ножӯя иш эмас, жиноят эди бу. Қай бефаросат, беақл сенга арпа тортди, ножужон! Ахир сенинг кимга оғирлигинг тушувди?!

Ҳар оқшом ишдан қайтаётиб, ўша арчазорга маъюс қарайман. Арпа тушган жойдан пастда қолган бир

кичик шохча ўсаяптими, дея назар ташлаб ўтаман. Йўқ, арчасимонлар ўзи секин ўсади, бунинг устига арранинг заҳри ёмон, у ҳар қандай дараҳтни куритади. Шунинг учун боғбонлар дараҳт бутаганда бу ишни ниҳоятда эҳтиёткорлик билан бажаришади. Танаси арраланган ножудан қолган ёлғиз шохча ҳам қуриб-қақшаб бораяпти. Билмадим, у арранинг заҳрини енгиб ўтадими ёки буткул қуриб қоладими, ҳар нечук ҳар ўтганда мени оғир ўйларга ботиради. Одам боласининг, инсониятнинг ўз келажагига бепарво бўлиб бораётганидан далолатдай бўлиб туюлади менга у. Яна ўз-ўзимга савол беравераман: ким қилдийкин бу ишни, дейман. Катта ёшдаги одамлар-ку, бундай ёвузликни ўзларига эп кўрмас-ов. Биронта ёши-яланг бир эркалик қилиб шу ишга қўл урдимикин? Мактабда экология дарслари яхши ўтилмаяптими? Ёки экологиядан дарс ўтувчи муаллимлар етишмаяптими? Биронта ёмон муаллим қўлида таҳсил олган болакай қилмадими бу жиноятни... Ҳали, бу саволларга нуқта қўйиб ҳам улгурмагандим, тоғда арчага болта солиб, қамалиб кетган муаллим ҳақида эшитганларим, ўша гавжум чорраҳа муюлишидаги танаси арраланган ёш қарағайнинг ноҳуш манзарасини кўз олдимга келтирди.

Гўзал тоғлар бағридаги арчазорлар йил сайин камайгандан камайиб бораёттир. Ўз гўзалиги билан тоғлар бағрини безаб ётган минг Йиллик арчалар фақат Зомин тоғ-ўрмон қўриқхонасида, камдан-кам ҳолларда эса Чотқол ва Ҳисорнинг баланд тизмалари бағрида сақланиб қолган. Гоҳи-гоҳида уларга-да арра ва болта урувчи нокас кимсалар учраб туроди. Ахир бу арчалар, биринчидан, тоғларни нураш ва емирилишдан, сел хавфидан асрайди. Унинг бағрида қорузоқ ётиб, минглаб булоқлар учун обиҳаёт тўпланади. Булоқ бор жойда ҳаёт қайнайди, серсув жилғалар пайдо бўлади. Бағри яшилликка, арчаларга қоплан-



ган тоғлар салқин мұхит яратиб, осмондан қор ва булутни чақиради, арчали тоғларга ёғин күп тушади. Сув шундан мұл бўлади. Арчаси кесилган тоғлардан файз кетаяпти, минг йиллар давомида қайнаб ётган чашмалар қуриб, атроф ялангланиб бораётир. Буни ҳамма билади. Наҳотки, тоғ-тошларда яшайдиган муаллим шуни билмаса? Ахир у истиқоат қилаётган жойда сувнинг олтинга тенглиги ҳаммага кундай равшан-ку!

Муаллимни бу кўргуликка нима мажбур этдий-кин? Тирикчилик ташвишида арчага болта урган тақдирда ҳам уни кечириб бўлмайди. Тўғри, тирикчилик оғир. Бироқ турмуш ташвиши, деб ўзинг турган дарахт шохини арралайсанми, номард?! Ахир сен, оддий одам эмас, муаллим бўлсанг. Мулланинг айтганини қил-у, қилганини эмас, экан-да. Сендан сабоқ олган болакайларнинг кўзига энди қандай қарайсан? Улар кимдан ибрат олади энди?..

Бу жиноятни бошқалар қилганда ҳам ташвишга тушар эдик. Табиатга зиён етказган ким бўлмасин, барибир она табиат фақат уни эмас, ҳаммамизни кечирмайди. Бу ахир ҳаммамизнинг лоқайдлигимиз, эътиборсизлигимиз вожидан келиб чиқаётир. Фақат муаллим арчага болта урганидан даҳшатта тушаётганимиз боиси шуки, бизни бундай жиноятлардан биринчи бўлиб шу муаллим қайтариши керак эди. Мурфаклигимиздан бошлаб онгимизга бунинг жиноят эканини шу муаллим сингдириши керак эди. Бунинг ўрнига ўзи шу оғир жиноятта қўл ургани — бу, оқибати ёмон маънавий жароҳат. Чингиз Айтматовнинг “Оқ кема”сидаги Мўмин чолдан унинг нима фарқи бор! Муаллимки, шу ишга ҳеч нарсадан тап тортмай қўл урган экан, демак, жамият ўз ақл-идроқи, маънавиятида ниманидир, ғоят қимматли бир нарсасини йўқотиб улгурибди.

Уч-тўрт йил бурун Мингзиё Сафаровнинг бир

ҳикоясини ўқиган эдим. Ҳикоя Шукур Холмирзаевнинг сўзбоиси билан, ёзувчи оламдан ўтиб кеттанидан анча сўнг, дафтарларда қолган ёзувлар сифатида биринчи бор ўқувчиларга ҳавола этилган эди... Куни кечада Шукур акадан ҳам айрилиб қолдик. Чигатой қабристони севимли адабнинг муҳлисларига тўлиб кетди. Ҳамманинг кўзи нам. Оҳ, Шукур ака-я, она табиатимизни, одамларимизни қанчалар буюк муҳаббат билан севар эдингиз. Шу куни Абдулла ака қанчалар дилгир бўлди. Видолашув чоғида ўзи ҳам ҳаммани йиғлатгудек бўлиб, адабиётимиз учун бу йўқотишнинг нақадар катта эканини изоҳлаб шундай деди: “Шукур Холмирзаев адабиётимизда ўз мактабини яратган эди”.

Дўстининг вафотидан сўнг Шукур ака нашрга тайёрлаган ўша ҳикояда Мингзиё ака қишлоқ муаллимининг билиб-бilmай қилиб қўйган ана шундай бир хатосини жуда таъсирли қилиб ёзган ва охри ўз ўқувчиларининг кўзига кўринишни ор билиб, кўчиб кетишига мажбур бўлган муаллим ва шабнамдан ҳам тоза, беғубор ўқувчи қиз образини яратган эди. Энди билсам, табиатни бутун вужуди блан севган, умрининг охирларида Амударё ўртасидаги Пайғамбар оролида яшаган Мингзиё ака бизни катта бир хавфдан, одамлар онги ва шуурида, тафаккурида, турмуш тарзida юз бера бошлаган лоқайдлик тушовидан огоҳ этган экан.

Бироқ китоб ўқимайдиган одамлар буни қаёқдан ҳам сезсин, қаёқдан ҳам билсин?!

Яқинда бир мақола ўқидим. Бурчмулла ўрмон хўжалиги директори Абдукарим Абдужамиловнинг гувоҳлик беришича, Чорвоқ сув омбори атрофини ўраб турган тоғ ўнгирларини қоплаб ётган дов-дараҳтлар йилдан-йилга камайиб кетаётган экан. Бунинг сабаби сўнгти йилларда тоғлар аҳолиси анча тез кўпаймоқда, бироқ ҳали у жойларга табиий газ етиб бор-

маган. Шу боисдан одамлар қишга ўтин ғамлаб, оддий дараҳтларни-ку қўя туринг, баъзан кўп йиллик ёнғоғу арчаларга ҳам болта солаётган экан. Бунинг натижасида тоғ ёнбағирларининг сел ва ёмғирда ювилиши кучайиб, Чорвоқ денгизининг туби гилга — тоғ-тош жинсларига тўлиб бормоқда. Натижада Чорвоқ денгизининг умри, лойиҳада кўзда тутилганидек олтмиш беш-етмиш йилга бормасдан, эрта қариётган экан. Денгиз тубини тозалаш эса ҳали қашф этилмаган. Бу ҳам катта муаммо. Муаммо ниманинг оқибатида келиб чиққанлиги эса ҳаммага аён. Демак, лоқайдлик ва мудроқликдан уйғониб, кўзни каттароқ очиш, она табиатни асраш учун елиб-югурмоқ пайти айни ҳозирдир.

Мушоҳадамизга қишлоқ муаллимининг тоғлардаги арчаларга болта уриб, қамалиб кетгани сабаб бўлган эди. Энди ўйлаб кўрайлик: Чорвоқ денгизи атрофидаги тоғ-тошларининг минг йиллик арчаларию серҳосил ёнғоқларигача кўзи қийиб, ўтинга кесаётганлар ичида фақат муаллимларгина эмас, эҳтимол менинг ҳамкасларим ҳам, борингки, касби тақозоси билан дараҳаткесарлар йўлини тўсишга бирдан бир мутасадди бўлган вакиллар ҳам бордир. Ўрмон хўжалиги раҳбари тезроқ тоғ аҳолисини ўтин-кўмир ва газ билан таъминлаш чорасини кўрайлик, акс ҳолда тоғлардаги қолган-кутган боғлардан, энг ёмони миллионлаб аҳолини ичимлик сув, дехқончиликни оби-ҳаёт билан таъминлаб турган денгизимиздан ҳам айрилиб қоламиз, дея бонг урмоқда.

Биз ҳам шу бонг садоларига қулоқ тутайлик, дейман-у, бироқ бойсунлик муаллим нима сабабдан арчаларни қийратганига ҳали-ҳануз тушунолмайман. Ахир Бойсунга газ борганига уч-тўрт йил бўлди! Муаллимни қандай етишмовчилик бу қадар тубанлик сари бошлади экан? Беихтиёр муаллимларининг турмуш ташвишлари кўз олдимга келади. Уларнинг одам-



лар орасидаги, жамиятдаги ўрни, инсоний қадр-қиммати ҳақида ўйлайман. Биз муаллимнинг қадрини жойига қўя биляпмизми? Ахир у сабоқ беради. Сабоқ берувчининг ўзи ҳам сабофини тугал олган бўлиши, ўз устида ҳамиша изланиб, ўқиб-урганиб, ижодий фикрлаб турадиган шахс даражасидаги етук инсон бўлмоғи зарур. Бугунги муаллимнинг ташвиши билан ҳеч қизиқиб кўрганмизми?

Бозор иқтисодига ўтаётган дастлабки йилларда “Муаллимлар ҳам ўзини бозорга ураётир, болаларимиз саводсиз ўқитувчиларнинг қўлида қолиб кетмоқда, ўқитувчилар етишмаётир”, дея дод деганларимиз ҳам бўлди. Ҳукумат ўқитувчиларга катта имтиёзлар берди. Қишлоқ жойларида истиқомат қилувчи муаллимларимизнинг аксарияти дала бригадирининг иш буюришидан, болаларни ёнига олиб, далама-дала из-фишдан, айни сабоқлар пайти турфа сафарбарликлардан қутулган.

Бу ҳам уларга кўрсатилаётган ғамхўрлик нишоналари. Бироқ ҳалқ таълими жонкуярларининг ўзи ва касбдошларига нисбатан лоқайдлик қилиштани ёмонда. Айтайлик, ҳалигача муаллим — сабоқларга ҳозирланиш, ўз устида изланиш, кундалик оммавий ахборот саҳифалари билан танишиб бориш, лоақал ўз нашрларига кўз таплаш, бадиий асарлар ўқиб, маънавий дунёсини бойитиш учун зарур бўлган қимматли вақтини ўғирловчи ортиқча расмиятчиликлардан қутулган эмас...

Ўқитувчи вақтини бекорга совурадиган вақтютар ҳангомалар, афсуски, оз эмас. Уларни ипидан игна-сигача санайверсангиз адогига етиш қийин. Шуларнинг ҳаммаси бир бўлиб муаллимнинг қадр-қимматига таъсир этмайдими? Албатта таъсир этади. Муаллимнинг қадр-қимматини ўйлаш бутун жамиятнинг вазифаси. Ахир унинг қўлига келажагимизни ишониб топшириб қўйибмиз-ку! Эртамиз қандай бўли-

ши муаллимга, унинг бугунги кайфияти, ташвиши, савиасига боғлиқ экан, нега жамият бу масалаларга лоқайд муносабатини ўзгартирмайди?

Ўқитувчиларга кўрсатилаётган бекиёс ғамхўрликларни айтдик. Улар орасида юксак унвонлар билан тақдирланаётганлар ҳам оз эмас. Бунга халқ таълими соҳасида амалга оширилаётган ислоҳотларни ҳам қўшсак келажак пойдеворини яратишта ҳукumat нечоғлик катта зътибор қаратадиганига амин бўламиз.

Кўплаб туман ва шаҳарлар, йирик қишлоқларимизда янги академик ва касб-хунар лицейлари фаолият кўрсатаёттир. Уларда минг-минглаб фарзандларимиз янги дастурлар бўйича ўқитилаёттани, мактаб ва синф хоналарни замонавий комъютерлар безаб, халқ таълимини ислоҳ қилиш ўюлида умуммиллий дастур рўёбга чиқарилаётгани, янги мактаблар қурилиши ва мавжуд мактабларнинг аксариятини қайта қуриш юзасидан олиб борилаётган кенг кўламдаги ишлар кимни кувонтирумайди, дейсиз.

Шу ўринда собиқ шўролар даврида кўп бор баҳс ва мунозараларга сабаб бўлган бир масала эсга тушаёттир. Бу ҳар бир синфда қанча ўқувчи бўлса дарслар яхши ўзлаштирилади, деган масала эди. Ўқувчи қанча оз бўлса дарслар шунча яхши ўзлаштирилиши, муаллимнинг барча ўқувчига кўнгилдагидек сабоқ беришга улгуриши — бу ҳаммага аён ҳақиқат. Барибир қандайдир меъёр бўлиши керак-да. Ана шу меъёр бир синф учун 20 - 25 ўқувчи даражасида белгиланганида яхши самаралар кузатилганига қарамай ҳозир 35 — 40 ўқувчининг ўқиётгани ўқувчиларнинг ўзлаштиришини қийинлаштирумокда.

Шу тариқа мактабларда яна бир муаммо пайдо бўлди. Хўш, ўтиз олти нафар ўқувчига муаллим қандай сабоқ беради. Қайси биридан сўраб улгуради. Қайси бир тартиббузар ўқувчига дашном берадими ёки сабоғини ўтадими? Масаланинг бу жиҳати, икror



бўлиш керакки, ҳалқ таълими мутасаддилари томонидан пишиқ-пухта ўйланмаган кўринади. Ҳамма нарсадан тежаш, иқтисод қилиш мумкиндири. Бироқ ҳалқ таълими соҳасидаги, эртанги келажагимиз билан бевосита боғлиқ бўлган муҳим бир соҳадаги тежамкорлик, ким нима деса десин, ўзини оқлашига асло ишониб бўлмайди.

Болаларнинг аксарияти муаллимнинг ундан дарсни сўрашига қараб сабоққа тайёрланишга одатланган. Муаллим сабоқни сўраб улгурмаган ўқувчидарсларни мунтазам тайёрлаб боришга эҳтиёж сўнади, ўйинқароқлик бошланади. Буни жуда кўпчилигимиз мактабдан қайтган болаларимизнинг юриштуришию, саволларимизга жавобларидан ҳам сезишимиз мумкин.

Бу масаланинг бир томони, иккинчи томони муаллимнинг манфаатдорлиги масаласи. Ундан ҳам кўз юмиб бўлмайди. Синфлар катталашиб, дарс соати камайган муаллим бошқа ишнинг этагини тутишга кечиккан бўлса, ўз тирикчилик ташвишлари ичida ёлғизланиб қолмайдими? Бойсунлик муаллим каби арчага болта уришдан ўзини тия олмаса-чи? Шу тариқа эътиқодига, виждонига қарши боришга мажбур бўлса-чи!

Жамият бу ҳақда ҳам ўйлаб кўриши керак. Жамият ким? Сиз, мен ва у. Барчамиз биргаликда жамият аъзоларимиз. Ва келажагимиз, эртанги кунимиз, фарзандларимиз истиқболи, мамлакат истиқболи ҳақида ҳаммамиз қайғуришимиз керак. Болаларимиз келажгини ишониб топшириб қўйган муаллим қадр-қиммати ҳақида ҳар куни ва ҳар доим ўйлашимиз керак. Ана шунда кўнглимиз ёруғ бўлади.



## АЛЮМИН ЖАЗАВАСИ

Жаҳон Жануби-шарқий Осиё мамлакатлариға уммондан ёпирилган мисли кўрилмаган довул асоратлари билан курашаётган, даҳшатли қор бўронлари Америкаю Европа шаҳарларини забтига олган, бутун дунё олимлари Ернинг эндиги тақдири нима бўлади, инсон ўз она сайёрасида яна қанча бехавотир яшай олади дея, бир-биридан таҳликали ҳаёт-мамот масалаларини муҳокама қилаётган бир пайтда экологик мувозанатга таҳдид солувчи янги-янги оғатлар ҳақида хабарлар таралди.

Тасаввур қилинг, пурвиқор тоғлар пойида кўза кўтарган Помир қизларининг гўзал табассуми ю шўх рақслари, бетакрор шарқона оҳанглар қатидаги навозишлар бир зумда саробга айланади ю жаннат насимларини уфурган водийлардан бутун тирикликни маҳв этувчи — алюмин оғуларига тўйинган заҳар-заққум аждаҳодек олов пуркаб кела бошлиди.

Алҳазар, дейсиз.

Ер юзи инсоннинг қўли, унинг очофатликлари боис табиатга етказилган чексиз жароҳатлар асоратидан азоб тортаётган бир пайтда кимлардир собиқ Репгар шаҳрида йигирма йиллар муқаддам оғзидан заҳар соча-соча, қанча бўстонларни совура-совура ҳолдан тойган алюмин аждаҳоларини яна тирилтиришга зўр бериб уринишмокда.

Улар кимлар? Тожикистонлик журналист Мирзо Шабдолов интернет сайтларидаги мақоласида уларни кўҳна россиялик саноат магнатлари деб атади. «Мамлакат эндигина оёққа тура бошлаганида россиялик саноат магнатларининг «алюмин истилоси» кўринишидаги яна бир янги ҳужуми бошланди, — деб ёзади у. — Бу ҳужумнинг оқибатлари Марказий Осиёни



майиб-мажруҳлар билан тўлиб тошган чўлу-биёбонга айлантириш учун таҳдид солаётган экологик ҳалоқат бўлиши мумкин».

Беш аср аввал Колумб изидан борган европалик корчалонлар олтин, ҳа сариқ олтин учун ҳиндиларнинг не-не жанинатмакон гўшаларини вайрон этиб, қанчадан-қанча ҳинди қабилаларини гўёки қуртқумурсқалардек топтаб ташлаган бўлса, бугун ҳам ўша чоғлардаги каби олтин жазавасига тушган корчалонлар «алюмин истилоси»дан келадиган мўмай бойликни деб шундай машъум жиноятдан тап тортмаяптилар.

Бунинг учун улар нефт сотишдан келаётган долларларини зудлик билан бир неча бор катта фойда берадиган соҳаларга йўналтиришни афзал кўришмоқда. Жаҳон кўламида бозори чаққон бўлган алюмин ишлаб чиқариш шундай соҳалардан ҳисобланади. Бироқ Мирзо Шабдолов қайд этганидек, Россиянинг ўзида тезда фойда берадиган экологик жиҳатдан зарарли ишлаб чиқариш соҳаларини йўлга қўйиш мушкул. Чунки демократияга ўрганиш йилларида россияликлар ҳокимиятнинг ҳар қандай зўравонликлари билан курашишнинг анчайин ҳадисини олишган. Боз устига, Россия давлат Думаси 2004 йилнинг охирида атроф-муҳитта зарарли моддалар чиқаришни чеклаш бўйича Киото Баённомасини ратификация қилди.

«Русский алюминий» (РУСАЛ)нинг йирик магнатлари ҳар нарсага кўнаверадиган собиқ республикалар ҳудудини мўлжалга олаётганлари бежиз эмас. Уларга Марказий Осиё аҳолиси саломатлигию жанинатмонанд табиатимиз завод топишининг сариқ чақачалик қадри йўқ. Ҳолбуки, янги «алюмин истилоси» ҳақида бонг урган ҳамкасбимиз ёзганидек, «Табиатнинг бебаҳо инъоми ҳисобланган ҳайвонот ва ўсимлик дунёсини йўқ қилиш инсониятга қарши жиноятдир... Россиялик магнатлар шу кунларда на-

фақат мамлакатимизни (*Тожикистон назарда тутилмоқда*) балки кўшни Ўзбекистонни ҳам ўзининг чиқиндилари билан заҳарлаётган Турсунзодадаги алюминий заводининг ишлаб чиқариш кувватини икки баробарга оширишни режалаштиришган. Бундан ташқари, россияликлар Хатлон вилоятида янги алюминий заводини барпо этиш ниятидалар. Уларнинг бу нияти осонгина амалга ошиши ҳам мумкин. Чунки бизда МДХ давлатлари ичида энг арzon ишчи кучи ва жаҳон бўйича ҳар нарсага сотилиб кетаверадиган ҳукumat мавжуд».

Бу хабарларни эшитиб ёқа ушламаслик мумкин эмас. Ахир, ҳозирнинг ўзида қанчадан-қанча одамларнинг соғлигини кемириб ётган корхона куввати яна икки баробар оширилса, бу ҳам етмагандек, яна бир заҳар сочадиган завод курилса, бусиз ҳам экологик танг вазиятда яшаб турган одамларнинг аҳволи не кечади? Уларнинг боболардан мерос очиқ осмон остида тоза ҳаводан нафас олиб, умргузаронлик қилишга ҳақ-хукуқи йўқми? Бу ҳақ-хукуқни назар-писанд қилмаётган корчалонларнинг кўли шу қадар узунми?

Бу ҳақда мушоҳада юритганда «алюминий оғуси»-нинг таъсир доирасида яшаётган одамларнинг арзоддлари қулоққа чалинади:

«Яrim тундан сўнг кўчада нафас олиб бўлмайди. Уйда эса эшик ва деразаларни беркитмасангиз, ноҳуш ҳаводан жон сақлаш қийин. Куйган кигизнинг ҳидидек бадбўй ис бўға бошлайди. Эрталаб соат бешдан саккизгача ҳам завод томондан заҳарли ҳаво келади. Тун бўйи какра чайнаб чиққандек оғзимиз таҳир. Уйкудан танангиз оғирлашиб, оғзингиз қақраб турасиз. Одамларнинг белидан мадор кетиб, иш фаолияти сусаймоқда, жигар, буйрак, турли нафас йўли касалликлари ошмоқда».

Алюминий заводи таъсиридаги Сариосиё ва Узун



туманлари ҳавоси таркибида газ ҳосил қилувчи фтор бирикмалари мөъёридан бир неча баробар юқори. Тиббиёт ходимлари аҳоли бош оғриги, бўғин касалликлари, кўзнинг яллиғланиши, бурун бўшлиғининг ачишиши, лоҳаслик, уйқусизлик ва толиқишдан шикоят қилишини, турфа касалликлар урчидек кетаётганлигини куюниб эътироф этишади.

Одамларнинг соғлигига таҳдид солаётган алюминий оғулари туфайли бу минтақада пилла етиштириш бутунлай барҳам топди. Молларнинг тиши тушиб кетмоқда. Одамлар ва жонзотлар соғлигини кемираётган фтор бирикмалари боғларга ҳам завол келтирмоқда. Тирикчилик неъматлари етиштиришдан файз кета бошлади, Аввало, Дашибобод анорларининг довруги сўнди. Сўнг ўрик дарахтларига ҳам касал тегди. Полиз экинчарининг эса ҳосили кескин камайиб кетди.

Хуллас, алюминий балоси одамларни ҳаёт-мамот масалаларига юзма-юз қилиб кўйди. Сариосиёлик журналист Маъмуржон Ботиров куюнганидек, одамлар тез қариб, ёш оиласларда бепуштлик касаллиги кўпайиб бормоқда.

Бундай маънавий жароҳатлар ҳам «алюминий оғуси»-ни жаннат водийларга сочишдан пул топаётган саноатмагнатларининг виждонига ҳавола. Шу мавзуда бундан йигирма икки йил аввал «Ўзбекистон адабиёти ва санъати» ҳафталигига эълон қўлган мақоламизни «Тан олинмаётган ҳақиқат» деб номлаган эдик. Орадан ўтган шу йиллар мобайнида Турсунзода шаҳридаги алюминий заводи билан боғлиқ масала турли поираларда бир неча бор кўтарилиди. Комиссиялар, эксперталар иш олиб борди. Ҳавога чиқарилаётган заҳарли моддалар миқдорини камайтириш юзасидан келишувлар белгиланди. Бу тадбирлар ўша йигирма йил аввал тан олинмаган ҳақиқатнинг расман тан олиниши эди.

Бироқ тан олинган, эътироф этилган ҳақиқат яна



унутилган кўринади. Алюмин жазавасига тушганлар учун бу ҳақиқатнинг заррачалик қиммати йўқقا ўхшайди. Акс ҳолда, яқин-яқингача гуллаган бўстонларни совуриб, жаннатмонанд зороатзор водийларга завол етказган, одамлар соғлигини барбод этаётган, болалар кўзидан кувончни ўғирлаб, не-не мурғак чақалоқларнинг ҳаёт шамини, қизлар юзидан латофатни, йигитлар кўзидан шижоатни сўндираётган ўша ёвуз мўрилардан фтор оғуларини тинимсиз пуркаб турган завод қувватини яна икки баробар ошириш, бу ҳам етмаганидек, ундан сал нарироқда янада улкан янги алюмин гигантини қуришга уларнинг ҳадди сиғармиди?!

Наҳотки, жаҳон ҳамжамияти бундай сурбетликка индамай қўл қовуштириб қараб турса?. Наҳотки, МДҲ давлатлари орасида ўзини тенг ҳукуқли суверен мамлакат ҳисоблаб келган қардош Тожикистон ҳукумати алюмин истилосидан келадиган жарақ-жарақ долларлар кўзини ўйнатаётган россиялик саноат магнатларининг тазиику таҳдиддан иборат хоҳиш-истакларига қарши тура олмаса?!

Ўзбекистон Республикаси Табиатни муҳофаза қилиш давлат қўмитасида бўлиб ўтган Марказий Осиё трансчегаравий муаммоларини бартараф этиш ва экологик хавфсизликни таъминлашга бағишлиланган анжуманда Турсунзода шаҳрида жойлашган алюмин заводи билан боғлиқ экологик муаммо нуфузли ташкилотлар иштирокида яна бир бор таҳлил этиб чиқилди. Ушбу анжуманда қатнашган Вазирлар Маҳкамаси ҳузуридаги Гидрометеорология бош бошқармаси, Соғликни сақлаш вазирлиги, Марказий Осиё минтақавий экология марказининг мамлакатимиздаги ваколатхонаси, Барқарор ривожланиш бўйича давлатлараро комиссиянинг илмий-тадқиқот маркази вакиллари, олимлар ва мутахассислар томонидан Сурхондарё вилояти чегара туманларида экологик



танглигни келтириб чиқараётган алюмин корхонаси билан боғлиқ масалаларга ҳаққоний баҳо берилди. Ҳозирги мавжуд корхонани янада кенгайтириш ва йилига икки юз минг тонна алюмин ишлаб чиқарувчи янги корхонани барпо этиш борасида тузилган келишув жамоатчиликни жиддий ташвишга солаётгани қайд этилди.

Инсон саломатлиги ҳамда атроф-муҳит мусаффолигига салбий таъсир кўрсатаётган саноат чиқиндиларини кескин камайтириш, экологик хавф-хатарнинг олдини олиш учун ҳамжиҳатликда иш кўриш ва ўзаро ҳамкорликни кучайтириш ниҳоятда зарурлиги таъкидланди. Жамоатчиликнинг, давлат идораларининг бундай қатъий позицияси, албатта, кўнгилга таскин бәради.

Бу саъй-ҳаракатлар нечоғлик самара беришини, албатта, келажак кўрсатади. Шундай бўлса-да, алюмин ишлаб чиқаришга бу қадар ружу қўйиш қўшини республикада арzon электр энергияси берадиган гидроэлектростанциялар қурилиши авж олдирилишига боғлиқ равишда келиб чиқаётганини ҳам назардан соқит қилиб бўлмайди. Мирзо Шабдолов бу жиҳатни, яъни гидроэлектростанциялар қурилишига сарфланаётган Россия сармояларининг ҳудудга нур олиб келиниши сифатида тарғиб-ташвиқ этилиши замирада ҳам «алюмин балоси» борлигини рўй-рост ёзib, уни «Ильич чироғи» тўғрисида янги эртак» сифатида баҳолади.

Бизни эса масаланинг бошқа бир жиҳати ташвишга солади: бу режалар кеча ё бутун эмас, бундан ўттиз-қирқ йиллар муқаддам шўролар ҳукмронлигининг айни гуркираган давларида «Орол денгизига кафандичтан» режалар билан бир пайтда туғилган эди. Режа муаллифлари Орол денгизини-ку ўлимга маҳкум этиб улгурдилар. Бироқ алюмин гигантларини қуриб, миллионлаб аҳолини экологик хавф-хатарга юзма-юз

қилишга муваффақ бўла олмаган эдилар. Бунга собиқ иттифоқнинг парчаланиб кетгани халал берган эди. Мана шундай ҳавойи иддаолари боис парчаланиб кетган собиқ салтанатнинг «совуқ режа»лари наҳотки ҳали ҳам ўз кучини сақлаб келаётган бўлса?!

Бундай бемаъниликлар собиқ иттифоқнинг ўзи билан бирга барбод бўлганига-ку, асло шубҳа йўқ. Аммо «ўлган илон»ни тирилтириб, манфаат кўришдан ҳамон кимларнингдир илинжи борга ўхшайди.

Бизни шу нарса ташвишга солади.

\* \* \*

Умид шулки, она Туркистоннинг қадим дарёлари мавжларини булғаб, боғларимиз заволи бўлаётган, жамики тирикликка таҳдид солаётган алюмин оғусининг йўлини тусадиган тоза насимлар албатта эслайдир.



## БУХОРО ОҲУЛАРИ

*Мунис мавжудотга мағбу шафқат бу!*

Қачонлардир Осиёнинг бепоён кенгликларида ёввойи от, қулон, туялар пода-пода бўлиб эмин-эркин кезиб юришган. Эндиликда бундай йирик сут эмизувчиларнинг айримлари буткул йўқолиб, баъзи бирлари эса ноёб турларга айланиб қолган. Йирик ҳайвонлар билан бирга жуфт оёқли кавш қайтарувчи сайғоқлар, оҳулар, жайронлар ҳам сурув-сурув бўлиб ўтлаб юришган. Тоғлар устидаги биёбонларда ёввойи буғу, дарёбўйи туқайларда эса зубр, ёввойи чўчқа ва бошқа жониворлар яйраб ўтлашган. Ҳозир айрим жойлардагина сайғоқ, жайрон ва оҳуларнинг баъзи турларигина сақланиб қолди.

Машхур шоиризининг “Қўриқхона” деган шеърини кўплар ёд билади. Уни ўқиганда, ёвуз кўзлардан зада оҳу ва тождор турналар, ноёб арслонлару неча минг хил безавол гиёҳлар, турфа қушларнинг камёб зотларини асраб қолиш учун юксак тоғлар, поёнсиз саҳролар кўйнида, дарёлар бурилиб оқадиган қайирлару яна кўплаб ғаюр кўзлардан пана жойларда вужудга келтирилган қўриқхоналар кўз олдимизга келади.

Ўқ отар қуролларнинг кашф этилиши табиат мувозанати бузилишига олиб келди. Бугунга келиб, инсон Ер юзининг барча бурчакларида чўл ва тропик чўллардаги бепоён ўтлоқларни ҳайдаладиган ер ва мол боқиладиган яйловга айлантириб, йирик ёввойи ҳайвонларни деярли қириб юборди. Бу жойларда табиий ҳолда ўсувчи гиёҳларнинг барҳам топиши билан улар орқали тирикчилик қилувчи майда ва ўрта турдаги

ҳайвонот олами ҳам йўқола бошлади. Фақат миллий табиат боғлари ва қўриқланадиган экология ҳудудларидагина миллион йиллар мобайнида Ер юзида табиий кўпайиб келган тирик мавжудотнинг айрим турларигина сақланиб қолди. Кўлига ов милтиги тутган инсон дашту чўлларнинг ноёб экотизимлари яратган не-не жониворларни да буткул маҳв этди.

Техник тараққиётнинг жадаллашуви нафақат наботот ва ҳайвонот оламига, айни чоғда, инсоннинг ўзига хос ҳаёт тарзи, аждодлар руҳи ва кўҳна заминнинг безавол қадриятлари билан боғлаб турган пок туйғуларига ҳам дахл қилаётир. Тарихчилар афсус ила ёзганидек, бир вақтлар шимолдаги улкан салтанатни учта асос тутиб турган — булар: қишлоқ муҳити, унинг қўргони ва роҳибхона. Эндиликда, бу уч илдизнинг барчаси барбод бўлган. Шу боис гиёҳвандлик, шафқатсизлик, беҳаёлик каби маънавий таназзул иллатлари миллатни ичдан емириб бораётир. Аллоҳга шукрки, кўҳна Туроннинг истиқдолга етишган халқлари одамизот наслини буткул маҳв этувчи бундай балолар йўлига пок эътиқоддан қалқон бунёд этаётир.

Коровулбозордаги Қизилкум барҳанларига туташиб кетган “Жайрон” экомарказининг мовий кўлларию туқайга айланган қуюқ саксовулзорлари бўйлаб кезаётиб, ҳуркак оҳуларнинг “ўз уй”ларида жуфтлари билан бехавотир юрганларини кузатар эканман, беихтиёр хаёлимдан шу ўйлар кечади.

### *Қулоқ қумбулия сир айтмас...*

Гўзал жайронларгина эмас, атоқли адаб Суннатулла Анорбоев тасвир этганидек, “иссиқда мудраётган чўлга файз киритиб, оққушникидай чиройли бўйнини ғоз тутганча” йўргалаётган йўрга тувалоқ (товуққа ўхшаш катта қуш)дан тортиб, “Қизил ки-

тоб"га киритилган Пржевальский отлари, қулонлару архар каби Бухоро тоғ қўйларигача шу экомарказда яйраб юришибди. Она табиатнинг нодир жониворлари беҳадик урчиб кўпайиши учун бу манзилда барча зарур шароитлар яратилгани меҳр туйғунгизни жўштиради.

Ўзбекистонда экотизимлар хилма-хиллигини тўқис муҳофаза қилиш учун тўрт тоифада маҳсус қўриқланадиган ҳудудлар ташкил этилган. Булардан бири давлат қўриқхоналари. Юртимизда жами тўқиз қўриқхона бўлиб, ҳудуди 209,6 минг гектар. Давлатга қарашли иккита Миллий табиат бофининг умумий майдони 6062 квадрат километр. Ов қилиш тақиқланадиган ва ўсимликлар алоҳида қўриқланадиган маҳсус буюртмахона-қўриқхоналар эса ўн бирта бўлиб, улар 1716,2 минг гектар майдонга эга.

Кушлар ва ҳайвонларнинг ноёб турларини кўпайтириш марказлари ҳам маҳсус қўриқланадиган табиий ҳудудларга киради. 1976 йили илк бор Бухоро вилоятида жайронларни кўпайтириш учун ихтисослашган питомник ташкил қилинди. Дастлаб унинг майдони 5145 гектар бўлган. 1989 йили қўриқхона "Жайрон" илмий-ишлаб чиқариш экомарказига айлантирилиб, Табиатни муҳофаза қилиш давлат кўмитаси тасарруфига ўтказилган. Ҳозир унинг майдони етти минг гектардан ортиқ.

— Экомарказимизни жануби-ғарбий Қизилқумнинг ўзига хос табиатини севувчи 33 турдаги сут эмизувчи ва 250 хилдан ортиқ кушлар макон тутган, — дейди марказ илмий ходими Наталья Солдатова. — Нафақат "Қизил китоб"даги охулару кушларнинг, ҳатто балиқларнинг ҳам Аму-Бухоро гулмойи каби ноёб турлари мавжуд.

Бу бежиз эмас, экомарказ ҳудудининг бир томони Термиз — Кўнғирот темир йўли билан чегараланган, иккинчи томондан Аму — Бухоро канали оқиб



ўтади. Тиниқ сувли “Гўзалкўл”, катта ва кичик шўр кўллар Амударё суви билан тўйинади. Уларда баликлар билан бирга турли қушларнинг озиғи бўлган планктонлар ҳам яшайди. Бундан ташқари, кўнғир эчкиэмар, илонлар, бир қозон деб номланадиган тумшуги остида мешқоти бўлган йирик сув қушларининг икки тури: пушти соқоқуш ва жимжимадор сақоқушлар, фанда фламинго деб аталувчи бўйни ва оёқлари узун, оч пушти тусли қизил ғозлар мавжуд.

Экомарказ аслида жайронларни урчитиб кўпайтириш учун ташкил бўлган. Юз бошга етар-етмас гўзал жайронлар ўтган ўттиз йилда минг бошга қадар кўпайган эди. Эндиликда уларга баъзан озиқ етишмайт қолаёттани, худуднинг улар сонига нисбатан торлик қилаётгани сезилмоқда. Бу ҳол жайронлар сонига таъсир кўрсата бошлабди. Экомарказга ёндош бўлган ўн саккиз минг гектар худуд табиий муҳитни асрашга доир амалдаги тартибларга биноан экомарказ ва хўжалик мақсадларида биргаликда фойдаланиш учун ажратилган. Ҳудудда аҳоли, шунингдек фермер хўжаликларининг моллари боқилмаслиги керак. Бироқ баъзан бу тартибни бузиш ҳоллари учраб тургани жайронлар кўпайтишига халал беряёттан экан.

— Шу чоққача Бухоро тоғ қўйи деб номланган алқорлар бутунлай завол топиб кетган, деб ҳисоблаб келинарди, — дея ҳикоя қиласиди кўп йиллардан буён экомарказда жониворлар шифокори бўлиб ишлаган ва ҳозир унинг директори бўлган Эркин Йўлдошев.  
— Ўтган йили Боботоғ ва Бойсун тоғларида уларнинг жуда кам туёқларигина борлиги ҳақида эшлитиб, ўша ёққа йўл олдик. Машҳур овчи-мерганлардан сўрабсуриштирдик. Аллоҳ ҳаётнинг тўқислиги учун яратган бу жониворлар бутунлай барҳам топиб кетмаслиги инсоннинг бурчи эканини тушунтириб ёрдам сўрадик. Алқорларнинг сонини кўпайтирсақ, ер юзида шу турнинг сақланиб қолиши учун шароит яратган бўла-

миз, дедик. Бошида бир урғочи ва бир эркак алқор олиб келган бўлсак, ҳозир уларнинг сони ўн бошга яқинлашиб қолди.

Халқ тилида архар ҳам, алқор ҳам бир жониворни англатади. Кўпчилик уни тоғ эчкиси дейди. Бироқ Бухоро тоғ қўйининг фарқи шуки, аста-секин ияги тагини соқол қоплаб боради. Экологлар тилида Северцев қўйи деб аталаётган Қизилқум қўйида эса бундай соқол ўсмайди. Бухоро қўйининг тоғли ҳудудлари бўлиб, улар бир вакълар Бухоро амирлигига қарагани учун ҳам тоғларни макон тутган архарларимиз Бухоро тоғ қўйи сифатида қайд этилади. Улар шоҳдорлиги, гавдасининг дуркунлиги, бақувватлиги ҳамда табиат яратган ноёб гўзаллиги билан бошқа шу турдаги жониворлардан фарқланади.

Пржевальск отларининг асл ватани Мўгулистон. Экомарказда 35 бош шундай отлар бор. Қулонлар эса отдан кичикроқ, кўпроқ эшакка ўхшаб кетадиган ёввойи хачирдир. Халқимиз тилида “қулон бошита иш тушса, қуруғига сир айтмас”, деган мақол ҳам бор.

### *Дельтаплан оғтида... турналар*

— Она юртимиз осмонида парвоз қилувчи жуда кўплаб кўчар қушлар, айниқса қизил ғоз ва оқ турналарнинг учиш йўллари экомаркази орқали ўтади, — дея мароқли ҳикоясини давом эттиради бир неча йилдан бўён шу марказда фидойилик билан илмий тадқиқот олиб бораётган Наталья Солдатова. — Сибирнинг шимоли-ғарбидаги Ямал-ненец миллий округини макон тутган оқ турналар Эрон ва Покистон ҳудудидаги қишлоғ жойларига қайтаётганда ва яна баҳорда узоқ шимол ўлкалари сари йўл олганда, албатта, бизнинг осмонимизда аргамчи солиб учадилар. Бироқ оқ турналар тобора камайиб бормоқда. Бунга



Эрон ва Покистон томонларда уларни отиб олишга ишқибозлар ҳаддан зиёд кўпайиб кетгани сабаб. Шу боис эндиликда ноёб оқ турналар кўпайиши учун ҳам жон кўйдираяпмиз.

Олимлар шу мақсадда оқ турна тухумини инкубаторда очириб кўпайтириш ниятида. Аслида турналар табиий шароитда икки-учтадан тухум қўяди ва полопонлар очиб чиққач, улардан биттаси учишга яроқли қушга айланади. Сабаби ҳаёт учун кураш лаҳзаларида улардан бири иккincinnини маҳв этади. Шунинг учун олимлар полопонларга ем берадиганда табиий шароит ҳосил қилиб, уларга ўзларини кўрсатишмайди. Полопонлар озиқни она турна бераяпти, деб ўйлади. Улар каттаргач эса оқ ҳалатли қушсеварлар турначаларни учишга ўргатади. Бунда дельтапланлар, айниқса, қўл келади. Олимлар турначаларни она турнага ўхшаб кетадиган дельтаплан изидан югуришга ва шу тариқа учишга ўргатишида.

Тадқиқотчининг айтишича, Россия, АҚШ ва Ўзбекистон экологлари ўртасида тузилган келишувга биноан ноёб оқ турналарни ана шу усулда кўпайтириш юзасидан катта саъй-ҳаракат бошланибди. Экомарказга оқ турна тухумлари Фарбий Сибирдан самолётда олиб келинаркан. «Биз уларни очириб, март ойи бошида учиб келадиган кулранг турналарга кўшиб учирамиз. Қушларнинг хотираси кучли. Экомарказ ҳудудида урчиб кўпайиш учун бехавотир шароит борлигини унутмайдилар ва ўз “тил”ида буни бир-бирига билдирадилар, деб умид қилалими», дейди у.

Бу тажриба олимлар томонидан қўлланиб, яхши самарага эришилган. “Умид дастури” лойиҳасига мувофиқ Қорақалпоғистон ва Қозоғистон ҳудудида ҳам кўчар қушлар йўлида зарур шароит яратиб оқ турналарни минтақамизга ўргатиши кўзда тутилмоқда. Ноёб қушларни улар бехавотир урчиб кўпаядиган жойлар

га ўргатиш учун космик радиоалоқа воситаларидан ҳам фойдаланиш мўлжалланмоқда.

Жайронларни табиий шароитда урчитиб кўпайтиришга ихтисослашган жаҳонда ягона экомарказ шутариқа ўз фаолияти кўламини кенгайтирмоқда. Узоқ-яқиндаги кўпгина зоопарклар, қўшни давлатларнинг кўриқхоналари, араб мамлакатлари ва Афғонистондан ҳам Бухоро жайронларига буюргмалар келиб туради.

Айни пайтда, экотуризм ишқибозлари ҳамда мактаб ўқувчиларининг “Жайрон” экомарказини келиб кўришга эҳтиёжи ошиб бормоқда. Уларнинг қизиқишлирини ҳам ҳисобга олишга тўғри келади. Шунинг учун жайронларнинг табиий кўпайиш шароитларига халақит бермаган ҳолда сайёхлар ва мактаб ўқувчилирига хизмат кўрсатиш учун экомарказ ҳудудига ёндош майдонда маҳсус “ташриф маркази”га эҳтиёж сезилмоқда.

Безавол оҳулар ва ноёб қушлар гўзаллигидан завқ олиш, бинобарин, она табиатта меҳр уйғотишдан кўра савоб иш йўқ.



## ОФТОБ НАҚПИ БОР

*Дон ба нон ҳақида ут ҳикоя*

Кўп йиллар бурун раҳматли отам томорқамизга фалла экиб, пишган буғдойга ўроқ соларкан, урушнинг охирги йиллари бўлган бир воқеани гапириб берганди. Шу гап хотирамда узоқ сақланиб қолди.

Ўшанда айни ёз, фалла ўрими авжиди экан. Эркаклар фронтда, ўроқчиларнинг аксари аёллар ва ўсмиirlар. Кун бўйи ўроқ сермаб мадори куриган аёллар кечки пайт дала четидаги анфиздан машоқ териб қайтаётганда нимадандир доим тажанг юрадиган Жаббор раис отини гижинглатиб келиб қолибди. Машоқ дегани ўроқ текканда тўкилган ярим-ёрти арпа-буғдой бошоги бўлиб, астойдил ерга эгилсангиз, бир соатда аранг бир ҳовуч териш мумкин. Баъзи қамчисидан қон томадиган раислар ана шу бир ҳовуч донни ҳам одамларга раво кўрмаган.

Замон оғир бўлган, машоқ термаса — уйда гўдаклар оч қолган. Эртадан кечгача бели қотиб ўроқ ўрган, қайтар чофи норасидаларини деб етти букилганча машоқ терганиларнинг шу арзимас насибасига ҳам большавой тўралар хасислик қилишган. Шу бир ҳовуч машоқни ҳам уларга кўп кўрганлар.

“Ҳамма машогини хирмонга тўксин!” деган буйруқ янграйди. Жаъми ўроқчи бу талабни бажарган, биргина Бибигул иккиланиб туриб қолади. Уйда унинг иккита жигарбанди оч ўтирибди, тонг чофи: “Кечқурун сизларга нон ёпиб бераман”, дея далага юргурган. Эри урушда ўлиб, бева қолган аёл бир ҳовучгина бошоқни енги ичига беркитади. Баттол раис шуни ҳам сезган экан, Бибигулни тўхтатиб, енг ичидаги бошоқларни хирмонга тўқтиради.



“Раис, сал инсоф қилсангиз бўларди. Бечоранинг норасидалари шунга кўз тикиб ўтирибди”, дейишади одамлар. Бироқ дийдаси тошга айланган Жаббор, одатича, бу гапларга қулоқ осмайди.

Бибигул йўл бўйи уввос солиб йиглаб қайтади. Йўл бўйи Жаббор раиснинг етти авлодини қарғаб қайтади. Дардларини сел бўлиб, шамол бўлиб айтади. Еллар унинг армонлари, оҳ-зорларини қанотларида олиб учадилар:

— Уйгинанг куйгур Жаббор, уйгинанг куйсин. Илойо, болаларинг томоғидан нон ўтмай қолсин-а, нон ўтмай!..

Шўро даврининг чопқирлари шундай тошбагир бўлган. Бибигул келиннинг қарғиши раиснинг ўзига тегмаган бўлса-да, унинг бутун авлодига, болаларига урганини одамлар кўришган. Кўришгану ҳайратдан тонг қотишган... Кейинчалик Бибигулнинг, йўқ, биргина Бибигулнинг эмас, у сингари минглаб уруш беваларининг дардли нолалари Шомурод баҳшининг ўлмас кўшиқларига кўчган дейишади...

\* \* \*

Иккинчи воқеани эса талабалик йиллари Аҳмад Яссавий бобомиз турбатлари жойлашган Туркистон шаҳри атрофидаги қишлоқларда эшиттан эдик. Биз ўзбек тили шевалари бўйича амалиёт ўтказган Қарнок қишлоғида ҳам Отабой деган шундай раислардан бири ўтган экан. У қаҳатчилик йиллари одамларнинг бор дон-дунини тортиб олиб, уругликка ҳам бермасдан омборда чиритиб юборибди. Далалар экилмай қолган ана шу пайтда унинг бу иши қаттиқ норозилик уйғодию колхозчилар тўполон кўтариб, раисни одил судловга тутиб бермоқчи бўлишади. Бироқ у қочиб қолишга уринади, ғазаби тошган уч-тўрт одам судгача кутмай Отабойни ўлдириб қўя қолишади. “Болшавой”лар уни жабрдийда қаҳрамон санаб, узоқ йиллар колхозни унинг номи билан атаб келишган.

Собиқ тузум қулагач, Қарноқ қишлоғининг асл номи қайтадан тикланди, уруғликни элдан яшириб чиритиб юборган раиснинг номи эса тарих саҳифасидан ўчириб юборилди.

\* \* \*

Дон ва ноннинг нақадар азизлигига доир яна бир ибратли воқеани Қўнғиртов атрофидаги қишлоқларда ҳали-ҳануз эслаб юришади. Машхур шоиримиз Абдулла аканинг падари бузруквори раҳматли Ориф ота ҳам ана шу оғир уруш Йиллари хўжаликка раис бўлган экан. Эрлари урушта кетган аёллар ёки уларнинг болалари дон янчгани хирмонга келишса, уларга секингина: “Эртага эрингнинг калишини кийиб кел”, “Отангнинг калишини кийиб юравер...”, деб қўяркан. Калиш каттароқ бўлса, бир-икки сиқим ғаллани билдирмаган-да. Элнинг ҳақиқий жонкуяр оталари одамларга далда беришга шундай йўл топишган.

Жаббор баттол ёки Отабой раис кабиларга ўҳшаб қарғиши эмас, элнинг раҳматини олган оталарнинг болалари эса улуғ юртнинг ардоқли фарзандлари бўлиб, эл-улус ифтихорига айландилар.

\* \* \*

Дон ва нонимиз билан боғлиқ бу уч воқеани бе-жиз эсламадим. Уруш ва ундан кейинги қаҳатчилик Йилларини қўя турайлик, олтмишинчи Йиллар бошидаги “тўқчилик” кунлари ҳам Хрушчевнинг валломатлиги боис жухори уну арпа нон еганимиз эсимизда. Ҳалқимиз оғир ва адолатсиз шўро даври қийинчиликларини босиб ўтиб, истиқоллга мусаттислар бўлди. Одамлар ғалла экиб, ўроқ ўриб бир ҳовуч машоқ теришига ҳалди сифмаган замонлар ортда қолди. Давлат раҳбарининг ташаббуси ва ҳалқимиз иродаси билан илк бор ғалла мустақиллигига эришдик. Нон-насибаси бутун ҳалқа айландик.



Донимиз хирмонларга төгдек уюлиб, эл дастурхони оппоқ буғдойимиз неъматларидан файзиёб бўлган кунларда ўз нонимиз, ўз донимиз кўзимизга беихтиёр иссиқ кўринаётгани сабаби ҳам шунда.

Пахта яккаҳокимлиги барҳам топиши шарофати билан ғаллазорлар кенгайгандан кенгайди. Соҳага хорижнинг юксак унумли техникалари кириб келди. Бироқ дала-қирларимизда гоҳо эски техникалар ҳам судралиб юрганини кўрасиз. Айни ўримнинг қисталант кезида улар дон-дунни тўкиб-сочиб, ҳосилнинг баракасини учирив қўяётган ҳоллар бўлиб турибди. Уларнинг ўрнига Германия ва Россиянинг янги ўрим техникалари келаётганини кўриб кўзингиз қувонади. Бу жараён янада жадаллашиб, хирмонларимиз тобора юксалиб бораверади.

Нонимиз ҳар қанча мўл-кўл бўлмасин, у энг тансиқ неъмат сифатида ҳамиша азиз ва мўътабар! Зоро, нон она юртнинг ризқ-рўзи. Миллий қадриятларимиздаги жуда кўп асотирлар ҳам ноннинг қадри, уни эъзозлаш билан боғлиқ. Демак, биз бу азиз неъматимизни ҳам мусаффо сув ва ҳавомиз каби эъзозлаб асраримиз, тансиқ нонимиз сифатига гард юқтираслигимиз керак. Зотан, дастурхонлар минг хил нознеъматга тўлиб турганида ҳам ноннинг ўрни ва қадри бўлакдир!

Нон бор экан, энг азиз неъмат сифатида у ҳақдаги таърифу тавсифлар ҳам давом этади. Асл хунарманднинг қўлида темир олtingга айлангани каби, сифати бир хил буғдойдан бир нонвой таъми оғзингиздан кетмайдиган ширмой ёпса, бошқа бири кўмач пишириши мумкин. Баъзилар унни увол қилиб, бўрдоқисига атала пиширади. Тансиқ неъматнинг бокибекамлик ёки бели оғримаслик оқибатида исроф бўлиб кетаётганини кўриб ичингиз ачийди.

Самарқанд нонининг машхурлигини ҳамма танолади. Бу ҳақдаги ривоятлар ҳам бежиз эмас. Бироқ

ноннинг энг яхшиси фақат Самарқанддагина пишади, дейиш унчалик ҳам тӯғри эмас. Қаршию Шаҳри-сабзнинг офтобдек кулиб турган нонлари таъми билан ҳам, кўриниши билан ҳам Самарқанднинг машхур нонларидан сира қолишмайди. Тошкент бозорларига-ку, Самарқанд нонидан ками йўқ нонлар чиқаёттанига анча бўлди.

Истиқлол йилларида хусусий тадбиркорликнинг равнақ топиши нонпазлик саноати ривожига ҳам таъсир кўрсатди. Бироқ яхши булка энди айрим туманлардаги эски нонвойлик дасттоҳларидагина пишаетганини ҳам айтишимиз керак.

Сифатнинг эмас, соннинг кетидан, бинобарин, мўмай даромаднинг ортидан қувиб қимматбаҳо уни-мизни исроф қилаёттанилар нондек улуғ неъматнинг қадрини тушираёттаниларини ўйлаб кўрсалар, фақат бу дунёнинг роҳатини эмас, у дунёнинг азобларини ҳам ўйласалар, ёмон бўлмасди, дегинг келади.

Тошкентни бежиз нон шаҳри, дейишмаган. Оғир қаҳатчилик йиллари пойтахтимиз очарчилик гирдо-бига тушганлардан Осиёнинг офтобдек иссиқ нонларини аямаган. Биз мана шундай улуғ эл, шавкатли аждодлар фарзандимиз. Нони ширин, насибаси бутун халқмиз!

• \* \*

Тандирдан эндиғина узилган оппоқ ионимизда офтобнинг нақши, ота юртнинг тафти бор! Она Ўзбекистон саховати бор!



## ДЕҲҚОННИНГ ОРЗУСИ

*Куронбюю Мўға Раҳмонлар  
нимадеёнди?..*

Кузнинг офтоб чарақлаб турган кунлари эди. Эллиқалтъа ҳокими Нематулла Худойберганов тумандаги Фани Одилов номли хўжалик пахтазорларига боришни маслаҳат берди. Теримчилар айни тушликка чиққан маҳал хирмон бошида учрашув бўлди. Шоир ҳамроҳларимиз қиз-жуонлар меҳнатини алқаб шеър ўқишиди, эсадалик учун суратга тушишиб, китобларига дастхат ёзиб беришиди.

Куронбой Бобожоновнинг даласи кўзни яшнатарди. Fўзалар бамисоли бутазордаги дарахтларни эслатади. Ҳар тупда саксон-тўқсонтадан кўсак. Ҳар чаноқда етти-тўққизтадан чигит.

— Бу ўзи қандай нав? — ҳаммамиз бараварига қизиқиб сўрадик.

— Бу, янги нав, — деди мийифида кулганча Куронбой. — Икки йилдан бери тажриба қилиб кўраптимиз. «Оқдарё — 6» нави. Раисимиз дарагини эшишиб, Самарқанддан топиб келган.

Унинг айтишича, янги нав бир йил аввал саккиз гектарлик шу далада етмиш центнердан пахта берган. Ҳосилнинг ҳозирги чўғи ҳам ундан кам эмас.

Албатта, Куронбой бу навга алоҳида эътибор қаратиб, ундан меҳнатини ҳам, меҳрини ҳам аямаган. Вақтида озиқлантириб, вақтида сугорган, барча юмушларни кўнгилдагидек қилиб бажарган. Бироқ бу қадар юқори ҳосил олишнинг сири нимада экан? Агар бунинг сири фақат Куронбойнинг тажрибасида, пах-



тага бўлган алоҳида меҳр-муҳаббатида десак, у сингари пахтадан меҳнатини аямайдиган миришкорлар жуда кўп. Бироқ уларнинг ҳаммаси ҳам ҳосил чўгини бу даражада юқори кўтара олишмайди. Ҳатто, ҳар қанча меҳнат қиласанг-да, пахта эллик центнердан ортиқ ҳосил бермайди дегувчилар ҳам кам эмас. Демак, ҳамма гап навда экан, навшунослик олми савиясини кўтара олсак, деҳқоннинг қозони ҳам, чўмичи ҳам мой бўларкан-да, деган фикрга боргандик ўшанда.

Орадан йил ўтиб, нишонлик фермер Тўра Раҳмонов даласида ҳам элликқалъалик Куронбойнинг пайкалида кўрганимиз сингари мўл пахта ҳосилига дуч келдик.

— Сизлар ҳам «Оқдарё» навини синааб кўряпсизларми? — деб сўрадик фермердан.

— Йўқ. Бу ўзимизнинг «Бухоро — 6», — деб жавоб берди у. — Ҳосили олтмиш центнердан ошиб кетди. Кўриб турибсизлар, ҳали яна пахта бор далада.

— «Бухоро — 6» дан ҳам шунча ҳосил олса бўларкан-да, — деб ажаблангандик, фермер ўз тажрибаларидан баъзи бирларини айтиб қолди:

— Бу дала олти гектар. Тажрибамни шу ерда ўтказман. Тўғрисини айтсан, нав-ку — ҳамма далаларимизда бир хил. Бироқ бу пайкалга алоҳида қараймиз. Аввало, тупроқни нурига «бас» деганча тўйдирман. Кузда ҳам, баҳорда ҳам. Ҳатто сугориш чоғида ҳам кўйнинг қийини оқизамиз. Иккинчидан, бу далада трактор култиватори то учинчи сувга қадар ишлатилган, холос. Шундан сўнг роса ўсиб кетган шохлар синмасин, деб ғўзага қўлда, кетмонда ишлов бердик. Натижани эса мана кўриб турибсизлар.

Ҳосил шу қадар мўлки, қанча терсанг ҳам кун сайин очилиб ётган чаноқларни сира адо қилиб бўлмайдиганга ўхшарди. Сал фурсат ўтиб, “Қорақалпоқтомат” корхонасининг Нуриддин Орифхўжаев раҳбарлигидаги гўзани томчилатиб сугоришга ихти-

сослашган тажрибакорлари ҳам етмиш центнердан ҳосил олаётганини эшигидик. Қани энди ҳамма пахта-зорларимизни мана шундай парваришлиш даражасига эриша олсак! Афсуски, ҳозирча бунинг имкони йўқ. Ҳамма далаларга бундай ишлов беришга деҳқоннинг қўли қисқалик қиласди. Гоҳида навларнинг ара-лашиб кетиши, техника етишмаслиги, ернинг шўри, минерал ўғитларнинг қимматлиги каби кўпдан-кўп омиллар панд бериб қолади...

Агар бу муаммолар ҳал этилса, биз бебаҳо ери-мизни, олtinga тенг сувимизни янада қадрлаган бўлардик. Яхши ҳосил олинмаётгани, тупроқ унумдорлигининг пастлиги оқибатида қанчадан-қанча ерларнинг умри бекор ўтмасди. Ер ва унинг унумдорлиги экологик муаммолар ичида энг долзарбидир. Биз ер билан боғлиқ экологик муаммоларни ҳал қилиш орқали жуда катта иқтисодий вазифаларни ҳам адо этамиз. Негаки, бугун ўзбек деҳқонининг моддий манфаатдорлиги кўп жиҳатдан у ердан олаётган ҳосил салмоғига боғлиқ. Ҳосил салмоғини эса пахтанинг нави ва деҳқоннинг чўнг меҳнати, унинг замонавий техника ва технологиялар билан қай даражада қуроллангани белгилашини юқорида айтилган мисолларда кўрдик. Аслида бу манзара пахтачилигимизнинг яқин келажакдаги истиқболидан далолат беради. Бинобарин, деҳқон-фермерларимиз ерга ҳақиқий эгалик туйғуси қандай самара бериши мумкинлигини ўз меҳнати, билими ва тажрибаси мисолида яққол кўра бошлади.

### *Пахтанинг янни бозори*

Ҳар йили куз ойлари бошида Тошкентда ўта бошлаган жаҳон пахта бозорининг асосий мақсади ҳам қимматбаҳо тола етказиб берувчи пахтакор деҳқоннинг, бинобарин, заҳматкаш халқимизнинг моддий



фаровошлигини янада юксалтиришни кўзда тутади.

Бу хусусда сўз юритар эканмиз, жаҳон пахта бозорининг юртимизга кўча бошлагани моҳият эътибори билан, мустақиллигимиз тақозо этаётган заруратлар сифатида юз берганини айтмасдан бўлмайди. Негаки, истиқоллга қадар ўзбек дехқони, ана шу жафокаш бободеҳқон сиймосидаги она ҳалқимиз не-не азоблар билан пахтани етиштиради-ю, бироқ олтинга тенг бу неъматни қандай нархда, кимга ва қачон сотиш буткул унинг инон-ихтиёридан ташқарида эди. Бошқача айтганда, оқ олтинни ўзбек дехқони машиқат чекиб етиштиради-ю, бироқ бу бойликнинг ҳузурини бошқалар кўрарди.

Бугун мамлакатимизда дехқончилик бутунлай янги тизимда шаклланмоқда, фермерлик ҳаракати ҳал қилувчи кучга айланди. Тайёрланаётган толанинг асосий қисми фермерлар етиштирган ҳосил ҳисобига тўғри келмоқда. Фермерлар даласидаги ҳосилдорлик ошиб бормоқда. Шу боис мамлакат Президенти бошланган ана шу хайрли жараённи янада изчил давом эттиришга даъват этаётир. Дарҳақиқат, фермерлар янги иқтисодий ислоҳотларни рӯёбга чиқараётисб, эндликда нафақат экин экиш, парваришилаш, айни чогда етиштирилган ҳосилни сотиш ва ундан тегишлича даромад олишнинг ҳам пухта ҳисоб-китобини юритадиган даражада замонавий фикрлаши зарурлигига аҳамият қаратилмоқда.

Яқин келажакда фермерлар пахтани фақат етиштириб, хомашёсини пахта заводларига топширибгина қўя қолмай, ундан тола ажратиб олишдек янада мураккаб жараёнда ҳам бевосита иштирок этиши зарур бўлади. Президентнинг бу даъвати замираида жуда катта ижтимоий адолат мужассам. Сабаби, бугун фермерлар пахтани бошқанинг аралашуви, кўрсатмасиз ўзи мустақил етиштира бошлади. Бироқ етиштирган ана шу ноёб неъматини ўзи хоҳлаганидек сота



олиш даражасига эришгани йўқ. Бу борада ҳамон монополист корхоналарнинг айтгани — айтган, деганидеган. Бу ишни ҳозирча «Пахтасаноат» уюшмалари амалга ошироқда.

Бошқача айтганда, хомашёни етиштирувчи билан ундан олинган тайёр маҳсулотни харид қилувчи ўртасида ҳозирча воситачи тарзидаги “учинчи одам” муаммоси бор. Хўш, бу жараёнда муаммо нега пайдо бўляпти? “Учинчи одам” тимсолидаги бу бўғиннинг деҳқон-фермерга ёқмаётган жиҳати нимада зоҳир бўлаётир? Ҳозирги шарт-шароитдан келиб чиқиб айтадиган бўлсак, кўп ҳолларда “учинчи одам” фермерни, бинобарин минг азоб билан пахта етиштирувчи деҳқоннинг хоҳласа қўлини боғлайди, хоҳласа «тушовлади». Бу механизмнинг тўғри ишлаши амалда қийин кечеётир. Аввало, пахтани деҳқон-фермерлардан қабул қилиб олаётган заводлар пахта етиштирувчи билан уни харид қилувчи ўртасида олтин қўприк эмас, уларни бир-биридан йироқлаштирувчи ортиқча бўғин бўлиб қолаётир. Бу унинг ўз манфаатини ҳадлан зиёд юқори қўйиб, кўп ҳолларда, хомашё етиштирувчи манфаатдорлигига раҳна солаётганида намоён бўлмоқда.

Шу ўринда пахта бозоримизга ташриф буюрган хорижий компанияларнинг вакиллари фикрини ҳам эшишиб қўяйлик. Улар “Биз шу чоққача ўзбек пахтасини турли воситачилар орқали сотиб олардик. Энди эса ўртадаги ана шу олиб-сотарларсиз тўғридан-тўғри Ўзбекистоннинг ўзидан оляяпмиз”, дей ўз мамнунликларини изҳор этишади.

— Биз ўзбек пахтасининг сифат жиҳатидан рақобатбардошлиги, ҳалқаро талабларга жавоб беришини аввалдан ҳам яхши билардик, — дейди Вьетнамдаги «Damu» компанияси раҳбари Фан Тан Сон. — Чунки компаниямизда асосан ўзбек пахта толасидан тўқимачилик маҳсулотлари ишлаб чиқарилади.

— Ярмарка сабаб узбек пахта толасининг жаҳон миқёсидаги обрў-эътибори яна бир погона ошди, — дейди «Коттон Бангладеш» журнали бош муҳаррири Куамрул Ахсан. — Дунё пахта саноати етакчилари ўзбек деҳқонининг хомашё етиштиришда пухта иш юритишига юқори баҳо беришди.

Ҳа, пахтанинг ҳақиқий жаҳон бозорини шакллантириш бўйича қўйилган кутлуг қадам ўз самараларини намоён эта бошлади. Шубҳасиз, бу жараён бундан буён ўзбек ҳалқи учун мустақиликнинг энг катта неъматларидан бири сифатида янада янги имкониятлар эшигини очажакдир.

### *“Учинчи одам”га ҳозқат борми?*

Хорижлик харидор-ку, ўзбек пахтасини бирор европаликдан эмас, ўзбекнинг ўзидан олаётганига, орадаги “учинчи одам” тимсолидаги даллол воситачининг хизматидан воз кечганига шунчалар қувонаётган экан, энди тасаввур қилингким, етиштирган хомашёсини ҳозирги пахта заводларига топшириб, улар ажратиб олган тола сотилганидан сўнг қўлига тегаётган ҳаққа қаноат қилиб келаётган ўзбек фермери толани ўзи етиштирган хомашёдан ўзи ажратиб олишга эришса, сўнг тайёр толани истеъмолчига ўзи тўғридан-тўғри сотиш имконига эга бўлса, бундан-да ортиқроқ қувонмасмиди! У албатта хорижлик харидордан ҳам кўпроқ суюнган бўларди. Умид қиласизки, бу жараён оддий воқеага айланадиган кунлар у қадар йироқ эмас.

Унга қадар эса ҳали орада деҳқон «нонини тuya қилишга иштаҳаси зўр» бўлган “учинчи одам” тимсолидаги бўғинлар жуда кўп. Ана шундай бўғинларнинг энг оғриқли нуқтаси бутунги пахта заводлари, улардаги катта раҳбарнинг измидан чиқмайдиган навсинаш лабораториялари ва устаси фаранг тарозиблардир.



Тарозибон-ку, аслида жудаям кичик шахс. Бироқ унинг ортида беш панжасини оғзига тиққан бутун бир тўда турибди. Ана шу тўданинг гирром манфаати билан тарозибоннинг ҳам ҳакалак отган ҳавойи нафси бирлашиб, ноҳалол муҳитни вужудга келтирган. Бутун биринчи навбатда дехқонни уларнинг ана шундай “ҳомийлиги”дан тезроқ қутқариш керак. Бу жараён қанча тезлашса, дехқону фермер ҳам, пахтакор халқимизнинг моддий манфаатдорлиги ҳам шу қадар кўпроқ барака кўрган бўлур эди.

Даъвоимиз куруқ бўлмаслиги учун пахта заводлари ҳаётидан бир-икки мисол келтиришга ҳаракат қиласиз. Айни йигим-терим авж олган кунлари заводларнинг пахтани қабул қилиш жойларида тарозибон билан дехқон-фермер ўртасида шундай гап-сўзлар тез-тез қулоқقا чалиниб қолади:

— Ҳов ака, ўзи сизда инсоф борми? Шундай оппоқ пахтани ҳам иккинчи навга оламан дейсизми?

— Инсофни ўртага тиқманг. Биринчи навга оладиган бўлсам вазндан чегиришга тўғри келади. Билдингизми! Ё навни туширишга, ё вазндан чегиришга кўниш керак. Бўлмаса, бу пахтани олмайман”, — дейди тарозибон.

— Қани, олмай кўр-чи! — дейди фермер. Орада сорт учун, пахтанинг ҳақиқий вазни учун талашиш, тўғрироғи кураш давом этади. Талашаётганларнинг ҳар бири ўзини ҳақ ҳисоблайди. Ҳар бирининг ўз далил-исботи бор. Лекин кўп ҳолларда дехқон унинг нонини тия қилишга ишқибоз тарозибоннинг айтганига кўнишга мажбур бўлади. Чунки унинг ҳақ-хукуқини ҳимоя қилишга қодир бўлган ҳакамни ҳар қадамда ҳозир нозир қилиб бўлмайди. Тарозибон ана шундан фойдаланиб қолишга устаси фаранглардан топиб кўйилган. Балки топиб кўйилгангина эмас, у ўша «ёғли жой»ни фалон пулга сотиб олган бўлиши ҳам мумкин. Буни қишлоқда яшовчи ҳамма билади...



Кимдир бундай талашишлардан кўра “қистир-қистир”ни афзал кўради. Буни ўзига эп кўрмаганлар эса пахта ортилган тележкаларни тўғри ҳокимлик биноси олдига олиб бориб, ўз ҳақини талаб қилган ҳоллар, тарозибонларнинг улар ортидан юргилаган вақтлари бўлиб туради. Ҳуқуқ идоралари ходимларининг бу ишга аралашган кезлари ҳам оз эмас.

Афсуски, ҳар бир тарозибон олдига биттадан назоратчи қўйиб бўлмайди. Қўйилган тақдирда ҳам улар аста-секин тил бириктириб кетмайди, деб ҳеч ким кафолат бермайди. Ана шундай фирромликдан куйганинг бир фермернинг ҳангомасини эшитинг:

— Чўлда деҳқончилик қиласиз, бизда ҳашарчи камроқ, — дейди у. — Шу боис теримга кечроқ киришдик. — Октябр ойининг бошларида биринчи терим пахта борлигини эшиттан ҳашарчилар ҳар томондан ёпирилиб келишди. Шу дент, икки кундаёқ салкам йигирма тонна пахта терилди. Уларни заводга олиб борсам, иккинчи навга оламан, дейди. «Хов, менга қара, кўзинг кўрми, бу, ахир биринчи теримники-ку, ҳали осмондан бирор томчи нам тушмаган, куёш чараклаб турган бўлса! Шундай оппоқ пахтани иккинчи нав дейсанми, имонсиз», дедим. «Хоҳласангиз шу, ана лабораторияда текширтириб кўринг, барибир, иккинчи нав чиқади», дейди кўзини лўқ қилиб. «Бўпти, — дедим, — қани ўша сенинг йўриғингга юрадиган лабораториядагилар иккинчи нав чиқариб кўрсин-чи, биласанми, нима қиласман!» «Ҳа, нима қиласиз?» «Ўша анализга олинган пахта билан бирга тўғри вилоят прокурорига бораман. Бошқа фермерлардан олинган пахта хирмонларингни ҳам ўлчатаман. Кимдан қанча ўмарид қолганингтча ошкор бўлмасдан қолмайди. Ана ундан сўнг ҳолингта маймунлар йиғлашини ўйлаб кўравер. «Ул-бул» бериб қутулиб кетганингда ҳам, ҳойнаҳой, анча-мунчага тушасан бола», дедим. Ҳа, шундай дедим! Ё тавба,

тапим таъсир қилди. Бола пакир дарров юмшаб қолди. Ҳар куни кимдан қанча ўмарид турганини ўзи билади-да! Бошқалар ҳам билади. Бироқ ҳеч ким мен сингари типпа-тик тортишмайди.

Фермер жуда тўғри айтди. Ҳамма ҳам у сингари тиккама-тикка тортишмайди. Бирор юз-хотир қилали, бошқа бирорнинг дурустроқ натижа чиқаришга кўзи етмайди. Қолаверса, бунга кўп фермерларнинг вақти ҳам, имкони ҳам йўқ. Пахта заводларига уя қурган тўдалар мана шундан фойдаланиб, дехқоннинг нонини тия қилиб ётишибди.

Дехқоннинг бели букчайиб етиштирган ҳосили қадрини ҳеч бели оғримасдан туриб ерга ураётган мана шундай фирром тарозибону сифат бўйича ҳакамларни шоир назарда тутаётган “учинчи одам”ларга қиёсласак асло муболага бўлмайди. Тасаввур қилиб кўринг: бир тонна пахтанинг нави туширилса дехқон элликолтмиш минг сўм ютқазади. Агар ўша фермер йигирма тонна хомашёни биринчи навга эмас, иккинчи навга қабул қилишларига рози бўлганида у нақд бир миллион сўмидан айриларди. Сифат бўйича мутасаддиларни ўз йўриғига юргизаётган тарозибон эса атрофидаги ҳамтовоқлари билан бу маблагни қандай қилиб ўз чўнтағига буриб юборишнинг роса ҳадисини олган. Шунинг учун ҳам фермер ўз даласида ишлатгани янги трактор ё бошқа техника воситалари сотиб олгани йиллаб маблағ йиғса, уни тарозида чув туширишга устаси фаранглар ҳар йили қўша-қўша машинаю қават-қават ҳовли-жойлар қуришнинг бемалол уддасидан чиқади.

Модомики, аҳвол шундай экан, муаммони ҳал этиш учун, Президент даъват этаётганидек, хомашё етиштирувчининг ҳосилни сотиш ва ундан тегишлича даромад олиши, яъни ўз маҳсулотини истеъмолчига — у жаҳон бозоридаги харидор бўладими ёки ўзимиздаги пахта толасидан маҳсулот ишлаб чиқа-

рувчи корхона бўладими, ким бўлишидан қатъи назар, орадаги “учинчи одам” сиз тўғридан-тўғри мумала қила олишига эришмоқ зарур.

Бу борада дастлабки қадамлар қўйилаёттани эса кўнгилда умид уйғотади. Аслида бу паҳтакор халқимизнинг азалий орзусидир. Жаҳоннинг кўплаб ривожланган мамлакатларида бу оддий воқелик. Бутун жаҳон синовидан ўтган фермерликни-ку муваффақиятли жорий этдик. Хўш, ҳозир фермерлар дуч келайдиган “учинчи одам” муаммосини қандай ҳал эта-миз? Бу саволга ҳам аллақачон жаҳон тажрибасида кўрилган жавоблар мавжуд. Бу тажриба икки-уч йирик фермер хўжаликларининг биргаликда хомашёни қайта ишловчи кичик корхона ташкил этишларини кўзда тутади. Хомашёдан паҳта толасини ажратиб олувчи ускуналар билан жиҳозланган энг замонавий мини- заводлар қурилади. Бундай кичик корхона деҳқоннинг ҳам, фермернинг ҳам талабига ҳар жиҳатдан жавоб бериб, унинг меҳнати қадрини баланд кўтаради. Ана шунда ўзбек деҳқони дўлтписини осмонга отса, ўз ишидан ҳар қанча фаҳр этса арзийди.





# **ОЛИСЧЎЛЛАР БИНАФШАСИ**

## УЛУФ ТЕМУРГА АЛЛА АЙТГАН ЭЛ

*Соҳибқирон ҳазратларининг халқимизни мўғул зулмидан ҳалос этиш, параканда эл ва элатларни бирлаштириш, диёнат ва адолатни қарор топтириш, илм-фан, маърифат ва маданиятни юксалтириш йўлидаги буюк орзу-ният ва интилишларига мана шу Қарши замини мустаҳкам қанот берган.*

Ислом КАРИМОВ

Насаф. Бу табаррук замин қадимда Жанубий Турон пойтахти дея эъзоз билан тилга олинган. У бугун озод Ўзбекистоннинг навқирон шаҳарларидан бирига айланган. Кўҳна Насафнинг йигирма етти асрлик тўйи боис ўтмиш саҳифалари яна тилга кирди. Ҳалқимиз салоҳиятининг гўзал ифодаси бўлган меъморий обидалар асрлар чанг-ғуборидан тозаланиб, обод манзилларга айлантирилди. Бетимсол қадриятларни тиклаш ва бу маънавий ҳазинани келажагимиз ворислари онгу шуурига сингдириш йўлидаги эзгу ишларга назар солар эканмиз, она Ўзбекистоннинг ёрқин истиқболини янада теранроқ тасаввур эта бошлаймиз.

Тўй тантаналари 2006 йил 27 октябрининг эрта тонгида пойтахтдан маҳсус учоқда борган элчилар, мамлакат ва хориж олимлари, дипломатик корпус вакилларининг кўҳна Насафдаги обод меъморий обидалар, янги муҳташам саройлар ва боғларни зиёрат қилишидан бошланди. "Қарши шаҳрининг жаҳон таддуни тарихидаги ўрни" мавзуидаги ҳалқаро анжуман ҳам шодиёнага алоҳида шукуҳ бағишлади. Анжуман Ўзбекистон Фанлар академияси, Ташқи ишлар ҳамда Олий ва ўрта маҳсус таълим вазирликлари, ЮНЕСКО ишлари бўйича Ўзбекистон Миллий ко-



миссияси, шунингдек Қашқадарё вилояти ҳокимлиги томонидан ташкил этилди.

Франция, Япония, АҚШ, Германия, Истроил, Россия, Марказий Осиё давлатларининг етакчи олимлари иштирок этган анжуман қатнашчиларини мамлакатимиздаги ЮНЕСКО вакили Майкл Барри Лейн самимий кутлади. Президент Ислом Каримов ташаббуси билан аждодларимиз томонидан яратилган улкан маънавий-маданий мерос истиқлол йиллари қайта тикланаётгани, Насафнинг 2700 йиллиги тарихи неча минг йиллик шаҳарларимиз жаҳон тамаддунига бекиёс ҳисса қўштанлигининг халқаро миқёсда эътироф этилишидан далолат экани таъкидланди. Қадимшунос олим Р. Сулаймонов, профессорлар С. Шакед (Истроил), Ю. Буряков (Ўзбекистон), Г. Тостевин (АҚШ) ва бошқаларнинг Насафнинг жаҳон цивилизациясидаги ўрнига доир маърузалари ҳам катта қизиқиш уйғотди.

Уларни тинглаётиб, бундай тарихий саналарнинг нишонланиши халқимизнинг бой ўтмиши ва боқий қадриятлари, жаҳон маданиятидаги ўрнига доир изланишлар натижасидан жаҳон жамоатчилигини, миллатдошларимиз ва ёшларимизни тўқисроқ хабардор этмоқ учун ҳам катта имконият эканини ҳис этасиз. Насафнинг 2700 йиллиги ҳам ҳозиргача ўрганилмаган тарих саҳифаларини тилга киритишда муҳим омил бўлди. Ҳозир Лондонда сақланаётган Афғонистон шимолида яқинда топилган бир ҳужжатда бундан 2300 йил муқаддам Насаф шаҳар-қалъаси Нахшаб (Никшапа) деб, Шахрисабз эса Кеш, деб аталганига доир муҳим битиклар акс этган. Бу ҳужжат аҳмонийлар салтанатининг расмий тили бўлган оромий ёзувида бўлиб, айнан шу имло кейинчалик сугд ёзувиning вужудга келишига асос бўлган.

Яна бир ҳужжат эса кўхна Насаф этакларидан оқиб ўтувчи Ўкуз (Амударё) дарёсининг бундан 1700 йил

аввалги ҳолатидан бизни воқиф этади. Л.Гумилев илгари сурган атлантик циклонларнинг 1300 йиллик даврий ўзгаришларига кўра, ёғин-сочин олиб келувчи асрий шамоллар ўз йўналишини ўзgartириб, Марказий Осиёда қурғоқчилик даврлари кузатилган. Дехқончилик ва чорвачилик билан шуғулланган қавмларнинг каттагина қисми жанубдан Европа ва Осиёнинг шимолий кенгликлари сари силжиб боргандар. Кўплаб дарёлар, Балхаш, Орол, Иссиққўл каби табиий кўллар саёзлашиб, кичик кўл ва ирмоқлар қуриб қолганда аҳолининг муайян қисми Қора дengизнинг шимолий соҳилларига қадар силжиган. Милодий тўртинчи асрда яшаган А.Марцеллин эса бу даврда Амударё ўз сувларини қўйган Ўкуз дengизи ҳам катта ботқоқликка айлангани ҳақида ёзади.

Орадан минг йил ўтгач, яна иқлим ўзгариб, Марказий Осиёнинг буюк дарёлари тўлиб оқсан. Соҳибқирон Амир Темур саройига йўл олган Руи Гонсалес де Клавихо Термиз яқинида Амударёдан ўтаётуб, бу улкан наҳр ўз сувларини Боку (Каспий) дengизига қўйганини ёзиб қолдирган.

Ана шундай кўхна тарих гувоҳи бўлган тупроқнинг ҳар қаричи муқаддас. Аңжуманда шу тупроқнинг улуғ масканларидан бўлган Нахшаб тарихий илдизларимиз теранлигидан далолат берувчи, башарият маданий тамаддунига бетакрор ҳисса қўшган шаҳарлардан бири эканлиги эътироф этилди.

Насафнинг тўйи шарофатли бўлди. Шу муносабат билан амалга оширилган савоб ишларни санаб адодига етиш қийин. Шаҳарда қирқقا яқин тарихий обида таъмирдан чиқарилгани, улар орасида Кўкгумбаз, Одина, Бегмир, Абдулазиз каби қанчадан-қанча масжиду мадрасалар яна аввалгидек илм-маърифат ва ўзликни англаш сабоқлари учун эшикларини кенг очганини айтишнинг ўзи кифоя. Бу обидаларга бофу хиёбонлар, муҳташам спорт саройлари, замонавий ша-

ҳарсозлик ансамбллари, кенг проспектлардан ўтиб борасиз. Мустақиллик майдонида барпо этилган “Эл-юрт таянчи” монументи эса ана шу бунёдкорлик ишларига гўзал тимсол бўлгулиkdir. Ушбу бадиий обида очилишида нутқ сўзлаган Президент Ислом Каримов унинг маъно-моҳияти, фоясини гўзал тарзда ифодалаб берди:

«Қанча-қанча синон ва бўронларни бошидан кечириб, ўз она заминини не-не босқинчи, ёвуз кучлардан, ҳар қандай бало-қазолардан кўз қорачиғидай асрраб-авайлаб келган, ўз зурриёди ва насл-насабини ақл-заковат, мардлик ва матонат соҳиби этиб тарбиялаган, улар орасидан дунёни ҳайратга солган олим уламолар ва саркардаларни вояга етказган, шу эл-юртнинг мана шундай мунаvvар кунларга этиб келишида бекёс куч-қувват ва мадад берган ким? Бунга жавоб битта — минг йиллар олдин мана шу мўътабар заминда илдиз отиб, Оллоҳнинг марҳамати ва неъмати, ўзининг оғир ва машаққатли меҳнати билан шу юртни обод этган, ҳаётни тебратган — бу инсон, ва шу инсонни тарбиялаган оила ва халқидир... Ушбу ҳайкал пойидаги тегирмон тоши бамисоли ҳаёт гардиши каби шиддат билан айланиб, замон, давр тинимсиз ўзгариб боришини англатиб турибди. Тегирмон тоши узра эса бир-бирини асрраб-авайлаб, бир-бирига елкадош бўлиб, ўз она заминида мустаҳкам турган, диёрини бутун дунёга танитган, ҳар қандай мушкул вазиятда ҳам ўзига ишониб яшаётган, халқимизнинг таянчи ва суюнчи бўлган меҳнаткаш оила тасвири мужассамлашган».

Ҳа, буюк соҳибқиронга алла айтган элнинг қадри ва улуғлиги мана шундай бетимсол обидаларда акс этиб турибди. Шаҳар тўйига бағишланган тантанали кечадаги табрик сўзида ҳам Қашқа воҳасининг қадимий тарихи, юксак нуфузини қайта тиклашга, шаҳарни ўз салоҳияти, ва аввало, шу юртда яшаётган

мард ва танти халқнинг меҳнати билан мамлакатимизнинг энг гўзал ва кўркам шаҳарларидан бирига, йирик саноат ва маданият марказига айлантиришга муяссар бўлингани алоҳида таъкидланди.

Юбилейга бағишлиланган театрлаштирилган дастурлар ҳам байрам завқига завқ қўши. Ҳам халқ сайлини, ҳам улкан издиҳомни ўзида мужассам этган кеча нафақат уч минг кишилик гўзал амфитеатр майдонида ҳозир бўлганларни, ойнаи жаҳон орқали уни томоша қилган миллионлаб юртдошу ватандошларимиз қалбини ҳам чексиз фаҳр-ифтихорга лиммо-лим этди.

Бу байрам истиқлол боис бизда томоша санъати бетакрор мақомга кўтарила бошлаганидан ҳам далолат берди. Бир пайтнинг ўзида бир неча жойда бўлаётган гўзал давраларнинг иштирокчисига айланиш қанчалар завқли бўлишини шу куни таникли режиссёrlар Баҳодир Йўлдошев, Исоқ Тўраев, Абдураҳмон Абдуназаровлар саҳналаштирган томошаларни кўрганлар теран ҳис этишди. Олдинги саҳнада хонанда кўшиқ куйлаётган, раққосалар хиром этаётган лаҳзаларда амфитеатрга туаш боғ ичкарисида дорбозларнинг ўйин кўрсатаётгани, тандирга нону патир ёпилаётгани, қозонда шўрва қайнаётгани, тандир кабоб пишаётгани, олис қишлоқлардан оту туюда, пою пиёда ёхуд велосипед миниб бу издиҳомга йўл олганларнинг шошиб келаётгани, келин-куёвлар тўйини кўриш — эҳ-ҳе, қай бирини айтасиз, буларнинг ҳам масини бир даврада, бир саҳна атрофида бирлаштириш нечоғлик катта санъаткорлик ифодаси эканини айтмасдан бўлмайди.

Шу ўринда истиқлолимиз шарофати билан отабоболаримизнинг қадим томоша санъати, унинг энг гўзал намуналари бутунги миллий томоша санъатига уйғунлашгани билан қайд этмоқ жоиз. Эндиликда томоша санъатимиздаги бу янгиликларни ойнаи жа-

ҳон орқали тўқис намойиш этиш учун ҳам муайян изланишлар олиб боришига тўғри келади. Ўз-ўзидан аёнки, кўрсатув режиссёри ҳам байрам режиссёrlари каби ижодий изланмоғи ва кўп планли томоша санъати руҳини узоқдаги томошабинга ҳам мукаммал даражада етказиб бера олмоғи керак...

Шу куни Кўкгумбаз ва Одина мачитларини ҳам зиёрат қилдик. Куёшнинг заррин нурида Кўкгумбазнинг мунаққаш пештоқлари ял-ял товланиб турарди. Тўй арафасида экилган анвойи кўчатлар тийрамоҳнинг майин эпкинларида ажиб силкиниб, жануб қуёшига таъзим бажо этаёттандек эди. Тантанали маросимда айтилган мана бу сўзларни яна бир бор эсладик: “Айни Қарши диёридан етишиб чиққан табаррук зот — пири муршид Шамсиддин Кулолнинг оқ фотиҳасини олиб, Амир Темур эзгу мақсадлар йўлида илк қадамлар қўйгани, Соҳибқирон бобомизнинг оқилона сиёсати ва саъй-ҳаракатлари туфайли ушбу шаҳар Мовароуннахрнинг йирик сиёсий, иқтисодий ва маданий марказларидан бирига айлангани ҳақида кўঢна тарихимиз гувоҳлик беради”.

Соҳибқирон даврида бунёд этилган Одина мачити “Ўзликни англаш маркази”га айлантирилибди. Бегмир мадрасаси ҳам таъмирлаш ишларидан сўнг худди кечагина барпо этилгандек кўркам қиёфага кирган. Бугун унда ҳалқ усталари “Хунарманд” уюшмасининг вилоят бўлими жойлашибди. Бир пайтлар маҳбуслар сақланган ҳужралар насафлик таниқли ҳалқ усталарига биркитиб берилган. Бир хонада бўлим раҳбари, Ўзбекистон ҳалқ устаси Баҳодир Ниёзов, яна бирида эса таниқли рассом Садриддин Салимов асаларини кўриб қувонмасликнинг иложи йўқ. Ҳужраларни айланниб бешикчи усталар, сандиқчилар санъатига ошно бўласиз. Каштачию зардўзлар, заргару пиҷоқчилар, тор, дутор, доира, дўмбира каби чолғу асбобларини ясовчи усталар эса навбатдаги хона-хуж-



ралардан муқим жой олишган. Улар бу жойда ҳам ижод қиласидилар, ҳам ўзлари ясаган санъат буюмларини мухлисларга ҳавола этадилар.

Қадим Насафнинг Регистон майдонидаги бу маскан олиму шоирлар, санъат усталари, ҳунарманд ва рассомлар, бадиий ижод муҳибларининг ўзаро мулоқот давралари, Навоийхонлик, Бедилхонлик, Абдулахонлик каби мушоиралар учун айни муддаодир.

Йигирма етти асрлик улкан салоҳияти барқ ураётган, айни чоғда, муҳташам замонавий қўргон-شاҳристон сифатида довруқ қозонаётган бугунги Насафнинг чинакам таърифи атоқли шоиримиз Абдулла Орифнинг ушбу мисраларида мужассамдир:

**Осиё бағрида камтарин макон,  
Сен офтоб ўлкаси, сен юлдузистон.  
Сен учун ҳамиша фидо бўлсин жон,  
Сен борсан ўзбекнинг гурури шоён.  
Эй қадим ота юрт — Насаф-Қаршимсан,  
Она заминимсан, аъло аршимсан!**

**Сен улуғ Темурга алла айттан эл,  
Дўстларга вафодор, букилмаган бел,  
Мехру-муҳаббатинг мисли оташ-сел,  
Довон ош бехатар, сен сахий карвон,  
Эй қадим ота юрт — Насаф-Қаршимсан,  
Она заминимсан, аъло аршимсан!**



## ЎЧОҚДАГИ ҚЎР

### *Көнликлар саҳовоти*

Олис чўлу саҳролар, қирликлар, тоғ этакларидан нефт ва газ заҳираларини изловчи контопарлар ҳақида ўйлаганда, дафъатан, уйимиздаги нур ва ўчогимиздаги олов кўз олдимизга келади. Зеро, уйимиздаги ёруғлик, юртнинг ободлиги, ҳурриятимиз барқарорлиги заҳматкаш контопарларнинг ғайрат-шижоати, жасоратига бевосита боғлиқ.

Эрта кўкламнинг эрка насимлари эса бошлаган кунлар. Кентликларнинг ажиб манзаралари, дашт ва қирлар жамолига боқиб тўймайсиз. Ватанимиз худудининг бу қадар бепоёнилиги, яйраб юрган кўй сурвлари, тоҳи-тоҳида кўзга ташланиб қоладиган чупонлар ўтови хаёлингизда моҳир рассом яратган мўъжизавий манзаралардек муҳрланиб қолади.

Тобора яшилланиб бораётган табиат, қирликларга сеп ёйган олис чўллар бинафшаси кўзингизни яшнатиб, руҳингизни осмон қадар юксалтиради. Беихтиёр шундай бекиёс ватанинг фарзанди эканингиз, ҳаёт деб аталмиш буюк неъматдан баҳрамандлигингидан яйраб, Яратганга шукронга айтасиз.

«Ўзбекнефтгаз» миллий холдинг компаниясининг бир қанча бўлинмалари мамлакат энергетика мустақиллигини таъмин этувчи кенг қамровли ишларга жалб этилган. Янги конларнинг очилиши ва ишга туширилиши, аввало, уларнинг катта ҳажмдаги қидириув бурғилаш жараёнларидан бошланади. Бу ишларга миллий холдинг компаниясининг «Ўзбекгеобурғинефтгаз» акциядорлик компанияси сафарбар этилган. Унинг бош қароргоҳи ёнилғи-энергетика заҳирала-

рининг йирик марказларидан бўлган Қашқадарё вилоятида жойлашган. Мамлакатимиз ҳудудидаги углеводородли ҳомашё бойликларини топишга доир кенг қамровли ишлар билан танишувни шу жойдан бошлидик. Компания бош директори, геология-менералогия фанлари номзоди Тўйчи Шоймуродов қазиб олинаётган нефт ва газ заҳиралари ўрнини тўлдириб бориш юзасидан амалга оширилаётган иш жараёнларининг асосий йўналишларини шундай изоҳлади:

— Мамлакатнинг нефт ва газга бой ёнилғи заҳираларини тадқиқ этиш ва фойдаланишга топширишга доир ишлар асосан Устюорт, Бухоро-Хива, Ҳисор, Сурхондарё ва Фарғона минтақаларидағи истиқболли ҳудудларда олиб борилмоқда. Албатта, ҳозирда очилаётган янги конлар миқёси жиҳатидан ўрта ва заҳираси чексиз бўлмаган конлар сирасига киради. Шунинг учун ҳам соҳа мутахассислари Устюорт ва Бухоро-Хива минтақаларида истиқболли янги конлар очиш мақсадида геология-қидирув ишлари миқёсими кенгайтиришмоқда. Дунё амалиётидан келиб чиққан ҳолда мамлакат раҳбарияти ташабbusи билан нефт-газ қидирув ишларига хорижий сармояларни жалб этиш ва бу борада улар билан ҳамкорлик юзасидан ҳам кенг кўламли ишлар рўёбга чиқарилмоқда. Устюртнинг табиий шароити туфайли илгари кам ўрганилган кенгликлар, туз билан қопланган ёки ботқоқ жойлар, Орол денгизи сатҳи (акваторияси), шунингдек, рельефи оғир бўлган тоғли ҳудудларимизга дунёда нефт ва газ соҳасида муайян нуфузга эга бўлган Россиянинг “Газпром”, “Лукойл”, Хитойнинг “CNPC”, “Дуншэн”, Кореянинг “CNOP”, “Кореягаз”, Малайзиянинг “Петронас Чаригали” ва бошқа қатор компаниялари жалб этилган.

Компания 2007 йили 85 млрд. куб метр табиий газ ва 5 млн. тонна суюқ углеводород заҳирасига эга янги конларни элимизга тұхфа этди. Айни кунларда бу



борадаги геология, геофизика ишлари, қидирув қудукларини бурғилаш жараёнлари жадал олиб борилмомоқда. Соҳага янги техника ва хорижий илгор технологиялар кириб келаётир. Илмий-амалий тадқиқотлар, изланишларимиз катта самара бермоқда.

\* \* \*

Киши уйқусидан уйғонаётган шаҳар-қишлоқларни ортда қолдириб, Дехқонобод тоғларига туташ баланд қирлар этагидаги Жанубий Тандирча конлари сари йўл солиб борардик. Шўрган газ-кимё мажмуига етмай туриб, Дехқонобод тарафга бурилдик. Ҳув нарида, чап томондаги қирликлар орасида бурғилаш қурилмасининг улкан минораси савлат тўкиб турарди.

— Ўтган йил баҳорда мана шу қудукдан нефт отилиб чиқсан, — деда изоҳ берди ҳамроҳим — компаниянинг Косон нефт-газ қидирув экспедицияси бошлиғи Сайдваққос Исоқов. — Биз бу ҳудудни Шимолий Тандирча деб атаймиз...

Рўпарамизда тоғдек юксалиб турган баланд қирлик тепасида улкан бурғилаш минорасига кўзимиз тушди. «Бу қурилма «Зеромакс» Ўзбекистон — Америка кўшма корхонасига тегишли», деда изоҳ берди ҳамроҳим. «Зеромакс» Фузорнинг Тахам қирликларида кон қидирув ишларини олиб бораётган экан. Шимолий Нишон конларида эса мазкур компания аввал топилган газ конларимиздан ёнилғи олиш бўйича ҳам бурғилаш ишларига жалб этилган.

Чехиянинг «Эриелл» компанияси ҳам углеводородли қазилма бойликларимиздан фойдаланиш ишларини жадаллатиш бўйича кўшма корхона тузган. Компания Фузордаги «Бузахўр» конларидан топилган газ-кондесатни қазиб олишда биз билан ҳамкорлик қиляпти. Айни чоғда Шимолий Ўртабулоқ нефт конида капитал таъмирлаш ишларини ҳам олиб бо-

раётган экан. Ҳамроҳимнинг изоҳ берипича, ҳар икки қўшма корхона Қашқадарё ҳудудидаги ўндан ортиқ мажмуаларда иш олиб бораётир. Уларнинг бурғилаш минораларида ҳам асосан ўзимизнинг ўзбек мута-хассислари ишлашмоқда...

Йўл четларидаги ер юзасига чиқиб турган ва кичкина тўсиқ билан ҳимоялаб қўйилган газ қудуқларига қўзимиз тушади. Бир неча йилдан буён газ ва конденсат олинаётган, улкан қувурлардан оқаётган “зангари олов дарёлари”га ирмоқ бўлиб қўшилган бундай қудуқлар жуда кўп. Уларни томоша қила-қила манзилимизга етиб келдик. Тоғ этагидаги кенг ялангликда бурғилаш минораси салобат тўкиб турар, сал беридаги вагон-уйларда эса мажмуа аъзолари энди тушлик қилиб бўлишган экан. Шу жойда моҳир бурғилаш усталаридан бўлган Олим Санакулов билан танишдик. Олимбой ўз фаолиятини асли бурғиловчига шогирдликдан бошлаган экан. Кўқондаги нефт-газ техникумини битириб, кўп йиллар контопарликнинг қаттиқ ва ҳалол нонини татиб кўрибди. Бир муддат хорижда — Арабистон саҳроларида ҳам нефт ва газ конларини қидиришда иштирок этиб, бой тажриба орттирган. Шунинг учун ҳам у раҳбарлик қилаётган мажмуада барча ишлар рисоладагидек ташкил этилгани гувоҳи бўлдик.

Олимбой дастлаб ўзига хос шаҳарчани эслатувчи бурғилаш мажмуининг бутун хўжалиги билан таништириб чиқди. Қурдатли дизел двигателлар бир маромда ишлаб “шаҳарча”ни электр билан таъминлаб турибди. Ер тубига уч-уч ярим минг метргача кириб борган бурғилаш ускуналарини ҳам шундай дизеллар ҳаракатга келтиради. Ишнинг энг қийини бурғиловчи зиммасида. У ҳар бири 8-12 метрлик қувурларни ер остига бир неча маротаба тушириб ва яна қайтариб олиши керак. Қувурларни алмаштириш кўлда бажарилади. Бу жараён такрорлангани сайин пўлат

қувурлар ер остига чуқурроқ кириб бораверади. Унинг учига эса бурғиловчилар тилида “долота” деб атала-диган пармалаш ускунаси ўрнатилган. Ер тубидаги белгиланган қатламга тезроқ етиб бориши тупроқ ос-тидаги қаттиқ жинсларни эритувчи маҳсус қориш-манинг нечоғли пухта тайёрланишию турли қатлам-ларнинг юмшоқ ёки қаттиқлигига ҳам боғлиқ.

Олим Санакулов ана шу жараёнларни бирма-бир кўрсатар экан, контопарликнинг энг оғир юкини елкасига олган моҳир бурғиловчи Обиджон Тоғаев билан ҳам таништирди. Паҳлавон келбатли бу йигит олти йилдан буён бурғиловчилик қилаётган экан. Қадоқ қўллари, ўқтам боқувчи кўзлари ўз ишини пухта эгаллаган бу йигитнинг орзу-ўйларини ҳам рўй-рост айтиб тургандек. Эҳтимол, у ҳам келгусида Олим-бойдай бурғиловчилар сардори бўлишни ният қи-лантир. Ҳар бир қудуқни бошдан охиригача қазиш жараёнидаги барча ишлар, вақтида ҳал этилаётган муаммолар ечими ўзига хос мактаб. Бу мактаб жара-ёнларида пишганларгина мураккаб вазиятларда бир-дан-бир тўғри қарор қабул қила оладиган ўз касби-нинг усталари бўлиб етишади. Компанияда кўп йил-лар оддий бурғиловчи сифатида ишлаб, сўнгра моҳир усталар сафидан ўрин олган ишбошилар кўп. Сайд-ваққос Исоқов экспедициянинг Маҳмудхон Ҳикма-тов, Нормурод Ҳўжамуродов, Қаҳрамон Суннатов каби моҳир усталари ҳақида сўзлар экан: “Уларнинг ҳар бирини қаҳрамон десак арзийди”, деди.

Дарҳақиқат, уйимиздаги нур ва ўчоғимиздаги оловнинг ҳарорати элимизнинг мана шундай мард ва жасур контопарлари фидойи меҳнатига боғлиқ.

— Табиий газ ва нефтнинг истиқболли заҳирала-рини аниқлаш ниҳоятда катта жараён бўлиб, унинг ҳар бир босқичи ўзига хос тугалланган иш маромла-рини кўзда тутади, — дейди компаниянинг геоло-гия-геофизика ишларини мувофиқлаштириш бўли-

ми бошлиғи Анвар Тошқулов. — Айтайлик, геофизикларнинг дастлабки маълумотларига асосланган ҳолда, у ёки бу ҳудуднинг ер ости бойликлари заҳирасини аниқлаш мақсад қилиб қўйилса, бунинг учун ўша ҳудуднинг муайян жойида икки ёки учта кудук қазиб кўришнинг ўзи билан иш битмайди. Ана шу излов-қидирав кудукларидан маҳсулот чиқса, унинг заҳирасини аниқлаш учун яна ўн-ўн бештагача қидирав кудуклари қазишга тўғри келади. Шундан сўнг ишни «Ўзнефтгазқазибиқариш» акциядорлик компанияси бўлинмалари давом эттиради. Яна ўнлаб кудуклар қазилиб, табиий босим остида юқорига чиқаётган ёнилги хомашёси “зангори олов дарёлари”га янги ирмоқлар бўлиб кўшилади.

### *Қашқадарё нефти*

Ўзбек пахтаси, ўзбек гази деган кўнгилда ифтихор уйғотувчи атамаларга қанчалар кўнишиб қолган бўлсак, ўзбек нефти деган гўзал ибора ҳам бугун шунчалик оммалашмоқда. Она табиятнинг бу қимматбаҳо неъмати бежиз “қора олтин” дея эъзозланмайди. У мамлакат олтин заҳираларини кўпайтирувчи ноёб бойликларимиздан биридир.

Бугун Қашқадарё кенгликларида мавж ура бошлаган “қора олтин” конлари ҳам оппоқ пахтамиз каби мустақил Ўзбекистоннинг жаҳон кўламидаги нуфузини ошироқда.

Кўхна Насафга туташ Хонобод қишлоғи ёнгинасида 2007 йил бошида нефт отилиб чиқсан экан. Янги кон билан танишиш учун борганимизда улкан цистернали машинага қуюлиб турган “қора олтин”ни завқланиб томоша қилдик. Компаниянинг бурғилаш ишлари бўйича технологи Эркин Шоназаровнинг айтишича, ҳозир бу қудукдан бир кечакундузда 20-30 кубометр нефт олинаётган экан. Компаниянинг Ко-



сон нефт-газ қидирув экспедицияси янги кон атрофидан яна бир нечта қудук қавламоқда. Ундан олинидиган хомашё миқдори янада ошади.

Вилоятнинг газ ва конденсат конлари азалдан машхур. Бу юртнинг кўз илғамас кенгликларида нефт конлари ҳам топилаёттани эса кўнгилларга хушнудлик бағишилайди. Эндиликда улар ҳам мамлакат ёнилги-энергетика манбаларига ўзига хос ирмоқлар бўлиб кўшилади.

2006 йили Фузор экспедицияси (бошлиғи Гулмурод Мавлонов) Шимолий Тандирча, Феруза нефт конларини очиб, навбатдаги қудуқларни бурғилаш орқали унинг заҳираларини аниқлашга киришди. Шу экспедиция Дехқонобод ҳудудида ҳам нефт конини очиб, дастлабки қудуқнинг ўзиниёқ «Шўртангаз» мажмуига фойдаланиш учун топширди. Бу жойда ҳам навбатдаги қудуқлардаги бурғилаш ишларини якунлашга тараддуд кўрилмоқда.

Чўл бинафшалари қўклам саҳоватидан дарак берганидек, Феруза, Хонобод, Тандирча ва Дехқонобод ҳудудларида очилган янги конлар Қашқадарёning “Қора олтин”га ҳам бойлигидан далолат бераётir. Бу янги конлар атрофида бирин-кетин бурғилаш қурилмаларининг баланд миноралари кўкка бўй чўзаётir. Янги конлар элимиз фаровоилиги учун мустаҳкам замин яратаетир.



## ЭЛ ОДАМИ

Инсоннинг нияти улуг бўлса, қадамидан гул униши мумкин. Орзуси беғубор, ўзи шижоатли бўлса, у ошиён тутган жойга файз киради.

Уй-жойидан юзлаб чақирим олисда, чўлу-саҳролар узра кум кечиб юрганлар ҳақида ўйлаганда, улар изида гуллар унаётгани, боғлар яшнаётгани, тоғларни кесиб йўллар ўтаётгани, замин бағрида маъданлар юз очаётганини курганда бўроңлар бағридан ҳаловат топган бу инсонларга тасанно айтасиз.

Шундайлар борки, ҳаёт мунаvvар. Шундайлар борки, нотанти одамлар тарози палласининг бир томонини босиб кетмайди. Юрт обод, элнинг юки ерда қолмайди. Бироқ уларнинг номини айтиб, буюк хизматларини эътироф этадиган бўлсанг, аввало, ўша инсоннинг ўзини хижолатга қўясан. Иккинчидан, бундай гўзал инсонни хижолатга қўйганинг етмагандай, унга ҳасадчилар кўпайиб қолади. Унинг оёғидан чалишга ҳаракат қилишади. Шуларни ўйлаб, ке, қўй, бу инсон сенинг эътирофингни кутиб эзгу ишлар қилаётгани йўқ. Сен билсанг, бошқалар билса, халқ билса — Холиқнинг билгани шу-да, дейсан...

Улар борки, бу ҳаёт гўзал. Шоир айтганидек, ҳали мард инсонлар яшаб юрибди. Мен чўл кезиб, тоғу тош, саҳролар кезиб, шундай асл инсонлардан бири билан учрашиб қолдим. У дастлаб Нуриддин Зайниневни эсга солди. Абдулла Орипов айтмоқчи «каска кийиб олиб, ойлаб Кўкдумалоқдан бери келмаган», эл-юрт манфаатига дахлдор ишлар кечаётган кезлар иши ҳам, ётоқ жойи ҳам маъдан изловчилар ёнида бўлган ва буни ўзига ифтихор деб билган Нуриддин акани.



\* \* \*

Ҳар бир касбнинг ўз устаси бор. Пахтакор ёки чўпон машаққатини яхши англаганимиз ҳолда замин бағридаги бойликларни изловчи контопарлар заҳматини ҳамма ҳам билавермайди. Уларни оддийгина қилиб “бурғиловчи” деб атаймиз-у, бироқ бу касбнинг барча сир-синоатларини унчалик идрок этмаймиз. Аслида, уларнинг заҳмати ишчи касблари орасида энг оғири ҳисобланган шахтёрларникидан асло қолишмайди. Шу боисдан моҳир бурғиловчилар алоҳида обрў-эътибор соҳиблари ҳисобланади.

Аввало, ҳамма ҳам бундай заҳматни зиммасига олишга қодир эмас. Маҳмудхон Ҳикматов эса ўттиз йилдан буён ана шу жараён ичидан яшаб, ўз касбини шарафлаб келаётган усталардан. У бурғилаш ускунасининг доимий шовқин-сурону тебраниб ишлаши, қаҳратон қишининг изғирин совуқларию саратон жазирамаси, саҳро қуонларида аччиқ терга ботиб ишлашга кўнишиб кетган. Бугун жуда кўплаб ёш бурғиловчилар, ҳатто ўғиллари ҳам фидойи меҳнатдан обрў-эътибор топган отадан ибрат олиб ишлашмоқда. Оддий ёрдамчи сифатида иш бошлаган Маҳмудхон Ҳикматов бугун бурғиловчилар сардори. Замонавий бурғилаш мажмуи раҳбари сифатида масъулиятли ишларга етакчи. У бош бўлган мажмуя “Ўзбектөобурғинефтгаз” компаниясининг илфор жамоаларидан ҳисобланади. Бугун мамлакат иқтисодига кувват бўлаётган қанчадан-қанча газ ва нефт конлари очилишида унинг бурғилаш қурилмаси юзага чиқарган ишларнинг муносиб салмоги бор.

Бугун кўплар унга ҳавас қиласи. У компанияда биринчилардан бўлиб, юксак унум билан ишловчи хорижий бурғилаш ускунасини ишлатмоқда. Шу маънода унинг омади чопган, бутун компанияда хурмати баланд, номи пешқадамлар сафидан тушмайди.

Ўз касбининг ҳалол нон-тузини тотиб келаётган



моҳир уста ёш бурғиловчилар тайёрлашга катта зътибор қаратади. Султон Бекназаров, Шавкат Аюпов, Акрам Қобилов, Жасур Норқуловлар унинг тажриба мактабидан баҳраманд.

Кончиларнинг иш тажрибасида кўпчилик била-вермайдиган бир сир бор: кон ҳаммага ҳам топила-вермайди, ҳамма бурғиловчига ҳам газ ёки нефт ер тубидан мана мен деб отилиб чиқиши насиб этавер-майди. Бутун умрини кончилликнинг оғир жабҳасига бағишлигаган устага мўлжалдаги чукурликка етилгач, худди покиза инсонларга бўлажак воқеалар олдиндан аён бўлганидек, бойликнинг бор ёки йўқлиги аён бўла бошлайди. У кўп ҳолларда шу жойда нимадир борлигини юрак-юрагидан сезади ва меҳнатимиз зое кетмабди, деб Яраттанга шукронга айтиб қўяди.

Маҳмудхон Ҳикматовни навбатдаги қидирув қудуғини қазиб бўлиш арафасида Қоратепа ялангликларидан топдик. Янги бурғилаш қурилмаси атрофидаги иш ускуналари, қоришка тайёрлаш цехи, тупроқ жинсларини таҳлил этиш лабораторияси, компьютер маркази, ишчилар жойлашган вагон-уйларнинг саранжом-саришталиги дикқатимизни тортди. Газ ва нефт қидирув ҳамда заҳираси аниқланган конларни қазиб олиш билан боғлиқ жараёнларга замонавий хорижий тахникалар кириб келаётганини мамнуният билан кузатар эканмиз, уларнинг иш унуми, афзалиги билан қизиқамиз.

— Янги қурилма, аввало, мураккаб иш жараёнларини бажарувчи бурғиловчига қулай шароит яратиб бериши билан афзал, — дейди Маҳмудхон. — Мавжуд қурилмаларда бурғиловчи ҳеч нарсадан ҳимояланмаган очиқ жойда қишу ёз тик туриб иш бажаришга мажбур бўлса, янги мажмууда эса у маҳсус кабинада ўтириб, барча ишларни компьютер ёрдамида уddалайди.

Янги техниканинг иш унуми ҳам юқори экан.



Одатда, уч-уч ярим минг метрлик қудуқни пармалаш учун ўртача тўқиз ой муддат белгиланса, “3J50DBS” замонавий Хитой бурғилаш мажмуи билан бу ишни етти ойда улдалаш ва икки ярим-уч ой вақтни тежаш мумкин. Иш унумининг юқорилиги боис бажарилган иш ҳажмига кўра кончиларнинг манфаатдорлиги ҳам юқори.

Шундай замонавий қурилмада янги конларини очаётган Маҳмудхон Ҳикматов бугун ўз сулоласини яратаБттанинг ҳам гувоҳи бўлдик. Ўзи сингари икки ўғли ҳам Кўқондаги нефт ва газ техникумини битириб, бурғиловчилар жомакорини кийишибди. Аслида бир пайтлар тоғаси Ражабхон Сирожев уни ёнига олиб келиб касб сирларини ўргаттан эди. Мана энди авлодлар анъанаси яна давом этайди.

—Компаниямиздаги ўнлаб мажмуалар орасида биринчилардан бўлиб, бизга энг замонавий хорижий минора берилгани жамоамиз учун катта мукофот, — дейди у.

Ҳамкасбларининг эътироф этишича, Маҳмудхон кўп ҳолларда ногоҳоний ички шуурига таяниб ишлайди. Мабодо, бирор иш босқичида муаммо туғилгудек бўлса, у ўз туйғулари билан буни олдиндан сезади. Бу ўз ишининг бутун масъулиятини юрак-юрагидан ҳис қилган инсонга табиат томонидан берилиган ноёб истеъдол тухфасими ёки уста бурғиловчининг кўп йиллар мобайнида орттирган тажриба ва малакаси маҳсули?! Ҳар икки ҳолда ҳам омад ва барака ёнма-ён бўлса не ажаб!..

Контопарлар ҳузуридан қайтар эканман, уларнинг жасоратта йўғрилган меҳнат манзаралари хаёл кўзгусида муҳрланиб қолгандек эди. Асл қаҳрамонликлар мана шу манзилларда юз кўрсатаёттир. Шуларни ўйлаганда, дафъатан бир ҳақиқатта икрор бўласиз: мовий кенгликларнинг мусаффо ҳавосини, олдимиздан оқиб ётган обиҳаётимизни нечоғли қадрласак, уйимизда-



ги нур ва ўчоғимиздаги беминнат оловимизни ҳам шу қадар эъзоз этмоғимиз — бу бойликларни катта заҳмат билан ярататтган фидойи контопарларимиз меҳнатини ҳам бениҳоя қадрлашимиз зарур.

\* \* \*

Кудуқлар учида порлаб турган машъалалар гүё қирлар бағрига улкан шамлар ёқиб қўйилгандек бўлиб кўринарди. Улар кейинги йилларда очилган ёнилғи-энергетика хазиналаримиз. Конларнинг кўпилиги — элизизнинг миллий бойлиги.



## ДЕНГИЗ ТУБИДАГИ ДЕНГИЗ

Бир пайтлар бу кўз илғамас кенгликларда кўмкўк дengиз мавжланиб ётарди. Балиқчи кемалар кўкка сапчиётган мовий тўлқинлар оша дengизбўйи элининг туз-насибасини қирғоқча ташишдан чарчамасди. Энди эса балиқларгина эмас, кумга тиқилиб ётган кемалар қолдиги ҳам онда-сонда учрайди. Фақат дengиз тўлқинланиб ётган ўша кезлардаги номларгина ўтмишни ёдга солиб турибди. Учсойу Жилтирбош, Корачиганоқу Сувчучук, Сургил...

Таниқли қорақалпок адиби Ўрзбой Абдураҳмонов собиқ дengизнинг эндиги манзараларига назар солиб тураркан, ўзига-ўзи таскин бергандек, шундай дейди:

— Орол халқимизнинг туганмас бойлиги эди. Шўролар бу ризқ-рўзни бизга кўп кўрди. Бироқ Аллоҳ ер остидан ундан-да каттароқ насиба — битмас-туганмас олов дengизини инъом этди. Шунга ҳам шукр. Етмиш йил ҳукмронлик қилган нотанти “дўст”лар Оролни қуритиб, халқимизни шўрхок қумга ўтиргизиб кетган бўлса, Ўзбекистон истиқоли унинг тубидаги олов дengизи қопқофини очиб, тиллоларга барабар газ ва нефт конларидан элимиз иқболи йўлида фойдаланиш калитини қўлимизга тутқазди.

Майдан изловчиларнинг кундузлари кўзга элас-элас чалинадиган минораларига назар соларканман, Ўрзбой ғоят топиб айтган ўхшатишдан кўнглим тўлади. Бурғилаш қурилмалари, гарчи поёнсиз кенгликлар узра кумуш тангалардек сочилиб ётган бўлса-да, тунлари улар чараклаб кўзни олаётган само ёритқичларига басма-бас кўз қисишаётган юлдузлар маржонига ўхшаб кетади.

Оролбўйидаги бурғилаш ишларига доир янгилик-

ларни дастлаб "Ўзбектегеобургинефтгаз" раҳбари Тўйчи Шоймуродовдан эшиштан бўлсам-да, минг чақирим йўл босиб келиб, атай маъдан изловчилар туну кун иш олиб бораётган кенгликларга йўл олдик.

Денгизнинг қирғоқдан сув қочган ҳудудлари бугун Оролқум деб аталмоқда. Бир вақтлар бу жойлар ҳудди Ой кратерлари каби ҳеч нарса битмайдиган тақирга айланиб қолади, деб тахмин қилинган эди. Она табиатнинг мўъжизасини қарангки, денгиз тубининг кўпгина ҳудудлари табиий ҳолда кўкарган буталар ва неча минг хил шўрга чидамли гиёҳлар чирмовуқдай ўсиб ётган туқайларга айланибди. Юлғунзорларда қирғовуллар яйраб учиб-қўниб юрибди. Яна қанчадан-қанча жонзотлар ундан паноҳ топишган. Шимолий кутб этакларини макон тутган кўчар қушлар ҳам баҳор ва кузда Осиё кенгликларига келиб-кетаётib, бу ердаги кўл ва туқайзорларда бир муддат нафас ростлашади.

Устюрт шамоллари шўрхок қумни осмону фалакка тўзон қилиб учираётган, ҳали табиий бутазорга айланиб улгурмаган ҳудудларда эса инсон қўли билан сунъий ўрмонлар барпо этилаётир. Қандим ва бошқа бутали ўсимликларгина эмас, ҳатто саксовул қаламчалари қадалган пайкаллар ҳам яқин икки-уч йилда ана шундай қалин чакалакзорга айланса, ажаб эмас. Негаки, сув қочган ҳудудларга кеч куз ва эрта баҳорда экилаётган ўсимликлар бу жойларнинг манзарасини тамоман ўзгартиришга қодир.

"Жўра, мановди қара, қандай яхши ўрмон бўлибди, — дейди Ўрозбой. Сўнг йўл бўйи айтиб келаётган шукронасини мароқ билан такрорлайди: — Шўролар биз ўзбек ва қорақалпоқларнинг онадек азиз денгизимизни тап тортмай куритиб юборган эди-я. Беминнат насибасидан айрилган ҳалқ энди не қиласди, денгиз балиғи билан тирикчилиги ўтиб турганларнинг ҳоли не кечади, дея қайғурад эдик. Эй, жўра, Алло-



ҳимизнинг марҳамати кўп экан: ер тубидан Оролдан-да катта денгиз берди! Бу насибани ер устига чиқариб, элимизни баҳраманд этиш йўлида Президент Ислом Каримов кўрсатаётган ғамхўрликдан бошимиз осмонда”.

### *Искандар ва Зулаконини излари...*

Устюрт қидирув-бурғилаш бошқармаси раҳбари Сайдваққос Исоқов билан аввалдан танишмиз. Ўтган йил баҳорида Дехқонобод тоғларига туташ Шимолий Тандирча ва Тахам қирликларида маъдан изловчилар, Феруза ва Хонобод нефт конларини очган бурғиловчилар ҳаёти билан таништирган кезлари у Косон нефт-газ экспедицияси бошлиги бўлиб ишларди. Асли Фарғона водийсида туғилиб ўсган. Кўқондаги нефт техникумини битирганидан кейинги ўттиз йиллик ҳаёти эса Қашқадарё кенгликларида янги конларни қидириб топишдек мاشаққатли ва, айни чорда, кўнгилга ифтихор бағишловчи ишларда кечган. Унинг эндиғи фаолияти Устюрт ва Оролқум билан чамбарчас боғланнибди.

Албатта, уй-жойинг, бола-чақанг олдида ишлаганга нима етсин. Бироқ маъдан изловчи ўзига касб танлагандаёқ бу масалада қатъий қарорга келган бўлади: зиммангдаги вазифа нимани тақозо этса, қаердан кон излаш зарурати келиб чиқса, киприк қоқмай ўша жойда бўлишинг керак. Шароити, об-ҳавоси ёқадими-йўқми, сенинг ўрнинг бурғиловчилар ёнида бўлиш, машаққатларни, янги кон очилган кундаги кувончу шодликлар, иш юришмай қолган кезлардаги аламларни бирга тотиш қисматинга ёзилган.

Сайдваққос Мамараҳимович толеидан мамнун. Унга ҳамиша масъулиятли жараёнлар ишониб топширилади. Фидойилиги, жонқуярлигини ҳамкасблари ва компания раҳбарлари қадрлашади, маслаҳат қилишади. У эса элга фойдаси тегаёттани, янги очган



конлари мамлакат белига қувват бўлаётгани, қанотида не-не ёш бурғиловчилар, маъдан изловчилар камол топаётганидан хурсанд.

Сурғил конларига унинг ўринбосари Мақситбой Курбонниёзов ҳамроҳлигига йўл олдик. Мўйноқдан ўтиб, шимол тарафга бурилганимизда аллақачон оқшом тушиб, осмонда юлдузлар чараклай бошлади. Бир пайтлар дентиз мавжланиб ётган ҳудуднинг қайси буржига кўз солманг, бурғилаш қурилмалари чироғи кўринади. Улар туну кун тўхтамай ишлаб турибди. Бу манзилларга имкон қадар йўл солиб борилган. Лекин бу оғир йўллар “Хундай” жипларига чўт эмас. Ичкарида ташқарининг совуғу-тўзонлари заррача билинмайди. Мақситбойга йўлларнинг ҳар қаричигача ёл бўлиб кетган. Шу боис “Сурғил-22” деб номланган бурғиловчилар қўналғасига қийналмасдан етиб келдик.

Ташқаридаги шамол изиллайди. Олис биёбонларда маъдан изловчилар ҳаётини ўсмирлик йиллари ўқиганимиз Пиримқул Қодировнинг “Қадрим” қиссаси орқалигина билар эдик. Искандар ва Зулайҳо муҳаббатига гувоҳ бўлган қир-адирлар, бурғилаш миноралари, газчилар қўналғаси тасвири ҳали-ҳали кўз ўнгимизда гавдаланиб қолади. Мен ҳар тал Кўқдумалоқ ва Устюрт газчилари ҳузурига йўл олсанм, ўша таниш манзараларни ахтараман. Зим-зиё тун кўйнига ёруғлик сочиб ишлаётган пармалаш қурилмаси, ундан эллик-олтмиш қадам нарида гугурт қутиларидек ёнма-ён кўйилган вагон-уйларга разм соларканман, ҳозиргина ё бурғилаш машинаси томондан ёки ён тарафдаги шаҳарчадан Искандар билан Зулайҳо чиқиб келаётгандай бўлиб туюлади...

### *Кукніб бокҳан тақдир*

Анча кеч бўлиб қолганига қарамай, “Сурғил-22”нинг бурғилаш ишларига раҳбарлик қилаётган



**Ниятулла Айлаёров ва унинг ҳамкаслари билан та-нишиб олдик. Ўрзбой ҳар замонда гурунгимизга қўр ташлаб турибди. Бу жойларга кўп келганиданми, у маъдан изловчилар тилидаги хос сўзлар, жараёнларни яхшилаб тушунтириб берарди. Оқшомни вагон-меҳмонхонада, Оролкум қаҳрамонлари даврасида ўтказдик.**

Эрталаб турганимизда ҳавони губор қоплаб, майдалаб қор ёғиб турган экан. Денгизнинг Устюрга тулашиб кетган қирғоқларидағи баланд чинклар хира офтоб нурида оқариб кўзга ташланади. Ниятулла ҳозиргина смена алмашган йигитлар билан тундаги иш натижаларини муҳокама қиласди. Хона деворига иш босқичлари, жадваллар, турли кўрсаткичлар осилган. Рациядан диспетчернинг бурғилаш майдонларидан олаётган маълумотлари эшитилиб турибди.

Ниятулланинг ёши ўттиз бешда. Ўн йилдан буён маъдан изловчилар сафида экан. Дастрлаб бурғиловчига ёрдамчи бўлибди. Беш йил мустақил ишда суюги қотгач, ишбоши уста ёрдамчиси сифатида фаолият олиб бориш ишониб топширилибди. Бурғиловчилар икки ҳафталик вахта тартибида ишлашади. Ҳар бир сменага бош уста ёки унинг ёрдамчиси етакчилик қиласди. Умумий иш жараённига иккаласи ҳам бирдек жавобгар. Ниятулла Урга, Қўнғирот орти, Шимолий Орол, Чеча, Сургилдаги ўндан ортиқ қудукларни пармалашда ишбоши бўлган. Лойихада белгиланган чукурликка етилгач, уларнинг ҳаяжони орта бошлайди.

— 1550 метрдан ўтгач, ҳар уч юз метрда ер жинслиаридан намуна ола бошлаймиз, — дейди у. — Ҳозирги қудукдан 2480 метрда газ чиқди. Бу юқори қатламдаги турли газлар. Лойиха бўйича яна беш юз метр кавлаймиз. Ўшанда ер тубидаги ёнилғи миқдори уни юқорига чиқаришга арзир-арзимаслиги аён бўлади.

Ниятулла билан бирга маъданлар “кулф”ини очаётган Абдусамат Маҳмудов кўқонлик. Умуман Сургил кончилари орасида фарғоналиклар кўп экан. Улар-



ни иш жойларига олиб бориб, олиб келиш учун Нукус ва Фарғона ўртасида самолётлар қатнови йўлга қўйилган. Замонавий мобил телефон алоқаси ҳам улар хизматида. Бу, аввало, маъдан изловчининг меҳнати нечоғли қадрли эканини кўрсатса, иккинчидан, мамлакат курдатини ҳам намоён этади.

Кончилар уч йилдан бери янги бурғилаш минорасида ишламоқда. Унинг афзаликлариға қизиққанимда ҳамсуҳбатимнинг юзига табассум ёйилди.

— Бу биз учун бир мўъжиза бўлди, — дейди у. — Аввалги ускуналарда ўн икки соат давомида миноранинг очиқ жойида туриб ишлардик. Қор-ёмғир ва изғиринда ҳам. Энди бурғиловчи кабинада ўтиради, шовқиндан, иссиқ-совукдан ҳимояланган. Бопқарув компьютерлар орқали бажарилади. Силкиниш даражаси, кўздан йироқ жараёнларни экран орқали кузатиб ўтирамиз.

Пармалаш минорасини кўздан кечираётib бурғиловчилардан “Бўш вақтда нима билан машғул бўласизлар? Кенг саҳрова зерикиб қолмайсизларми?” — деб сўраймиз.

— Бу муаммо эмас, — дейди Ободбек. — Қишида шахмат ўйнаймиз, телевизор кўрамиз. Ёзда футбол ўйнаймиз. Яна айтаверсам, жингилзорда қўёну қирғовул кўп. Овнинг гашти зўр...

Ниятулланинг Рустам, Нурулла, Нифматулла, Абдужамил деган ака-укалари ҳам бир соҳада устозу шогирд бўлиб ишлашар экан. У билан хайрлашар эканмиз, юз-кўзларида ака-укаларнинг ноёб касбларни танлаганидан ифтихор балқиб турарди. Бу ўз баҳтини юрт тақдирига боғлиқ ҳолда кўраётган одамлар қалбидаги баҳтиёрликнинг оддийгина тимсоли бўлса, ажаб эмас. “Сурғил-20” деб номланган манзилда ҳам шундай фидойиларни учратдик. Ишбоши Ислом Маматқулов Кўқондаги Шоимбек қишлоғидан. Нефт техникумини битиргач, Белоруссияда аскарлик хизматида бўлибди. Сўнг эса Тюмен нефт қидирувчилари

сафида тажриба оширган. Ҳозир “F-400” минорасида кон изламоқда. Мингбулоқда нефт қудуқларини бурғилашда ишлатилган бу ускуна етти минг метр чукурликкача кавлай олиши билан афзал. Мўйноқ ва Бердах конларини очища кўп хизмат қилган бу курилмани Тўхтаназар Султонов, Аҳмадали Мамадалиев, Адҳамжон Саидов, Исмоил Кўчқоров каби маъдан изловчилар омадли минора деб билишади.

Минора ўрнатилгандан сўнг дастлаб қурилма эҳтиёжларига зарур бўладиган сув учун алоҳида қудуқ қазиб олинаркан.

— Ширин сув ҳам чиқиб қоладими? — деб сўрайди Ўрозбой.

— Ҳозирча йўқ. Толлида 500 метрча кавлаб кўрдик. Чиқмади...

— Ширин сувни ҳам нефт ва газни қидиргандек астойдил қидирсак, бирда бўлмаса, бирда чиқиши кераг-ов.

— Бунинг учун геофизиклар буюртмаси зарур...

Маъдан изловчиларга бу борада ҳам омад тилаб, янги манзилларга ошиқамиз. Учсойга етганда олисдан тоғдай бўлиб кўринган қир устидан чиқдик. Бу ерда бурғилаш минораси бошқа жойга кўчирилаётган экан. Салкам олтмиш метрлик минорани маҳсус механизмлар билан “кулатиш” жараёни ҳам қизиқ экан...

Денгизга балиқнинг куйруғидек бўлиб кирган яrim орол кунчиқарида бир пайтлар “Артек”ка ҳавас қилиб қурилган оромгоҳ, олтинқум пляжлар, тезюратар теплоходлар лангар ташлайдиган порт, зогора балиқ тангаларидек сузиб юрган қайиқлар кўз олдимизда гавдалангандек бўлди. Эссиз, кўп ўтмай уларнинг сароб эканига иқрор бўлдик...

Кунботишда эса бир пайтлар машҳур балиқчилар маскани бўлган Учсой қўрғони. Унда-бунда қайлартадир кўчиб кетган одамлар ҳовли-жойи кўриниб қолади. Бироқ бугунги Учсой аввалги шайтон қарға-



ган жой эмас. У хоин отган ханжар заҳмидан қулаган бўлса-да, азобларда ўтган кунлар сўнггида иродаси-ни қўлга олиб, қаддини тиклаб бораётган йигитга ўхшаб кетади. Конлар очилиб, Учсой шимолида газ тозалаш иншооти қурилгани одамларни фақат ишли қилиб қолмай, унинг қиёфасини ҳам тубдан ўзгартириб юборибди. Янги мактаб-интернат, шифохона, газчилар қўналғаси...

### *Экологик фалокатдан сұңғ...*

Қўнғиротга қайтаётиб бир фурсат Мўйноқнинг бутунги манзараларига боқдик. Бозор гавжум. Одамлар ўз тирикчилиги билан банд. Кимдир балиқ, кимдир қирғовул харид қиляпти. Денгиз узоқлаб кетгандан кейинги йигирма йил ичидаги бор ҳаётнинг ўнгланаёттанига ишонч ҳосил қилдик. Жилтирбош ва Сувчучук кўлларининг тикланиши балиқ тутишга ҳам имкон берадиган экан. Янги қурилишлар, одамларнинг асрий маконларига қайта бошлаганига гувоҳ бўлиш бундан-да умидбахш. Кўп йиллар қулфлоғлиқ ётган шаҳар аэропорти ҳам эрта-индин само дарвазасини очаётгандек бўлиб туюлди...

Қўнғиротта қадар чўзилган йўлнинг икки ёни кетакетгунча маржон кўллар, бепоён туқайзор ва шолизор далалардан иборат. Ҳаким ота Сулаймон Боқирғоний мақбарасига бурилаётиб, кўм-кўк бўлиб ётган кузги ғаллазор кўзимизга янада иссиқ кўринди. Зиёратдан қайтаётиб Ўрозбойдан: “Бу жойларнинг ери унчалик шўрга ўхшамайди-ку?”, деб сўрадим. “Ер — зўр... Ғалла ўсиб ётиди-ку. Фарғоналик деҳқонлар кузда бу ерда ҳам, Қанглиқўл туманида ҳам шолидан роса мўл ҳосил олишди”. Бу жавобни эшлитиб ҳайратим ошди. Агар сув бўлса, ҳақиқий деҳқонлар бўлса, ҳали Оролбўйини обод қиласиган ишлар кўп экан...

Ха, Оролбўйининг бойлиги фақат ер остидаги газ ва нефтгина эмас. Сувли жойларда Фарғона водийси-

дан ишчи кучларини жалб этиб, ғаллазор ва шолизорларни кўпайтириш, айни чоғда, денгизнинг қуриган тубига черкез, қандим ва саксовул экилаётган майдонларни кенгайтириб бориш ҳисобига унумдор яйловлар ҳосил қилиб, қоракўлчиликни ривожлантириш мумкин экан.

Халқаро Оролни асраш жамғарасининг GEF агентлиги ҳамда Германиянинг техникавий ҳамкорлик жамияти минтақানинг табиат жонкуярлари билан ҳамкорликда собиқ дengiz ўрнида кумларни мустаҳкамловчи иҳотазорлар барпо этаётир. Чимбой, Қозоқдарё ва Қораўзакда саксовул ва бошқа бутали ўсимликлар кўчатини етиштирувчи питомниклар вужудга келтирилди. Саксовулзорлар орасига терескен, чоғон, боялиш, қуёнсуяқ қаби иссиқ ва совукқа чидамли ўсимликлар экилмоқда. Бундан ети-саккиз йил бурун вужудга келтирилган ўрмонзорлар орасида ғалла етиштириш, қўй ва ўрдак боқинш синааб кўрилмоқда. Ҳозир бундай сунъий ўрмонлар майдони 10-15 минг гектардан ошмайди. Яна юз минг гектарлаб кумзорлар қиёфасини шу тарзда ўзгартириб, экологик мувозанатни тиклаш ва фаровонликка хизмат қилдириш мумкин.

Шу гурунглар билан Кўнғиротга етиб келганимизни ҳам сезмадик. Ўлканинг ер ости бойликларини ўзлаштириш тарихи музейи экспонатлари билан таништирган эколог Салима Қорабоеванинг айтишича, Устюртдаги биринчи газ фавораси қирқ икки йил бурун Шохпахти деган жойда отилиб чиққан экан. Шундан буён Қувонч, Борса-келмас, Оқшўлак, Қорашўлак, Урга, Шағирлик ва бошқа ҳудудларда ўнлаб конлар очилди. Ўн йил аввал йилига 15-17 минг погон метр ҳажмда кудуклар бурғиланган бўлса, 2007 йилда бу кўрсаткич 55 минг метрдан ошибди.

Уч йил аввал Шарқий Мўйнокда 2820 метрдаги қатламдан нефт топилганд. Ҳозир унинг заҳираси аниқланмоқда. Устюрт ва Оролкум конларининг ўзита хослиги

шундаки, улардаги ёнилғи таркиби олтингугуртсиз. Бу уларни тозалашда мураккаб жараёнларга эхтиёж қолдирмайди. Бироқ ёнилғи таркибидан фойдалар моддалар кўпилиги учун Оқшўлақда Шўртан газ-кимё мажмуига ўшаш табиий газдан полизтилен ва полипропилен олувчи корхона қуришга киришилмоқда. У Жанубий Корея мутахассислари билан ҳамкорликда бунёд этилади.

Поёнсиз Оролқум бойликлари денгиз мисол мавжланиб очилаётгани тақдирнинг кулиб боққанидир. Шунинг учун ҳам “Газпром”, “Эриелл” каби хорижий компаниялар ҳамкорлигига янги конларни ўзлаштириш миқёслари кенгаймоқда. Бу мамлакат бойлигига бойлик кўшиб қолмай, Оролбўйини обод қилишда юз кўрсатаётган янги омиллар билан бир бутун ҳолда навқирон ёшларимиз учун ҳам катта имкониятлар эшигини очиши шубҳасиз. Насиб этса, Устюрт ва Оролқум кенгликлари бунёдкорлик завқига тўлиб-тошган эндиғи авлодларимизни ўзига чорловчи гўзал манзиллардан бири бўлиб қолгусидир.

\* \* \*

Оролбўйи сафаридан қайтар эканман, кўнглимда бир ишонч уйғонди: ҳали бу жойларга она табиат билан ошно тутинган, ер ва сув илмини улуғлаган, Ҳабиб Абдуллаевдай саҳроларда конлар очишга қодир, айни чоғда, замонавий илмий салоҳият ва мукаммал технологиялар билан қуролланган ёшлар гурас-гурас бўлиб келадиллар. Улар янги даврнинг Искандар ва Зулайҳолари сифатида ўз шаҳарлари, гўзал манзилгоҳлари, мукаммал корхоналарини қурадилар. Жаннатмакон ошиёнлар бунёд этиб, Ватан кўксини гулларга буркайдилар.



## ЯРАТГАННИНГ ЯХШИ КУНЛАРИ

Карвон ярим тунда йўлга чиқди. Йўл олис, замон нотинч эди. Ўн етти оила жам бўлиб, ҳадик-хавотирда қорама-қора боришарди. Юлдузлар осмонга бодроқдек сочилган, фақат уларгина ҳамма нарсадан огоҳ, ҳаммага юпанч ва йўл кўрсатувчи эди.

Касби, унинг тарихий обидалари ортда қолиб кетди. Карвон Жайхун сари интиларди. Ҳали ўн еттига тўлиб-тўлмаган Фиёсиддин юртдан бош олиб кетишини хаёлига ҳам келтирмаган эди. Ўзини ошёнидан айрилган қушдек ғарип сезар, гўё ота-онаси бағридан бутунлай кетаётганта ўхшарди. Зим-зиё тунда ёшли кўзлари билан ортга термулиб, пичирлади:

— Хайр, Султон Мирҳайдар ота! Хайр, аждодлар хоки. Сизларни тавоф этиш яна насиб бўлармикан? Қачон юрт бошидан қора булувлар арийди? Ватан қачон озод бўлади?

Падари бузруквори ва волидаи муҳтарамаси билан хайрлашиш жуда оғир бўлди. У бир умрга хаёлида муҳрланиб қолди.

— Болам, сени тоғангга ишониб топширдим. Бир тоға етти отанинг ўрнига ўтармиш. Ёнида бўл... Қирқ йил қирон келса ҳам Аллоҳим суйган бандасини асрайди. Бошинг тошдан бўлсин. Бизни ўйлама, юртга не бўлса, бошимизга не келса, шуни кўрамиз. Бироқ сен ёшсан, ёш умрингни завол қилма. Нотанти замоннинг довуллари тингунча бу тала-тўплардан четда юра тур. Яратганинг яхши кунлари ҳам бордир...

Онаизор ўқсиб-ўқсиб йиғлади. Унинг юраги ҳам безовта эди. Наҳотки, дийдорлашиш энди қиёматга қолган бўлса?! Фиёсиддин шулар ҳақида ўйлаб борар, энди қачон уларнинг рухсорига тўйиб боқаман, дея кўзларида ёш айланарди.



Одам боласи борки, яхши кундан ўзга элларга улоқиб кетмайди. Киндик қони томган заминдан бош олиб кетишта ҳеч кимнинг кўзи қиймайди. Алам ўтса, ситам етсагина шунга мажбур бўлади.. Эсинг борида этакни ёпиб, ўзга жойлардан паноҳ изламасант жон сақлаш омонат эди ўшанда. Хат-саводли, хунарли, ўзини англаган зот борки, мустабид тузум пешволари душман ҳисоблар, уларга ишонишмас, фирром сиёсати фош бўлишидан чўчирди. Шу сабаб бирни диндор деб қамоқча тиқар, яна бирни “кулоқ” қилиб бадарға этарди. Фиёсиiddиннинг отасини ҳам отини сотгани учун қулоқсан, деб қамашди. Қулоқнинг фарзанди сифатида уларнинг тинчи бузилди. Яна қанчадан-қанча касбиликлар бундай зуғумлардан юрак олдириб қўйишганди.

Жайхун ортидаги тинчроқ ерларни мўлжал олиб йўлга чиқкан ўн етти оила шундан безовта, шундан беҳаловат бўлиб жон асраш ташвишига тушган. Тоға уларга бош бўлди.

— Мен Авғонни яхши биламан, савдо-сотиқ қилиб кўп борганман. Ҳозирча у ерга шўронинг қадами теккани йўқ. Юрт тинчигунча ўша ёқда яшаб турсак бўлади, — деди.

Фақат Касбигина эмас, Ковчину Бешкент, Чорони Нижон, Жалажину Сарой, яна ўнлаб қишлоқлар хувиллаб қола бошлади. Энди уларга касбилик ўн етти оила ҳам қўшилди...

Карвон иккинчи куни хуфтон чоғи қамишзор шовуллаб ётган Жайхун соҳилига жадаллаб етиб келди. Шитоб-ла айқириб оқаётган дарёдан ўтиш мушкул, қил кўприкка юзма-юз келгандек бир гап эди. Қайиқчиларнинг даг-дагаси эса ўтакани ёради: “Бу сенга ўн еттинчи йилдаги амир замони эмас, биродар, — дейди. — Буни ўттиз иккинчи йил дейдилар... Аямасдан отади. Ё дарёга ғарқ қиласди... Кўнсаларинг шарт шу: ҳеч кимдан садо чиқмаслиги керак. Бехос-

дан чинқириб юборувчи гўдаклар бўлса, ҳаммангнинг ҳолингвой, дарёдан ўтувчини ҳам, ўтказиб қўювчини ҳам тутиб беради. Шу боис...

Ҳамма сукутга чўмиб қолди. Илҳақ бўлиб тоғадан садо кутишди. Тоға ўйлаб-ўйлаб қиличдек кесиб гапирди:

— Менинг гапим гап! Сизлар айтганча бўлади. Ҳеч қандай овоз чиқмайди биздан!

Жайхун қирғонини ялаб-юлқаб, пишқириб оқиб ётиди. Қоронғида соҳилларни кўз илғамайди. Куюқ қамишзор ичидан чиқиб келган қайиқлар чайқала-чайқала Карки томонга интилади. Карвон дарёдан ўтиши билан Андхўй томонга жадаллаб кетди. Ҳадик-хавотир босилгандек эди. Қувғиндаги одамлар “Худога шукур”, дедилар. Тонг бўзариб келарди. Фиёсиддининг кўз ўнгидаги батамом нотаниш манзаралар на-моён бўлди. Олис-олисларда сервиқор Банди Туркис-тон тоғлари салобат тўкиб турарди.

Фиёсиддин шу тоғлар этагидаги қишлоқларда кун кечирди. Кошиблик, маҳсидўзлик қилди. Тоғаси қизига уйлаб қўйганидан сўнг савдо-тижоратга шўнғиди, кичикроқ дўкон очди. Ўттиз еттинчи йилнинг машъум хабарлари Жайхун оша бу жойларга ҳам етиб келган, кўпчиликни ватанга қайтишдан ноумид қилиб қўйган эди.

Фиёсиддин ва Муаззамхонлар фарзандли бўлиши-ди. Савдо кўп вақтни оларди. Шу ишлар билан у Ҳин-дистонгача бориб келди. Уруш йиллари она юрт билан алоқа боғлашга бўлган уринишлар чиппакка чиқди. Шўролар дарёнинг икки ортидаги қариндошларни бир-бирига қўшмаслик учун жон-жаҳдлари билан тирищдилар.

60-йилларнинг ўрталарига келиб ватандошларнинг бир-бирига хат ёзиб туришига сал имкон берилди. Борди-келдига ҳам рухсат бўлади, деган хабарлар эшишилди. Бирор бунга ишониб-ишонмай вақт пой-

лар, бирор минг бир тўсиқни енгиб, бор-йўғини со-тиб бориб ҳам келарди... Бу вақтта келиб Фиёсиддин аканинг фарзандлари бирин-кетин вояга етишди, уларни ўқитиш, уйли-жойли қилиш керак эди. Ота жаҳон кезиб тил билишнинг аҳамияти нечоғли катта эканини ҳис этди. Болалари, невараларини ҳам турли тилларни ўрганишга, техник касбларни эгаллашга даъват этди. Фарзандларининг бири Кобулда, бири Истанбулда, яна бири Ҳиндистонда таҳсил олди.

У энди яхши кунлар келса, юртдан хабар оламан, дея интиқ яшаётган кезларда кутилмаганды Афгон тупроғида уруш бошланди. Бир пайтлар киндик қони томган жойларни ташлаб келиб, қўним топган одамлар энди бу ерни ҳам ташлаб жаҳон бўйлаб тентирашга мажбур бўлдилар.

Фиёсиддин ота турли хорижий давлатларда ўқиётган фарзандларига хат йўллаб: “Шошмай туринглар, иложи бўлса ўша жойлардан бизга ҳам уй-жой топинглар”, деб мурожаат қилди. Иккинчи ўғли Сайфиддин Насафий шу сабабдан Покистоннинг Пешовор шаҳрида яшаб қолди. Микробиология бўйича фан доктори бўлиб етишган катта қизи Марям Жайхун Истанбулда ўқиб, турмушга чиқди. Шу шаҳарда ўзининг хусусий муолажа тармогини очди. Кичик қизи Ойша Насафий эса Францияда ўқиб, ишлаб қолди.

Афғонистондан Ҳинд сари юзланган, бир оз фурсат бу мамлакатда яшаган Фиёсиддин ота умр йўлдоши Muazzam ая, ўғиллари Сирожиддин, Нажмиддин, неваралари Жалолиддин ва Жамолиддин билан биргаликда ниҳоят Американинг Чикаго шаҳридан қўним топдилар. Афғон уруши сабаб бутун бир оила дунёнинг турфа мамлакатларига сочилиб кетди. Уларнинг Афғонистонда бирга турган энг яқин қариндошлари эса араб мамлакатларига бориб макон тутишли. Тақдир — бешафқат, деганлари балки шудир.



\* \* \*

“Яраттанинг яхши кунлари ҳам бордир!” Фиёсиддин ота ўттиз иккинчи йилнинг ўша қора кунлари жигаргўшалари билан хайрлашаётганда онаси айтган шу сўзларни олтмиш йил кўксисда олиб юрди. Ҳар эслаганда юраги бир хапқириб, юрт тарафдан мужда кутди. Ўшандада яраттанинг яхши кунлари орадан олтмиш йил ўтиб келишини сира тасаввур этмаган экан. Радиодан “Ўзбекистон мустақил давлат бўлди. Президент Каримов истиқлол байробини кўтарди”, деган овозларни эшидтию севинчдан шошиб қолди. Ўғиллари, невараларига ҳозиргина радиодан эшидган бу хушхабарни айтаётib кўзлари ёшланди, суюнганидан каловланиб гапиролмай қолди. Қанот боғлаб юрт тарафга учгиси келди. Қани шу тоб имкон бўлсаю тақдир тақозоси билан дунёнинг турфа бурчакларига тарқаб кетган фарзандлари, жигаргўшалари, қавмларни тўплаб ҳаммасини она юртга — Ўзбекистонга чорласа.

Бироқ, шўроларга кўп алданган одамлар анча хушёр бўлиб қолишган. Ҳали улар озод ватанинг мустақил қадамларини кузатиши, унинг мавқеига тўла ишонч ҳосил қўлмоқлари керак эди.

Узоқ йиллар Ватандан мужда кутиб, қайтиб боришига имкон туғилармикан, дея кўзлари нигорон бўлган саксон ёшли отахон тинчини йўқотди-кўйди. Ҳар куни радиога қулоқ тутади. Газеталардаги хабарларни кўз нурини тўкиб эринмасдан ўқиб боради. Истиқлол кучган элнинг, озод Ватанинг сиёсати қандай? У шўролар тузумидан нимаси билан фарқ қиласди? Чет элларда ватан доғида куйиб юрган ўз фарзандларини қачон бағрига чорлайди?

Фиёсиддин ота гарчи уммон ортидаги Чикаго шаҳрида бўлса-да, она Ватан билан ҳамнафас, ҳамқадам яшади. Ўзбекистон истиқлолининг алп қадамларини кузатиб борди. Ватан ўзининг асрий шуҳратини, маъ-



навий қадриятларини тиклаёттанини эшитиб қувонди. Ҳар бир куни она ошёнига узоқ талпинган дилбанд янглиғ бемисл соғинч билан ўтарди.

Нихоят, 1992 йилнинг 2 март куни бўлган тарихий воқеа отага зўр қанот, қудрат баҳш этди. У ўғиллари, неваралари билан машинада ўн олти соат йўл босиб Чикагодан Нью-Йоркка етиб келди. Шу куни БМТ биноси пештоқида илк бор мустақил Ўзбекистон Республикасининг давлат байроғи ҳилпиради.

Улар бу куттуғ воқеанинг шоҳиди бўлдилар. Уни қалбда ғуур, кўзда севинч ёшлари билан нишонладилар. Фиёсиддин ота сингари хорижда Ватан фироқида яшаётган минг-минглаб ўзбекларнинг юртимиз озодлиги, ҳурриятимизга ишончлари тоғдек ўсади.

— Болаларим, ана энди бемалол Ватанга бораверинглар, — деди ота Чикагога қайтаётиб. — Ўғлим Нажмиддин, сенинг шу томонга йўлинг тушиб турибди. Зинҳор она юртни кўрмасдан қайтма. Тез йўлинни топгину жигаргўшаларимдан хабар олиб кел. Жиянларимга айт, таклиф қофози юборицсин. Йўл тадоригини кўринглар. Кўзим Ватан жамолига тезроқ тўйсин...

Ана шундай соғинчда яшаётган Фиёсиддин ота оиласи ҳақида илк бор "Ўзбекистон адабиёти ва санъати" газетасида Америкада ишлаётган Хайрулла Исматуллаев хабар берган эди. Шундан сўнг отанинг Касби туманидаги қариндош-уруғлари, жиянлари, сингиллари ундан дарак топишли. Бир-бирларига мактублар, телеграммалар йўллашди. Дастреб отанинг кичик ўғли Нажмиддин Касбига келиб, бир ойча юриб кетди. Қариндош-уруғлар дийдорлашиб, қувончларини элу юрт билан баҳам кўришди. Бамисли кафтларида олиб юргандек сийлашди.

Нажмиддин юртда кўрган-кечирганлари, ўзини қандай эъзоз билан кутганлари, жигарбандларининг дуюю саломларини видеотасмага тушириб, Чикагога равона бўлди.



Фиёсиддин ота қалбининг туб-тубидаги Сталин замонидан қолган қўрқув ҳисси буткул тарқаб кетди. Кўнгли кундай ёришли. Ошёнига талпинган қушдай йўлга отланди.

Самолёт Тошкент заминига кўниши билан “Мени “Ўзбекистон адабиёти ва санъати” таҳририятига олиб боринглар, деб илтимос қилди. Ўзи ва оиласи ҳақида илк бор хабар берган, жигарбандлари билан топиштирган газетага шахсан миннатдорлик билдириб ўтишни ўзига бурч деб билди. Буни қарангки, ота юрт сафари қариб Чикагога қайтиш олдидан ҳам таҳририятга келиб, хўшлашиб кетишни ўзларига фарз ҳисобладилар.

Унинг қадимий Касбига ташрифи қишлоқдошли учун катта тўй бўлиб кетди. Бироқ Фиёсиддин ота қишлоққа қадам қўйиши билан Султон Мирҳайдар ота мақбарасига олиб боришиларини илтимос қилди. Тарихий қадамжони зиёрат этгач, шу жой қабристонидаги ота-оналари хилхоналарини ҳам тавоғ этди. Уларнинг руҳларига тиловат қилди. Сўнгра олтмиш йил бурун яшаган ҳовли-жойлари ўрнини тусмоллаб топиб, ҳаробага айланган маскан ўрнида узоқ вақт хаёлга чўмид, йиглаб ўтирди...

Бутун Касби аҳли у кишини азиз меҳмон деб қаршилади, жиянларининг уйига одам сифмай кетди. Уни жуда кўп қишлоқлардан таниш-билишлари, олис ёшликтаги ошна-оғайнилари сўраб-суриштириб келар, кўз ёш билан дийдорлашар эдилар. Отани уйларига, тўйларига таклиф этишарди. Нима бу? Олтмиш йиллик айрилиқнинг мукофотими? Ё шунча йил она Ватаниннунутмаган, уни соғиниб яшаган, юрт бошидан зўравон тузумнинг қора булутлари аришини Худодан тилаб, бу кунни сабр-бардош билан кутган инсонга тақдирнинг бир иноятими?

Фиёсиддин отанинг назаридаги эса яратганинг яхши кунларига етгани шу эди: “Дилдаги энг катта армо-



ним Ватан дийдори эди. Аллоҳга шукр, кўзим тириклигида, саксон ёшимда ниятимга етказди. Она юртни кўрдим, тупроғини кўзимга суртдим. Энди армоним йўқ!”

Отага қишлоқдошлари, қариндош-уруғларининг лутф-эҳтиромларидан ҳам кўра жияни Олимбойнинг савоб ишлари кўп ёқди. Аввало, Олимбой Султон Мирҳайдар ота мақбарасини, шу жойдаги тарихий ёдгорликни улуг авлиёлар, ота-боболар, аждодолар руҳига катта эҳтиром билан таъмирлатибди. Зиёратгоҳ юз очиб, обод бўлибди. Қолаверса, жияни қишлоқдошларининг бошини қўшиб, уларни яна бир савоб ишга бошлибди. Қишлоқ марказида маҳобатли масжид, миллий чойхона тикланибди. Олимбой бинонинг тарҳини яратишда кўп излинибди. Қадими меъморий обидаларга уйғун, ажойиб лойиҳа чизиб берибди. Курилишни у бош бўлган усталар олиб бориб, Самарқанду Шаҳрисабздан чоркунжак фиштлар, нақшланган кошиналар келтиришиб, имаратни хўб зийнатлашибди. Мураккаб муҳандислик ечимлари кўлланиб, бино маҳобатли иншоотга айланибди. Юқориси масжид, унинг ён томонидан кириладиган пойдевор қисми эса тикувчилик, дурадгорлик устахоналари учун жой. Қиз-жуvonларга ишхона. Ҳафсала қилинса, қишлоқ кутубхонасини ҳам бемалол шу масканда жойлаштириш мумкин. Баҳоуддин Нашбанд ҳазратларининг “Дилинг Аллоҳдаю, кўлинг ишда бўлсин!” деган ўғитларига бундан ортиқ амалий жавоб бўладими!

Олимбойнинг ёш бўлишига қарамай, бош бўлиб ўзи бино қилган масжидга қатнаб намоз ўқиётгани, кўп ёшларга ибрат кўрсатиб, уларни инсофу диёнатга чорлаётганидан руҳланган тоға “Кўп яшант” деб дую қилди...

Фиёсiddин ота орадан икки йил ўтгач, Ватанга яна бир бор келиб кетди. Орадан ўтган икки йил ичи-



да олтмиш йиллик айрилиқ давомида узилган ришталарни боғлаш йўлида катта ишларни ҳам қилиб улгурди. Бўйдоқ ўғлию невараларини юрт томондан уйланинглар, деб тарғиб қилди. Ватанга илк бор қайтишида ўзи билан бирга олиб келган невараси Жалолиддин Тошкентда Гулсара исмли қиз билан танишиб қолган эди. Ўша йили кузда пойтактнинг муҳташам кошоналаридан бирида уларнинг тўйи бўлиб ўтди. Бу тўйга Америкаю Туркиядан, Афғонистону Касбисидан Фиёсиддин отанинг уруғ-аймоқлари йигилиб келдилар. Яқинда Чикагодан иккинчи бор Тошкентга келиш учун йўл тадоригини кўраётгандан улардан чеваралик ҳам бўлди. Унга Темур Турон деб исм қўйдилар.

Фиёсиддин ста юрт озодлигини илк бор келиб кўриб кетган кичик ўғли Нажмиддинни Касбидаги жияни Олимбойнинг қизи Шаҳлохонга уйлантириб кўйди. Қишлоқда катта тўй бўлди. Бу тўй олтмиш йил аввал узилган ришталарни қайтадан, ҳеч узилмас қилиб боғлади.

Ёши саксондан ошган бўлса-да тетик ва ўқтам отахон билан узоқ сұхбатлашамиз. Ўтган сафар келиб кетганингиздан буён кўп ўзгаришлар бўлди, сиз ҳам уларни сезган бўлсангиз керак, деймиз. У киши бироз ўйлаб жавоб қиласидилар:

— Икки йил аввал келганимда туманимиз Улянов номи билан аталар эди. Қарши билан Касби ўртасидаги йўл чорраҳасида большавойлар отасининг зўр бир ҳайкалини кўрганман. Бироқ уни ўша кунлари шу йўлдан ўтаётуб олиб ташлаётгандарига ҳам кўзим тушганди. Бу гал эса ўша ҳайкалнинг ўрни гулзор қилинганини, туманимиздан номи ҳам буткул ўчганини кўрдим.

— Сиз дунё кўрган, жаҳон кезган одамсиз. Ёшингиз ҳам табаррук, — деймиз у кишига. — Мана, юртимиз озодликка эришди. Иккинчи бор келиб кетяп-

сиз. Хўш, кўнглингиздан нималар кечяпти? Элдошларингизга айтадиган гапларингиз ҳам бордир?..

— Ҳа, бўтам, айтадиган гапларим жуда кўп, — дейди Фиёсiddин Насафий ота оҳиста-оҳиста сўзлаб, — фақат оғир бўлмаса айтаман. Сиз ўйламанг, бу одам жуда бадавлат, осмондан туриб сўзлайди деб. Йўқ, асло ундаи эмас. Мен Америкадаги ўртаҳол бир ўзбек оиласига бошман. Болаларимнинг топганига қаноат қилиб яшайман. Уларнинг катта дўкони ҳам, савдо-тижорати ҳам йўқ. Мен бир пайтлар кувватим борида шуғулланганман, холос. Болаларим эса илм-хунар йўлидан кетишиди. Юқори малака эгаллашди. Шу хунарлари эвазига, яна жуда қаттиқ ишлашлари туфайли нисбатан яхши яшаймиз. Бироқ ҳар нарсадан тийиб-тежаймиз. Бизларда исрофгарчилик деган нарса умуман йўқ.

Мен буларни айтаётганим боиси, сиз хафа бўлмангу ўғлим, бизнинг элдошларимиз шўро замонида исрофгарчиликка, ичкилиkbозлиkkка роса ўрганиб қолган кўринади. Ўйлаб-ўйлаб ҳайрон қоламан. Шундай катта-катта, тўкин-сочин тўйлар бизга ҳозир зарурмикан?! Одамлар бир-бирларидан қолмаслик учун йифиб-йифиб тўй қиларкан. Ахир йигилган мол-мулк бойликка бойлик қўшиши керак. Ўша одам фарзандларининг келажагини таъминлаши керак. Яхши илм олишга, хунар эгаллашга, соғ-саломат яшашга сарфланиши керак...

Отахоннинг бу сўзларини қайта-қайта эсларканман, она юрт жамолига тўйган, бироқ узоқ йиллик айрилиқ жафоларидан буткул фориғ бўла олмаган инсоннинг изтиробли ўйларини ҳис этгандай бўламан. Йўқ, у Ватанга келиб ўзини асло бегона сезгани йўқ. Шунча йил юртидан айри тушгани билан минглаб жон ришталари уни аждодлар хоки ётган заминга боғлаб турибди. Ота буни бутун вужуди билан ҳис этди. Бироқ шунча йил жаҳон кезиб руҳиятига синг-

дирган аъмоллар таъсири ҳам йўқ эмас. Ўтган йиллар фақат Ватандан олисда яшаётган одамлар руҳиятида эмас, бизнинг руҳимизда ҳам не-не эврилишлар, ўзгаришлар ясагани сир эмас-ку.

У олтмиш йил бурун дуч келган ҳаёт-мамот чорраҳаларида бирдан-бир тўғри йўлни топиб кетгандай эди. Бугун Ватанга қайтиб, уни икки бор зиёрат этиб, яна улкан йўллар чорраҳасида тургандай сезди ўзини.

Фиёсиддин ота ва Муazzам аялар ўзлари яшаб турган маконлари — Американинг Чикаго шаҳрига қайтиб кетдилар. Йўл олдидан хўшлашдик. Оқ йўл тила-дик. У киши “Бизга ҳам боринглар”, дедилар. Ўз на-вбатида биз энди яна қачон келасиз, деб сўрадик. Фиёсиддин ота бир оз сукут қилдилар-да, шундай де-дилар: “Иншооллоҳ, Тангри насиб этган куни ке-ларман...” Сўнг Яратганинг яхши кунлари келиб юрт озод бўлгани, истаган мамлакатга бориб-келиш йўллари очилгани учун шукроналар айтди. Ҳамон қулоқларим остида отанинг ушбу сўзлари акс-садо бериб турибди:

“Ватан озод бўлди. Энди руҳимизни ҳам поклай-лик!”.



## ҚАЙРАЛГАНҚАЛАМӘГАСИ

Одамлар ҳам китобга менгзайди. Китоблар бор, биринчи саҳифасиданоқ домига тортиб кетади, қўлдан қўймай охирига еттанингиэни билмай қоласиз. Китоблар бор, уч-тўрт варақ ўтиб зериктиради, одамни эсноқ босади. Баъзи умри азиз инсонлар борки, улар билан сұхбатлашсангиз жонингиз роҳат қулади, яна сұхбатини соғинасиз. Баъзи бир эзма, фикри саёз кимсалар ҳам борки... Келинг, у ёрини айтиб тилло вақтингизни ўғирламайлик. Камина бу мухтасар ибтидо билан ижодкор иним, ҳамфикр дўстим, қайралган қалам эгаси Мурод Абдулла ўғли хусусида тўрт-беш ориз сўз айтмоқчи эдим.

Китобдан бежиз гап очмадим. Муродулла сия билан бизга янги китобини армуғон эттали чорланибди. Номи ҳам дилтортар — «Тўмарис она». Муборак ном. Ҳеч иккиланмай Тўмарис онани буткул туркий элатларнинг кўкаaldoш энагаси дейинш мумкин.

Сайлланмани бир нафас билан, «дўппини ҳидламай» ўқиб чиқдим. Унда ўн-ўн беш йил илгари ёзилган воқеий ҳикоялар ҳам, куни кеча битилган бадиа ёхуд очерклар ҳам бор. Аммо улар ўзаро «қўл ушлашиб», шода маржондек бир ипга тизилиб турибди. Ўзимча бунинг сабабини топгандай бўлдим: Муродулла юрт соғинчи, она замин кўрки, яхшилик шарофати, иймон-эътиқод событлиги, хуллас, комил инсонга хос туйгулар, чин ватан фарзандига ярашадиган хислатлар хусусида қалам тебраттан. Мазкур хислатлар эса, бани башар бор экан, то абад эскирмагай, одам боласига зебу зийнат бўлиб қолгай.

Ўттиз-ўттиз беш йилдирки, Муродулланинг ижодини кузатиб келаман. Бу қаламкашнинг шахсиятидаги бир хислат кишининг ҳавасини келтиради. У каттами, кичикми, қайси мавзуга қўл урмасин, эҳтирос билан куюниб ёзади. Долзарб му-



аммоларни кўтарганда эса, баъзан ҳаяжонини яшиrolмайди. Бу эл-юрт юмида ёнган чин зиёлиниинг амали, деб биламан.

Муродулла Қарши чўлининг қоқ белида туғилган. Унинг болалиги муаззам қирмизи гиламдек бепоён қизғалдоқзорлар, уғуларга туташган мөвий осмон, самоларда чарх урган бўзтўркайлар, баҳорий тошқинлар ва йил ўн икки ой эсиб тургувчи сарин елларга эш бўлди. Шунинг учун бўлса керак, Мурод Абдулла чўл ва чўл одамлари ҳакуидага ёзганда қалами эмин-эркин йўргалайди, киндик қони тўкилган юрт васфи унинг илҳомини жўш урдиради. Мана, «Туркистоннинг тоза мавжлари» деб аталган эсседан бир мисол: «Туркистонни осмоналаш төглар, буюк саҳролар, чўнг денгизлар ўраб туради. Бағридан улуғ дарёлар ҳайқириб оқади. Бу диёрда оламга келиб, унинг юксак төгларидек мададбажш бўлган, жўшқин дарёларидек тўлиб оққан, эл қалбида улур денгиздек мавжланиб ёттан беназир сиймоларга жаҳон таъвиимда. Мен Туркистонни хаёлан тасаввур этгим келганида ана шу төглар, ана шу дарёлар, ана шу улуғ боболаримни ўйлайман». Эссе шу тарзда баланд руҳ ва ошуфта бир юрт оширининг дил изҳори бўлиб давом этаверади.

Муродулла устоз кўрган, боз доно, талабчан ва меҳрибон устозлар назарига тушган адаб. Унинг Одил Ёкубовдек алломага яқинлигини, Абдулла Ориповдек закий шоирнинг этагини туттанилигини. Озод Шарафиддинов, Бегали Қосимов сингари унтутилмас зотлардан таълим олганлигини биламиз. Муродулла китобида устозлари шарафига ҳам содиқ шогирдлик сўзини айтиби.

Журналист халқининг ҳам тоифаси кўп бўлар ёкан. Айрим касбдош дўстларимиз бор, идоранинг еттинчи қаватида ўтириб ҳаётни кузатади ва кўчада кўрганларини қогозга туширади. Бунақа кимсаларни хабарчи, гўзал ахборотчи ҳам дейиш мумкин. Яна бир хил қалам соҳиблари гўё аржонлаб қўйилган тулпорни эслатади — улар олисга чополмайди. Нари борса, Тўйтепадан қайтади. Мурод Абдуллага бу иккала тоифа ҳам

бегона. У тиним билмайди, гоҳида йўқлаб қолсанг, уйидан то-  
полмайсан. Бир қарасантиз, бийдай қозоқ чўларида, бир қара-  
сангиҳ Молдова узумзорларида юрган бўлади. Гоҳо уни дунё  
томи аталмиш Помир төғ тизмалари бағрида, гоҳо ўзимизнинг  
Варахша ёки Кизилчум барханлари орасида учратасиз. Бу  
қаламкаш биттан ва битаётган дилномаларнинг ўқишилиги,  
одамларга маърифий-маънавий янгилик элтиши, эҳтимол, шу  
жаҳонгашгалик туфайлидир. Устоз Асқад Мухтор: тепаликка  
чиқкан одам ён-верини кўради, тоқуҳа чиқкан одам бутун во-  
дийни кўради, дегувчи эди. Муродулла, афтидан, бу ўғитни  
дилига жо қилиб олган кўринади.

Етмишингчи йилларнинг бошида журналистикамизга бир  
тўп иқтандорли ёшлар кириб келди. Улар орасида Қарши даш-  
тининг Чорориқ қишлоғидан чиқкан тийрак ва тиришқоқ  
Муродулла Абдуллаев ҳам бор эди. Ўттан ўттиз беш йил  
ичида Муродулланинг қалами обдон қайралди. Энди у рес-  
публикамиз матбуотининг забардаст вакилларидан бирига ай-  
ланди. Шогирд эди. Энди ўзи ёшларга устоз. Лекин ҳамон  
унинг оти эгарланган, ҳамон у сафарга шай. Қирқ йиллик  
сирош қалами эса, унга ҳануз беминнат ҳамроҳ Теша тегма-  
ған мавзулар эса, қайралган қалам соҳиби Мурод Абдуллани  
кутиб мунтазир.

Уч мучал қирчиллама йигит ёши бўлса, беш мучал айни  
қаймоқ боялаган камолот фасли, дейдилар. Мен бу қутлуғ  
фаслни қаршилаётган қадрроним Мурод Абдуллага ижодий  
кувончлар тилайман.

Сайдула СИЁСХ



## **МУНДАРИЖА**

### **Тарих — буюк мураббий**

Тўмарис она .....	4
Гагаузлар — кўкуғузлар .....	32
Қўним топмаган карвонлар .....	48
Илк маданият бешиги қаерда? .....	58
Ватан тупроғи .....	70

### **Туркистоннинг тоза мавжлари**

Буюк ва бетимсол .....	91
Сарез кўли мадад сўрайди .....	102
Олисдаги ...сув .....	108

### **Устозлар давраси**

Абдулла Орипов сабоқлари .....	119
«Толстойнинг нияти мени мафтун этган» .....	141
Адибнинг кўнгил чироғи .....	155
Абдулла Кутб мадрасаси толиби .....	163
Ўз осмони бор .....	170

### **Она табнат эъзози**

<b>Муаллим арчага болта урди .....</b>	<b>180</b>
<b>Алюмин жазаваси .....</b>	<b>189</b>
<b>Бухоро оҳулари .....</b>	<b>196</b>
<b>Офтоб нақши бор .....</b>	<b>203</b>
<b>Деҳқоннинг орзуси.....</b>	<b>208</b>

### **Олис чўллар бинафшаси**

<b>Улуг Темурга алла айтган эл .....</b>	<b>219</b>
<b>Ўчоқдаги қўр .....</b>	<b>226</b>
<b>Эл одами .....</b>	<b>233</b>
<b>Денгиз тубидаги денгиз .....</b>	<b>238</b>
<b>Яратганнинг яхши кунлари .....</b>	<b>248</b>
<b>С. Сиёев. Қайралган қалам соҳиби .....</b>	<b>259</b>

*Адабий-бадиий нашр*

**Мурод Абдуллаев**

# **ТҮМАРИС ОНА**

<i>Мұхаррір</i>	<b>Ақмад Отабоев</b>
<i>Бадиий мұхаррір</i>	<b>Хамидулла Худойбердиев</b>
<i>Техник мұхаррір</i>	<b>Рустам Исакулов</b>
<i>Мусағұл</i>	<b>Ш. Нишонов</b>
<i>Сағифаловчы</i>	<b>Илхом Жуманов</b>

Босишига рухсат этилди 25.02.2008 й. Бичими 84x108 1/<sub>22</sub>.  
Шартли босма тобоги 16,5. Нашриёт-жисоб тобоги 17,0.  
Агади 1000. Буюртма № 17. Шартнома № 40/3

**Алишер Навоий номидаги Ўзбекистон Миллий  
кутубхонаси нашриёти.**

**Алишер Навоий номидаги Ўзбекистон Миллий  
кутубхонаси босмахонасида чоп этилди.  
Тошкент ш., X.Сулайманова, 33.**